

62555 / B

MEDICAL SOCIETY
OF LONDON



ACCESSION NUMBER

PRESS MARK

HAEN, A. de



U₂

ANTONII DE HAEN

Consiliarii Aulici, & Archiatri, Medicinæ Practicæ, in Alma ac Antiquissima Universitate Vindobonensi, Professoris Primarii, Societatis Harlemensis, & Physico-Botanicæ Florentinæ Socii,

RATIO MEDENDI

I N

NOSOCOMIO PRACTICO

VINDOBONENSI.

VOLUMEN SECUNDUM.



LUGDUNI BATAVORUM

Apud **PETRUM VANDER EYK,**

M D C C L X I V.

ALTO MILANO

ALTO MILANO

ALTO MILANO

ALTO MILANO

ALTO MILANO



ALTO MILANO



LECTORI.



n præfatiuncula parti Quintæ præfixa rationem reddidi, quare non differre novam editionem horumce opusculorum ad numerum quaterna-

rium eorum licuit, simulque promissum fuit, de sequentibus me idem acturum: Steti promissis, at vero quum Collectio primarum quatuor Partium in unum Volumen plurimis arripit, visum fuit non displiciturum, si idem ad editam Octavam Partem iterum fieret: Quare

L E C T O R I.

has ultimas quatuor Partes denuo sic adornavi, ut unum inde exfurgat Volumen. Elenchus Capitem continuatus iterum adest, ut uno prospectu contenta in hoc volumine pateant, deinde ad calcem Index, ordine Alphabetico, præcipuarum rerum habetur, factus ad normam Indicis Primi Voluminis: Tandem mendis typographicis quam maxime prospectum est: sic denique utilissima hæc Opuscula Usui quoque magis accommodata reddita sunt. Annus 1760. continet priora Capita sex, sequens septem, tertius quinque, quartus eundem numerum, ut ex Elenchis cuique parti præfixis videre est.

ELEN-

ELENCHUS CAPITUM.

CAP. I. *De Febris cum Exanthematibus
quæ Petechiæ & Miliaria vocari
solent.* Pag. I

II. *De Hydrope & Tympanitide.* 16

III. *De Hydrope Pectoris.* 30

IV. *De Epilepsia & Convulsionibus.* 50

V. *De Calculo, Uva Ursi, Lithontrip-
ticis dictis, &c.* 61

VI. *De Aneurysmate.* 79

VII. *De Cardialgia Chronica.* 93

VIII. *De vario Hydrope ac Tumore Abdo-
minis.* 108

IX. *De Hydrope Pectoris.* 125

X. *Problemata & Difficultates.* 133

XI. *De Calculo Vesicæ Urinariæ & Li-
thotomia.* 165

XII. *De Cranii Ustione in pertinaciõribus
Vitiis Capitis.* 195

XIII. *De quorundam Medicamentorum Vi-
ribus.* 214


XIV. *De Aneurysmate externo Spurio.* 229

XV. *De Aneurysmate vero.* 259

ELENCHUS CAPITUM.

CAP. XVI. <i>De Hydropē Cystico & de Hydatidibus.</i>	276
XVII. <i>De Intestino in Inguine perforato, excrementisque inde foras expulsis.</i>	298
XVIII. <i>Varia.</i>	317
XIX. <i>Varia de Sudoribus in morbis Acutis.</i>	338
XX. <i>Varia de Crisi morborum.</i>	345
XXI. <i>De Morbis acutis cum Petechiis & Miliaribus.</i>	383
XXII. <i>Problemata de Scorbuto.</i>	423
XXIII. <i>De Machina ad Curandum Ileum desperatum.</i>	442





ANTONII DE HAEN

*Consiliarii Aulici, ac Medicinæ Practicæ, in
Alma ac Antiquissima Universitate Vindo-
bonensi, Professoris Primarii,*

P A R S Q U I N T A
R A T I O N I S M E D E N D I
I N
N O S O C O M I O P R A C T I C O
V I N D O B O N E N S I.



LUGDUNI BATAVORUM,
SUMPTIBUS SOCIETATIS.
M D C C L X I.

ANTONIO DE HAYEN

Commissarius Generalis
Ordinis S. Augustini
in Provincia S. Augustini

PARS QUINTA

CAUSAE MUNDI

IN

UNIVERSITATE REGIA

ALMA MATER



ALMA MATER

UNIVERSITATIS REGIAE

ALMA MATER

LECTORI.

Non diu est , quod quatuor priores hujus operis partes certo ordine digestas , & indice locupletatas in lucem prodire fecimus , similiterque cum sequentibus pergere tum temporis in animo habebamus , quum vero multorum sciendi ardor non sivit ad integrum tale alterum volumen differri editionem adeo utilium observationum , non potuimus non huic laudabili desiderio satisfacere ; itaque mox ad edendam hanc partem quintam nos accinximus similiter de reliquis acturi.

Vale !

E L E N C H U S C A P I T U M.

C A P U T I.

De Febribus cum Exanthematibus, quæ Petechiæ & Miliaria vocari solent. Pag. 1.

C A P U T II.

De Hydrope & Tympanitide. 16

C A P U T III.

De Hydrope Pectoris. 30

C A P U T IV.

De Epilepsia & Convulsionibus. 50

C A P U T V.


*De Calculo, Uva Ursi, Lithontripticis dictis,
&c.* 61

C A P U T VI.

De Aneurysmate. 79



RATIO MEDENDI IN NOSOCOMIO PRACTICO VINDOBONENSI.



C A P U T I.

*De Febribus cum exanthematibus quæ petechiæ
& miliaria vocari solent.*

§. I. *Historiæ XVII. Ægrorum, hæc Exanthemata plane symptomatica esse probantes: ostenditurque hac occasione perfectæ criseos in Acutis certitudinem nos sæpe non habere; sanguinem in morbis, quos malignos vocant, & crassissimum sæpe, & maxime esse inflammatum; tandemque communicatur notabilis observatio circa prædictionem in Acutis ex pulsu intermittente.* §. II. *Ex omnibus horum ægrorum exemplis concluditur exanthemata similia rarius observari oportere, si legitima curandi methodus adhibeatur; eaque, si contingant, prævæ potius medicationi, quam Aëri, aut Climati, originem debere; paucis exceptis casibus, in quibus aut sponte, aut contagione, nascuntur:*

§. I.



icet in ultimo de Febrium Divisionibus tractatu de exanthematibus Petech. & Miliar. fuse egerim, tamen cum nova exinde observata colligere licuerit, pondus rerum tantarum me adigit, ut nova hæc

cum publico communicem, unaque ex Nosocomii

A

Dia-

2. DE FEBRIBUS CUM EXANTHEMATIBUS,

Diariis, omnium illorum, qui ibidem unquam hæc passi sunt, fidelem historiam tradam; quibus eorum, quæ in eodem Tractatu posui, evidentia, ni fallor, veritasque, patefcet.

1. Hoc verno tempore proxime elapso femina 22. annorum febre valida laborans, quinto sui morbi die ad nos delata est; extantibus jam tum Petechiis. Vere ardens febris erat, tertiam eo die habens exacerbationem. In summa omnium cruditate Petechiæ extabant. Igiturne hæ Criticæ? Certe cum nullum symptoma mitesceret, quin ingravesceret potius, Symptomaticæ duntaxat vocari merentur. Sanguis hoc die vena missus, crustam formabat portionem rubram densitate superantem. Die septimo ad quartam, eamque prioribus longe mitiorem, exacerbationem, febris sudore & urina maximam partem judicata; ad nonum vero diem; in quinto, eoque omnium levissimo insultu, urinis ac transpiratione integre judicabatur. Novem diebus perstabant Petechiæ.

Sana octiduo vixit; die autem 17. post morbi principium, ad primas carnes vitulinas degustatas, licet tenerrimas, in febrim æque vehementem incidit: cujus altero die Miliaria alba, numero pauca, comparuere. Sanguis bis missus corio densissimo tegebatur. Nec numero Miliaria augebantur, nec diu perstabant. Imperfectum judicium contigit 23. morbi die, prægresso intermittente pulsu, per alvum; integrum vero 27. die, eodem modo, eodemque pulsu.

Die 29. nova febris vehementissima oritur, in qua sanguis bis vena missus, singulis in vasis, æque magnam, densamque habet, quam olim, crustam. Nulla vero hic Exanthemata. Die 4. & 5. judicium alvo, urina, sudore.

Ex data historia nihil evidentius est, quam utrumque hoc Exanthematum genus minime criticum fuisse. Summa morbi cruditas; ejusque, postquam hæc ef-

floruiſſent, validum incrementum; critica aliunde contingens poſthac evacuationo; evidenter, arbitror, hæc demonſtrant.

Quod eo magis notandum, quia hic caſus ex rarioribus eſt, in quantum nobis adparet, in quibus nulla arte producta Exanthemata erant. Frigido quippe in loco, frigida tempeſtate, primis quatuor morbi diebus ægra jacuerat, remediis calidioribus minime uſa. Ita ut hæc ne critica quidem fuerint, licet prava arte non producta. Confirmat id ſententiam, quam egregius *Paulus de Sorbait* annis abhinc 90. ex cathedra *Vienneſi* docebat, *Petechias eſſe motum noxium & ſymptomaticum*. Med. Pract. Tract. 3. pag. 541. & 545.

Advertimus quoque Exanthemata putridæ ſanguinis ſolutioni proprie non deberi, cum poſt eorum exitum idem ſanguis, etiam iterato miſſus, denſiſſimus fuerit.

Tandem febris tanto cum furore tertio repetens nos docet, id quod toties ad lectos ægrorum advertimus, perfectam non haberi, iudicio jam facto, certitudinem morbi ita deviſti, ut non fiat recidiva. Equidem quo omnes functiones perfectius, celeriusque, in integrum reſtituuntur; quo motus critici diebus iudicatoriis exactius fiunt; quo denique evacuationes perfectiores, conſtantioresque, cum virium incremento, contingunt; eo minor adeſt relapſus metus: at vero hucusque non habetur ejusmodi certitudo, quæ excludat omnem omnino relapſus formidinem. Vidimus ſane & in hac muliere, & in pluribus aliis, nihil iudicio deſuiſſe, attamen iisdem ſucceſſiſſe relapſum. Niſi forſitan quis novum potius morbum, quam recidivam, appellandum idem eſſe arbitretur: ſed difficulter proſecto admittetur hæc opinio, ſi ſuccedentis febris cum præcedente ſimilitudo attentius ponderetur. Itaque merito jure Medici omnem adhibeant diligentiam, ne in ſex rebus non naturalibus quid committatur, quo

4 DE FEBRIBUS CUM EXANTHEMATIBUS,

repetat morbus: juvatque hujus incertitudinis serio monitum esse ægrum, monitosque ejusdem familiares; ne morbo male curato adscribant, quod a quopiam regiminis errore, aut etiam absconditis plane de causis, postliminio forte contingit.

2. Juvencula 20. annos nata, tertio Hemitritææ die Petechias jam habuit, nostrumque in Nosocomium die quarto illata est. Multæ sane hoc die conspiciebantur in jugulo, pectore, humeris, dorso, lumbis, femoribus, cruribus.

Notabile porro 1^{mo}. quod hæc femina die morbi tertio, ipso Hemitritææ accessu, summo mane, in frigido ad 27. gradus aëre, extra civitatem pedes iverit, nec motu per horam producto ullatenus incaluerit. 2^{do} quod post meridiem intropulsos frigore humores, eosdemque plane crudos, valido sudorifero moverit; hincque crudis hisce ad ambitum corporis pulsas, Petechias consciverit sibi. Miri ergo nihil, quod ad 5. diem, cum valida Hemitritææ exacerbatione, Exanthematis intropulsio observaretur. Quare etiam illico, maligni quidpiam hic præsagiens, Cort. peruvianum dedi. Confestim inde convaluit, extra ordinem fluentibus mensibus, mox a Petechiarum recessu.

Hæ certe pessimo more expulsæ, penitus symptomaticæ fuere; eademque suo subito recessu alioquin nocituræ, jam & dato cortice, & profluis catameniis, subitam reconvalescentiam non retardarunt.

3. Femina 39. annum vitæ agens, Cardialgia acida crudeliter per annos vexata, totaque inde cachectica, gravi demum Peripneumonia corripiebatur, & ex Nosocomio, in quo multa Exanthemata grassabantur, die morbi quinto ad nos deferebatur. Maculæ in collo, dorsoque, rubræ, æque, quod profundius hærerent, quasi eruptioni impares, suspectæ; omnium cruditas; morbi que augmentum; suasere venæ sectionem. Sanguis crusta facile transcendenda tectus fuit, rubra autem

QUÆ PETECHIÆ ET MILIARIA VOCARI SOLENT. 5

tem parte dissolutus. Crescentē ad diem 6. febre cum anxietatibus, verisque Pulmonis inflammati signis, iterata V. S. est. Sanguis eductus priori similis, nisi quod ultimo in vase, sub alba tremulaque crusta, iuste compactus cerneretur. Die 7. una pustula alba Miliaris visa ad jugulum. Febris pravis cum symptomatibus perpetuo stipata, pulsumque exploratione Homotonos quidem appellanda fuit, sed calore ad Thermometrum mensurato minime Homotonos. 9. & 10. die pauca, die 11. copiosa, eaque alba, in pectore Miliaria. 12. die paulo minus conspicua. 13. eadem iterum, ac nova præterea, in pectore conspicua. 14. die mortua est. Febris ab initio ad finem usque horrida fuit.

Historia mali docet 1^{mo}. Petechias contagione susceptas, nec sufficienter propulsas, morbi cum augmento adparuisse. 2^{do}. Miliaria eadem origine nata, quo copiosiora, eo & graviora, & magis fuisse letifera. Unde concludimus Exanthemata hæc, non a Natura, sed a contagio genita esse; eademque minime critica, sed mere symptomatica habenda fuisse.

Hic in transitu noto hoc Exanthematum Contagium, ut illud Variolarum, Morbillorumque, se sæpe habere, non nisi prædispositos afficiundo. Præter alia exempla, memorabile illud Ancillæ est, quam suscepimus eo momento ex ædibus eductam, in quibus cubiculo, jubente Medico, arcte clauso, calidissimoque, inservierat Patri nobili, filiabusque duabus, Exanthemate Miliari omnibus successive enectis: Febre continua hæc apud nos decubuit, & sine Exanthemate brevi convaluit.

4. Juvenulæ, mensibus terrore suppressis, ingens brachii dolor, brevique post acuta febris oritur. Die 11. Peripneumonia adest, albaque Miliaria confestim prodeunt, continuoque augentur. Die 14. Gangræna brachii & mors. Eo tempore nondum sciveram, quod posthac expertus sum, in febre continua non remit-

6 DE FEBRIBUS CUM EXANTHEMATIBUS,
tente, ac vere inflammatoria, si Exanthemata adsint
morbusque rebellis sit, corticem peruvianum egregie
prodesse.

A resorptu ichoris gangrænosi nata pectoris anxietas, nata copiosa Miliaria, criseos nullam, ni fallor, suspicionem faciunt.

5 Femina vehementi ira excandescens, gelidamque affatim hauriens, febre corripitur; & continuans interim ancillares labores, vagos ejus insultus per octiduum sæpe experitur. Tandem in continuam incidit, cum gravi pectoris anxietate, vehementi cephalalgia, multa siti, prostrato appetitu, vertigine, vigiliisque continuis. Eo in statu omnis auxilii inops, calida admodum tempestate, per integram septimanam, jacuit, jure carniū, & frigida aqua usa duntaxat. Accessit angina biduo durans, & sic demum octavo die continuæ suæ febris ad nos delata est. Quo ipso tempore catamenia ipsi octiduo maturius, fluere ceperunt. Febris validos artuum dolores sibi junctos habebat, vires autem nondum prostratas. Die 11. Miliaria maximam partem alba, pauca vero rubra, apparuere; signis coctionis in alvo prægressis. Ab 11. ad 14. diem bene procedente Exanthemate, vomitus glutinosus vexabat, vel copiosæ pituitæ tremulæ, pellucidæ, vitreæ, per alvum secessus, vel noctes insomnes, pectorisque anxietates, imo novi, simulque feroces, artuum dolores. Alvo cocta partim judicata est 14. die, sed eadem demum integre ad diem 17.

Morbus neglectus per 14. dies, humores crudi, ancillaribusque laboribus intempestive moti, & cum per angustiora vasa transadigerentur, dolores rheumaticos excitantes; deinde decubitus per tantos calores in parvo squalidoque cubiculo, vix renovata atmosphæra, corpus ad Exanthemata necessario disposuere. Morbus vero post exorta Exanthemata, cumque eorundem non interturbato progressu, diris symptomatibus,
cru-

cruditatem spirantibus, increfcens, poſteaſque demum alvo judicatus, hanc profecto eruptionem minime criticam, ſed penitus ſymptomaticam, declaravit.

6. Juvenis febre continua putrida, gravi cum delirio, laborans, in Noſocomium inferebatur. Diem morbi primum exacte reſcire non potui, cum ex ejus incerta, ac variata, enarratione, ſextusne ab illo tempore dies, an octavus eſſet, ambigeretur. Saltem eo tempore crudam morbi materiem Emeticis & Purgantibus vehementer moverat, ingentem præcordiorum gravitatem, anxietatemque, perpetuo expertus.

Præterea ex Noſocomio alio, ubi Exanthemata fere perpetua erant, in noſtrum ductus erat. Interim ſenſim ad coctionem morbus tetendit, alvoque, & leni ſudore, ad judicationem pervenit: urina interim sæpe enæoremate, & nubecula, carente, nec hypſtica unquam.

Judicio prægreſſo, incredibile quam cito, perfecteque, faneſceret; ita ut integris noctibus, idque ſponte, dormiret, belle comederet, totasque obambulare per ædes. Sed biduo poſt, Miliaria totum pectus obſiderunt; quibus tum prodeuntibus, tum triduo poſt exſiccari ceptis, mirum quam bono ſomno, quam grato appetitu, quam facili corporis exercitio, integraque prorſum valetudine, fruëretur.

Neglectus igitur, peſſimeque tractatus, morbus; decubitus primo pro Patriæ more in calida atmophæra, idque in fervida tempeſtate, tandem infectus prior in Noſocomio aër, labem aliquam ſanguini conciliare potuerunt; quæ demum criſi prægreſſa, & recuperata ſanitate, expulſa fuerit. Unde certe nec origine, nec effectu, hæc Exanthemata critica fuerunt.

7. Juvenis femina ex eodem Noſocomio ſuſcepta, hanc nobis anamneſin formavit. Tribus integris ſeptimanis laſſitudine ſpontanea, cruribusque nonnihil tumidis, laboraverat, eamque ob cauſam illud Noſocomium

8 DE FEBRIBUS CUM EXANTHEMATIBUS,

mium adiverat. Ibidem porro tum præstantissima cura, tum blanda quiete, se ita refocillatam experiebatur, ut repeteret famulatum: at vero eidem sustinendo inepta, in quotidianam febrim inciderat, ad quam curandam quendam sibi pulverem coëmerat, qui decies & novies alvum, vomitum autem ter, vehementer, ciebat, posteaque venam sibi tundi curaverat. Tandem in continuam acutam intermittente conversa, quarto ejus die ad prius Nosocomium, quinto ad nostrum, delata est; Petechiis, dum nobis afferebatur, jam prodeuntibus.

Septimo morbi die subito hæ evanuerunt, datoque cortice, pauca die 8. repullularunt. Die 9. pauca Miliaria alba visa sunt. Vomuit eo die pluries cum euphoria; ut & die 10. cortice interim uti perrexit, paucisque opacis Miliaribus, quæ ad posteriora colli perennabant, exceptis, intra octiduum integre convaleuit.

Morbus dudum neglectus, contagium, intempestivus crudæ materiæ motus, ægram hanc quarto febris continuæ die Petechiis macularunt. Crevit postea morbus. Cortice sanatus est, licet retrocedentibus Petechiis pauca Miliaria successissent. Iterum nihil hic criticum.

8. Juvenis 17. annorum in neglecta per sex dies febre continua ad nos adfertur. Die 14. febris alba Miliaria erupere. Crevit iisdem erumpentibus vis morbi; & qui eo usque bonus fuerat, æqualisque, pulsus, inæqualis nunc rythmo, temporeque, factus est. Unde mox cortex datus; cujus sub usu pustulæ ad 5. diem disquammari incipiebant, & integra sanitas octavo post eruptionem die succedebat.

Die quanvis critico erumpentes papulæ miliares, nullam criseos, sed præcipuam symptomatis notam, gesserunt; morbo tunc admodum calamitoso facto.

9. Adolescens, qui a septennio spina ventosa, foede
exul-

exulcerata, laboraverat, in Nosocomium demum susceptus, diætam lacteam, & corticem peruv. spatio bimestri, idque bono cum effectû, adhibuit: at vero ulcere tandem sponte ficcato, febris continua acuta eum aggressa est. A 4. usque ad 9. diem cutis rubebat, ac si expectanda scarlatina eruptio foret. Die autem ipso nono Miliaria solitis in locis comparebant; unaque vehemens ac sicca tussis, quæ eo usque diu noctuque ægrum vexaverat, nunc & mitior, & pulcre humida, reddebatur. Hucusque Exanthema istud, ut criticam evacuationem, facile quis salutaret; at vero ad sequentia attentus symptomaticam audacter pronuntiabit.

Etenim 11. die observabamus 1^{mo}. eam in pulsu inæqualitatem & intermissionem, ut quandoque, sed sine ordine, per integrum unius pulsationis spatium differret, moxque insolitam repeteret celeritatem. 2^{do}. Nauseam, vomitumque. 3^{tio}. Ulcus, quod eo usque ficcum fuerat, jam fluidum, suoque postmodum in fluore continuum. 4^{to}. Subito turbatas urinas, quæ pluribus diebus limpidissimæ fuerant.

Igitur iudicium proprie fiebat die undecimo. An integrum? Equidem dubitabam, propter notabilem pulsum, in diem 20. usque, intermissionem; Febris tamen acutæ absentia, ac virium reditus, citra aliam, quam ulceris, evacuationem, iudicium perfectum ostenderunt.

Quid igitur intermittens ille pulsus? Sane ex eo, & circa criticum tempus, & cum prægressis quibusdam coctionis signis, observato, sæpius, autore *Solano*, evacuationem criticam, vomitu aut alvo futuram, prædixi ad ægrorum lectos in Nosocomio; id quod etiam in hoc ægro, eodem undecimo die, exacte confirmabatur. Attamen cæteris octo diebus, cum nulla per vomitum, alvum, hæmorrhoidasve, evacuatio, pulsu continuo intermittente, contingeret, experi-

10 DE FEBRIBUS CUM EXANTHEMATIBUS,
mentum fallere visum est. An quia cocta morbi materies, in corpore superstes, & ratione intermittentis pulsus aut vomitu, aut alvo, aut hæmorrhoidibus, eliminanda, ulcere effluerit aperto? Numquid hic pulsus, si materia per vias a *Solano* indicatas non effluit, etiam ulceris, si adest, fluorem præfagiat?

10. Adolescens 17. annorum, ob nimii ponderis gestationem febricitans, bis secta vena ad nos adducitur, finiente jam die sexto, & jam tum in pectore brachiisque variegata, præ rubedine, cute. Crevit pessimis cum signis, & symptomata maxime alvo, morbus. Die autem 11. alvus pulti similis, ac flava; simulque ad pectus maculæ plures, ad nullum certum eruptionis genus sese determinantes, conspectæ sunt. Quæque a nocturni spatii defuerat urina, copiosa nunc illa, & cum enæoremate fundum brevi petente mittebatur; Febris modica; flava, pultique similis alvus; &, projectus qui fuerat, renatus appetitus. Die 12. perseverantibus bonis hisce signis, vires majores, lingua nitidior, nox optima fuit. Die 13. veniam per conclave ambulandi, cibosque tum mutatos, tum copiosiores, rogavit. Die 14. vero juveni per omnia sano Miliaria alba erumpunt, paucas intra horas iterum sicca; eodemque plane modo, spatio 5. dierum, continuo renascentia, & eodem die exsiccantia sese ac disquammantia, absque ulla vel minima labe sanitatis. Ita ut brevi Nosocomio exiret, constantique postmodum sanitate gauderet.

Maculæ rubræ ad sextum diem, adeoque per morbi augmentum, adparuere: pustulæ Miliaribus formæ similes, crisi jam perfectæ, ac sanitate recuperata, effloruerunt. Criticum ergo neutrum fuit.

11. Maligna admodum febre Juvenis decubuit, variolas nunquam passus, easdemque valde metuens. Ad sudores validos, eosdemque continuos corpus, patrio errore, disposuit, quotiescunque non aderam.

Hinc

QUÆ PETECHIÆ ET MILIAR. VOCARI SOLENT. II

Hinc die 5. maculæ rubræ in collo ac manibus visæ sunt, mox vero iterum evanidæ. Itidem die sexto. Posthac illum, ægrotans ipse, non vidi. Ab aliis autem rescivi rubris illis maculis alba Miliaria sensim accessisse, profusissimosque toto in corpore sudores. Ad diem 15. totus Miliaribus scatens, periit.

Nimio atmosphæræ, parvo in cubiculo, calore, coactisque sudoribus, utrumque Exanthematum genus genitum est; neutrum sane criticum.

12. Femina 24. annos nata, nono morbi acuti die ad nos deferitur, maculis rubris in collo, facie, pectore, summo humero, jam a biduo deturpata, & ab earum eruptione in pejus lapsa: Porro ipso hoc 9. die duo observabantur: 1^{mo}. Retrocessio macularum, 2^{do}. intermittens pulsus cum torminibus ventris, cum tenesmo, & dein cum alvo cocta, multaque, ad tertiam usque vicem repetita. Mitis exinde illico febris.

Judicium factum multa suadebant; sed insolita admodum debilitas post subitaneum macularum retrocessum, maligni quid portendebant. Unde corticem extemplo dedi. Mox inde recreata bis similem alvum posuit. Die 13. tria visuntur in collo Miliaria, quæ perstant triduo. Die 17. pauca alia accedunt. Ut & die 18. 20. 21. Sed, ut dixi, mox a sumto cortice mire recreabatur, subitoque reddebatur sana; ut cum paucis hisce papulis egredi domo, si opus fuisset, potuisset.

Enarratione tota arguitur rubras maculas, crescente morbo natas, plane symptomaticas fuisse; Miliaria vero post crin quandam, postque plenarum virium reditum, nata, Criseos certe normam non habere. Forte prius illud symptomaticum Exanthema subito evanescens, viresque prosterbens, posthac bonitate corticis, paucorum forma Miliarium, effloruit.

13. Vir 27. annorum sexto febris continuæ die Miliaria habet, quæ nunc plus, nunc minus, extabant, usque

12 DE FEBRIBUS CUM EXANTHEMATIBUS,

usque ad 12. diem, quo nova, pellucidaque eadem & alba, prodire. Continua febris nunc in remittentem, his exacerbantem, abivit. Die autem 16. & 17. æger copiosissimis scatuit Miliaribus. Febris inde exacerbatio major, viresque projectiores. Cortex ad 20. diem dari ceptus; cujus sub usu papulæ novæ. Sanitas integra brevi sequuta est.

Prodiere prima Miliaria cum morbi incremento, imo morbo posthac in longe periculosiorem mutato; posteriora itidem. Nulla proinde criseos similitudo.

14. Eodem tempore mulierem, ulcerosa scabie sponte fere curatam, ceterum arthriticis obnoxiam insultibus, jamque universorum pene artuum rheumatismo laborantem, suscepi in Nosocomio. Febris acuta fuit, pustulæque nonnullæ rubræ in facie, unaque insignior ad nasum, aderant. Die 13. rubra Miliaria copiosa prodire in facie, collo, brachiis, cruribusque universis; una hora conspicua admodum, hora altera vix visibilia. Die 15. & 16. bene prostant. 17. adhuc magis. 18. maxime, sed cum intolerabili cephalalgia. Die 19. ipsi pedes Miliaria habent. Die 20. Miliaria rite quidem prostant, sed magna præcordiorum anxietas adest. 21. & 22. die cum copiosissimis Miliaribus enormes pedem, quo præcise olim loco Podagra, excruciant dolores. Die 24. cum Miliaribus & copiosis, & magnis, valida Febris. Miliaribus jam in facie siccescentibus ad 27. diem febris magna. Decem postmodum dies elapsi sunt, priusquam ultimæ pustulæ exsiccarentur. Rheumatici dolores, Febre & Exanthemate jam evanidis, diu adhuc perstiterunt.

Contagium hæc femina vel jam habuit, cum ad nos duceretur, pustulis in facie rubris tunc jam maculata; vel in Nosocomio, Miliaria ægro mox descripto habente, contraxit. Ceterum, nemo, credo, criticas has eruptiones esse autumabit, qui cum iisdem videt morbi durationem, febri validam, judicium imperfectum.

15. Mulier 27. annorum sexta die suæ continuæ ac putridæ febris numerosas acquisivit circum labia pustulas, ut & die 7. Ad finem autem hujus diei sicciscentibus illis alba, eaque copiosa, succedere Miliaria ad scapulas, humeros, faciem, ac demum ad brachia universa, die 10. ac 11. pulcre prostantia, 12. numerosiora, 13. in toto dorso atque abdomine conspicua. Die autem 14. hæc omnia rubris Miliaribus plurimis interspersa, tam in priore, quam in posteriore corporis parte, inveniebantur. Die 15. his cunctis rite extantibus valida admodum febris cum cephalalgia per integrum diem intolerabili, ægram vexavit. Die 17. ingentes anxietates adsunt. Cum 19. die examinaremus an diuturniore decubitu, licet omnis adhibita cura fuisset, postica corporis haud excoriarentur, vidimus totum dorsum lumbos, nates, crura, pedes, pedumque digitos, confertissimis Miliaribus scaterere. Hoc die incipiebant exsiccari, exsiccatio tota brevi successit, integraque sanitas.

Quia eodem tempore cum binis posterioribus ægris hic decubuit, natum. contagione Exanthema facile credimus; symptomaticum autem fuisse dies 15. 16. 17. abunde evincunt.

16. Femina Petechiis, antequam ad Nosocomium deferretur, fere enectâ, altera die mortua est.

17. Peripneumonicus in Nosocomio casu & neglectu Exanthemata passus, brevique inde curatus, crisi Peripneumonix posthac rite absoluta, Tom. 1. hujus operis, ut & alibi, descriptus fuit.

§. II. Ægri ergo numero septendecim spatio sex cum dimidio annorum Petechias, aut Miliaria, aut utrumque, in Nosocomio practico habuerunt, adeoque quinque circiter omni biennio. Pars media horum, Exanthemata, antequam ad me adferrentur, jam habuerunt; pars altera iisdem in Nosocomio practico correpti sunt: ergo inibi spatio trium annorum Exanthe-

themata hæc quatuor duntaxat ægris eruperunt. Omnium vero duo tantum fuere, quibus id iponte contingerit; reliquis quindecim aut contagium, aut pravum regimen, medendive methodus, aut combinatæ hæ causæ, Exanthemata produxere. In nemine vero illorum ea critica fuisse, ipsa cujusque morbi historia abunde evicit. Ad historias autem illas quod spectat, exacte profecto eas ex majoribus Nosocomii Diariis contrahere valui, quod in hisce quidquid ægris nostris omni die quavis hora, singulo momento, contingit, exactissime, amplissimeque, adnotetur: unde etiam fit, ut ipsa hæc Diaria basin ponant dicendorum Medicinæ Studiofis ad ægrorum lectos.

Igitur irrefragabili experientia convictus, assero nemini meorum critica hæc Exanthemata fuisse. Imo si nunquam Petechiis, Miliaribusve laborantes vidissem, & nudam modo horum 17. ægrorum historiam legissem, quo, amabo! jure criticum id vocarem, quod sæpe diebus neutiquam criticis, sed admodum infidis, contingat? quod cum morbo & multum, & diu ingravescente, auctoque proinde periculo, fiat? vel etiam quo erumpente, criticæ evacuationes, in morbis acutis citra Exanthemata consuetæ, eæque sufficientes, prodeant?

Hinc concludo 1^{mo}. Si in aëre *Viennensi*, in quo Medicinam facio, adeo rarissima mihi hæc Exanthemata sunt, ut spatio $6\frac{1}{2}$. annorum vix 17. exempla coram centenis testibus potuerim producere; si præterea plerisque ægris meis, citra Exanthemata, integræ contingant, felicesque crises; tunc Exanthemata illa, aliis Medicis adeo frequentissima, critica utique appellari non posse.


2^{do}. Si iisdem acutis in morbis Exanthemata mihi rarissima sunt, in quibus alii Medici ea frequentissima vident, ea fane ab aëre, seu nostro, quod vocant climate, neutiquam generari; at vero potius a certis quibus-

busdam causis, quas ad ea generanda ponere soleant illi, ego autem non soleam. Quænam porro causæ illæ sint, has in *Tract. de Febr. Divis.* fatis superque, nittallor, ex pluribus, imo etiam ex celebrioribus *Germaniæ* Autoribus, demonstravi.

Ut igitur multa paucis dicam, differentia exercendi praxin tanta est, ut differentia in morbis inde necessario generari debeat. Mistura, *Hofmanniana* Practicis *Germaniæ* dicta, eive similis, nunquam adhuc cuiquam nostrorum acuto in morbo, data fuit. Deinde 2^{do}. Pulveres absorbentes, sive testacei, ac præcipitantes, nec non bezoardici, & cinnabarini, nunquam iisdem in morbis in Nosocomio præscribuntur; puerperas, infantes, & præterea ex centenis forte hinc inde unum alterumve, cui ab acido febris, excipiat. Tertio Emetica aut Purgantia nunquam adhuc debui principio Acutorum dare. Itæ ut *Hippocrates* Aphor. 1 - 22. & maxime in *Libro de Purg.* sive in fragmento dicto *Hecurniano*, recte monuerit oppido raros esse casus illos, in quibus aut emetico, aut purgante, initio Acutorum, uti oporteret. Quam utique doctrinam in *Epidemiorum* libris, passimque alibi, exemplo confirmavit. Quarto in calida, non renovata, putridis exhalationibus inquinata, athmosphæra, nunquam ægri includuntur, & fere suffocantur, in nostro Nosocomio.

Unde tam certum mihi videtur, quam quod certissimum, Exanthematum frequentiam a quatuor hisce causis positis oriri, ac perennare; & e contrario a Medicina *Hippocratica* eorundem observari raritatem. Hujus observati veritatem partim jam confirmarunt edita, partim brevi confirmabunt edenda in lucem variorum Diaria Nosocomiorum, in quibus demum modernorum hæresin antiqua *Hippocratis* Medicina pepulerit. Merito igitur concludere mihi videor, quamdiu moderni morem obtineant, eos Exanthematum perpetuare crebritatem; eorumque conscientias graviter

viter oneratas manere, tum ea majori molestia, quam suis ægris frustra faceſſant; tum graviore periculo, in quod conjiciant eosdem; tum denique multorum ſtrage, quos Exanthema, dedita opera provocatum, quotannis e vivis tollat.



C A P U T II.

De Hydrope & Tympanitide.

§. I. *Viri Hydrops ascites cum monſtroſo Omento, ceteraque Abdominis pinguedine mire degenerante. Varia circa ejus cauſas, & effectus. Obſervatio pertinens ad hiftoriam vomitus, qui ſecundum communes Pathologiæ leges inevitabiliter hic adefſe debuiffet, adefſe tamen haudquaquam potuit.* §. II. *Hydrops feminae cſticus, ascitesque, Abdominis; una cum hydrope peſtoris, & inferioris corporis intercute. Saccus ex Ovario ipſo, ejusque Hydatide, ortus, ventrem explens fere univerſum.* §. III. *In alia muliere Hydrops & cſticus, & ascites: ſaccus autem tam ab Ovario, quam a toto ſiniſtro uterilatre, natus, in eoque una cum aqua aër contentus. Parvus admodum Thorax; pulmonumque pars notabilis aquæ, in quam injecta, fundum petens. Ad trinos hos caſus impoſſibilitas Pariſinos imitandi oſtenditur.* §. IV. *Oſtendit idem hiftoria Hydropicæ ex Tom. I. reſumta, atque in præſentem diem producta.* §. V. *Proſecutio alius exempli ex Tom. I. curam cſtici tumoris, natura viam monſtrante, enarrantis.* §. VI. *Tympania improprie dici poteſt Aqua, & Aëre, gigni; unde Veterum quorundam, id ita affirmantium, mens intelligitur: quanvis eo in caſu alio potius, quam Tympanitidis nomine, morbus inſigniendus eſſet.*

De hoc argumento fuſe egi Tom. I. cap. 31. variasque curandi methodos examinaſi, ut conſtaret

staret qua demum ratione ejusmodi calamitates five percurare nonnunquam, five saltem tolerabiliores redere, possimus. Verum cum proxime elapsus Academicus annus novas suppeditaverit, easdemque notabiles admodum, observationes, operæ precium erit hasce nunc recensere, fusiusque differere super hac quæstione.

§. I. Scriniarum faber 36. annos natus, sanus perpetuo, vino licet deditus, calidissimo die 25. Julii 1759. domicilium mutans, transferenda suppellectili plurimum occupabatur, gelidam procul dubio plurimam ingurgitans. Nocte insequente collo, lumbisque, dolere, simulque tumere ventre, cepit. Variis remediis frustra usus, ad *Fratres Misericordiæ*, mense Novembri, se contulit. Hydrope intra octiduum immenso crescente, libras medicas aquæ limpidæ, flavæ, utcumque flocculentæ 68. Paracentesi eduxere: renato autem subito malo, 48. libras, elapso vix a prima Paracentesi octiduo, iterum evacuarunt.

Ventre hinc egregie depleto, expertissimus hujus monasterii Medicus *D. Guarin* minitanti morbi reditum aptis semper retudit medicamentis. Interim manifesto deprehendebantur in ventre tumores, qui prominentes globos hinc inde referrent. Perpetuosque fere & dolores & ardores miser, ad umbilici regionem, conquestus est. Unde demum collapsis viribus 13. Dec. periit.

Fratres Misericordiæ lymphæ 2. aut 3. ut putant, mensuras cavo abdomine eduxere: cum vero ceterum totum inibi confusissimum cernerent, attulere mihi exemtam totam quantam viscerum ventralium molem, cohærentem ita, ut in corpore fuerat. Cujus en publice factam Anatomen!

Ingens ventriculus adparuit, lieni arcte connatus, hepar autem mediocre. A fundo autem ampli, latique, ventriculi, durum, crassumque scutum nasceba-

tur, universum explens abdomen, usque in latera, imaque pelvis; viscerum proinde omnium conspectum velans, peritonæo hinc inde connatum. Eodem elevato intestina nuda patebant. Ut manifesto constaret ingentem hanc molem degenerans Omentum esse. Accuratiore examine patuit substantiam ejus constare tuberculis innumeris, majoribus minoribus; hinc omnino informem, & inæqualem; lamellis Omenti am-
 babus, intime connexis, constantem. Cartilagineam naturam plura tubercula induerant. Parvumque ita *Winslowo* dictum Omentum pariter degenerans, cum Omento magno, cum gibbo ventriculo, cum cava hepatis regione, ante finem venæ portarum, intime concreverat. Pondus autem Omenti totius $5\frac{1}{2}$. librarum fuit.

Omnes præterea productiones adiposæ, quæ, totidem Omentulorum instar, ad Colon, Rectumque, enascuntur, eodem modo degeneraverant; ad Rectum vero adeo, ut inde tota pelvis repleta cerneretur.

Mesenterium, ac Mesocolon, iisdem quidem tuberculis scatebant, sed aliter dispositis; ramosis nimirum, eumque productis in modum, quo in fodinis, vel subterraneis specubus, Stalactica.

Sub duro Omenti tegmine compressa locabantur, interque sese ligamentis, facile tamen dilacerandis, connata Intestina. Omnis pinguetudo, quæ tria ad hepar ligamenta comitari solet; omnis ea, quæ vesicæ felleæ, ejusque ductui, circumfusa cernebatur, nil nisi similem induratum, atque globosam, referebat substantiam. Pylorus intus bonus, exterius tumorem gerebat, qui & durus, & semicircularis, & plus quam tres digitos latos crassus, inventus est. Diaphragma tota sua inferiore facie duos hos sebaceos tumores, semidigitum crassos, gerebat.

Suspicaretur fere calore nimio fusam Omenti, Ventrisque pinguedinem, subito frigore, dum vespere

re a laboribus quiescebat homo, ad ventrem externum admissio, frigore quoque potus gelidi intro suscepto, coaluisse, induruisse, in irresolubilem hanc massam abivisse; sensimque appulsis humoribus auctam esse; atque hinc positam demum, quod in ejusmodi degenerationibus assolet, Hydropis causam fuisse. Utique dies fuit totius æstatis calidissimus, thermometro post meridiem in loco a reflectione radiorum immuni 90. gradum notante. Si in tanto calore ponderetur labor, quem vehementem, quem continuum, sustinuerit, & conferatur cum observatione *Ruischii* fusam a motu pinguedinem inequo describentis, conjectura verisimilitudinem adipiscitur.

Nunquam, quod notandum, homo in hoc morbo vomuerat. Attamen præter alias vomitus causas, irritatio perpetua Ventriculi, tum & Pylorum premeas, arctansque moles, vomitum frequentem, ac vehementem, ex iterata experientia anatomica, excitare debuissent. Verum in hoc homine Ventriculus & utrinque, & toto fundo suo, tam duræ, tam crassæ, tamque ponderosæ massæ, adeo intime adnatus erat, ut videretur, ne a fortissimo quidem Emetico in convulsivos vomendi motus contrahi, agitarique, potuisset. Bilis in Cystide copiosa, aurantia, tenax.

§. II. Mulier 52. ætatis annum agens, adhuc menstruens, a 12. retro annis tussi vexata, alvo perpetuo segnis, curat sibi pro consuetudine majali venam tundi, ex eoque tempore fluore menstruo caruit. Brevi postea dolorem in Hypogastrio quidem toto, sed sinistro ejus in latere intensiorem, percepit; ut ultra in illud incumbere nullatenus posset. Crevit sensim abdominis moles, ita tamen, ut cutis & muscoli semper flaccidi manerent, prehendi que ac complicari, possent, præterquam ad umbilicum. Dolorem deinde in dextro hypochondrio conquesta est, versus costas ac ventriculum se extendentem; qui tamen posthac mi-

nus observabatur. Quinque septimanarum spatio ventrem ego sæpe sollicitè tangens, dura omnia apprehendi, præcipue utroque Hypogastrii in latere; fluctuationem vero liquoris nunquam. Tandem contigit, ut dum incederet per plateam, acutum sinistra in abdominis parte dolorem, cum quodam dilacerationis sensu, perciperet. Ex illo die manifesta humorum undulatio ab utroque umbilici latere, in Epigastrio potissimum, percepta est. Jamque integumenta, & musculi abdominis, olim adeo flaccidi, vehementer tensi, expansique observabantur. Ventris crurumque Hydrops intercus hisce se junxit.

Qui cysticus olim Hydrops fuerat, eum nunc, dilacerato sacco, Asciten produxisse rati, ad Paracentesin devenimus, apertura solito altius facta; quia infra nulla undulatio, sed magna potius durities. Unde nobis videbatur callosus, crassusque saccus, licet infirmiore quadam plaga crepuisset, multisque esset evacuatus aquis, tamen dura sua mole, lymphæ forte multa adhuc circa ejus fundum existente, hanc efficere hypogastrii duritiem.

Paracentesis 7. Nov. 1759. instituta, 22. propemodum libras medicas fusci, turbidi, spissi liquoris eduxit. Ventre inde plurimum evacuato, femina veluti reviviscere tridui spatio visa est. Verum brevi adeo tempore liquor undulans recrevit, ut propter anxietates auctas, suffocatamque respirationem, cogeremur 31. Nov. repetere Paracentesin: qua tamen haud ultra 16. libras educere potuimus.

Vix inde perceptum solamen, quod anxietatum alia longe, quam olim, se causa prodiderit. Decubitus in dextrum latus commodior, subita a primo somno excitatio, & suffocans eo tempore anxietas, Hydropem dextri thoracis lateris innuerunt. Ita tamen, ut sinister thorax haud omnino ab aquis videretur esse immunis: diutius enim in dextrum latus jacentem subor-

ta nonnunquam nova anxietas in sinistrum latus convertit.

Diuretica & ante, & inter, & post Paracenteses, cujuscunque generis, etiam varia Purgantia, nullam opem tulerunt. Exigua alvus, & pauca atque lateritia dicta urina, tantum prodierunt. Conamina nostra ad aquas exulceratis, aut scarificatis cruribus educendas, palliarunt quidem aliquantisper, symptomata autem non abstulerunt. Ad 15. Jan 1760. obiit.

Cadaveris venter valide fuit, æquabiliterque, tensus. Aperto prudenter Peritonæo, corpus ingens, fuscum, durum, totum quantum explebat abdomen, ab ima pelvi, ad usque lienem & hepar. Idem illud, variis in locis, expansionibus firmis, membranosis, & adiposis, cum Peritonæo concreverat, præsertim circa umbilicum, & in eadem cum umbilico latitudine, sinistro in latere, idque transversim, latitudine quatuor digitorum; deinde & per tres, quatuorve digitos deorsum, ut cum prima transversa adhæsione angulum fere rectum componeret; etiamque hinc inde ad latus dextrum.

Examine eo usque producto patuit vel Ovarium dextrum esse, vel ex Ovario Hydatidem natam, quæ totam hanc expansam molem produxerat; intus plenam subrubra aqua, quæ 24. libras ponderabat, quæque igni imposita, in scissilem abibat materiem. Saccus porro totus facie sua interna mire exulceratus, & hinc tuberculis, seu sebaceis, illinc ichorosis, iterumque alibi cartilagineis, aut etiam saniosis, plenus.

Quod vel Ovarium, vel ex eo natam Hydatida, hunc saccum formare dixerim, id ideo dixi, quod ambigui hæserimus utrum corpus quoddam, quod ad sacci radicem inveniebamus, Ovarium ipsum, an vero separatus parvus saccus esset? Sinistrum Ovarium in varios degeneraverat tumores. Uterus mutatus fuerat in duram substantiam, eamque carnosam, & difficulter per-

scindendam; crassam adeo, ut vix in utero cavitas, nisi prope ejus orificium, superesset.

Universa pene Intestinorum moles versus lienem trusa erat. Ventriculus pro more ingens; cum is, compressis adeo intestinis, vehementer distendi, inflarique, soleat.

In thoracis cavo dextro rubicundior adhuc aqua, quam ea, quæ in magno sacco hæserat, ad trium librarum pondus inerat, verum non ut illa, in duram massam ad ignem mutabatur; pauca namque pellicula superstitite evaporabatur tota. In sinistra thoracis camera, in qua aliquam, sed copia minorem, aquam, vivente femina, suspicati eramus, nulla aqua inventa est. Pulmo lateris dextri vix mediam ejus altitudinem occupans, adparuit condensatus, ac veluti ad ignem crispatus. Idemque inferiore sua tota media parte, dum in aquam conjiceretur, ejus fundum petebat; innatabat vero superiore. Interna pulmonis substantia sat bona, sed lata ejus in dorso cum pleura cohæsit.

Tota superficies inferior Pulmonis, Pleura, Diaphragma, Mediastinum, id est, quævis partes aquæ contiguæ, plenæ fuere tuberculis variæ magnitudinis, semiscirrhoris, purulentisve, aut saniosis. Lien quadrifariam, profunda que incisione dentatus; durus. Hepar albescens & compactum. Vesiculæ bilis profundissime tinctæ copia duas pondere uncias superabat: ineratque vesiculæ calculus, quadrangulus fere, trium linearum diagonalem habens, spiculis innumeris, ac parvis, splendidisque lapillis concretus, exusto carboni rudiori adpectu haud ab similis. Nulla feri in encephalo redundantia, & quæ pauca aderat ventriculorum anteriorum lymphæ ad ignem non coaluit.

Ex historia morbi, & sectione cadaveris, id videtur colligi oportere, quod mulier ista primum Hydropem cysticum passa fuerit; quod deinde saccus parva quadam in plaga crepuerit, & Ascitem effusis produ-

xerit

xerit aquis; deinde quod paracenteses aquas Ascitis duntaxat eduxerint; præterea quod lapsu temporis concidentis sacci apertura, cujus vestigium invenire non potuimus, consolidata fuerit, sicque regenerata aqua sit, quæ saccum in eam, quam in cadavere deteximus, extenderit molem. Probabileque admodum, eam sacci crassitiem impedivisse, ut vel morbi principio, vel sub finem ejusdem, undulantem perciperemus Lympham. An ideo, quod femina a 12. retro annis sicca, eaque valida tussi laborasset, Hydrops thoracis eo, qui abdominis, longe annosior? Nunquid, quod posteriore anno menses adeo irregulares, ac paucos, habuerit, & tamen Plethorica existeret, uterinum systema obstructum, atque induratum, habere ceperit?

§. III. Sub idem tempus aliam, quinquagenariam suscepi, quæ bona semper, ut ajebat, valetudine usa; nisi quod febre intermittente, seu quotidiana, seu tertiana, laborare consuevisset. Quas quidem febres largiore vini potu, quem impense amabat, semper se dissipulisse asseverabat. Catamenia tarde incepta, maturius finita, pauca perpetuo & irregularia, habuit. Quinquennium elapsum esse ajebat, ex quo semel urinam mittere, præ adstantium verecundia virorum, impediretur: elapsis aliquot deinceps horis se ventre doluisse, urinam vero, quum mittere gestiret, nullatenus mittere potuisse: fomento tamen ad Hypogastrium vespere adhibito paucas reddidisse guttulas: remediisque postera die a Medico acceptis iterum guttatim eam prodidisse, postea autem sensim abdominis tum tumorem tum dolorem se percepisse. Adjungebat porro elapso ab illinc mense se, vehementer sitientem, copiam gelidæ immensam hausisse; cumque tota insequente hyeme admodum siticulosa foret, plurimum bibendi necessitati parere se debuisse; nec unquam nisi stranguiose reddere potuisse urinam.

Porro ventris mole crescentis extensionem, eoque æqualem, ut ait, perceperat; cum vero plurimorum Medicorum opem frustra esset integro triennio experta, & tandem Decoctum Juniperi diu affatimque haussisset, ventrem quidem multum concidisse, sed etiam admodum inæqualem tactu, figuraque, redditum esse deprehendebat: relicto autem eo Decocto, advertit antiquam ventri molem, antiquam rediisse æquabilitatem.

Ex hac sæpe repetita, eodemque semper modo enarrata, ac confirmata Anamnesi, conclusimus cysticum Hydropem adesse; cujusnam visceris incerti quidem, probabiliter tamen obstructione systematis uterini natum; eique demum ascitem junctum esse. Quippe Catameniorum modus hoc ipsum systema dudum laborasse indicaverat nobis: annosusque vini abusus, frequentiores quoque narium hæmorrhagiæ ad causam proegumenam accedentes, morbum præsentem gignere potuisse nobis videbantur; ita tamen, ut continuus aquæ abusus eundem vehementer auxisset.

Urinofusne Hydrops forsan non fuerit si quis suspicetur, respondeo Hydropem urinofum celeriter perimere, hunc vero jam integro perstitisse quinquennio. Sed præterea Hydropis causæ pridem in corpore existeret, antequam urinæ retentio nasceretur.

Decoctum Juniperi multam sane ascitis lympham diuresi eliminavit, quum venter ita detumesceret; sed ascite evanido cysticus Hydrops cum omnibus suis tumorum inæqualitatibus eo manifestior adparuit. Confirmavit hanc phænomeni hujus explicationem ventris renato ascite æquabilitas.

6. Nov. 1759. Paracentesi eduximus 56. libras liquoris, qui fuscus, atque instar potus Chocoladæ spissus deprehensus fuit, integraque septimana asservatus non foetuit; igni autem a principio educationis impositus, pauca sui massa coagulabatur, plurima sui parte

in auras evanuit. Principio, ut fit, ab operatione recreata, viribus solito citius decrevit, perpetuisque tum anxietate, tum pertinaci diuturnoque singultu, 19. ejusdem mensis obiit.

Venter monstrofe inflatus. Musculi abdominales tenuatissimi. Peritonæum denso cum sacco, in cavo ventre contento, hinc accretum, illinc liberum. Sacco levi vulnere pertuso, mox venter, flatu sibiloso erumpente, multum detumuit.

Saccus ex ima pelvi supra umbilicum, ac per totam ventris latitudinem adscendens, fundo suo terminabatur latis circiter quatuor digitis infra cartilagine[m] xyphoideam. Omentum supra saccum sub hepate locabatur, & hinc inde ad ejusdem lobi majoris crepidinem, tum & ad totius sacci fundum, adhærebat, & connatum erat. Thorax minimus fuit, nam hepar tam alte sub costis recondebatur, ut gibbo suo ultra tertiam (ducto a superioribus numero) adscenderet; eodemque modo diaphragma medio sui. Cellulositate quidem facile dilaceranda saccus pluribus in locis cum peritonæo connexum; ad latera vero, & in Ilibus, ligamentosis productionibus, non nisi cultro separandis, cohæsit. Origo ejus ab Ovario sinistro, totaque uteri sinistra parte; fundi sui postica plaga cum intestinis tenuibus unitus ope ligamentorum membranorum, non tenacium, sed digito facile solvendorum. Tenuia intestina omnia fere in Epigastrio sinistro convoluta: suo Colon loco. Jamque in inguine dexto, iisque cunctis in locis ubi saccus a cohæfione cum peritonæo liber, ac toto abdominis cavo, ascites erat. Aqua ascitis minime foetens; ea autem sacci, fusca & foetida fuit. Ipse autem saccus inæqualiter crassus, intus tuberosus, saniosus, semipurulentus, tota sua interna substantia. Aër, qui sibilo exiverat, ad anteriora sacci locatus fuisse videtur, hincque, facto vulnere, exitui aptus. Substantia sacci hic semilineæ, ibi lineæ, alibi 2. 3: linearum; in

latere vero sinistro digiti, imo pollicis, crassitudinem inæqualem ac tuberosam, habebat.

Circa uterum nihil non confusum. Examine tamen patienter instituto, patuit Ovarium ipsum, dum extendi inciperet, cum laterali uteri superficie cohæsisse; Tubam Fallopianam implicuisse sibi, eandemque ad sesqui spithamæ longitudinem extensam, secum duxisse, sic demum occupasse ventrem fere totum. Habebatque ad suam originem appendiculum, aqua similiter repletum. Dextrum Ovarium diametri sesqui pollicis, lympa gelatinosa repletum erat.

Igitur Paracentesi eductus fuit liquor turbidus, non foetidus, in cavo abdominis ascitem faciens; qualis etiam a morte ibidem deprehendebatur. Libere enim effluere sub Paracentesi potuit e locis a cohæsione cum peritonæo liberis. Hincque factum, ut etiam in vivente undulatio perciperetur aquarum.

Docent porro hi tres casus, me, *Tom. 1. Rat. Med. cap. 31.* haud immerito aliquas, easdemque haud leves, adnotasse difficultates, in exsequendo erudit. *Paris. Chirurgorum systemate*, quo statuerant, eductis Paracentesi aquis, vulnus insigniter dilatandum esse, apertumque servandum; ut & omnis posthac renascens liquor, abdomen alioquin iterum extensurus, inde extillaret perpetuo, & faccus ita concideret, complanaretur, convolutusque concresceret, ut deinceps ultra extendi nunquam posset.

In I. enim historia Hydrops renascens præcaveri quidem potuisset, lata servata ventris apertura; sed Omentum ita monstrosum non modo inde mutatum non fuisset, sed aëris allapsu in sphacelum dirum, subjecta sibi omnia destruentem, abivisset.

In historia II. & III. faccus in Paracentesi percussus non fuit; percindendus ergo fuisset. Ecquis vero pollicis forte densitatem offendens, nescius proinde quid forte percinderet, cultro penetrare ausus fuisset?

Haud

Haud enim id in vita, ut quidem in cadavere, illico patescit. Nec concidisset faccus, sustentaculis quippe & adhæfionibus validioribus cum peritonæo cohærens. Quid vero in substantia ulcerosa, scirrhusa, saniosa, adeo crassa, vulnus effecisset? Quid demum aër? Dira certe carcinomata, quæ mutuus binorum pendentis facci laterum affrictus auxisset vehementer. Quod si demus aperturam forte fortuna in tenuiore facci substantia, ut latis in plagis antè, postèrèrque erat, penetraturam fuisse, quid inde non timendum ab Intestinis? Compressa hæc olim, jamque libertatem nacta, & flatibus distenta, aut colicis expansa doloribus, versus locum minime resistantem, saccum, seu ejus parietem posteriorem, protrudere, extrudere, & ventrem extra ventrem, monstrosamque formare Herniam, potuissent. Mitto nunc, quæ de degenerascente Ovario excindendo, etiam ab iisdem claris viris proposito *Tom. I.* dixi. Utique in tertio hoc exemplo patuit Ovaria, dum extendunt sese, quandoque utero primum adplicari, eidemque arctissime uniri: Ovarii proinde extirpationem majoribus difficultatibus premi, quam quidem theoretica ejusdem contemplatio suggessisset.

§. IV. Prosecutio historię mulieris, de qua *Tom. I. cap. 31.* difficultates confirmat easdem. Sic enim res nunc cum illa se habet. Tumor abdominis post Paracentesin semper recreverat, undulans nunquam. Hydragoga vitam hyeme præcedenti, bonaque veris parte, tolerabilem ipsi reddiderant. Maji vero 10. proxime elapso, motum exercens validum, pondusque elevans, crepitum in ventre percepit, veluti quid intus sibi dilaceraretur, simulque subitum ventris incrementum. Fluctuationem nunc manifestam iterum deprehendebamus.

Ut anno præterito præter cysticum tumorem habuerat ascitem, Paracentesi eductum, ita etiam nunc, vel sacco ipso vilacerato, ut in historia II., vel alio tumore

more hydatico rupto, ascitem adesse rati, 14. Maji Paracentesi eduximus libr. 20. liquoris turbidi fusci, tenacis, haud foetentis, vix imminuta abdominis mole. Unde potius alterum a primario sacco disruptum ea vi fuisse credimus, cum primarius ille, intra octiduum a percepta dilaceratione, æque magnus, extensusque, quam olim deprehenderetur. Liquor eductus secessit in gelatum, quod lumini admotum pellucet, & in liquorem fuscum, fere limpidum, qui ad ignem omnino coagulatur. Toto eo tempore notavimus ejus urinas nunquam habuisse lateritium sedimen, ut alias id hominum genus habet; sed tale, quod a bona in acutis hypostasi haud facile interstinguas.

Post hanc Paracentesin aliud quid, præter descriptam formam, extensionemque, venter notandum exhibuit. Circumscriptus quippe tumor ab Hypogastrico ad umbilicum, & ultra, extensus, durusque idem, atque ovalis, deprehenditur; haud sane aliter, ac si ultimam graviditatis metam attingeret. Maritata cum sit, graviditatis datur una cum Hydrope, tum cystico, tum ascite, possibilitas. Id vero incertum. Casus famosus *Drelincurtii*, cui similem etiam *Tom. i.* descripsi, abunde evincit uterum posse, dum privato turget Hydrope, simulare graviditatem. Tempori utique hoc concedendum. Interim præter alias sufficientes rationes haud imitandi *Parisi*nos, nova hæc nobis, eaque urgens sane ratio, saccum haud aperiundi, sistebatur.

Dies interim docuit diem. Elapsis nunc fere quinque mensibus, dum hæc sub prælo sudant, ex quo subdubitare ceperimus, mutatio figuræ, incrementumque abdominis, plane arguunt, personatam graviditatem fuisse. Quamvis igitur graviditatis metus haud existat ultra, subsistunt tamen graves aliæ rationes abstinendi a cura proposita.

§. V. Anno proxime præterito innueram casus nonnunquam dari, ubi id ipsa per sese natura facit, quod in
pro

proposita methodo & difficile deprehenderamus, & periculofum, & sæpe impossibile. Videatur hist. mulieris *Tom. i. cap. 31. pag. 276.*, quæ scilicet in graviditate, præcipueque deinde a partu, ab umbilici dextro latere tumorem gerebat, qui manifestam puris, arctiore spatio contenti, fluctuationem exhibens, aperiebatur, pusque copiosum per multos dies fundebat, cum imminuta duritie, & ceteris bonis inde sequentibus signis. Quandiu potuimus, locum in illa servavimus apertum, quia purulentus saccus peritonæo accretus esse detegebatur, nec admodum magnus ille, ut stylo flexili & incurvo patebat. Mense Octobr. & Nov. 1759. vulnus sponte coëuns, aliquoties dilatavimus, eo quod superstitem duritiem deprehenderemus. A partu, qui ineunte Junio contigerat, defuerant menses; finiente vero Octobri rediere; ex eoque gravida facta, mense Augusti 1760. feliciter peperit. Locus affectus sine ulla duritie relicta, aut tumore, coivit. In ejusmodi casibus verum illud Manilii: *Artem experientia fecit, Natura monstrante viam*: præter naturam magistram, res semper periculosæ admodum aleæ.

§. VI. Antequam hoc caput finiam, unum monendum habeo. *Tom. i. p. 87. § 273.* de Tympania agens, in eorum sententiam abivi, qui aëri soli, eique intestinis cavis contento, adscribant eandem. Quippe capta in cadaveribus experimenta, præter *Dureti* & *Littræi*, aliorumque, auctoritatem, eo me adduxerant. Historia tamen III. hujus Capitis, pag. 25. demonstravit posse ex putrido liquore aëra in sacco gigni, pertusoque sacco exire sibilando. Ergo si Veterum nonnulli simile quidpiam forte observantes Tympanitidem dixerint aqua & aëre gigni, hancque partim aëream, partim aquosam, haudquaquam in Intestinatorum cavo, sed in ventre, contineri, non est quod obloquar. Verum enim vero nec in vita, nec in cadavere, hic, de quo

quo agimus, morbus, ipso Tympanias nomine recensendus venit, si totam ejus historiam attente pervolvamus. Utique nulla in eo Hydropis ficci signa.



C A P U T III.

De Hydrope Pectoris..

§. I. *Signa & Symptomata morbi ex Hipp. Sequentium ævorum Scriptores parum aut nihilejus meminerunt.*

§. II. *Sæculo autem XVII. ut & præsentī, plures de eo ex professo egerunt.*

§. III. *Diagnosī & curatio ex autoribus formantur. Ea occasione Paracentesis tum in*

genere, tum ea Thoracis in specie, examinatur, ac remediis ceteris præstantior declaratur Inquisitio fit quibusnam, & quandonam, profit.

§. IV. *Examen evacuationum in Hydropicis per Cauteria, Scarificationes, Vesicantia, &c. & qua lege usui venire queant.*

§. V. *Problema proponitur cur laudata in Hydrope pectoris Paracentesis adeo raro instituta fuerit, adeo raro adhucdum instituatur? Responsum petitur ab inchoantis morbi incertitudine, & a rebus ejus, dum probe cognoscitur, conclamatis.*

§. VI. *Fallacis morbi historia practica traditur, qua dicta probentur. Incertitudo signorum ejus probatur historia Hydropicæ, multisque aliis practicis exemplis. Confirmatur ulterius alia historia notabili, & sectione anatomica. Conclusio medica.*

§. I. **F**emina, de qua Cap. proxime superiore pag. 19. actum, præter Hydropem cysticum & ascitem, Pectoris quoque Hydropem habuit. Hunc,

vivente ea, dudum suspicati eramus, ut ibidem innui.

Attamen quæ signa pathognomica morbi vocari solent, non aderant omnia; & quæ etiam in eadem Hydropem sinistræ thoracis cameræ indicare videban-

tur, nos plane fefellere. Fallacem sane morbum plura nobis experimenta jam evicerant; ita ut eum incertis-
simorum morborum in classe locari oportere, cum Au-
ditoribus meis sæpius doluerim. Quum tamen adeo &
frequens morbus sit, & difficulter cognoscendus, o-
peræ precium erit eum ab incunabulis repetere, adeo-
que examen instituere quorumvis signorum, quibus
cujusque ævi Scriptores Medici illum nobis depinxe-
rint, cognoscendumque, ut indubie præsentem, de-
derint. Inquiram deinde num incipientis morbi signa
propiora artis usus forte non suggerat? Ex omnibus
præcticas regulas deducere conabor.

Ad signa morbi tum communia, tum pathognomi-
ca examinanda ab *Hippocrate* ordiri convenit. *Lib. 2.
de Morb.* pag. apud *Foës.* 483. Tom. 1. apud *Charter.*
Tom. 7. pag. 575. vocatur morbus ὁ δερὶ πλεύμονος.

„ Si Hyderos, inquit, in pulmone nascitur, febris,
„ & tussis, vexat, confertim respirat, pedes intumescunt,
„ ungues omnes contrahuntur, & iisdem,
„ quibus suppuratus, afficitur; verum remissius, ac
„ diutius. Quod si Infusum, aut Fomentum, aut Suffitum
„ adhibeas, pus non sequitur; indeque cognoveris non pus,
„ sed aquam intus esse. At si diutius aure ad latera admota
„ auscultaveris, intrinsecus velut acetum olet. Et aliquandiu
„ his afficitur, sed postea in ventrem erumpit: confestimque
„ sanus, & morbo liberatus esse videtur. Verum procedente tem-
„ pore venter incenditur, eademque illa, & graviora patitur.
„ Quibusdam etiam venter, & scrotum, & facies, intumescit.
„ Et nonnulli istud ab inferiore alvo, provenire existimant,
„ cum ventrem magnum, & pedes tumere, videant. Quæ certe
„ intumescunt, ἢν ὑπερβάλλῃς τὸν καιρὸν τῆς τομῆς, si
„ sectionis tempus opportunum prætervideris.

Libr de Aff. int. apud *Foës.* Tom. 1. pag. 544. &
545, apud *Charter.* Tom. 7. pag. 655. 656. morbi descriptio

scriptionem & curationem eodem modo, sed fusius,
 prosequitur. „ Hic Hydrops, ait, ex his oritur.
 „ Quum æstatis tempore, siti premente, copiosam
 „ aquam biberis, quandoquidem inde maxime gigni
 „ solet, & pulmo expletus fuerit, rursus in pectus
 „ dimittit. Quumque in pectore extiterit, vehemen-
 „ tem ardorem excitat, ita ut pinguedinem, quæ in
 „ arteriis inest, liquefaciat. At si semel pinguedo
 „ multo magis liquefieri ceperit, Hydropem brevi
 „ efficit. Gignitur etiam ubi tubercula, *φύματα* in
 „ pulmone exorta fuerint, eaque aqua repleta in pec-
 „ tus eruperint. Quod etiam a tuberculis oriatur Hy-
 „ drops, mihi argumento sunt Boves, & Canes, &
 „ Sues. In his etiam quadrupedibus maxime pulmo-
 „ nis tubercula oriuntur, quæ aquam continent. Sec-
 „ tione namque facta id illico cognosces; aqua quip-
 „ pe effluit. Talia autem multo magis in homine,
 „ quam in pecoribus fieri videntur, quanto morbo-
 „ sa magis etiam victus ratione utimur. Plerique vero
 „ exortis tuberculis purulenti etiam extiterunt.
 „ Hæc igitur per initia oboriuntur morbo: tussis
 „ sicca, & fauces exasperari videntur, & rigor & fe-
 „ bris succedit, & orthopnoea; cutis totius corporis
 „ tumefit, tument pedes, ungues contrahuntur; &
 „ quandiu quidem in superiore ventre Hyderus exti-
 „ terit, extat acutus dolor: cum vero ad inferio-
 „ rem ventrem devenerit, melius habere videtur:
 „ deinde progrediente tempore impleto ventre, ea
 „ quæ prius patitur. Interdum vero ad latus tumes-
 „ cit, & qua parte secandum sit, indicat. Quod si non
 „ indicet, multa calida lotum, humeris comprehen-
 „ sum, concutito, deinde quonam in latere materia
 „ magis fluctuat, auscultato.

Hippocrates igitur causam Hydropis Pectoris dedu-
 cit 1^{mo}. ab aquæ potu, & nimio, & celeriter ingurgi-
 tato. 2^{do}. A ruptis pulmonum tuberculis, (Hydatidi-
 bus)

bus) quæ, si versus externam pulmonum superficiem percurrunt, suam utique lympham in cavum thoracis effundunt.

Morbi signa & symptomata ait 1^{mo}. Tussim siccam. 2^{do}. Faucium raucedinem. 3^{io}. Rigorem. 4^{to}. Febrim. 5^{to}. Respirationem citiorem. 6^{to}. Orthopnoeam. 7^{mo}. Totius corporis, pedumque præsertim, Hydropem intercutem, seu ἀνὰ σαρξά. 8^{vo}. Thoracis dolorem. 9^{no}. Hydropem ventris, cum remissione omnium symptomatum, quum pectus ad tempus evacuetur. 10^{mo}. Recrescente pectoris lymphæ, quod ejus sit scaturigo perennis, tunc ascitem ultra non levare morbum pectoris. 11^{mo}. Unguium curvationem, qualis fieri solet suppuratis: addit & alia suppuratorum signa, quæ mitius tamen ait, & diutius, ipsis evenire. 12^{mo}. Absentiam sputi purulenti, etiamsi medela ad sputum provocandum adhibita sit.

Symptomatum horum plura etiam signa vera morbi sunt, sed addit *Hippocrates* aliud quid. Hominem nempe in sedili collocatum humeris valide concutit, movetque; ut sic aure mox ad latus admota, undulantem percipiat aquam. Addit pro alio signo, *Lib. 2. de Morb.* quod eadem pectoris aqua, dum sic aurem pectori admoveas, veluti acetum olet.

Errone aliquis hic exemplariorum? *Foësius*, & *Charterius*, & *Lindanus*, hic legunt ὀζει, *Cornarius* vero ζέει, nempe, *fervet*. Juxta hoc exemplar sensus bonus est, non vero lectione alia. Nunquid enim *Hippocrates* juberet non nares, sed aurem, pectori admove-re, ut odorem aceti perciperemus? Sed si *fervere* intellexit, tunc aurem admove-re oportune præcipit.

Cum magnus *Hippocrates*, adeo in ceteris Laconicus, judicaverit hunc morbum adeo fuse describi oportere, expectare quis posset *Galenum*, *Cælium Aurelium*, *Aretæum*, posteriorumque ævorum scriptores, & fusos, & perspicuos esse, cum de eodem agunt.

Sed nihil minus. Plures in transitu meminere illius; nonnulli ne meminere quidem. Quo quid in obvio adeo morbo mirabilius? *Platerus, Hollerius, Goræus, Capiuaccius. Hier. Mercatus, Salius Diversus, Jacotius, Ballonius, Duretus, &c.* obiter modo de Hydrope pectoris locuti sunt, eorumque, quæ adeo fuscæ *Hippocrates*, signorum pauca modo raptim tetigerunt: unde concludere nos cogunt morbum ipsis minus in viventibus ægris, quam in denatorum cadaveribus, patuisse. Idemque iudicium sit de *Cardano, Coitero, Donato, Cratone a Craftheim, Casparo Baubino, & reliquis omnibus*, ex quibus optimus *Schenckius*, utilissimas suas adornavit collectiones.

§. II. Incunte autem Sæculo XVII. tres magni in arte Viri simul hoc argumentum pro aliqua ejus dignitate tractarunt. *Prosper Martianus, Romæ; Carolus Piso, Nanceii; Daniel Sennertus, Wittenbergæ.* Paulo post etiam *Lazarus Riverius* utcunque fuscæ de eodem egit. *J. B. Helmontius*, quanvis de eo parum habet, in tractatu tamen, qui vocatur *Ignotus Hydrops*, & morbum in ægri vita præsentem cognovisse, & in cadavere demonstrasse, videtur. Post illum *Sylvius de le Boe*, & cum *Lowero Willisus*, ex professo de eodem egere. Plures tamen post illos, ut *Juncken, Etmuller, &c.* solo vix nomine morbum recensuerunt. Egregius *Wepferus Libr. de Affect. Cap. Obs. 60.* anatome potius illum, quam ægro vivente, cognovisse videtur: cumque ipsemet hoc morbo laborasse post mortem inveniretur, minus tamen id credidisse legitur apud *Brunnerum*, eo quod urinam egregie redderet, matutinisque gauderet sudoribus. *Wratislavienses N. C. Medici* ad *Ephemeridas* suas ann. 1699 -- 1702. Tractatum de Hydrope Pectoris adjecerunt, in quo ejusdem causas, signa, curamque, erudite tractant. Exinde *Académie N. C. Paris. Lond. Edimb.* varia ejus dedere exempla: *Immortalis Boerhaave Cap. de Hydrope §. 1219. Hy-*
dro-

dropem hunc describit Empyemati multis signis similem, sola causæ antecedentis observatione ab illo discriminandum. Nobiliss. Ruffiæ Archiater *de Gorter*, in *Med. Comp. Tract.* 35. morbum obscurissimum vocat, ejusque signa ex *Hipp. Pisone*, *Sennerto*, tradit.

§. III. Porro si ex quibuscunque recensitis hisce autoribus causas, signa tam communia quam pathognomica, diagnosin quoque, & curam, diligenter colligamus, notanda sequentia invenimus.

1^{mo}. In causarum enumeratione passim conveniunt omnes. Causas enim Hydropis generales recensent, quæ vel in aliis corporis plagis Hydropem primo conciliant, deinde pectori; vel pectori primum, deinde reliquo corpori; vel denique pectori soli. Causas præterea peculiare quasdam nonnulli addidere: v. g. maturiorem vulneris in thorace curationem, rupturam ductus chylieri, diruptionem hydropici pericardii, vasorum in osseam substantiam degeneraciones, &c.

2^{do}. Signa morbi multi haud alia enumerant, quam quæ *Hippocrates*; nonnulli vero singularia dedere, quæ vel pathognomica, vel illis saltem proxima appellarunt: v. g. subitanam prima nocte excitationem, cum intentata fere suffocatione; alterutrius, vel utriusque, manus sive paralyfin, sive œdema; hypochondriorum tumorem; pulsum debilem, tardum, inæqualem, haud raro intermittentem; foetentem animam; urinam paucam, crassam, & brevi ante fata ex atro rubentem, cum furfuraceo, aut lateritio, sedimine.

3^{tio}. In Diagnosi multi, gravesque Viri, difficilem, obscurum, ambiguum, morbum esse fatentur: varii e contrario tanquam communi omnium more propriis ex signis cognoscendum, atque ab aliis interstingendum eum describunt.

4^{to}. Curam ejus varii, vario admodum modo, auspiciati sunt, *Hippocrates* textibus, ex *Libr. 2. de Morb.* & *Lib. de Aff.* supra recensitis, „Hunc quidem, ait,

„ si exteriore parte intumescit, inter costas sectione
 „ facta, curare oportet. Sin vero minime intumue-
 „ rit, etiam multa calida lotum tunc, veluti purulen-
 „ tos, in sella collocato, & qua parte strepitum edet,
 „ ea secato: tertiam ab ultima costam ad os usque se-
 „ cato: deinde terebra acuta ulterius perforato: vo-
 „ tumque est, quo sane facile effluat, ut quam infimo
 „ loco id fiat.

„ Ubi autem secueris, oportet ulcus cavum, in in-
 „ terna patens, efficere, imposito lino crudo; cras-
 „ sum autem, & extremo acutius, oportet hoc li-
 „ num, sive linamentum, facere. Quam paucissimam
 „ aquam parce emittas. Imposito igitur linamento
 „ mollem spongiam supra imposito; deinde ne peni-
 „ cellus decidat, deligato. Et si quidem 5^{to}. die pus
 „ in ulcere circumnascitur, ut plurimum evadit: sin
 „ vero circumnascitur nihil, postquam aquam edu-
 „ xeris, fitisprehendit illum, ac tussis, & moritur.
 „ Per 12. autem dies semel die aqua educenda: post
 „ 12. vero dies, id est, 13. die, tota aqua educenda est:
 „ & reliquo tempore, si ab aqua distensio fiat, exhau-
 „ rienda, venterque cibis siccis refecandus.

„ Hæc autem post sectionem exhibenda: succum
 „ laseris dragmæ pondere adparatum, & Aristolo-
 „ chiæ tali cervini magnitudine frustulum dera sum,
 „ & lentium, ervique, torrefactorum polentam; u-
 „ triusque purgatæ chænicis dimidium: hæc melle
 „ & aceto subigito. Deinde 60. trochiscis formatis,
 „ unum tritum quotidie vini nigri austeri quam sua-
 „ vissimi heminæ dimidio maceratum, mox jejuno
 „ potui exhibeto. Reliquam vero victus rationem,
 „ & exercitationem eandem, quam priore tempore,
 „ habere jubeto. Et si pudenda, ac femora intumue-
 „ rint, audacter scarificato. Hunc si ita curaveris,
 „ certissime sanum reddes.

Monitos Lectores hic velim me 1^{mo}. utrosque lau-
 da-

datos *Hippocratis* textus dedita opera confudisse, & commiscuisse, ut continuata oratione integra ejusdem sententia pateret. 2^{do}. Me *Hippocratis* μότα, & ἔμμοτα, eo modo latina reddidisse, quo *Tom. 1. cap. 31.* necesse esse demonstraverim.

Haud omnibus æque arrisit hicce curandi modus. *Prosper Martianus Paracentesis Hippocratis* ut primum, ut præstantissimum auxilium, commendavit. *Magnus Boerhaave Aph. 1219. & 1238. Hippocratem & Martianum*, presse sequitur. At vero Auctorum plerique hanc eo duntaxat casu laudarunt, quo remedia consueta minime juvarent. Ita *Piso, Sennertus, Wratislavienses, De Gorter, &c.* Imo dantur haud contemnendi in arte Viri, qui hanc operationem, cum bona *Hippocratis* venia, condemnarunt, ut v. g. *Ludovicus Mercatus, Petrus Salius Diversus, & pene etiam Sylvius de le Boe.*

Hinc ultimæ penultimæque classis Scriptores, ut quævis passim Hydropem, ita & hunc evacuantibus docuere debellandum. Unde purgantia hi leviora, illi drastica, tum omnis generis diuretica, ac sudatoria, præscripsere. Fonticulos quoque, & setacea, vesicantia, scarificationes, inunctionesque crurum, femorum, tumentisque scroti, ad revellendam de pectore lympham, unanimiter commendarunt.

Et sane quoad *Paracentesis* in genere, in quovis Hydrope, notamus eam ab omni retrò ævo male audisse, & a multis tanquam periculofam, a nonnullis tanquam quovis indiscriminatim occidentem, proscriptam fuisse. Quos egregie *Cælius Aurelianus*, primi sæculi æræ Christianæ, ut videtur, autor, refutavit; ut & sæculo 16. finiente *Ambrosius Paré*, aliique. Præcedenti ac præsentī sæculo frequentiore in usum vocata est. Notabilia exempla *Acad. Reg. Sc. Paris. Theses Parisinæ*, observationes omnium regionum, multas Hydropis ascitis curationes, ut vocant,

radicales, aut semel, aut iterum, aut pluries instituta Paracentesi, referunt: tum & curas plures morbum egregie palliantes.

Numerosi, qui mihi obtigere, casus me docuere, palliantes curas, numero plures, quam integras, Paracentesi perfici. Quare examinare confert quondam integre, & quondam tantum palliative Hydro-pici ejus ope curari queant: sponte tunc liquebit quibusnam Paracentesis, & quousque, profit.

A causa quacumque homo potest notabili tempore eam suis in humoribus tenuitatem, eam cutaneis in vasis laxitatem, & anastomofin, habere, ut perpetuo fere sudet, sudorque guttatim defluat, & vestes mades faciat, lectosque. Sed & idem homo, seu bonitate naturæ, sed diætæ mutatae, mutatae ve atmosphaeræ, medicamentorumque, auxilio, ita potest compingi humoribus, vasis ita constringi, ut ultra non sudet, viresque sudore confractas brevi recuperet. Hic homo tunc integre curatus est.

Verum ponamus exhalantium vasorum debilitatem minus ad corporis ambitum peccare, quam ad pleuram, ad peritonæum, ad viscerum in thorace, ac ventre, superficiem; ita ut potissimum per harum partium exhalantia vasa tenuati humores Hydro-pem transsudando creent. Ut priori, ita & huic naturæ, regiminis, artis, auxilio, diathesis ita tolli potest, ut internus ille sudor cesset. An autem ita hic, quam ille curatus? Neutiquam. Prior ille vasis roboratis, inspissatisque humoribus, jam curatus erat; posterior cum omni hoc beneficio aquæ dolium manet. Hæc porro aqua si bonitate medelæ, aut maxime Paracentesi, evacuata fuerit, cum mutata in melius jam antea diathesi, perfecta aderit ac firma sanitas.

Etiam hoc in casu contingere potest, ut Paracentesis, nondum mutata diathesi, colluviem aquarum auferat; ac deinde optima roborantia & inspissantia re-

media

media integram efficiant, constantemque salutem.

Si nunc homo a subito, ac copiosiore potu aquoso, post diuturnam sitim hausto, in Hydropem inciderit, quemadmodum olim totus pene exercitus invictissimi Imperatoris *Caroli V.* in expeditione *Tunetata*; utique potus abstinentia, motus, elater conservatus vasorum, ejusmodi innumeros restituere possunt. Sin vero abundantior lymphæ, in corpore effusa remanserit, homo hic aut aptis medicamentis, aut paracentesi, ab illuvie aquosa liberandus erit: liberatus, recte valebit.

Sed alia longe res est, si dispositio in corpore perseveret, qua sublatis aquis, perpetuo succedant novæ. Si ductis aquis vasorum humorumque vitia corrigi nequeant, causæ persistentes novas continuo regenerabunt aquas. Si aperta hydatis aquam stillaverit,educta ea, novam abundantius, ablata resistentia, dabit. Ergo paracentesis ad tempus modo levari bit; sed & medicamenta belle evacuantia etiam tantum ad tempus proderunt. Igitur cum medicamenta sæpe nihil aut vix agant, prætereaque corpus defatigent; ipsa vero paracentesis vires vix projiciat, nec corpus exagitet, secure autem semper, certoque evacuet; merito *Prosper Martianus*, & *Boerhaavius*, paracentesin medicamentis prætulerunt. Tandem in ascite, cui Hydrops cysticus junctus, etiam ceteris paribus est Paracentesis medicamentis anteferenda; quia medicamenta ibi vix unquam efficaciter agunt, & Paracentesis semper evacuat.

Diffiteri equidem non possumus mortem Paracentesi pressa pede nonnunquam insequi: cum tamen eo modo in casu tunc adhibetur, ut vitam lymphæ abundantia jamjam suffocandam fortassis aliquantisper producat, dubiumque tunc auxilium, quam nullum, adhiberi præstet; neque etiam hic condemnanda Paracentesis erit. Hujus erat mentis *Hippocrates Lib. de Loc. in hom. pag. apud Foës. 417.* ἡ νοσημάτων ὅ,τι ἀν

ἐπικινδυνωτάτων ἔσιν, ἐν τέτοισι ἀρρακινδυνεύειν χρὴ ἐπι-
 τυχῶν μὴ γ' ὕγια ποιήσεις, ἀτυχήσας ὃ ὅπερ ἢ ὡς ἐμελλε
 γίνεσθαι. In morbis, in quibus periculum ingens adest,
 aliquid audendum est: si enim successerit, poteris ser-
 vare ægrum; si non profeceris, fit modo id, quod si-
 ne tuo molimine brevi contigisset.

§. IV. Atque hæc de Paracentesi. Sed quæ com-
 mendatur evacuatio in quacumque Hydropis specie,
 cauteriis, ac scarificationibus, peragenda, illa etiam,
 subsequa brevi gangræna, discrimine non vacat. Pas-
 simque omnes post *Hippocratem* Medici Hydropico-
 rum ulcera curatu difficillima, ne dicam impossibilia,
 notarunt. Interim qui hoc primus notavit *Hippocra-
 tes*, ille etiam ulcera Hydropicis arte excitanda esse
 primus monuit. Sibine igitur contradixit? Mini-
 me; sed necessariam adhibuit, quam negligere sole-
 mus, cautelam. Ἀεὶ τὸ ἐξοιγόμενον χρεῖν δερματηρίῳ φαρ-
 μάτῳ. Sicque averruncare gangrænam potuit. Unde
 bene *Prosper Alpinus*. finiens suum 7. Lib. de Med. Me-
 thodica. „Hocque, inquit, præsidii genere scimus
 „nos complures Hydrope fuisse sanatos; at quia cu-
 „rationem vulnerum neglexerunt, alio morbo quam
 „Hydrope interemti sunt: quippe vulnere in gan-
 „grænam abeunte”. Quare, dum in Nosocomio
 scarificationes, Hydropem palliantes, instituimus,
 saturato corticis peruviani fomento gangrænam aver-
 runcavimus. Ultra nunc progrediemur. Hydropem
 & ascitem, & intercutem, curatum vidimus in can-
 crosa femina, cui cortex adversus cancrum dabatur.
 Cancer quidem non curabatur; sed vasa corporis, cor-
 tice roborata, omnem aquarum colluviem alvo & uri-
 nis expulerunt. Quid ergo impedit, quo minus Hy-
 dropis, sine viscerum interiorum scirrho obtinentis,
 curam cortice & assumpto, & scarificatis admoto locis,
 tuto tentemus? Duplex sane causa nos eo adigit: al-
 tera egregius effectus in ipso morbo; altera ejusdem,

ad morbi proegumenam causam haud raro tollendam, exploratissima virtus.

Atque hæc de ejusmodi evacuationibus in genere dicta funto : superest eam, quæ de ipso thorace directe instituitur, nunc contemplari.

§. V. Dudum quidem accessi ad sententiam *Hippocratis, Martiani, Boerhaavii*, Paracentesin thoracis sive in Hydrope pectoris recentiore, sive viribus utcumque constantibus vetustiore, palmarium auxilium esse statuentium : attamen abstinere nequeo, quin medicum hoc problema proponam ; scilicet : *Cur ita laudata Paracentesis, sive ut primum, sive saltem ut alterum in hoc morbo adhibendum auxilium, spatio XXIII. Sæculorum theoretice commendetur, & vix unquam instituta legatur?* In Empyemate historiam operationis, fateor, habemus : in Hydrope autem pectoris, forte unus alterve me casus fugit, sed vix illam institutam novi, nisi a *Lowero & Willisio*, idque modo semel. *Willis. op. omn. in fol. tom. 2. Phar. rat. part. 2. sect. 1. c. 13.* Quid igitur causæ, quod nulla operatio universalius commendata, nulla rarius instituta fuerit?

Si conjecturare liceat, suspicor morbum inchoantem difficulter sæpe ægrorum in vita cognosci ; morborumque aliorum, in quibus Paracentesis haud conveniat, sub larva fallere : dumque demum cognoscatur, adeo jam provectum esse, ut eandem haud ultra admittat.

§. VI. Morbum apud *Batavos* haud infrequentem sæpius in denatis, quam in vivis, cognovisse me fateor. Quod cum Veteranis in arte quoque contingere cernerem, phænomena observata in illis, quorum me morbus fefellerat, animo volvi, cum phænomenis simili morbo deinceps laborantium sedulo comparavi, atque ita tandem sæpius eundem citius præsentem detexi ; haud tamen ita, ut nonnunquam illum non, nisi conjectura assequeretur, imo vix rite, nisi desperatis fe-

re ægri rebus, cognoscerem. En igitur quæ attentior observatio me docuit!

1^{mo}. In plena sanitate omnium prima observatur Dyspnœa levis, vix notabilis, ut & vix advertenda Tussicula; quæ a communi Dyspnœa inchoante nullo signo distinguitur. Ejicitur nihil tussiendo: unde Medici totum incommodum pulmoni utcumque debiliori adscribendum rati, roborantia cum effectu aliquoties bono, sæpe autem nullo, exhibent. Neque tantillo debilior pulsus, aut vix perceptibilis ad motum defatigatio, anhelitusve, aliud suadent. Nulla enim ratio subest vomicas, aut abscessus, suspicandi. Lento interim passu crescit malum, interea dum non raro fallaci curatione Medico imponat. Quippe sicciore dudum tempestate, moderatiore forte motu, curatum, læto ægro, lætis adparet Medicis: quiescente vero ægro, aëreque diu valdeque humido, non curatus morbus, sed auctus adparet. Tussis paulatim increscens, glutinosa pauca ac spumosa producens, cum fonticam causam non agnoscat, prognosin vix videtur gravare; quia in debiliore paululum pulmone quid glutinis generatione facilius? Malleoli posthac pedisque œdema levissimum conspicitur, vagum quidem primo, postea autem constantius: sed vix inde augmentum inquietudinis; quid enim in desidiosa vita frequentius? Hic primus mali gradus, diuturno tempore sic in pluribus obtinens.

2^{do}. Interim fiunt ægri corpore haud modo, sed & animo imbecilliores, spasmis flatibusque, ac levioribus anxietatibus magis obnoxii, somnum ægrius capientes, exiguosque, leves, vix inchoantes, Asthmatis spasmodici patientes insultus. Cum hucusque nulla cujuspiam visceris labes se manifestet, persistit nobis imbecillioris pulmonis idea, solidaque roborandi, ac fluida inspissandi indicatio. Si autem gluten paucum pulmone ejectum Medicis eo usque imponat, ut ad at-

tenuandum illud accingant sese, morbi causa facile adaugetur.

3^{to}. Crescunt mala pedetentim; observantur quidam noctu inquietiores, & conqueruntur quadam anxietate se a prima somni blanditie capta expergefieri, erectos se esse oportere, postea vero nonnihil tranquillitatis se denuo percipere. An id quia jacentibus, truso altius diaphragmate præ mole viscerum abdominis, thorax angustior? An vero iis modo fit, quibus venter effuso intra illum liquore turgidior? Practica observata has rationes omnino non per omnia admittunt. Observavimus has nocturnas anxietates in his, quorum cadavera abdomen aquis inane exhiberent. Observavimus easdem cum *Pisone*, licet ægri illarum evitandarum causa in fedili obdormivissent. Utique res explicatu difficilis! sed quid tunc Medici concludunt indicari? Si gluten aliquid copiosius ad has anxietates exspuatur, Asthma glutinosum; si vix tale quidquam, spasmodicum concludunt. Præsertimque dum dato paregorico, & antispasmodico ad noctem remedio, subitanam mali furentis remissionem ægri ita lætantur, ut sequenti, altero, tertiove die, noctes agant tranquillas; imo obliti ærumnarum, in publicum prodeant, suisque cum amicis se exhilarescant. Ergo antispasmodica vel expectorans medela continuatur; morbus in pejus ruit.

4^{to}. Caducam suam machinam interea adhuc miseri trahunt, donec ad tragicas illas noctes deventum sit, quibus decies minantur suffocationem; unde tandem leipothymia, syncope, debilitate, vitam ducant ipsa morte miserabiliorem; sicque, quanquam mortem effugere sæpius visi, tandem subito suffocentur. Lepida catarrhi suffocantis adplicatio Medicorum servat factum tectumque honorem; & si forsan Medicus affuerit, qui morbi præsentiam ante fata subolfecerat, utique non nisi ut immedicabilem pronunciaret, cognoverat illum.

Hæc

Hæc nunc historia miserandi morbi, ut plurimum ignoti, quo plures extincti in una, alterave, aut etiam in utraque thoracis camera collectas exhiberent aquas. Unde quidem crebrior nata postliminio ejusdem in vita suspicio, sed sufficientium defectu signorum, quibus a morbis, quos simulabat, quosque ars sæpe feliciter tollit, discriminaretur, nulla certitudo.

Quamobrem ad invenienda propria morbi ac pathognomica signa variorum adhibiti animi; eorundemque demum is adornatus catalogus est, cujus cum pag. 33. meminerim, hic non repetam, sed ad singula ejus capita ordine respondebo.

Ac primo quidem respondeo, subitam a prima somni dulcedine excitationem, cum intentatis suffocationis minis, semel mihi octiduo ante fata quondam apparuisse, & pluries quidem maturius, at vero semper provecto ita morbo, ut omnem respueret curationem Pathognomicum proinde hoc signum non adpellabo.

Secundo dico Hydropem pectoris aliquoties adesse posse citra hoc signum. En evidens exemplum! Sexagenaria mulier hoc ipso anno, ineunte Majo mense, ad *Pasmanianum* Nosocomium transferebatur, ascitem habens, tumidisque, atque hinc inde ulcerosis cruribus lympham stillans. Pectoris quidem nonnulla anxietas, ut in ascite consuevit, aderat, sed admodum exigua: quodque in provecto ascite mirandum, nulla tussis. Nulla præterea peculiaris de nocte anxietas, aut subitanea e somno excitatio. In dorsum quidem sæpe incumbens visa ægra, frequenter autem etiam utrumvis in latus. Vino herbis amaris medicato, cui Oxym. Squill. Spir. nitr. dulc. Tinct. Millep. &c. adjuncta, tota fere, idque iterata vice, detumuerat, sed aqua furtim capta continuo se replens, relapsa est. Tandem manu ac brachio sinistris quatrinduo ante mortem tumentibus, 3. Julii expiravit.

In cadavere invenimus ascitem ventris cysticique
prin

principium: scilicet duas ovarii hydatidas, quarum una pellucens lymphæ ultra libram gerebat. Deinde ovarium dextrum in cellulas cartilagineas degenerans, officulum magnitudine pilulæ duorum granorum, membranula cohærens, suo in fundo continebat. Uterus vix distentus, glabrò, carnosoque corpore repletus, quod cum uteri fundo posteriore ita unitum, ut non nisi unam eandemque cum eo formaret substantiam.

Sed quis mortalium credat hanc feminam utrumque pectoris cavum copiosissima lymphâ repletum gessisse, ita ut arcto in spatio compressi pulmones, pluribus in locis aëre vix ultra permeabiles essent, magnisque sui portionibus aquæ, in quam injecti, fundum peterent? Utque Pericardium, undique pressum, cum cordis massa, nullo cavo relicto, in unum coivisset, albitudine modo sua, duas circiter lineas crassa, a cordis substantia distinguenda? Obiter hic noto Pericardii absentiam, ab Anatomicis notatam, similibus forte causis deberi.

Si ergo nocturna orthopnœa omnino deesse in gravissimo pectoris Hydrope potuit; si in aliis paucis modo ante funera diebus adparuit; si denique ubi adest, provectiore adeo morbo patescit, ut quodvis fere respuat auxilium; non videtur illa pathognomici signi nomine venire debere.

2^{dum}. Signum, œdema scilicet, aut paraly sis alterutrius, imo etiam utriusque brachii, manusve, priore vix multo certior est. In quo viro dixi nocturnam orthopnœam octiduo priusquam periret, me observasse, in eodem quoque manus non nisi eodem die œdematosa apparuit. In femina, cujus historia mox data fuit, quatrIduo tantum ante obitum. In ea vero, cujus casus Cap. 2. pag. 19. descriptus fuit, tale œdema adfuit nunquam. Caruit quoque eo clarus *Wepferus*. Ergo quod vel deest aliquando, vel morbo ad interitum

ritum proximo sæpe advertitur, pathognomicum non est.

3^{tium}. Signum, aquæ nimirum fluctuatio, pluribus defuit meorum. Adeste tamen sæpe illud, & ratio fuadet, & Hippocrates tradidit, & nostra femina Cap. 2. pag. 19. experta est, & plures memorant Autores. *Hippocrates* sedentis hominis comprehendens humeros, valide ejus corpus concutiebat, ut audire fluctuationem posset. Autorum nonnulli corpore inclinato id explorant; imo ægro toto corpore superiore de lecti crepidine deorsum pendulo. Verum vel non adest multis, vel sero tantum adeste percipitur fluctuatio; & in casus *Hippocraticis* similes incidere oportet, ubi auditu percipi possit. Quod ergo sæpe deest, aut sero nimis advertitur, pathognomici morbi signi conditione caret.

4^{tum}. Signum, Hypochondriorum, vel alterutrius ejus tumor dicitur; sed cum tumere id variis de causis queat, non est pathognomicus hic tumor. Contingere quidem potest, ut aqua in diaphragma gravans, hep. par v. g. premat, trumatque extrorsum; cui signo, si forte fluctuatio simul adest, morbi major certitudo nascitur: sed in multis & tumor deest & fluctuatio. Ergo.

5^{to}. Pulsus debilis, tardus, sæpe intermittens, inter hujus morbi signa recensetur. Erat quidem talis *Wepferi*, testante *Brunnero*, pulsus; sed cum *Wepferus* etiam osseam habuerit Aortæ substantiam, pulsus ejus non potest Hydropis pectoris pathognomicus adpellari. Deinde talem pulsum multi Autores non recensuerunt. Tandem pluribus nostrorum defuit. Sane febricula, individua multis comes, pro tarditate celeritatem habet.

6^{to}. Foetentem animam meorum nemo habuit.

7^{mo}. Urina pauca, crassa, Hydropicorum passim esse solet, sed non immutabili lege. Hydropica Cap. 2. pag.

pag. 28. eam reddit pulcre coloratam, limpidam, cum sedimento fere acutorum bonorum. *Wepferus* ideo minus credebatur se pectore hydropicum esse, quod *urina copiosa, naturalis matutinusque adesset sudor*. Descripta *Wratislaviensibus* urina, qualis prope mortem ipsis observata fuit, etiam sic in Nosocomio adparuit: sed quod lethi instantis, id morbi ipsius signum dici non potest.

Quam parum ergo certi, ut morbum initio præsentem dicamus, ex recensitis nanciscamur! Provoco etiam ad quotidianam Praxin. Quid incertius concilio Medicorum, quos similis convocaverit morbus! Examine per horam producto sæpe uni horum malum æsthmaticum audit; alteri dyspnœæ similis; tertio Hypochondriorum affectione natum; quarto peculiari nervorum irritabilitati, cum aliqua acritudine juncta, adscribitur; cuiquam forte etiam Hydropis pectoris suspicio nascitur. Ac profecto si talis revera esse deprehenderetur, idoneum Paracenteseos tempus nunc forsitan esset. Sed suspicio morbi duntaxat est, eaque cum aliorum morborum ita intricata, permistaque, signis, ut certi quid concludi nequeat; rarusque sane ille Medicus foret, qui operationem hanc ex mera hac suspicione in se suscipere vellet, rariorque æger, qui incerta de causa permetteret thoracem sibi terebrari. Unde ad maxime verosimile concilium concludit, donec signa evidentiora elucescant; utinam modo, iis elucescentibus, conclamatum non esset!

Nunquam e mente excidet casus viri, quinquagenario majoris, qui spatium quinquennii sæpius meam imploraverat opem. Cardialgiis ab immemorabili pene tempore obnoxius, nullum demum solamen habuit, nisi vel ab opio audacius dato, vel, quando digestionis tempore doloribus ferendis ultra non erat, compresso valide epigastrio. Ita ut aliquoties inven-
rim eum in terram pronum, substratis soli ventri pul-
vina-

vinaribus. Sponte enim noverat vehementiores sopire dolores, nervis abdominis prope ventriculum & pancreas compressis. Semianno ante mortem vespere tempus suaviter cum amicis fallens, crudeli cardialgia afficitur, brevique postea anhelitu, demum aponia; anhelans autem ac vocis expers, cardialgia liberabatur. Vena secta, immisso enema, vesicante inter scapulas adhibito, insultus ille mirus tridui tempore integre cessavit; sed quæ eo triduo plane siluerit cardialgia, mox rediit. Quindecim diebus elapsis idem paroxysmus rediit, ut instar asthmatici respiraret æger; at mistura Neurotica sumta brevi convalesceret. Octiduo post repetens priore sævior insultus, eidem remedio actutum cessit.

An hic, amabo vos! pectoris hydropem somniare, qui in consilium vocati, Medici potuere? Quid asthmatico insultui similis? Potissimum si consideremus 1^{mo}. quandam affuisse materiem, quæ in singulo Paroxysmo sedem consuetam reliquisset doloris, & ad thoracem videretur transmigrasse. 2^{do}. Idem ita creditum Asthma consuetis discutientibus & antispasmodicis auscultasse. 3^{tio}. Sed auscultasse nunquam, nisi prius dolor antiquam sedem occuparet. 4^{to}. Per integros quinque deinceps menses pectus nihil simile passum esse. Interea tamen torosus eo usque homo, ac perfecte quadratus, indies collabascere animadvertatur.

Octiduo tandem ante fata plura subito signa manifestabantur, quibus Hydrops pectoris subdole dudum latuisse, jamque adeo proventus esse videretur, ut immedicabilis esset. Improvisa scilicet e somno excitatio, orthopnoea, oculorum vultusque livor, ac simul manuum inflatio ambarum: consueti vero in Epigastrio dolores hac vice minime cessarunt. Pridie autem mortis omnibus symptomatibus tam in ventre, quam in pectore, liberatus, pulsum bonum, vultum mire

recreatum, ac veluti vegetum, præ se tulit, suaque repetere negotia jam meditabatur. Nocte autem insequente in lecto invenitur cum matula in manu veluti vomiturus, sedens, sed jam mortuus; atro, eoque plurimo cruore, sub utraque albuginea, suffusus.

In cadavere præter ingentem totius pancreatis scirrhum, præter lienis crassam cartilagineam superficiem, invenimus diaphragma utroque in latere abdominis, sacci instar, prominens; & lympham enormi copia explentem sinistrum thoracis cavum; eodemque modo, sed paulo parcius, dextrum; costarum denique cartilagines plane osseas factas.


Priorum anamnesis, morbi finis, inspectio cadaveris, videntur demonstrasse colluviem in pectore aquarum diu adfuisse; quæ cum larvata, complurium Medicorum aciem fugerit, simul evicit, quam in proclivi sit hic falli. Præter orthopnoeam nocturnam, œdematosasque manus, etiam convexum versus ventrem diaphragma a gravante lymphâ inveniebatur: sed crassitudo ventris notabilem non exhibuit in vita differentiam. Ita ut hoc signum pag. 45 ex Autoribus recensitum in graciliore ventre evidentius, quam in crasso, adverti possit, debeatque.

His omnibus ita pensatis, veram capimus, arbitror, causam, cur centeni Scriptores practici Paracentesis vel in morbi principio, vel saltem post irritum remediorum usum adeo laudantes, eam tamen nunquam instituerint: morbus quippe in principio non manifestus, eam non suasit; cognitus postmodum, eam ultra non admisit. Qui vero illam instituerunt, ut *Hippocrates*, *Lowerus*, *Willisius*, & forte pauci alii, hi censendi sunt in ejusmodi ægros incidisse, in quibus signa morbi oportuno tempore manifesta erant.

Unde ea proficiscitur conclusio, ut 1^{mo}. subdolus hic morbus raro, dum curabilis est, cognoscatur; cognosci incipiat, dum ultra vix admittat medelam.

30 DE EPILEPSIA ET CONVULSIONIBUS.

2^{do}. Ut si cognoscatur mature, nihil sit Paracentesi potentius. 3^{io}. Ut in posterum, dum ambiguus inchoantis mali se exhibet casus, diureticis, purgantibus, sudatoriis, diaphoreticis remediis minime parcamus; cum ex effectibus brevi pateat subsitne, quem suspicemur, an alius morbus?



C A P U T IV.

De Epilepsia & Convulsionibus.

§. I. *Impossibilis alias Epilepsiæ cura non raro obtinetur sedula causarum procatacticarum expiscatione, quantvis proegumenæ haud auferantur. Gravidæ Epilepticiæ id demonstrans exemplum.* §. II. *Multiplices viæ, casu detectæ, enarrantur, quibus aut sopitus morbus, aut sublatus fuerit. Hunc in scopum simplicia quædam laudantur.* §. III. *Exemplum mirabile curatæ in adolescente Epilepsiæ. Mors ejusdem alia de causa orta; & inspectio cadaveris.* §. IV. *Epilepsiam vafri homines varias ob rationes plurimum simulant. Bina, quæ id ostendant, exempla enarrantur.* §. V. *Variæ leges dolos eorum malos expiscandi, & demonstrandi.* §. VI. *De Dæmoniis fictis, eosque palam prostituendi methodo. Magna prudentia Medicis opus esse ostenditur.*

§. I. **E**pilepsia morbus est omnem artis opem haud raro eludens, sæpius tamen vel curandus integre, vel ita saltem moderandus, ut, causa procatactica ablata, proegumena veluti sopita maneat, atque ita certo quodam sensu morbus plane abactus esse videatur. Unde plurimum juvat, quæ symptomata aliquandiu, aut mox, ante insultum præsentiat æger, apprimere nosse; nota autem tollere, aut saltem suffocare posse. Experimentis enim constitit horum felici ac prompto

DE EPILEPSIA ET CONVULSIONIBUS. § I

prompto moderamine, haud raro totum averiuncari Paroxysmum. En ex pluribus unum! Inexpugnabilis multis ab annis Epilepsia tandem & ante paroxysmum nauseas, & in paroxysmo vomitus, exhibet violentos. Illustrissimus Baro *Van Swieten*, egoque, ad Emeticum ante futurum paroxysmum, deinde, ne Emetici turbæ nocerent, ad Paregoricum exhibendum, facile devenissemus, ni graviditas obstitisset. Considerantes tamen postea & prægnantem, & fœtum, paroxysmis vehementissimis gravius lædi, quam Emetici actione, Emeticum dedimus, Emeticum repetivimus: idque eo cum successu, ut morbus integro decennio siluerit. Præsentiebat quidem illa aliquoties quædam veluti futuri insultus inchoamenta, sed & hæc usu sequentis remedii penitus compescuit. R. Spir. sal. ammon. Tinct. Cast. Suc. Asæ fœt. a dr. 3. ter, quater, die 60. gtt. cum vino. Exacto vero decennio, summis animi mœroribus confectam repetens Epilepsia occidit.

§. II. Dum vero aut nihil horum ab ægro præsentitur; aut etiam præsensum auferri nequit; aut denique ablatum, effectum causæ latentis non sopit: sæpe immedicabilis morbus haberi solet. Attamen ne tunc quidem absolute conclamatum pronunciare oportet. Fuere quibus excitatus ille, & nutritus, opipara ac desidiosa vita, subita fortunarum jactura per omnem vitam, haud contemnenda plane compensatione, siluerit. Alii, quibus casus ab alto in cranium, vulneraque ejusdem, aut contusiones, morbi aut moderamen, aut integram effecerint absentiam. Etiam mutatione domicilii, diuturniore peregrinatione, vitæ genere prorsum permutato, quidam leguntur se etiam ab ipsa gentilitia labe præstitisse immunes. Ars hæc, similiaque, contemplata, ac imitata, stupendas nonnunquam curas perfecit. Sed & simplicia usu detexit, quæ summæ ad hunc morbum refrænandum efficaciae sint.

Hæc inter *Pæonia*, *Viscus Quercinus*, & *Radix Phy*, sive *Valerianæ*, foliis omnibus pinnatis dictæ Botanicis. Vidimus sane rebellem dudum morbum aut hisce mitigatum, aut silentem penitus. Experimenta nostra dudum facta confirmavit nobis doctissimus Vir J. Scopoli, Physicus Idriensis, Flora sua Carniolica clarus, qui binis dragmis pulveris Radicis *Valerianæ* quotidie datis; deinde ejusdem decoctæ libra post singulam pulveris dragmam exhibita, Epilepsiam triennem, ex terrore, (pessima sane origine) natam, & quovis fere die adorientem, jam per decem septimanas, dum hæc ad me scriberet, suppresserat.

§. III. Sed præterea dum polymorphus hic morbus nos per hæc omnia tentantes, prorsum eludit, nonnunquam nobis, animo ad cuncta attentis, sui amotionem veluti furtim indicavit. En notabile ejus, quod habuimus, exemplum!

Sexennis puer, sanissimus, infiliente in se cane molosso ita terretur, ut integro triduo convellatur, horrendosque postmodum Epilepsiæ insultus fere quotidie patiatur. Morbus ad omnia rebellis, ac per sexennii spatium perdurans, ignoto Parentibus remedio paululum mitescebat; sed novo irritatus pavore, nec ultra ignoto remedio moriger, puerum vario modo, quotidie, eodemque die multoties, adoritur. Tandem inter pauperes, qui mane Nosocomium consilii causa petunt, mihi sistitur.

Radice *Phy* trium septimanarum spatio ipsi dedi, sed ab eadem desistere increscens vis morbi me compulit. Quo autem securior medicina esset, illum in Nosocomio locavi. Sedulo examine constitit vigesies & ultra, die, inchoari paroxysmos, sed semel tantum, bisve, compleri eosdem; idque hoc modo singulis diebus ac noctibus. Virus *Castorei* copiosioris me explorantem, itidem effectus elusit. Quemadmodum etiam aliorum foetidorum, & acrem spiritum rec-

torem

torem habentium, usum. Morbus varietate terribilis nunquam graviores suos insultus modo perficiebat eodem. Alio enim tempore totum corpus, medium autem alio, convellebatur, altera sui parte obrigescens. Nunc Opistotonos; Emprostotonos utcumque alio tempore fuit. Jamque una vice vehemens calcitratus, alia vice manuum in proprium pectus, caputve, tanta agitatio, jactatio, vibratio, ut, ni cautum fuisset, sibi nocuisset vehementer. Sudor perquam foetidus insultum comitabatur, copiosus ita, ut indusium, lectusque, plurimum maderent; tenax itidem adeo, ut corpori, ceu quopiam glutine, adhæreret. Mugitus, ululatus, rugitus, gemitus, vultusque omnem in modum horridus, & urinæ profluvium, Paroxysmum frequenter concomitabantur.

Interim morbo quotidie in pejus verso, nascuntur signa vehementis humorum rarefactionis, quam ipsa natura haud levi narium hæmorrhagia testabatur. Sed sæpius me Mater monuerat, nunquam ipsi graviores fuisse, frequentioresque paroxysmos, quam qui hæmorrhagiis ejusmodi successissent. Re nihilominus crescente, admodumque urgente, sanguinem pede bis detraximus, diluimus, moderavimus, sed morbum hinc vehementer augeri doluimus.

At vero dies diem docet. Animum quippe quamcumque in partem vertentes, constanter demum observavimus puero jacenti, frequentique somno obrepto, morbum frequentioresse, quam aut sedenti, aut vigili. Hanc ob causam majore diei parte illum in sedili locavimus, vigilemque variis objectis mentem grate occupantibus servare annisi sumus. Sensim hinc insultus rariores.

Verum soporosus erat. Et tandem somno quidem capto paroxysmum accedere, nunquam autem vigili, advertimus. Ergone causa tetri mali latens aptiores in somno nervos, ut agigaret, invenit, quam vigiliarum

tempore? Utique experientia convincebamus, quo Adolescentem diutius vigilem servabamus, eo rariores contingere paroxysmos. Sic liberos quidem dies integros nanciscebamur; nocturnos vero insultus, cum tamen dormiendum erat, averruncare non poteramus.

Aliud igitur consilium arripuimus. Vigili insultus ultra non fiunt: fiunt autem, dum stertorosus eum somnus capit. Ergo causa latens invenit nervos somni stertorosi, quam vigiliarum tempore, ad Convulsiones, ad Tetanos, ad Spasmos, aptiores. Ipseque ille stertor somnum minime naturalem esse demonstrat. Quid igitur si opio nervos insensiles redderemus, ne causa illa, ignota nobis, irritare eosdem posset? Sed contra: Nunquid opium in dispositione adeo comatosa somnum non posset æternum facere? aut per omnem vitam stupiditatem? Sed periculo saltem vacabit minima dosis. Igitur tentavimus. Jamque minima dosis in corpore, opio neutiquam assucto, nec soporem augebat, & tamen boni præstabat quidquam. Dosin ideo prudenter auximus; omnem omnino Paroxysmum averruncavimus; pro sopore somnum naturalem produximus; puerum brevi agilem, alacrem, sanum, salutavimus; Matri reddidimus.

Ufus Adolescens integra per tres menses valetudine, ad Nosocomium rediit; tumorem sponte in inguine natum mihi exhibiturus. Herniosusne esset, an alius generis tumor, ambiguum fuit. Ventre primum liberato, emolliens Cataplasma appositum est. Sed paucis postea diebus nuntiavit mater Dysenteria, quam mihi non indicaverat, sed commiserat Balneatori, filium periisse.

Cadaveris examinandi copia fuit. Patuit tumorem in inguine ante aliquot dies exhibitum, ingentem fuisse abscessum. Nodus durus nervo diaphragmatico in medio suo itinere arcte circumcretus inveniebatur; aliusque similis illi ejus loco, ubi in diaphragma abiturus erat. Thalami Opticorum emarçidi. Nun-

Nunquid vitia enarrata nervorum, medullæque, diu post Epilepsiam nata sunt? An vero dudum præsentia, causam proegumenam posuerunt, cui terror accedens, causam Epilepsiæ proximam cum illis formaverit? Incertum! Saltem aut Idiopathica Epilepsia a terrore genita, excitatave, aut Idiopathica a terrore cum male affecta medulla cerebri orta, aut deum invincibilis Deuteropathica, ex male affecto nervo diaphragmatico & terrore nata, arte medica si non curabilis, sopiri saltem ita, ac si penitus abesset, se posse ostendit.

§. IV. Sed tædiosa causa ingratam observationem, Tyronum in gratiam, adjungere jubet. Quippe nulla re turpius decipimur, quam Epilepsia, aut Convulsione, fictis. Vix morbus datur, quem & frequentius, & artificiosius simulare Mendici norint, quo transeuntium animos in commiserationem commoveant. Pueri ac puellæ hanc vāfram fingendi artem a se mutuo discunt, ne vapulent; vel ut mollius tractentur; vel ut nihil cogantur addiscere: quemadmodum vident cum pueris, quos in paroxysmis forte viderint, a parentibus, tutoribusque agi. Maturam Virginem Procorum penuria torquet, angitque. Forte casu audit a garrientibus inter sese matronis Epilepsiam matrimonio nonnunquam curari. Ergo eam artificiose fingere discit, quo cogat Parentes se viro jungere. Monachus, quo a Choro, a jejuniis, aliaque monasticæ vitæ asperitate se vindicet, se fingit convulsam. Quin & sine peculiari intentione ipse malus animus eo nonnullos seducit. Tandem etiam in scenam diabolus adducitur, quo obsessos se fingunt, intentione fontica varia, etiam, quis credat! superstitionis roborandæ causa. En aliquot, quæ habuimus, exempla!

Adducebatur mihi puella gravi auditu laborans. Quo revellentibus, & factis in aurem injectionibus, restituto, Convulsiones suboriebantur, quas hoc or-

dine contingere Mater narrabat. Incipiebat tremere puella, angi, anhelare, clamare, brachia agitare, totumque corpus, humi cadere, pollices fortiter intra pugnos firmare, vociferari, cantare, ore tandem producere spumam. Principio bis, ter, die, id contigisse; jam autem quavis ferme hora.

Commodo meo morbum examinaturus, puellam jussi in Nosocomio servari. Vidi illam, eadem die, in lecto decumbentem, convulsam, mediisque in Convulsionibus pollices adeo fortiter intra pugnos firmare, ut maxima vi vix solvere valerem. Oculos horrendo agitabat. Attamen dolum subesse suspicabar 1^{mo}. quod oculi durante Paroxysmo non connivendo, sed sano prorsum modo, aperirentur. 2^{do}. Quod pulsus fere naturalis esset. 3^{io}. Quod cortinis lecti clausis pupilla dilataretur, vicissimque apertis iisdem contraheretur. 4^{to}. Quod pupillæ admota candela vividissime se contraherent, & puella quasi nocumentum inde percipiens, caput rotaret. Igitur e lecto statim exemi: minitanti ipsam lapsum Custos ægrorum minis, si caderet, intentatis, erectam servavit, & baculo munitus, eoque veluti vibrans, Convulsionum progressum stitit. Convicta demum puella, fatebatur & surditatem olim, & nunc Epilepsiam, finxisse sese, ne cogeretur munus ancillare obire, cui eam Mater destinaverat.

Hanc in fingendi fallendique artificio crassior, sequebatur astutior Adolescens, quem vaframento suo pluribus me luisse diebus fateor. Mirifice convellebatur toto abdomine, tumque vehementer singultiebat. Ortum porro id asseverabat Mater, quod Emeticum ipsi datum fuisset. Adjungebatque Paroxysmum non raro etiam invadere dormientem. Detentus aliquot diebus in Nosocomio, enemate, epithemate, neuroticis ac paregoricis, sanitati, ut videbatur, restitutus, Parentibus redditur. Vix vero tantisper pa-

ternas incoluerat ædes, quin repeteret Paroxysmos, & a Matre in Nosocomium reduceretur. Fucum suspicatus, privato eum cubiculo inclusi, ubi se solum credens, nobis eum per rimam contemplantibus, tranquille sedebat, nobis intrantibus in Convulsiones Singultusque prorumpebat, nobis egressis iterum sedatus. Imo idem in Paroxysmo contingebat, dum adstantes aliorum cerneret occupatos; nam fictis tandem motibus defatigabatur. Patri arcessito veritatem fateri coactus, ideo se simulasse hæc confessus est, ut a Magistro, apud quem carpentariam artem discere cogebatur, dimitteretur, ædibusque reciperetur paternis. Igitur vel Mater cum Filio collusit, dum etiam dormientem malo invadi affirmaret, vel ipse novit se dormientem vaferrime fingere.

§. V. Versati in hisce Practici ea passim experiri solent, quæ jam enarravi, quo doli latentis fiant certiores: ac præter hæc omnia, bonis unguibus norunt prehensam cutim rudissime vellicare; imo ignem manui, aliisve corporis partibus admove, & si ne id quidem juvat, ignem immediate adplicare solent. Exempla docent fictas Epilepsias ejusmodi tentaminibus se prodidisse.

Attamen & morbum fictum esse, & ne igne quidem posse detegi, non caret exemplo. Scelestissima femina 20. annorum, quæ animi gratia vetulam truculenta manu occiderat, facta in carcere est horridam Epilepsiam, qua longo tempore laborasse credita fuerat, se impio animo finxisse; id quod etiam experimento confirmavit. Morbum enim simulare iussa, ita simulavit, ut quivis fere crederent fictum morbum in verum demum abivisse; iussaque medio in paroxysmo surgere, & tranquille ambulare, surrexit, ambulavit. Hanc nos, Illustrissimus Præses, Spectabilis Decanus, & Clarissimi Professores, supremo jussu, nomine Inclytæ Facultatis Medicæ examinantes, eadem audacter

§8. DE EPILEPSIA ET CONVULSIONIBUS.

proferentem, & repetentem audivimus. Et quod res est, ostendit nobis tres foedas in manu cicatrices, quas ipsi igne Chirurgus, urendo veritatem exploraturus, olim inusserat, quasque inuri sibi adeo tranquille pertulerat, ut ultra nemo de certitudine Epilepsiæ dubium moveret. Quis crederet remedium, adeo ceterum infallibile, quandoque turpiter fallere posse? Melius profecto in hac scelestissima muliere Parisinum successisset experimentum. Cum enim quisquam ad Epilepsiam in platea adstantium fucum subolfecisset, iussit convulso paleam sub sterni, ne sibi læderet: quo facto, utrumque paleæ extremum flamma incendit, effecitque, ut vaferrimus homo fulmine citius fugam capesseret.

§. VI. Sed & aliud Convulsionum genus hic memorandum est, quarum autor, horresco referens, Sathanas dicitur. Utroque in sexu id expertus sum. Plures feminas, quas a diabolo obsessas vulgus non modo, sed & Sacerdotes jurabant, AUGUSTISSIMA IMPERATRIX ad Nosocomium practicum deferri iusserat, examinandas. Examinaui porro easdem eo munitus principio, quod homines a dæmonibus revera obsideri, ut ajunt, queant; quodque id invictis argumentis tum ex Novo Testamento, tum ex genuina Historia Ecclesiastica, & SS. Patrum doctrina, petitis, indubitatisimum sit; ut meridiana luce evidentius Illustrissimus Præses, cap. de Epilepsia, demonstravit: sed simul eo principio, quod sæculis posterioribus, præsertimque corruptissimo nostro, millenæ fingantur fallaciæ, quas utinam Simpliciores Monachorum, Sacerdotumque, haud ita foverent! Horum porro principiorum ope fraudem facile detexi, detectam revelavi. Ubi igitur res mihi constabat, sic egi: Custodes ægrorum, singulos bona aquæ amphora munitos in acie collocabam, ut mox, dum ad auditum venerabile DEI nomen, nominave Sanctorum, rerumque sacrarum, fictus

fictus diabolus corpora pro more agitare, integram amphoram unico ictu in faciem, pectusque profunderent; idque ita, ut si ad primam profusam insultus non cessaret, suam ordine omnes evacuant. Prima utique vice amplo satis aquæ dolio indigebam. sed cum intelligerent omnes deinceps Convulsiones hanc sortem habituras esse, non habuerunt postmodum ullas, sed integre sanæ apparuerunt.

Nemo in nos, confido, quod rude adeo & incomptum experimentum tentaverimus, tanquam in profanos, indignabitur. Eramus aliis argumentis plane convicti de fraude nefanda; sed ejus fabricatores publice convincendi erant. Ad exhibitam v. g. sanctæ Crucis imaginem, aut ad alias res sacras, quas corpori adplicatas illico diabolum revocare ferebant, videramus quidem statim id, quod prædixerant fieri: sed quando easdem res sacras involveramus, ut, quid essent, non adpareret; involutasque eisdem applicueramus, Convulsio nulla excitabatur. Si quoque rude lignum aqua sacra aspersum esse dicebamus, eoque corpora tangebamus, furebat diabolus; itidemque si ipsa corpora aqua lustrali aspergebamus; sed æque valide etiam, dum aqua mera utentes, tantum fingeremus eam aquam sacram esse. Igitur fraudis certi, reliquum experimentum duntaxat instituimus, ut dolus omnibus patesceret.

Igitur sanctissimæ nostræ Religionis veneratione & amore ducti, debuimus ea confundere, quæ illam adeo dehonestent: & ex corde vovemus, ut ii, quorum est Catholicam Religionem tueri, propagare, & ornare, a depravata aut malitiosa hominum idea fovenda, statuminandaque, abstinerent; & sive per se, sive per alios, eadem, quæ nos, tentamina instituerent. Utique haud tam sæpe res ad Religionem spectantes, ludibrio & irrisioni exponerentur, nec ipsi illi, fraude postmodum detecta, ignominia confunderentur.

Pro-

Profecto si ad doctos hominum dolos, eruditamque vafritiam, Medici se non aliquantulum cautos; atque subargutulos præstent, & artem suam, & se ipsos, ludibrio continuo exponunt. Casus quotidiani sunt. Haud ita pridem femina aderat, quam ipse Confessarius, tanta Religione pollere, tanto eminere pietatis exercitio, assererat, ut si Sancti in hac tellure haberentur, hæc saltem Sancta habenda foret. Anxietatibus, & plane singularibus faciei convulsionibus viciniam totam in commiserationem ducebat. Hinc illam in Nosocomio suscepi, & bona fide aliquantis per deceptus, tandem attentior in rem detexi pulsum & ante insultum, & sub insultu, postque eundem, nunquam non optimum esse; dum de prostrato prorsum appetitu conquereretur, eam integram suam portionem avide abligurire; & durante paroxysmo me manibus meis ita vultum ejus componere posse, ut Convulsiones plane cessarent. Convictus doli ego, turpitudinis eam suæ, suæ hypocri-
seos, convincere annitebar, sed incassum. Alio ergo modo convincenda erat. Cura per aquam, ut in dæmoniis fictis instituta, effecit, ut Convulsiones redierint nunquam, licet adhuc per 12. dies in Nosocomio detineretur. Sed ne tunc quidem finis fingendi. Quippe a facie malum in pectus delapsum esse, continuumque creare anhelitum conquerebatur. Fraudem ipsa prodidit dum liberrima, & longè producta respiratione fruebatur, quando per horæ quadrantem mentem ejus grato, quem cum illa miscbam, sermone, a decipiendi studio abduxeram.

C.A.

De Calculo, Uva Ursi, Lithontripticis Dictis, &c.

§. I. *Historia hominis a diuturnis calculi doloribus Uva ursina liberati; eaque occasione describitur remedium, quo sibi olim multum profuerat.* §. II. *Alius Calculosus, qui quodam remedio multum levatus, deinceps vero minime, ab Uva Ursi juvabatur; viribus autem penitus extenuatis moriebatur. Miranda ejus Anatomie. Non curat Uva ursina, quos Lithotomia non curasset. Recensio multorum, quæ vocant, Lithontripticorum; quæ probantur Uvæ Ursi viribus minora.* §. III. *Uva tamen quosdam non nisi tarde admodum juvat, imo nonnunquam Recidivam post se relinquit, si non continuatur: his sectio suadenda, ne degeneratio partium immedicabilis fiat.* §. IV. *Congenitus verosimiliter calculus felici sectione curatus. Anceps hæc curatio, cum omnibus eam suadentibus, dissuadentibusque, argumentis enarratur, acutissimusque illi mox subsequens morbus: tum etiam urinæ phænomenon, Uvæ Ursi necessitatem, etiam post sectionem indicans. Subjunguntur, intermiscenturque observata circa Lithotomiam, & incommoda, quæ illa nonnunquam post se relinquit.* §. V. *Urinam Calculosus reddit, in qua, dum in vitro quiescit, lapilli generantur. Homini huic Uva Ursi mirifice confert. Puer calculosus, quo toto tempore Stepfenianum remedium sumit, calculosa ramenta cum urina copiosissima emingit; sectione nihilominus liberandus. Non fuere soluti Calculi ramenta, sed corpora genita a materia terrea copiosa, in vesica præsentia. Forsan generalis Calculosorum ejusmodi Dispositio est. In contrarium autem affertur Historia Rev Kirkpatrik, & Quadraginta Calculosorum, in Actis Acad. Reg. Scient. Paris. ex quibus Cl. Morandus concludit id proprie effectum esse remedii*
An-

Anglicani, viresque ejusdem Lithontripticas hinc demonstrari. Argumenta contra hanc sententiam. §. VI.

Novum experimentum ostendens id multiplici observatione constare, quod hæc ipsa Diathesis Calculosis communis sit, quodque sincere loquendo Stepfenianum Medicamentum, si forsan sapone, ac calce, quibusdam levamini est, plurimis tamen ita hanc in Calculosis dispositionem augeat, ut id jam fiat in vesica, quod alias in matula. Conjecturæ quædam circa Lithiasin, & circa originem copiosæ adeo calcarie materiae. §. VII.

Binæ nostræ methodi in calculo videntur cæteris hucusque cognitis anteponendæ. Vires horum omnium vere Lithontripticas nulla experimenta adstruunt. Unde cura integra non est, sed egregie adeo pallians, ut homo æque liber sit ab incommodis morbi, ac si calculum non haberet. Nec calculus extra corpus humanum in aqua calcis magnam partem solutus, aliud docet. Tandem problemata proponuntur circa causam hujus indolentiæ.

§. I. **S**patio elapsi Academici anni frequentiores quosdam olim morbos, observavimus rariores; Paralyfin nempe, Calculos, ac systematis urinosi alias affectiones: haud tamen ita raros, quin novas observationes colligere potuerimus, quorum præcipua dabo, una cum nondum communicatis antiquioribus.

Vir mediæ ætatis a 14. annis dolores in mittenda urina percipiens, cujusdam consilio usus est quotidie, spatio novimestri, septem nucibus Avellanis, & novem Juniperi Baccis. Quo remedio, postquam urinam vini fœcibus similem trimestri tempore minxisset, vitam diu tolerabilem duxit. Tandem tamen dolores redierunt, & urina anni abhinc spatio glutine copioso scatet, validique adeo urgent tenesmi, ut Intestinum Rectum ad pugni molem extrudatur. Remissionis tempora observat nonnunquam. Et quæ utilia quondam remedia fuerant, ea usu nunc cassa ex-

peritur. Calculus, Cathetere inducto, manifestus adparuit.

Integris sex mensibus Uva Urſi, & opiato nocturno, uſus, fere convaluit, ut leviora, quæ nonnunquam ſuperſunt, incommoda non curet, remediumque, quod ceterum gratis habet, & facile ſumit, prorſum negligat. De industria formulam remedii quo malum quondam compescuerat, addidi; ut plura in rerum natura exiſtere intelligeremus, quæ hæc ærumnas mitigent. Aliud ſequens hiſtoria dabit.

§. II. Vir 32. annorum a 4. ætatis anno urinæ difficultati obnoxius vixit, variosque excrevit calculos. Ad vitæ ſuæ annum 24. mulierculæ conſilio, liquore uti cepit, qui odore ac ſapore Therebinthinam referret, eoque integri ſeptennii ſpatio optime ſe habuit. Pauper ipſe, cum liquori ſolvendo ultra non eſſet, ſubſtituit Juniperi Baccas, immenſaque devoravit quotidie copia. Tandem vero redeuntis doloris crudelitate iterum victus, antiquum liquorem repetivit; ſed jam citra levamen. Doctiſſimus *Gleisner*, qui jam *Græcii*, *Styriz* Metropolis, praxin magna cum prudentia & laude exercet, miſeri hujus curam ſuſcepturus mecum conſuluit, datisque cum Uva urſina, & Opiato, traumaticis ob puris emincti copiam Decoctis, ingens ſolamen homini attulit, & a doloribus per tres ſeptimanas immunem præſtitit. Homo tamen labescentibus ſenſim viribus contabuit, periit.

In cadavere renes magni, ſiniſter præprimis, ſaccos pure plenos referebant. Ureteres ita ampliſſimi, ut ſiniſter Intestinum Colon amplitudine ſuperaret. Veſica circum calculum contracta, ac plane ulcerofa. Calculus uncias quatuor, una dragma minus, pondere pendebat, fuscus uno latere, altero cinereus.

Confirmari dato exemplo cernimus, quod Tom. I. variis anatomicis obſervationibus poſueram; eos nimirum Uva Urſi non curari, quos Lithotomia curare

non potuisset. Calculi quippe sectio degenerationem ureterum, ac vesicæ, renumque, non emendat, non aufert. Deinde ex enarratis patet solamina plura adhiberi posse, quibus longa annorum serie sopiantur hæ calamitates. Occasione liquoris Therebinthinam referentis memini olei dicti *Harlemensis*, apud *Batavos* famigeratissimi, quod Therebinthinam odore ac sapore quoque multum æmulatur. Equidem nocet multis, aucto forte stimulo, aliave ejus qualitate; sed plures tamen novi, qui ejus usu per annos sese præstent doloribus immunes. In Millepedibus cum Oleo Vitrioli Rostochii *Laurenbergius*, in *Dissert. de Lithontrip.* ad *Hoyerum*; in Olei Vitrioli rectificatissimi usu copiosissimo *Schulzius* (vid. *Disp. Chir. in Collect. Ill. Hall. tom. 4.*) efficax ad calculum remedium invenisse se autumarunt. *Uva Ursi* tamen reliquis palmam præripere videtur, quia & pluribus prodest, & constantes curas, calculo etiam manente, efficit.

§. III. Porro quanvis celer in multis ejus effectus sit, in aliis tamen tardus admodum observatur; id quod in bienni infante, ante triennium mihi exhibito, præprimis observavi. Etenim datum per 4. menses remedium vix juvabat quidquam; deinde inconstanter; jam vero ab anni elapso spatio constantissime: ita tamen, ut si semper bene valentem esse puerum Parentes velint, pulveris usum intermittere nunquam debeant. Asper calculus ipsi ante triennium deprehensus, similis etiam hoc anno, repetita per Catheterem exploratione, inventus est.

Hic sane puer non eum remedii habuit, quem alii, effectum. Alii enim post longum ejus usum nesciunt ultra se calculo laborare, quanvis a longa die remedio carentes; hic si diu intermittat, a redeunte dolore ad idem confugere cogitur. Quare si hoc anno id non emendetur, facile proponemus Parentibus Lithotomiam: cum ab una parte *Uva Ursi*, magnopere licet ipsi

ipsi proficua, clare tamen innuat aliquam, quanvis forte nondum valde notabilem, urinosi systematis degenerationem; prout observata Tom. i. data docuerunt: ab altera parte metus est, ne a diuturniore medicamenti usu vel abhorrere puerulus, vel desistere Parentes, incipiant, quod remedio dudum non adhibito, malum sensim renasci videatur: quo in casu miserimum in statum puer dilaberetur, neglectuque auxilii in Vesicæ, Ureterum, Renumve, immedicabilem incideret degenerationem. Ita simili in casu hoc anno fecimus.

§. IV. Quippe mense Februario anni 1759. Parentes ad me ducunt novennem filium suum, qui ex quo natus erat, perpetuo ipsis visus fuerat in emittenda urina dolere, ejulare, eamque nunquam naturaliter, sed perenni reddere stillicidio. Ærumnis hisce pauperes pedetentim assueti medelam non fecerant; jam vero cum sine commiseratione intolerabiles pueri dolores a 14. diebus adspicere ultra non possent, eum mihi obtulerunt. Immisso cathetere Calculum manifeste deteximus.

Bimestri spatio incredibile quantum Uva ursina profuerit! Renascente nihilominus posthac dolore, omnem curationis fiduciam deposuere Parentes, puerumque omni destitutum reliquere auxilio. Interea ita crevit crudele malum, ut nunc hunc, nunc illum, levandi causa, adierint. Integro demum anno, ex quo puer ultimo nobis oblatus fuerat, elapso, Pater illum hoc mense Majo iterum adduxit, enixe petens, ut eum sectione liberarem. Calculi præsentiam exploraturi, catheterem non nisi cum labore, dolore, hæmorrhagia, inducere valuimus, nec movere inductum: ita ut calculum ea vice non perciperemus. Digito vero in anum immisso, eundem versus vesicæ collum deprehendere videbamur.

Hic optimus noster Chirurgus *Ferdinandus Leber*

E

ego

egoque, rem citro, ultroque, versavimus. Repræsentabamus nobis 1^{mo}. Casum ut fere congenitum, forsitan incurabilem fore, & notabiles nonnullas partium degeneraciones jam adesse. 2^{do}. Uvam Urfi initio prodesse visam, reditum calamitatis minime impedivisse, adeoque non juvante ea, nec Lithotomiam, ex factis antea observationibus, profuturam. 3^{tio}. Vesicæ ad calculum contractionem, tum impedimento fore, ne operatio rite peragi posset, tum si adhuc perageretur, vulnus vesicæ densæ, cartilagineæ, imo scirrhusæ, non coalitutum. 4^{to}. Hisce iisdem difficultatibus fortassis etiam alios permotos fuisse, ut operationem prudenter a sese declinarent; ac proinde eadem nobis non succedente, aut justam deprehendi, aut saltem iniquam calumniandi causam, nos iisdem præbituros.

Sed ab altera parte considerabamus 1^{mo}. Patrem, aliosque, qui nobis puerum commendabant, id ardentè desiderare. 2^{do}. Vires ejus aptas ad subeundam sectionem. 3^{tio}. Ex reditu doloris ad degeneracionem partium paulo forte meticulosius concludi; cum Uva ursina haud sufficienter adhibita fuisset. 4^{to}. Vesicæ validam circum calculum contractionem, indurationemque, tum operationi, tum vulneris consolidationi, impedimento quidem fore; attamen id nondum certo constare. Cavis namque in visceribus nunc summam observari contractionem, nunc iterum relaxationem; adeoque ad eorum contractionem semel, iterumque perceptam, velle eandem perpetuam credere, iniquum fore. Argumento esse experientissimi *La Motte* observationem, qui tertio jam die uterum contractissimum, una cum suo Collega, offendens, partumque lege naturæ impossibilem credens, demum parturientem DEI folius auxilio commendaturus, abiturusque, ultimo tandem explorare tentabat, jamque mirabundus contractionem ita relaxatam deprehen-

henderebat, ut brevior, commodiorque partum vix unquam vidisset expertissimus Embryulcus. Sed etiam mutuæ nostræ circa vesicam urinariam experientiæ, mutuam nobis memoriam refricabamus. Adeoque nec hoc operationem impedire oportere, si nova exploratione contractionis relaxationem deprehenderemus. 5^{to}. Denique si ad sectionem rationes sufficienter probabiles adessent, quæ factam nobis tetamque conscientiam redderent, famæ detrimentum omnium postremum esse oportere, ad quod ii attenderent, quibus proximi salus unice ante oculos versaretur.

Sectionem igitur concludentes, instituimus eam die 26. Maji, præsentibus Magnifico Archiatro *A. Störck*. Cl. Viro *J. Gasser*, dignissimo nostro Anatomies Professore, Viro expertissimo *L. Erndl*, Physico in Nosocomio Civico, Medico prudentissimo, optimo Chirurgo Cæsareo *Homburg*, dexterrimo ad S. Marcum Chirurgo *Reigberger*, Nosocomii Assistentibus, aliisque.

Catheterem, Itinerarium in operatione dictum, non nisi magna cum difficultate Operator *D. Leber*, induxit, sanguine denuo ex uretere profluente: eo vero intra vesicam admissio, urina mox jactu valido, & continuato, Catheteris apertura profiliit, ipseque Catheter commode in vesica movebatur. Itinerarii apice oblique ducto, ut fere 15. gradus notasset in quadrante circuli, si angulus rectus a centro Itinerarii & ad medium Perinæi, & ad latus, ductus fuisset, fiebat sectio sufficiens. Cujus longitudinem cernens Operator, eamque calculi magnitudine, per anum explorata, majorem intelligens, non usus est instrumento famosi Lithotomi *Le Dran*, quo in longitudinali sectione adhuc alia fiat, quæ latus sectionis externum in angulos rectos secet, ut calculo majus spatium pareretur: eo, inquam, instrumento ob vulneris amplitudi-

nem haud egens, illico Conductorem introduxit, & extracto Itinerario Forcipem. Verum cum simul calculum digito invulnere prehenderet, Conductorem, Forcipemque extraxit, ac digitis calculum prehendit, eduxit. Vix quinque minutis tota operatio durabat. Ejulans eo usque puer, mox ad visum calculum præ gaudio exclamabat, veluti hoc momento omnium ærumnarum oblitus. Calculus ovalis, asper, sed mollior; ut si forfice captus fuisset, exteriore sui parte omnino abiisset in grumos, parvosque lapillos. Erat ponderis unc. i. dr. i. scrup. i. Potuit Chirurgus facile perlustrare vesicam, alium calculum, grumosve, quærendi causa. Vulnus illico plumaceo lo texit, & emplastro; repositoque in lectum puero, ventrem tepido oleo rosaceo totum inunxit, ac mappa lanea texit. Emulsionis leviter paregoricæ, & juris carniū, portio modica dabatur alternatim.

Fortunatissimam sectionem horrida symptomata, a nobis fane non prævisa, sequebantur. Post meridiem quippe febris magna, vespere ad octavam maxima, oriebatur; una cum pessimo Peripneumonicorum roncho, tensoque, & asseris instar duro, abdomine. Quare mox novem unciaë sanguinis brachio detractæ, & emolliens cataplasma ventri, oleo bene inuncto, admotum est. Ingravescente autem post mediam noctem febre, roncho, tumore, ac duritie ventris, repetita V. S. fuit. Summe pleuriticus utriusque missio- nis sanguis fuit. Exinde sensim decrevit febris, ac febricula modo per aliquot dies adfuit; urina per vulnus bene effluxit, pusque quarto die ad bona labia deprehensum est. Eluebatur porro vesica sæpius decocto hordei cum oleo lini, ne quid heterogenei in eadem maneret. Emulsionēs paregoricæ diu continuabantur.

Sed de Urethra nunc cogitandum erat. Vulnerata quippe hæc toties per Catheterem, nec amplius stilli-
cidio

cidio urinæ consueto aperta, sed collapsa, nunc facile coire, obturarique, poterat, omni urina per vulnus effluente. Cum enim a secto calculo nonnulli per omnem vitam urinas vulnere stillent, sive ob vulneris non coëuntis malignitatem, vel ob Urethræ coalitionem, metuimus molestissimum hoc turpissimumque incommodum a posteriore causa. Unde liquorem in Urethram quotidie injiciendum esse decrevimus. At vero læti advertebamus maturum urinæ per Urethram stillicidium, ideoque destitimus incepto. Tandem hortatu, multisque promissis, puerum deduximus ad consuetudinem urinam in vitrum reddendi: unde clauso penitus exacta septimana tertia vulnere, ac cicatrice obducto, urinam deinde semper debito tempore retinuit, & in vitrum aut matulam reddere consuevit.

Attamen necdum absoluta cura nostra. Glutinis, calculum vesicæ comitari soliti, & aliquoties puris, copia notabilis in foetente urina quotidie adparuit. An id residuum ejus, quod calculi tempore in vesica præfens, injectionibus ablui, præ tenacitate, non potuerit? Et an vesica hinc inde exulcerata a calculo fuerit? Igitur mox Uvam ursinam dedimus, qua continuata urinæ foetor paulatim emendabatur, & pauculum ultra illius materie nunc prodit.

Quam pulcre hæc Lithotomia confirmat sententiam, quam supra, de varia amplitudine & contractione viscerum cavorum protulimus! Hinc raro desperandum. Prudentia tamen semper opus est, ne vesicam, quo tempore adeo contracta est, importune lædamus. Nunquid, si ter, quater, eandem contractam invenimus, ipsam irreparabiliter contractam esse concludemus? Forte sic est: sed si per vices contrahatur, laxeturque, fieri id potest, ut sæpius in contractionis tempora incidamus, & ut ea tamen haud perpetuo contracta maneat. Ita ut ne tunc quidem, sine ulteriore examine, animum despondeamus.

§. V. Est hac occasione de alio calculosorum phænomeno differendum.

13. Julii hujus anni ad me venit Civis *Cremzensis*, vir 34. annorum, qui per 28. annorum spatium verus Lithiascos Martyr, cum ardore nunquam non minxit rubram arenam, calculos autem nullos. Evacuavit subinde olim, & nunc sæpius ab octo retro annis, copiosissimam albam glutinosam materiem; quæ pauculo tempore sibi relicta, friabiles format, albidosque lapillos. Et hæc quidem in quiete. At si corpus itinere, aliove modo, movet, urinam fuscā, ac stranguriosam deponere solet. Lapillos hos, quorum copiam habeo, diceret quis cretæ albæ majora esse minoraque frustra, ad figuram demum vasis, in quo urina servatur, formata. Incredibile quantum miserimus ille intra mensis spatium Uva Ursi mutetur, idque jam ab ejusdem initio: ut certe spem magnam faciat summi solaminis.

Juvat hic phænomenon referre, quod 20. abhinc annis observavi, una cum celeberrimo Viro W. *Ouwens*, *Franequeræ* Academiæ in Medicina Lumine, ac Celsissimæ Principis *Arausionensis* viduæ Archiatro. Calculosus puer *Hagæ Batavorum* utebatur famoso Anglorum remedio, *Joannæ Stepfens*, dicto; quod constat pulvere, decocto, & pilulis. Pulvis componitur ex putamine ovorum, & limacibus, domiportis dictis, omnibus vero calcinatis. Decoctum fit ex Saponem Hispanico, seu Veneto, ex calcinata herba dicta Ambrosia campestri, Floribus Chamomillæ, Fol. Fœniculi dulcis, Petroselini & Bardanæ. Pilulæ parantur ex Domiportis calcinatis, semine Pastinacæ sylvestris, seu Elaphobosci, & Lappæ majoris; tum ex Fructibus Fraxini, Rubi Idei, & Oxyacanthæ: horum omnium calcinatorum a. q. s. Cochleare pulveris cum unc. iv. Saponis Hispanici, & Mellis q. s. in pilulas redigitur.

Videbamus porro hunc puerum, magno cum Parentum gaudio, cum urina quotidie emingere fragmenta alba, lapidea, vel calcarea; ejus quidem formæ, ut adparerent veluti excorticantis se calculi ramenta esse. Quavis autem longo tempore ejusmodi materiem copiose redderet, calculi tamen symptomata ideo non mitigabantur, neque imminutus deprehendebatur calculus. Ita quidem, ut tandem post collectam magnam ramentis hisce repletam pixidem, puer sectione liberari a magno calculo debuerit.

An ergo in corpore illius pueri idem a glutine, in vesica calculosorum contento, productum est, quod in cive *Cremzensi* ab eadem materia in vitro? aut in matula? Et quidem ita, ut indurescens, lapidescensve, hoc gluten, primo adhæserit circum calculum; deinde fragile nimis, per ramenta cum urina prodeuns, exfoliati in dies calculi specie deceperit? Utrique si binos hosce casus inter sese conferamus, videremur ejus fere convicti esse, quod talis sit calculosæ urinæ dispositio, ut quandoque suo in glutine, sive dum intra vesicam est, sive extra eandem, petrificantem, ut ita dicam, hanc materiem gerat. *Cremzensis* enim nihil sumsit, quod ullam habeat cum *Sepfeniano* remedio affinitatem; ut exactissimo examine, iterato instituto, certus novi. Hanc autem sententiam confirmabit afferendum deinceps ex clarissimo *Adamo* exemplum.

Contrariam tamen conclusionem sequentia videbuntur suadere. Rev. *Jacobus Kirkpatrick*, in edito morbi sui diario narrat se, postquam 17. annorum spatium Nephritide calculosa, & vesicæ calculo, laborasset, *Stepfenianis* medicamentis ab Octobri mense 1738. usque ad Aprilem 1739. sedulo usum esse, & quod nunquam antea sibi contigerat, jam ab initio curæ se ejusmodi fragmenta cum urina excrevisse, idemque & durante tota cura, & post eandem, continuasse: ita ut majora minorave fragmenta numero 1036.

eminxerit, prætereaque quinque parvos lapillos.

Sed secundo idem *Kirkpatrick* sæpe numero in matula sua advertit illud ipsum glutinosum urinæ sedimentum, in similem, sed sæpe crassio rem, magisque lapideam, abivisse substantiam. Egregius *Morandus* in *Act. Acad. Reg. Scient.* anni 1740. in sua prima dissertatione super *Stepfenianis* medicamentis, observationes nobiscum comunicans, quas circa 40 homines, iisdem usos, jussu Academiae fecerat, adnotaveratque, asserit illos homines passim omnes solere, *Communement ils ont rendu &c.* ab ipso remedii principio, cum urina gluten, albumque deponere sedimentum; quod dum fervaretur, atque siccesceret, in flavum pulverem abiret; huncque pulverem, dum igni imponeretur, animale quidquam redolere. Plures porro non nisi hanc solam materiem produxisse; alios autem etiam veluti *crystallizatas* laminas, talco perquam similes; alios squammas lapideas, easdemque convexas; nonnullos dura fragmenta calculi; quosdam denique lapillulos. Additque eos, qui ante remedii usum rubram mingere arenam consuescerent, eandem sub remedio ultra non reddere.

His ita utrinque positis, qui ab una parte considerat in glutine calculosorum, qui *Stepfeniana* medela nunquam usi fuerint, hanc calcariæ aut lapideæ materiæ genesin haud ita descriptam esse; & e contrario eandem a glutine urinæ eorum, quibus hæc medela exhibita fuerit, fere inseparabilem esse; in eam facile sententiam abire forsan potest, quod ab eodem remedio miseranda ad Lithiasin diathesis passim generetur, illudque ideo augere potius calculum, quam solvere, conterereque debeat. Equidem contrarium laudatus mox *Morandus* in altera sua dissertatione *Act. Academ. Reg. Scient. Paris.* anni 1741. evincere conatur; dum calculum hominis, qui post ejusdem remedii usum, crudelitate morbi aucta, periisset; dum duos alios cal-

calculos binorum hominum, quos remedio frustra usus sectione servare oportuisset; plenos invenerit inæqualitatibus, crenis, foraminibus. Fateor, cum claro hoc Scriptore in eandem olim sententiam abiveram, præ argumenti probabilitate: sed ab eadem discedere observationes postmodum captæ jubent, cogunt.

Observo enim 1^{mo}. & civem *Cremzensensem* lapideam hanc, aut calcaream materiem abundanter reddidisse, licet nec hoc famoso olim remedio, nec illi confimili, unquam usus sit; & *Haganum* puerum, post tantam emissæ hujus materiæ copiam, nullam calculi, sectione educti, solutionem exhibuisse. Considero 2^{do}. præclaram remedii famam velocius forte evanidam, quam natam fuisse; ipsosque *Britannos*, ab octo & pluribus retro annis, in aqua Calcis cum Sapone, vix ulla *Stepfeniani* remedii facta mentione, omnem fiduciam collocare. Sed dico 3^{tio}. ejusmodi calculos inæquales, ac veluti corrosos, foraminosos, hinc inde pumicosos, frequenter reperiri in his, qui illud remedium non adhibuerint; hasque præterea inæqualitates calculi æque ab adposita inæqualiter materie, quam ab eadem soluta & ablata, produci posse.

Fuisse tamen, quis oggeret, quos observationes allatæ integre curatos affirment. Respondeo nondum convincentia, quæ id statuunt, argumenta esse. Equidem copiosior Calcis, Saponisque, usus, multis profuit, ut Nobilissimo *Horatio Walpole*, ut Homini nostro *Tom. I. Rat. Med.*, ut ibidem *Viro militari*, & ut novum exemplum adhuc præ oculis habeo. An vero ideo, qui remedium *Anglicanum* sine noxa tolerantes, levamen inde experiuntur, curati dici debeant? Et *Kirkpatrik*, & reliqui Angli, Gallique, quos inde curatos fama ferebat, vix notabili tempore a remedio destiterant, dum promulgarentur eorum curationes. Imo ipse *Kirkpatrik* vix ab illo cessaverat, quin lum-

borum se vexari dolore denuo conquereretur; quem tamen in gratiam, ut apparet, remedii, Lumbagini, quam Nephritidi, acceptam ferre maluit.

§. VI. Sufficiat porro, occasione experimenti civis *Cremzensis*, ea argumenta attulisse, quæ *Anglicanum* medicamentum laudent, vituperentque. Superest meam paucis opinionem dicam, quam novo experimento fundabo.

Urinas enim varias calculo laborantium collegi, gluten inde separavi, & in aëre aperto, limpida urina abjecta, posui. Brevis glutinosum hoc exaruit, & dr. 2. aliquando dr. 3. materiæ lapideæ ad figuram vasis formatæ exhibuit. An autem non detur calculosus, quin idem phænomenon in ejus urina adpareat, nondum assero; sufficiat experimenti demonstrasse frequentiam.

Summa ergo rerum hæc esto: Quivis homo, etiam sanissimus, calculi rudimenta in se habet, eo quod solida corporis continuata vitæ actione deterantur, abradantur, humoribus misceantur, & magnam partem per urinæ vias eliminantur de corpore. Hinc etiam pro magna parte oritur terra illa subtilissima, quam Chemia in urinis invenit. Nullam inde labem sanus homo habet; quia ex alimentis tantum ac tale deperditorum loco adplicat, quantum & quale deperditum fuerat: deinde cum nulla in itinere obstacula terrea hæc materies offendit, innoxie, integreque de corpore eliminatur. Huic nunquam calculus nascetur. At vero si contingat vel minimum corpusculum alicubi hærere, ut v. g. fibrillæ portionem suppurando solutam, aut tantillum puris mora exsiccati, aut grumum sanguinis, &c. id tunc inde proficisci potest, ut terrea materies ad ejusmodi obstaculum retardetur, adplicetur, & adhærescat: id quod dum continuo sic pergit, ideam calculi nobis facile format.

Sed 2^{do}. Experimenta, ut vidimus, docent in urina cal-

calculosorum multorum copiosam materiem terrestrem haberi, quæ in his cito, in illis tardius; in quibusdam ex ipsa urina stagnante, in aliis duntaxat ex asservato post effusam urinam glutine; cretam quandam, lapillosque formet. Quæri hic potest, num omnis illa cretacea materies tantummodo a solidis humani corporis detritis? An vero dentur alimenta, potulentæque, quibus subtilissima hæc terra contineatur; quæ idoneo vehiculo mista, lacteorum oscula subeat, cum sanguine commisceatur, ab eodem per urinam ablueatur? Sane Regiones, in quibus calculosos vix invenire est, ut v. g. multi *Lombardiæ* loci, ejusmodi suggerunt suspensionem.

An præterea calculosam diathesim id demum appellemus, quod efficiat, ut terrestre id, quod in aqua, quod in alimentis, quod in vino est, minus subigatur, ad sanguinem vehatur, cum sanguine commisceatur, iterumque humorum circuitu, ac vi vitæ non muteatur, & in renibus tandem cum urina secernatur?

Nunquid etiam Arthritica materies eidem producendæ apta? Utique, cum Arthritidem ultimæ digestionis defectus efficiat, videntur minima quædam elementa terrestria immutata manere; eaque ut ad juncturarum arteriolas adplicantur, ita etiam ad eas renum adplicari posse, & urinas generare calcareas. Hujus mentis clarissimus *Adamus* est, in dissertatione anno 1740. edita, occasione sexagenarii hominis, qui perpetuo rerum aut saccharo, aut lacte, paratarum, impensus amator, Arthritidi, quosvis occupanti artus, obnoxius ultra 20. annos vixerat; dolorum vero per-tæsus, eosdem novem abhinc annis Theriacæ emplastro sopiverat. Unde in periculosum morbum primo prolapsus, dein anomalam prorsus Arthritidem in multis internis corporis partibus per vices expertus erat; a quinquennio autem acerbos vesicæ urinariæ dolores crebro repetentes, Dysuriam, & varia alia cal-

calculi vesicæ symptomata. Biennium erat, quod ramenta calculosa, nucum putaminum instar concava, copiose emingeret; annus autem, quod his ramentis absentibus mucum cum urina redderet, qui in cretaceam abire materiem solet. Et quod præprimis notandum, Podagræ accessu lotium eo mucro carebat; Podagræ recessu scatebat eodem. Confirmat deinde hanc suam de materie Arthritica ideam Autor eruditus variorum Scriptorum testimoniis. Quin etiam exemplis demonstrat calcaream Arthriticorum materiem non modo ad vias urinarias, sed quoque ad quævis alia corporis loca concretiones producere lapidosas.

Sane quæ mihi hanc sententiam probabilem reddant, plures habeo rationes. Arthriticum hominem Nosocomium XV. mensium spatio aluit, qui ab annis quindecim tum colli vertebri, tum pedum manuumque ambarum articulis, calcaream materiem excreverat, & etiamnum excernebat. Primo tempore urinam pallidam, & admodum furfuraceam emittere solebat; ultimo autem semianno, multo semper pure, una cum furfuribus, onustam; denique multis ante obitum diebus & limpidam, & paucissimam. In cadavere nullus ullibi puris fomes: verum ipse sanguis, qui incredibiliter paucus in corpore supererat, adeo polyposus fuit, ut vix guttula ejus inter secandum prodierit; quod, ut obiter notem, clare ea confirmat, quæ Tom. I. Cap. II. de Puogenia scripseram. Quod autem maxime ad rem nostram; Renes ambo in corticali sua substantia crassi & ampli, omnino arenosi erant, ita ut quacumque in parte nitido semper cultro secarentur, novam semper arenam proferrent. Quippe calcarea materies hujus Podagrici partim ad renes delata, videbatur jam urinam calcaream productura fuisse, nisi eadem vasorum urinam secernentium ora obstruxisset, hincque tum urinæ secretionem fere im-

pedivisset, tum ipsam corticalem renum substantiam reddidisset arenosam. Calculosus ceterum nunquam fuit.

Præterea relatus a *Sigismundo Koenig* ad Societatem Anglicanam casus Juvenculæ, quæ post enormes artuum dolores demum in plurimorum, eorundemque majorum, calculorum vomitum inciderat: descripta *Weismanno* historia quinquagenariæ, quæ crudeles Arthritidis dolores perpeffa, tandem tum intestino Recto, tum ipsa vulva, plurimos excreverat lapillos: notata denique ab ipso *Clar. Adamo* enarratio *Schneideri* de INVICTISSIMO IMPERATORE MAXIMILIANO II., qui Podagra gravissima conflictari solitus, calculos in corde gessisse post mortem inveniebatur: hæc, inquam, omnia *Cl. Viri* sententiam mirificè fulciunt.

Porro quod concavas Podagricus ejus reddat has concretiones, id vel ideo est, quod calculum in vesica habeat, ad quem applicata hæc materies, hanc formam induat necesse est; vel quod vesicæ ipsi, forte contractæ, qualis calculosorum frequenter reperitur, se applicando, eam figuram adipiscatur. Prius tamen enarrata symptomata probabilius reddunt; & Catheteris, quem non adhibuerunt, ope, certum, ni fallor, fieret.

Tandem 3^{io} compertum esse vidimus, calculosos homines ab *Anglicano* medicamento sic disponi, ut materies illa, toties descripta, jam in ipsa eorum vesica lapidescat. Infaustum ergo remedium hoc tam a priore dici deberet, quam tale esse experimentis comprobatur.

§. VII. Ex omnibus hucusque dictis evidens demum fit binas nostras in calculo methodos ceteris omnibus, hucusque per alios laudatis, tum præstantiores esse, tum constantiores. Curæ enim id mihi fuit, ut, quotquot eorum, qui alterutra curati, indagari po-

tue-

tuerant, quærentur, examinarenturque sedulo, utrum ab omnibus symptomatibus immunes esse persisterent, nec ne; ut demum, si relaberentur, genuinam relapsus historiam cum publico communicarem; at vero curæ perstant. Prima nostra methodus vere *Brittanica* est: eandem tamen, æquali copia lactis ad aquam Calcis adjecta, promptiorem, felicioremque, invenimus. Unde etiam eandem *Stepfeniana* methodo, licet nonnulla cum illa communia habeat, tum efficacior, tum humano corpori per omnia tutior, existimamus. Altera vero methodus, quam compendii causa, nostri Nosocomii voco methodum, Illustrissimo autem Præsidi gratus debeo, numero plurimas constantes curas effecit.

Facile ex his omnibus patet, nec in nostris remediis, nec in omnibus per alios recensitis, vires inesse Lithonripticas, quantumcumque id de suis multi jactitarint. Experientia fane convincere omnes debuit, tum in paucioribus his, quos *Anglicano* medicamento dudum frustra adhibito, sectione liberare a calculo oportuit, tum in omnibus, quibus remedia nostra profuere. Quippe fuimus in eo Chirurgis Gallicis fortunatiores, qui, teste *Morando*, a nemine eorum, quos *Stepfeniana* remedia juverant, id obtinere potuerint, ut se denuo Cathetere examinandos præberent: dum interea nostri voto morigeri, calculi, ejusque nonnunquam asperioris, præsentiam, nobis demonstrarint.

Nunquid tamen calculus vesicæ, longiore tempore in Aqua Calcis maceratus, non solvitur? Solvitur certo multorum mensium spatio, modo Aquæ Calcis additus detur ad calculum, auferendo sæpius id, quod in ejus circumferentia pumicosum ab aqua redditum fuerat; ceterum minime. Ita demum trium mensium spatio solvi præcipuam majoris calculi portionem. Similiter in experimentis suis calculos in Aqua Calcis
sol.

solvebat Doctissimus Vir *Carolus Alston*, famosus Professor *Edimburgensis*, scriptis clarus. Videatur in egregia sua *Diff. de Calce viva, & Aqua Calcis*. Verum in vesica humana neque calculus scalpello abraditur, neque illibata virtus Aquæ Calcis ita vesicam ingreditur, ut in experimentis nostris. Non mirum ergo hominem, qui 1600. libras Aq. Calc. spatio sex mensium biberat, jam post tertium illibatæ valetudinis annum adhuc calculum in vesica gerere, ut exploratione Catheteris constat.

Quærat porro nemo a me, lqui fieri id, qui concipi queat, quod homo calculum in urinario systemate gerens, secernendi tamen, excernendique urinam, perfectam exerceat functionem; & adeo indolens vivat, ac si calculum non haberet? Sufficiat rem, captu difficilem, observatu constare. Præcedenti Tomo, observationis frequentiam plurimis exemplis demonstravi, quæ exempla ab Autoribus notata, collectaque fuerant, priusquam quæstio præsens existeret. Nunquid si ve in humoribus humanis, si ve in ipso urinario systemate, aliquid existit, quod applicatum calculo, dolores, spasmosque excitet; quodque ipsum in quibusdam corporibus vel minime, vel haud sufficienter adsit, ut creet dolores? An hinc ratio petenda, cur inter diuturna tormenta calculosorum nonnulli lucidis fruantur intervallis? An tandem Calx, & potissimum Uva ursina id in humoribus, aut systemate urinario, demant, absorbeant?

C A P U T V I.

De Aneurysmate.

§. I. *Duo Aneurysmata curata, & Tom. I. descripta, egregie curata manent.* §. II. *Aneurysmata non raro*
cogni-

cognitu difficilia, imo etiam impossibilia. Probatur imo. exemplo Aneurysmatis ad Poplitem, quod ad vitæ finem usque Chirurgo imposuit. Anatome. Disquiritur an homo culpa Chirargi periisse credendus sit? Animadversio in Practicos, quibus Collegarum honori detrabere volupe. §. III. Probatur idem exemplo inventi ad pectus Aneurysmatis. Sequuntur ad hos duos casus Corollaria Medico - Chirurgica. Quandonam compressio Aneurysmatis externa prodesse queat, nocere debeat.

§. IV. Origo, ac celer progressus Aneurysmatis arteriæ popliteæ, & amputatio cruris. Considerationes Medico - Chirurgicæ circa arteriarum interceptiones, ac Fungi Agarici ad abscissas arterias adplicationem. Hæmorrhagia letalis, quanvis tanta adhibita esset in operatione prudentia. Anatome. Problemata circa hoc infortunium. §. V. Varia Phænomena Aneurysmatum internorum, eademque palliandi methodus.

§. I. **D**iedianno proxime priorē duarum feminarum historiam, quarum altera compressione simplici, altera operatione, ab Aneurysmate in brachio curatæ fuerant. Caput præsens compositurus, jussi ambas in urbe quæri, & ad me adduci, quo constantiam curæ, inconstantiamve, cum publico communicarem. Lætus vidi utriusque perfectam curam fuisse, ambas sanissimas esse, omnemque, quem vellent, motum, brachio exercere posse. Unice modo conquerebantur, quod ad mutatas tempestates ingrata titillatio affectam olim arteriam afficeret.

§. II. Cognitio Aneurysmatum utinam certior esset; signisque munita pathognomicis desisteret turpissimis erroribus ansam præbere! Hinc infortunia, quæ vel mihi, vel aliis, defectu horum signorum, contigerint, candidus enarrabo: quo demum aut majorem in Diagnostici certitudinem, aut majorem saltem in pertractando eo prudentiam, omnes adipiscamur.

Homo 37. annorum per omnia sanus, mense Octobri 1759. Erysipelate ad internum sinistri pedis malleolum se laborasse narrabat; eoque evanido, dolorem se ad ejusdem cruris poplitem percepisse, deprehendisseque ibidem tumorem, qui mole ac dolore indies augesceret. Hisce compescendis Emplastro Oxycroceo admoto, non modo tumorem ac dolorem poplitis auctos esse, sed integrum crus, pedemque, occupasse.

Hæc porro narrabat Chirurgo, quem medio Januario hujus, quem vivimus anni, ad se vocabat. Attente exploratis ille omnibus, detexit ad caput internum ossis tibiæ quendam veluti materiæ strepitum; in medio vero ejus, externoque capitis latere, materiem fluctuantem. Quantumcunque rem examinabat, malum a vi quapiam externa originem ducere deprehendere non potuit. Itaque crus ac pedem vehementer inflammatum esse cernens, cataplasma emolliens circumposuit illi. Altera die pars affecta abscessus similitudinem hinc inde exhibuit, observatusque antea strepitus, contuit. Die tertio crure ac pede detumescuntibus, maturum fere abscessum poples referebat. Die 19. Jan. turgens pure tumor, ac veluti pus hinc inde transudando propellens, levi scalpelli ictu dilatabatur, effundebatque mox purulentam materiem, sed simul 4. vel 5. cochlearia sanguinis. Levamen hinc tantum, ut indies redeuntem sanitatem æger assereret. Nitrosis emulsis interea utebatur. Sexto vero demum ab apertura die, quis crederet unquam! Hæmorrhagiam ad usque animi deliquium passus est. Involvit, ligavitque, quacumque possibili arte, partem. Adveniens mox Chirurgus citra guttulam effusam sanguinis totum abstulit adparatum. Sanguis igitur ultra non effluxit; debili tamen ægro ronchus in pectore auditur, deficit respiratio, & 12. horis ab hæmorrhagia elapsis moritur.

Re ego percepta, ad ædes me contuli, & emta examinandi venia, Aneurysmaticum saccum pugni magni-

gnitudine inveni, qui ex parva origine, suo in collo vix digitum crassa, in enormem hunc saccum abiverat. De corpore ablatum in liquore servo.

Facile prævideo multos his lectis fore, qui suis in arte Collegis condemnandis assueti, in Chirurgi five ignorantiam, five imprudentiam, acriter invecturi sint, ac si miserandus ille homo Chirurgi culpa periisset. Verum antequam eo perveniant, rogatos eosdem volo, ut, vacuo a præjudiciis animo, ad sequentia mecum attendere velint.

1^{mo}. Aneurysmati generando nulla causa violenta præcesserat. 2^{do}. Nulla Aneurysmatici tumoris signa ex anxietate ad compressionem, vel ex ejusdem pulsatione, aderant. 3^{tio}. Strepitus quidem percipiebatur; sed cum is & in Aneurysmate aliquando, nonnunquam etiam in tumoribus purulentis & aquosis observatur, ad quos Emphysema five ob aëris accessum externum, five ab ejusdem generatione interna, accedit; hinc cum nulla alia Aneurysmatis indicia adessent, strepitus loci ad aliam longe originem, quam ad Aneurysma, referendus videbatur. 4^{to}. Sex diebus continuis apertus tumor pus, nullum vero sanguinem, dedit; id quod alioquin in Aneurysmate, ablata resistantia, impossibile videtur. Equidem in apertura ipsa aliquot effluxere cochlearia sanguinis; sed quis Chirurgorum ignoret expanso vase cutaneo, eoque percisso, quandam hæmorrhagiam observari oportere? Sex sane dies sine ullo sanguine aperto de vulnere transacti, quamcumque Aneurysmatis suspicionem, si qua nata forte fuisset, dispulissent. 5^{to}. Et qui tum in Aneurysmate, tum variis aliis in tumoribus quandoque adest strepitus, jam pridie aperturæ evanuerat. E contrario 6^{to}. communis inflammationis signa, Erysipelas nempe aderant. 7^{mo}. Hæc inflammatio primum malleolum internum occupaverat. 8^{vo}. Nil verisimilius, quam quod Erysipelas Metastasin ad poplitem fecerit, relinquens malleo-

leolum. 9^{no}. Inflammatio Erysipelatosa in abscessum abibat. 10^{mo}. Fluctuatio materiæ manifesto percepta est. 11^{mo}. Apertura facta, pus & mox, & sequentibus exivit diebus.

Suam cuique sententiam integram relinquens, iudico inculpatum Chirurgum fuisse, & concludo ita personatum Aneurysma esse posse, ut decipiat vel oculatissimos. Quo subinde contingente, necesse foret quosvis cordatos Chirurgos Medicosque in defensionem ejus, qui deceptus fuerit, unitos videri, & probe memores principii tum Naturalis, tum Evangelici: *Quod tibi non vis fieri, alteri ne facito.*

§. II. Confirmare idem potest historia sequens. Femina quadragenaria 17. Junii præsentis anni me accessit, conquerens a 3. vel 4. annis ægram se pectore esse: sputa quippe purulenta, subinde sanguine mista, se reddere, cor sibi palpitare, difficulter se respirare, vagosque experiri dolores. Lactasse quidem infantem sese, at vero cum indies emaciaretur, pejusque pectore haberet, ablactasse. Anni spatio menstruis se carentem, nempe lactationis tempore, nunc denuo a trimestri gaudere. Tandem adjunxit a Festo Paschatis, ex nulla nota sibi causa, pustulam primo animadversam esse ad sinistri lateris thoracis costas, & quidem eo a latere sterni loco, ubi cartilagine infimarum costarum pene uniuntur, sterno jamjam inarticulandæ. Parvam quidem dudum mansisse, a quatuor vero retro septimanis in tuberculum castaneæ magnitudinis abivisse.

Tumor examinatus, non pulsans, sed durus & elasticus, veram sui non determinabat naturam. Eo igitur Emplastro Diabotanon tantummodo tecto, curam ad Phthisin pulmonalem potissimum direxi. Spatio trium septimanarum nihil in tumore mutabatur; eo vero elapso sensim emollescebat, ita ut 17. Julii apostema perfectum referret, manifesta que puris fluctuatio genuinam tumoris naturam nunc determinare videretur.

Suspicio itaque indurati, scirrhusi, aut cujuscumque alius mali, prorsum evanuerat, certitudo apostematis aderat, adeoque ejusdem apertura vel ideo maxime suadenda erat, quod Pulmo suppuratus fortunato casu viam sibi extrorsum quandoque capeffat; qua diu aperta internum ulcus demum evacuetur, & sanescat. Duos ejusmodi casus sub oculis præsentēs habebamus; tertium, eumque tristem, lugentes, eo quod, contra monitum nostrum, Balneator salutare hoc incommodum præpostera sua arte delevisset, ægerque jam hecticæ consumeretur. Et quantum casum tractabamus, jam vel ideo desperatum, quod tumor a natura extrorsum ductus, sed ruptus necdum, iniqua vero Chirurghi arte retropulsus, evanidusque, nunc eundem in locum a nobis revocari nullatenus posset.

Igitur tumorem aperuimus, pusque & album, & coctum, eduximus. Erat autem pus illud ratione tumoris parcius; in fundo autem durius quidquam supererat. Igitur tumorem partim maturum, partim crudum esse concludentes, digestivum imposuimus, & Empl. Diach. c. gum., scopo maturandi totum teximus. Biduo elapso rediit. Horrescebamus. Loco expectatæ maturationis pulsus ibidem fortissimus in tota lata basi tumoris, digitumque repellens, observatur; digito vero per aperturam immisso horrendum Aneurysma obstupescimus. Itaque mox consolidandæ aperturæ gratia Emplastrum ad Rupturas Fernelii imposuimus, integramque fere consolidationem spatio trium septimanarum obtinuimus. Deinde tumor Aneurysmatis sensim est imminutus, & in toto tumoris ambitu sub costis manifestum Aneurysma pulsationis vehementia percipitur. Ita ut quod primo detectum fuerit, id modo veluti appendix sit, quæ a magno sacco orta sese inter costarum cartilagine sinuaverit.

De industria bigam hanc Aneurysmatum communicare volui, ut patesceret. 1.^{mo}. Nullum fere morbum esse,

esse, in quo tum facilius, tum turpius, decipiamur. 2^{do}. Posse Aneurysma gigni sine ullo pulsu externo percepto; idque verosimiliter tunc, quando in eodem nascente, mox laminæ concreti cruoris se ejusdem applicant parietibus. 3^{tio}. Posse in membrana adiposa, nascens Aneurysma tegente, inflammationem, suppurationemque, ab affricu, nasci; & copiosum pus omnem ita motum suffocare, ut licet jam forsitan antea pulsatio quæpiam adverti potuisset, eadem nunc minime percipi queat. 4^{to}. Posse etiam educto pure adhuc veram mali naturam latere, si tumor residuus, explicata ad n^m. 2. de causa, non pulset. 5^{to}. Etiam educto pure fieri posse, ut in uno casu per duos dies, in altero per sex; copiosior cellulosa substantia, nondum consumpta, debiliorem Aneurysmatis pulsationem, si qua adest, adhuc suffocet. 6^{to}. Posse quoque reliquam hanc adiposam membranam in pus converti, atque integris sex diebus omnem Aneurysmatis suspicionem, suo effluxu, amovere. 7^{mo}. Videri demum ablata resistantia, vel arteriam subito frangi, vitamque cum sanguine profundere; vel extendi ita, ut latens olim, jam manifesta deprehendatur. 8^{vo}. Consultum esse, ut in posterum, dum nobis purulenti tumores exhibebuntur, quibus aut inflammationes, aut tumores duri, atque ambigui, dudum præcesserint, antequam pus adpareat; idque maxime iis in locis, ubi dura tubercula minus frequenter, quam quidem in collo v. g. aliisque glandulosis in locis, purulenta pro parte fieri solent; ut, inquam, hic consideratissime procedamus. 9^{no}. Oportere demum, ut dediscant Chirurghi Medicos laceffere, ut quidem Publicis Actis fecerint, jactando hos circa plurima incerta, intus latentia, versari duntaxat; se autem maxime externis, ideoque certis, occupari.

Cum optimo nostro Chirurgo *Leber* in hunc casum meditatus, cogitavi, num forte compressio externa hic non conducere? Attentior vero contemplatio nos

docuit, vitium in externa arteria locum non habere neque ejus sedem, præcise determinatam, ibi esse ubi cartilagines jam junctæ firmam basin præbeant. Verisimile maxime ex figura rotunda esse, quod saccus sit, qui per rimam inter binas cartilagines exsurgat, emineatque; quippe propterea vel arteriæ intercostalis, vel cujuspiam alius interioris, degenerationem denotet. Quia nunc egregius *Lancisius* clare demonstravit compressionem simili in casu mortem accelerare, vitalibus quippe hinc angustatis, ab omni externo molimine abstinuimus. Quin & docuit eventus, ut mox monebam, pag. 84. id minime indicari.

§. IV. Arteriæ *Popliteæ* Aneurysmatis novum exemplum habeo. Rarius id descriptum jam ter *Viennæ* vidi. Primum enerravi Tom. 1, pag. 251. Alterum mox communicavi. Tertium autem sic se habet.

Lanio quadratus 32. annorum me convenit 10. Junii proxime elapsi, narrans tres modo septimanas esse, quod sura sinistra sibi intumuisset; duas septimanas, quod ad poplitem tumorem adverterit, dolentem quidem, & mole in gradiendo auctum. Examine patuit Aneurysma arteriæ popliteæ esse, cujus mole venas comprimente, crus ad suram intumesceret, & varicosum fieret. Ab aliis postea relatum est hominem ab alto per multos gradus cecidisse, antequam de crure conqueri cepit.

Vena brachii secta est; serum lactis cum Pulpa *Tamarindorum*, Rob *Sambuci*, ac Nitro, copiose datum; Decoctum adstringens cruri circumpositum; Ligatura idonea, quæ ab omni parte saccum arctaret, Spir. vini rect. intincta, adponebatur; & summa corporis in lecto quies imperata est. Ut autem exactius omnia peragerentur, hominem in Nosocomio servavi.

Hac methodo sura intra quatrimum egregie curabatur; poplitæus vero tumor indies crevit, & pugni demum magnitudinem mole æquavit; ita ut mense exacto,

actō, omnis per compressionem illum curandi spes evanesceret. Unde demum ipsi serio declaravimus bina modo superesse, quorum alterutrum eligeret: vel certam mortem, sive post calamitosum martyrium, sive inopinatam; vel amputationem ambiguam. Hanc ideo ambiguam diximus, quia & per se gravis ac periculosa est, & nesciebamus, quam alte inciperet dilatatio aneurysmatica; quæ quidem si amputato crure altior, vix constringi idonea ligatura valeret; sin autem adhuc ligari posset, tamen impulsu sanguinis novum illico faccum formaret.

Respondit Lanio rem naturæ aliquantisper committere se velle, & Nosocomio valedixit. Interea Balneatoris se curæ commisit. Venam is secuit, multaque applicuit. Tandem prima Augusti per amicos certiores nos reddidit æger de tumoris incremento, & intolerabilitate dolorum: enixe petens, quo recipi in Nosocomium, amputationemque inibi subire posset. Mox eum recipientes, invenimus tumorem longe extensio-rem, inque latus productum esse; dolores autem tantos, ut ne opio quidem largiore sopirentur.

Hinc properandum esse rati sumus. Amputationem, præsentibus iisdem fere Medicis atque Chirurgis, qui Lithotomiæ pag. 67. adstiterant, aliisque, *D. Leber* spatio 7. minutorum absolvit.

Quæsitum fuerat, utrum arteriam majorem, atque unam alteramve minorem, ligatura, an *Fungi Agarici* adplicatione, obturarem? Considerabamus ab una parte ligaturam arteriæ tutissimam quidem semper haberi; non raro tamen intercepto nervo, ejusve ramulis, convulsiones nasci, quibus ars non esset interno externove auxilio compescendis. Ab altera parte *Tom. 2. Acad. Reg. Chir. Par.* tria exempla inveneramus, ab egregio *Morando* relata, felicitis *Agarici* successus in crurum amputatione. Hinc eo fere inclinassemus. Attamen *Parisiæ* exempla *Cruris* referebant, non *Femoris* amputationem. Cum igitur hic de

femoris amputatione ageretur, & quidem de eadem longe altius, ne quid de sacco reliqui faceremus, instituenda, ubi certe arteria longe majoris diametri esset; præterea cum exemplum in iisdem *Actis Parisinis*, in *Dissert. D. Louis*, pag. 395. referretur, quod Agaricum in amputato crure adeo inutilem demonstrasset, ut semihora elapsa totus adparatus auferendus esset, adhibendaque ligatura; rem dubiam experiri noluimus, sed majorem saltem truncum arte ligandum esse, minores vero Agarici fungo obturari posse, unanimi consilio decrevimus. Chirurgus itaque eo modo omnia perfecit, & soliti pulveris adstringentis loco totum vulnus Agarici fungi pulvere crasse textit, Instrumentum tornatile quoque ad arteriam apte comprimendam adposuit.

Hoc pacto nos ab omni hæmorrhagiæ metu exemptos credentes, turpiter tamen nos elusos vidimus; trihorio ab operatione sanguine per universum transfluente adparatum, lectoque toto inde madente. Chirurgus fasciis novis super vetera adductis, arctiusque appresso stringente Instrumento, egoque Diacodio largiore, hæmorrhagiam imminuimus, imoderavimus, stitimus.

Saccus nunc erat amputata in parte examinandus. Arteria supra saccum naturalis magnitudinis demonstrabat amputationem debito peractam in loco esse. Arteria, non ut in casu pag. 82. descripto, uno latere, sed toto suo ambitu in saccum quaquaversum extensum, abiverat, excrescente sepimento membranoso, sed sursum deorsumque abrupto, illum bifariam dividente. Nervus magnus adjacens tota sacci longitudine arctissime cum eodem coiverat. Ipsumque Aneurysma cum superiore portione Gastrocnemii inseparabiliter connatum erat. Unde hominem ita a motu minimo doluisse non mirabamur; quia saccus, nervusque, & musculus, unam exhibebant, eandemque concres-

cretam, atque confusam massam. Membrana porro ipsa postica facci, laterisque externi, adeo tenuis fuit, ut dum vi minima expandebatur, dilaceraretur. Quapropter id certum, quod, dilata operatione, disrumpi cito, subitamque facere mortem, debuisset.

Interim æger noster una atque altera hora, postquam hæmorrhagia cessasset, debilitari cepit, brevi deinceps frigescere, leviozem iterum hæmorrhagiam pati, continuo vomere, pulmone angi, leviter delirare, tandemque vultu convelli. Horis 25. ab operatione elapsis obiit.

Examinavimus tunc serio amputationis locum. Ligatura arteriam majorem apte claudebat; nervum autem minime comprehendebat. Fungus valis suis perstrata adplicatus inventus est. Vulnus integrum pulvere fungi egregie, crassiusque, tectum. Pectore aperto, cor maximum, at pallescens, & vacuum. Vacua etiam omnia vasa majora, arteriosa, venosa; exiguum modo, gracilemque, polypum sua in axi gerentia.

Hæmorrhagia inter operationem, ac trihorio post illam, nata, homo hic tantum amisit cruoris, ut sine vitæ dispendio ultra amittere non potuerit. Levior postea per totum adparatum transsudatio abstulit eum reliquum necessarium sanguinem, vitamque ademit.

Optime tamen cum provisum hæmorrhagiæ videretur, tum Ligatura, tum Fungo, tum Instrumento, quæri potest an Fungi hujus viribus nimium non tribuamus? An vero in posterum forte præstaret majori arteriæ adplicare eundem, quia habet compressio suum punctum fixum ad os; reliquas autem duas, tresve arterias, imo etiam venam majorem, quæ, ligata arteria, aliquando vice arteriæ fungens, terribilem Hæmorrhagiam producit, firma interceptione ligare?

S. V. Aneurysmata interna multa *Austria* habet. Plura curavimus methodo descripta Tom. 1. pag. 257.

multa vero incurabilia manent. Habuimus hoc anno horrenda exempla, costarum remotarum, sterni elevati, motus aneurysmatici terribilis supra mammam dextram, sine ullo motu ad regionem cordis, &c. Hos palliatis utcumque ærumnis solamur, omnem vigilantiam adhibitori, ut post fata eosdem examinemus. Mire interim quosdam levare sequentia demonstrant.

Juvencula fortis, torosa, bene menstruans, 24. annos nata, finiente Septembri 1759. circa inferiora sterni dolere cepit, & quoddam Emplastrum loco admovit. Sed pedetentim aliquid sub cartilagine ensiformi tumere percepit, ad tactum dolere, simulque fortiter pulsare, & somnos valde perturbatos efficere. Cum hæc ingravescerent, venit primo ad me 26. Febr. 1760. Cum Chirurgo & Assistentibus, eam examinans, deprehendi locum pulsanter, palmam manus fere æquantem esse, stanti quidem magis, minus vero jacenti, percipiendum. Malum sensim cepit nocte ingravescere, ac tandem gradus conscendenti respiratio ferre omnis deficere. A pastu quoque pejus habuit. Majo mense minus, Junio parum, Julio nihil ultra femina doluit; pulsatio minime molesta superfuit modo. Itaque quidem, ut jam optime comedat, tranquillime dormiat, & graves ancillares labores, indefessa omnino, liberaque pectore, peragat.

Ad inexpectatam hanc mutationem sumsit tota die serum lactis, cum Nitro, & Cremore Tartari; cubitum vero petens $\frac{1}{6}$ sequentis: ℞. Pulp. Tamarind. Rob. Samb. Syr. Diacod. a unc. 2. Laud. Liq. Syd. dr. $1\frac{1}{2}$. Et quia etiam nauseoso ac debili ventriculo, tum & segniori alvo, prospiciendum erat, sumsit quoque vis quarto mane dr. med. Elect. Hieræ picræ. Optime se nunc habens, pergit sero lactis cum melle quotidie uti, alterno autem die Paregorico.

Dubitabit forte quispiam, utrum hæc femina verum

rum Aneurysma habuerit, an potius Deuteropathicum a ventriculo, pyloro, pancreate? Idque 1^{mo}. quia haud insolitum hic Medicos decipi, ut exemplis patuit, *Tom. 1. cap. de Aneur.* 2. Quia signa adfuere hærentis cujuspian labis in ventriculo, aut prope illum. 3^{tio}. Quia post multa solventia, & repetitam sæpius quartanam purgationem insigniter lucrata est ægra. Huic respondeo: Etiam si res ita haberet, conferret vidisse, qua demum methodo ambiguum hoc malum superetur. Attamen longe verosimilius Prothopaticam esse affectionem; cum morbus medium annum jam emensus esset, priusquam inciperet ventriculi incommoda sibi juncta habere; & antea cum optima functione naturali, solo tumore, dolore, ac pulsu consisteret.

Femina 26. annorum mense Augusti 1758. brachia in altum, onus grave depositura, extendens, medio in pectore crepitum observabat. Paulo post œdemate totius corporis affecta est; quod copioso Rob Sambuci dispulisse se credit. Tussis inde nata, sputumque sanguinis, vespertini quoque horrores, & pectoris dolores continui. Remediis aptis a Tussi multum, a sputo sanguinis penitus, ubi liberata erat, conquesta est 15. Martii 1759. interna, eaque violenta pulsatione os sterni sibi attolli videri. Examine instituto deprehendimus media, eaque inferiore sterni parte tota, ejusmodi pulsum, ut digiti, vi quasi, repellerentur. Cum adderet vehementius ibidem se ardere ac dolere, nec dorso ultra incumbere posse, suspicari Aneurysma debuimus. Tandem pulsatio, tumorque magnus, colli totius anteriora & lateralibus occupabat; dumque se in lecto convertibat, os pectoris veluti sibi findi lamentabatur. Imo & supra sinistram orbitam pulsatio & dolor extendebantur. Nocte aliquoties suffocatum iri se credebatur, nisi erecta sedisset. Demum cordis palpitatio-

nem

nem molestumque in dorso pulsus, conquesta est. Cum omnibus his ærumnis menstruo fluore optime gaudet.

Iterata V. S. & methodo demum eadem, qua ægra præcedens, sensim tantum lucrata est, ut jam dudum vitam maxime tolerabilem gerat.



ANTONII DE HAEN

*Consiliarii Aulici, ac Medicinæ Practicæ, in
Alma ac Antiquissima Universitate Vindo-
bonensi, Professoris Primarii,*

P A R S S E X T A

RATIONIS MEDENDI

I N

NOSOCOMIO PRACTICO

VINDOBONENSI.



LUGDUNI BATAVORUM,
SUMPTIBUS SOCIETATIS.

MDCCLXII.

УКАЗЪ И ПРАВИЛА

16-го числа...
...
...

А Т Е М А

ОБЪЯВЛЕНИЕ

ОБЪЯВЛЕНИЕ

ОБЪЯВЛЕНИЕ



ОБЪЯВЛЕНИЕ

ОБЪЯВЛЕНИЕ

ОБЪЯВЛЕНИЕ

E L E N C H U S C A P I T U M

C A P U T V I I.

De Cardialgia Chronica. Pag. 93.

C A P U T V I I I.

De vario Hydrope ac Tumore Abdominis. 108

C A P U T I X.

De Hydrope Pectoris. 125

C A P U T X.

Problemata & Difficultates. 133

C A P U T X I.

De Calculo Vesicæ Urinariæ & Lithotomia. 165

C A P U T X I I.

*De Cranii Ustione in pertinacioribus Vitiis
Capitis.* 195

C A P U T X I I I.

De quorundam Medicamentorum Viribus. 214

R A.

GENERAL CAPITUM

THE
CAPITUM
OF THE

THE
CAPITUM
OF THE

THE
CAPITUM
OF THE


THE
CAPITUM
OF THE

THE
CAPITUM
OF THE

THE
CAPITUM
OF THE



RATIO MEDENDI IN NOSOCOMIO PRACTICO VINDOBONENSI.



C A P U T VII.

De Cardialgia Chronica.

§. I. *Cardialgia multis oriunda de causis, protopathica datur, & deuteropathica.* §. II. *Scirrhi, ut causæ, suspicionem tum diuturnitas morbi, tum ejusdem pertinacia, haud immerito fecerunt; interea dum remedia nonnulla diu constanterque adhibita, constantemque sanitatem operata, clare demonstrent necdum scirrhum adfuisse, sed alias pertinaces causas.* §. III. *Nihilominus frequens heu nimium! Cardialgiæ causa scirrhus est, quem cognoscendum regulæ artis sæpenumero quidem dant, quamam vero in parte is resideat, rarius viventibus ægris, frequentius in denatis, certo novimus.* §. IV. *Causa in Pyloro protopathica dum adest in nonnullis, jugi ingestorum vix mutatorum vomitu se prodit, in aliis minime: probatur utrumque exemplis.* §. V. *Frequentior ea nihilominus Observatio est, quod vomitus ille adsit, dum vel causa protopathica in Pyloro, vel deuteropathica pone Pylorum est, quam quod non adsit. Historiæ id confirmantes.* §. VI. *Solet eo in casu ventriculus vehementer augeri, nonnunquam sola amplitudine, aliquoties etiam crassitie: vix capitur vera hujus differentiae ex observationibus causæ.*

§. VII. *Quæstio hæc ad plura cava viscera adplicata, varietatem detegit eandem. Discrepantia sententiarum circa utrum aufertur exemplis, quæ indubie demonstrent illum crescendo haud amittere crassitiem, quam non imprægnatus habebat. Tuba, Ovaria, Hydatides, quoque crassitudine tunicarum passim augentur.* §. VIII. *Confirmatur argumentum de difficiliori hujus morbi Diagnosi; dum vomitus vix mutatorum ingestorum diuturni latentissima & insolita plane causa nonnunquam deprehenditur. Prudentia & Præcautiones commendantur, dum ejusmodi insolitæ causæ suspicio est.*

§. I.



ardialgiam Chronicam hic describere animus non est, sufficienter id scholis, scriptisque Medicorum præstantibus; verum ea potius communicare, quæ propriæ observationes ad illam elucidandam contulerint.

Quod ordine ut faciam, præmittere debebo recensitionem variarum admodum partium viscerumque, in quibus hic morbus sedem, originemque, unquam habuisse inventus est.

Ac primo quidem ipse Ventriculus cum Pyloro recensetur, suo affectus in cavo, substantiave. Estque tunc protopathica Cardialgia, quo etiam eæ species pro parte referendæ, quæ N°. 28. 29. 30. 31. recensentur. 2. Oesophagus pone ventriculum. 3. Diaphragma. 4. Pancreas. 5. Duodenum. 6. Omentum. 7. Hepar. 8. Splen. 9. Sternum aut mucrone suo, aut adnato sibi tumore. 10. Musculi Recti abdominis. 11. Vesicula fellis. 12. Mesenterium. 13. Renes & Ureteres. 14. Uterus. 15. Ovaria. 16. Tuba Fallopii. 17. Præternaturales concretiones ac tumores, in appendicibus per abdomen adiposis. 18. Hydatides. 19. Aqua, Serum, Pus, Ichor, Mucus, Sanies, aut

aut quicunque alii liquores, five in vacuum effusi Abdomen, five faccis, hydatidibusque contenti. 20. Affectiones spermaticorum vasorum. 21. Aneurysmata varia. 22. Viscerum variorum degeneratio. 23. Mutuaque eorundem inter sese concretio. 24. Hernia levior, euns, redeuns, sæpe ignota. 25. Prolapsus uteri ac vaginæ varius. 26. Multiplicia intestinorum incommoda. 27. Cephalæa. 28. Nimia debilis ventriculi sensilitas. 29. Hystericus clavus. 30. Peculiares atque insuperabiles ventriculi crampi dicti. 31. Humores acidi, alcalini, fordes, vermes, in ventriculo fixi aut perpetui.

De Cardialgia in enumeratarum partium una, pluribusve, sede; a recensitarum una, pluribusve, causis; innumera quidem exempla nos convincunt; at vero cum de Cardialgia, ut monui, tractatum non conscribam, ea modo tangam, circa quæ meæ, aliorumque, five nuperrimæ, five saltem necdum publice editæ observationes, versantur. Si quæ tandem veterum observata simile quid innuant, ea quoque recensebo.

Multis admodum ventriculus, longo annorum spatio, irritato artis conamine, dolet, nauseat, vomit; & his quidem perpetuo, aliis vero periodice.

Emetica, alvi purgationes, antacida, roborantia, nervina, carminantia, opiata, haud raro, five singula, five succedente ordine data fuerint, levamen afferunt, at passim fugax illud, atque inconstans, sæpe omnino fallax. His omnibus vel protopathicum malum est, quibus ventriculus debilis, aut sensibilissimus, aut multo acore obsessus, aut in fabrica sua varii generis tumores gerit; vel est deuteropathicum, dum vel corrupti humores ex Intestinis, perque Intestina, aut vermes, aut fordes, multave bilis in *πικρόχολοις ἀνω*, in ventriculum sæpius, inexhaustoque fonte, irrepunt: maxime autem quando ille adjacentium partium tumore, durtie, scirrho, premitur, vellicatur, continuoque irritatur.

§. II. Quos mihi hoc morbo laborantes videre contigit, annosum admodum malum passim hi testabantur, & ad oblata auxilia rebelle. Unde scirrhi, aliusve generis tumoris, sive ventriculi pylorique, sive partium vicinarum, ventriculum aut pylorum compri-
mentis, vehemens sæpe suspicio mihi nata est. Incertus tamen atque animo fluctuans, dum sequentia adhibebam, dicere vix possum, quam multis integram attulerim sanitatem, adeoque omnem apud illos scirrhorum suspicionem mente excusserim. Præfari autem oportet incomparabili *Boerhavio* me hanc methodum debere.

Primo ad externam ventriculi regionem sequens ad-
movi Emplastrum: ℞. Empl. de Labd. vel Diabot.
unc. jβ. Camphoræ, Opii crudi, a. scrup. β. gr. xv.
scrup. j. Bals. peruv. q. s. M. Diu gerendum hoc em-
plastrum fuit, dumque laberetur, reficiendum. Et si
quis cutis ardor, vel efflorescentia in nonnullis ejusdem
ablationem nonnunquam posceret, adplicationis con-
tinuationem cutis denuo in plerisque admisit, si sæpius
sapone cum lacte lota, fotaque fuerat. Deinde assum-
fere quovis bihorio aut trihorio cochlearia duo Mistu-
ræ hujus: ℞. Lap. Cancror. unc. β. Ol. still. Menthæ
cum Sacchari dr. iij. in Elæosacch. redacti gtt. x. Spir.
Menthæ unc. j. Laud. Liq. Syd. dr. β. Syr. Menth.
unc. j. Aq. Menth. unc. viij. Est id genus hominibus
tarda passim & sicca alvus: quemadmodum alias sæpius
adverti, ita hic quoque plures fuere, quibus Opium &
Carminantia hujus misturæ alvum maxime naturalem
redderent, vel operationem levioris subinde dati pur-
gantis egregiam perficerent. Haud defuere tamen
nonnulli, quibus vis Acidi potentior, datis cum mistu-
ra pilulis ex Sap. Veneto copioso, cum pauco stimulo
gum. ammon. & mas. pill. Ruffi, infringi debuerit.
Dabantur quoque, quibus ventriculi non ita acor, sed
potius frequens spasmus & debilitas, dolorem conco-
mitari

mitari viderentur: his summe conditum hoc profuit:
 ℞. Cort. peruv. unc. iij. Camphor. Myrrh. a. dr. jβ.
 Syr. Diacod. & Menth. a. unc. iijβ. M. ut sexies de die
 magnitudinis nucis moschatae frustulum fumerent. A-
 derant, quibus opii majorem longe dosim, ad noctem
 præcipue, dari oportuerit. Multi sane homines a Car-
 dialgia penitus convaluerunt, modo, durante cura, ex-
 acte abstinerent ab iis, quæ difficulter digeruntur, & a
 lacte, caseo, aceto, vinis acidis; diætamque alcalescen-
 tem observarent.

Hæc, inquam, dando, his proficiendo, tandem didi-
 ci inveteratos ejusmodi Cardialgicos, eo quod medi-
 camenta sine curæ stabilitate per annos abligurierint,
 incurabiles fere, scirrhoque ventriculi, aut partium po-
 ne illum sitarum, laborantes haberi; curam tamen &
 integram, & perseverantem has scirrhi suspiciones pla-
 ne abigere. Concludere hinc debui plures dari, quibus
 immodicus ventriculi acor fere indomabilis adesset,
 quibus debilitas ventriculi foret insuperabilis, quosque
 a flatibus, a spasmis, a convulsionibus primarum via-
 rum liberare, ferme impossibile videretur; licet nunc
 antacida, nunc paregorica, alio tempore purgantia, a-
 lio iterum roborantia, & carminantia dicta, ipsis sæpius
 exhiberentur; eo quod optima hæc remedia nec suffi-
 ciente copia, nec tempore haud interrupto, nec multa
 horum sociata, nec longo post symptomatum silen-
 tium tempore, fumerentur.

§. III. Quamvis hæc ita se habeant, ultro tamen fa-
 tendum est, ventriculi, œsophagi, pylori, partium-
 que hisce vicinarum scirrhum, morbum frequentem
 esse, quem palliamus potius, quam curamus; nisi initio
 advocati, & signa ejus certiora contemplati, quam qui-
 dem in casibus §. II. lenissimis solventibus, & præpri-
 mis copiosissimo, eodemque pertinaci mellis usu, na-
 scentem hanc diathesim dissolvamus. Hinc juvat men-
 te præsentia hæc signa gerere, quæ Ars observando de-
 textit.

Sunt 1. causæ prægressæ, ut v. g. ventriculi inflammatio, nec benigna resolutione, nec critica evacuatione soluta. 2. Mali diuturnitas. 3. Pertinacia ejusdem ad selecta remedia. 4. Vomitus frequens sub actu digestionis. 5. Loci pondus. 6. Dolorum moderamen a fortiore ventriculi, abdominisque compressione. 7. Ventris externi tactus. 8. Vitia affecti visceris, quod, defectu secretionis, corporis œconomiam plus, minus, turbat.

Exacte locum determinare indurati tumoris, five ipso in ventriculo hærentis, five ejus, qui in vicinia natus ventriculum premit, facile nonnunquam datur, aliquando difficulter, sæpe vero neutiquam. Tot hinc in consultationibus litigia. Versati utcunque in Anatomicis Medici, qui semel iterumque Pancreas scirrhosum invenere; idem posthac perpetuo accusant: legerunt alii, videruntque ex ipso Mesenterio enatum tumorem, qui sursum vergens ventriculo in functionibus suis impedimento fuerit; nihil in posterum, nisi Mesenterium clamant. Sic iterum alii aliud. At vero ingenue fateamur certa signa rarissime dari, quæ ex innumeris causis veram determinent, quæ locum, quo tumor hæreat, quæ viscus, quod occupet, quæ modum impedimenti, naturamque, examussum explicet. Cadavera passim nos erroneæ convincunt sententiæ. Exemplis videre juvat.

§. IV. Per illustris ac longe doctissimus, expertissimusque Vir, *G. Macneven o Kelly ab Agrim*, Fac. Med. Prag. Director sapientissimus, consummatus Pathologiæ ibidem Professor, verum nostræ artis ornamentum, edidit 1760. Dissertationem de *Raro Ventriculi casu*, in quo vomitus ingestorum vix mutatorum, in provecto admodum morbo, impedimentum circa Pylorum hædere indicabat. Probabilis sane hæc dicta de causa sententia erat; haud tamen ita, ut una constaret utrum in ipsa Pylori substantia, an in circumjacentibus par-

partibus, hæreret id, quidquid esset demum, obstaculi. Cadaveris autem sectione patuit scirrhum adesse, eumque ita totum ambitum occupare Pylori, ut transitus per illum vix setæ mediocri concederetur. Eo obstaculo effectum id, ut eam sensim in molem creverit ventriculus, quæ, sacci instar, universum expleret abdomen, suoque fundo inter Rectum & Vesicam insinuans sese, simul causa tenesmi extitisset, frequentisque stranguriæ. Ingens adeo hic ventriculus, ut, referente claro Autore, „ filum arcui majori circumductum, antequam evacuaretur, ulnam Bohemicam, cum tribus quadrantibus, & duobus pollicibus æquaret: minor arcus tres daret quadrantes, cum uno pollice.”

2. Apud *Riverium* observatio *A. Jodon*, *Antissiodorensis* Medici, habetur, hominis nempe qui integro triennio cum tumidissimo ventre *sine vomitu* conflictatus, demum febre & anxietatibus emaciatus, periit. Ipse *Jodon*, qui historiam narrat, anatomen fecit. Hydatis magna in medio pendebat Pyloro, hydatidibus tota scatebat universi ventriculi interior superficies: liquidum vero in hoc ventriculo contentum *nonaginta librarum* pondere fuit. Ventriculus medius dissectus, superabat ulnam *Parisiensem* (quæ media parte *Viennensi* longior) ambo ventriculi ora fere juncta erant. Hic autem homo cur non vomuerit? Quia ventriculus cum Peritonæo arcte connatus. Igitur hic videmus casum, in quo cum omnibus vomendi causis vomitus impossibilis. *Blancard* Cent. 1. N°. 84. vel ipsissimam historiam habuit, vel eam *Jodonis* inter suas retulit.

3. Et rarior ille casus, quem Part. 5. Cap. 2. pag. 18. *Rat. Med.* dedi, in quo ventriculi pars prope Pylorum, ipseque Pylorus, Omenti parvi *Winslowi* crassa duraque productione premebantur, ac præterea peculiari extrinsecus adnato tumore Pylorus compressus erat; ille, inquam, casus vomitum cetera inevitabilem, tamen impossibilem fuisse ostendit, præponderosissimo,

rigidissimoque omento, ventriculum immobilem figente.

4. Quid mirabilius, quam quod 10. Aprilis 1758. in publico auditorio circa hoc ipsum negotium demonstraverim! Ventriculus primo formabat lagenam, sinistrorsum productam, $3\frac{1}{2}$ pollicum; deinde ex fundi sui latere dextro tubum emittebat, diametri sex linearum, qui pedetentim ad sesqui pollicis amplitudinem latefcens, longitudinemque $4\frac{1}{2}$ pollicum æquans, demum pylorum formabat, & in duodenum abibat. Pinguis moles ventriculo adnata, magnamque adeptam duritiem, in causa fuerat, cur ventriculus hanc assumpfisset figuram. Interim homo hic, cujus morbum Cap. 10. probl. 8. enarrabo, ante ultimum suum ac brevem morbum nunquam vomuit. Cujus miri phænomeni si a me causa quæritur, aliam non novi, nisi quod Natura nonnunquam sese monstrosis accommodet. Et quidni? Antiquos scirrhus in cadaveribus reperimus, qui sui signa ita per annos dederint, ut homines subinde per plures septimanas, mensesve, a quovis dolore ac vomitu liberi vixerint. Cur, quod per menses, id quoque non posset per annos, non posset per totam contingere vitam?

5. Aurifaber *Riverii* Cent. 1. N°. 90. ingentem pancreatis ac mesenterii scirrhum gessit, qui pylorum, jejunique principium, ita angustaret, ut omnis fere præcluderetur transitus, quique dolores crearet enormes. Hic homo a tribus saltem mensibus, antequam adesset ipsi *Riverius*, & aliquo adhuc postmodum tempore, neque sponte vomuit, neque dato Emetico vomere potuit, nisi eodem repetito; quamvis ventriculus materie esculenta & potulenta plenus a morte inveniretur. Cur non vomuerit, data historia non exponit: cum autem ex natura morbi vomere debuerit, nec vomuerit tamen, videmus plures dari, qui cum omnibus vomendi causis neutiquam vomant.

§. V. Igitur ut in quibuscunque fere aliis morbis, ita quoque hic miras detegimus exceptiones. Cæterum, si nec ventriculus manifesto aliis de causis a vomitu impediatur, nec forte ærumnis hisce assuescat sic, ut inde ad vomitum non proritetur, solent passim id genus hominum vomere, hocque mox, aut brevi post assumpta; quæ tunc fere immutata prodire cernas. Centena id demonstrant exempla. Novendecim anni sunt, quod publice ediderim Anatomen feminæ, perpetuo vomentis immutata sæpe ingesta; qua constitit omentum geminos digitos crassum adhæsisse ventriculo, jecinori, intestinis, colo, jejunio, duodeno, omnesque has partes in unam veluti fasciam, contraxisse.

Obiit 19. Aprilis anni præsentis prænobilis sanitatis Consiliarius, ac præstantissimus Medicus, *Leopoldus Erndl*, qui sane noverat 15. annorum spatio inmedicabilem sui ventriculi morbum, vomitusque frequentes, prudentia, & solertia sua ita palliare, & moderare, ut in 45. ætatis annum vitam suam inter labores practicos, Vir Deo & hominibus carus, produxerit. Invenimus porro ventriculum sic se habentem: primo instar inversæ lagenæ longitudine 8^l. pollicum, ad umbilicum fere usque descendebat, inde angulo facto assurgens, atque canalem quatuor pollices longum formans, ad Pylorum petebat.

Porro hujus miri phænomeni gemina patuit causa mechanica; quarum prima ventriculus in genere extendendus, altera in hanc præcipue formam mutandus fuerit. Scilicet pancreas sensim indurefcens, auctaque tumescens mole, compresserat retroflexum a Pyloro duodenum; quo effectum id, ut duodenum contra vertebrae dorsi pressum, chymum ventriculo pulsum sæpe retardaverit, imo demoratum sit. Hæc igitur vera causa ventriculi universalis distensionis, utpote accipientis, nec nisi per lucida intervalla dimittentis. At vero immensum jecur æque in toto latere sinistro, quam

in dextro, ultra umbilicum productum, sic formatum erat, ut sub lobo sinistro suo, utpote tenuiore, ventriculus in crassæ lagenæ ventrem abire potuerit; lobo autem dextro admodum crasso, idem ventriculus non potuerit in latus distendi; sed unice supra umbilicum, ubi aliquod spatium inter utriusque lobi pendentis crepidines nactus, angustus plane ille ut oblongum lagenæ collum, aliquantisper decurrebat, & angulo factò asurgebat, itidemque sub crassissimo lobo hepatis dextro, angustiore tubo ad pylorum pergebat. Ita ut evidens sic fiat, quod dixi, duodeni compressione oportuisse, ut universus ventriculus sensim distenderetur; monstrosa jecinoris forma contigisse, ut in sua distensione ventriculus in hanc figuram potissimum mutaretur.

§. VI. Expedit meditationem super hisce malis ultra producere. Viscera cava, Tumores cystici, Aneurysmata, uno in corpore reperiuntur eo tenuiora, quo expansiora; in alio vero quo ampliora, eo crassiora. An lenta extensione, crassitudinem; cita, tunicarum extenuationem referant? id Anatome non ita admittit. In historia *Ill. Mac-neven*, ut sensim mole ventriculus, ita & crevit substantia. E contrario scirrhus ingens *Octaviani a Taxis*, Pylorum *sensim* angustando, in causa quidem fuerat, ut in immensum ventriculus distenderetur, haud vero ut augeretur crassitie, cum *Hög stettero* solito tenuatior inventus sit: & licet optimi *Erndl* ventriculus non nisi lentissime distentus sit, incrassatas tamen tunicas non habuit. In cadavere cujus historiam Cap. 9. §. 2. dabo, cupido me invasit capacitatem mensurandi ventriculi, qui lenta & continuata per annos epulatione pedetentim in magnum saccum abiverat. Mensura male capta fuit, nam antequam pylorum ligarem, neglexeramus ventriculum a multa copia contentorum, qua utcunque turgebat, exonerare. Nihilominus quinque mensuras, sive viginti libras aquæ commode infu-

di-

dimus, plus infusuri, si ejusdem prope œsophagum tenuitas, qua illum digitis ad infundendam aquam dilatabamus, profunde dilacerata non fuisset. Ut eo loco, sic ubique membranarum ventriculi tenuitas deprehendebatur.

§. VII. Differentia igitur magna in ampliato ventriculo, lente quantumvis distento, observatur. In vesica fellea, & urinaria, pro distensione tenuitas crescere solet. Sed quid demum de utero est?

Galenus l. de uteri Anatome cap. 8. pag. 280. apud *Charterium* in Tom. 4., uterus in principio conceptus, crassus, cum prope tempus pariendi accedit, magis quidem sed tenuis: crassitudo enim in longitudinem extensa absumitur. Eodemque *Charterii* Tomo pag. 653. *Galenus* idem repetit lib. 14. libr. de usu part. cap. 14. Cum subsequantium sæculorum autores, & Arabum schola, non nisi in *Galen*i verba jurerent, nec facilis daretur occasio examinis gravidæ uteri, mirari non oportet, quod in postrema usque hæc tempora apud omnes passim Medicos, imo etiam celebres Anatomicos, v. g. *Vesalium*, receptissima sententia hæc fuerit. Contrarium tamen asseruerunt *Du Laurent*, *Riolanus*, *Bartholinus*, *Plazzonius*, *Harvæus*, alique. Sic demum magna hæc quæstio devolvebatur ad *Moricæum*, qui antequam sua ederet, jam magnam vitæ partem circa uterum, & in utero triverat. Audacter ille *Galen*i sententiam tuitus est, & putavit meridiana luce se eam clariorem demonstrasse. Putat *Moricæus*, plures ideo supposuisse non extenuari gravidos uteros, quod viderint crassiores eosdem manere, qua parte placentam habeant, statuerintque ut ibidem, ita se habere ubique; porro id falsum esse, & uterum cæterum pro ratione extensionis tenuiorem fieri. *La Motte*, *Trew*, *Moëbius*, pluresque alii, uterum saltem non minui a naturali in non imprægnatis crassitie; *Sylvius*, *Heyster*, *Palsinus*, alique uterum scribunt crassiorem naturali reddi.

In-

Incomparabilis *Albinus* hic præprimis laudandus, qui nobis naturali forma dederit uteri gravidæ figuras egregias, varioque aspectu contemplandas, in quibus uterum cernimus, minime pro ratione extensionis extenuatum. Egregius, & vere doctissimus *Noordwyk*, in sua uteri gravidæ Anatome in 4to edita 1743. idem in utero, forte 5. menses gravido, demonstravit. Tandem testis autoptes rem pulcra occasione contemplatus sum *Hagæ Batavorum* 26. Maji 1751. Gallica femina septem mensibus gravida, infantis ad finem usque experta motum, phthisi pulmonali moribunda jam, Rev. P. Carmelitæ *Cyrilli* cura omnis eo tendebat, ut mox ab ejus morte tentaretur, an civis Reipublicæ, an Ecclesiæ membrum, subita sectione servari forte posset. Hinc rogabar, ut proximis in ædibus cum Chirurgo, eo fine præsentem me sisterem. Unde quo momento moriebatur, intrantes examinabamus, num vere mortua esset? maritumque & feminas adstantes rogabamus, num vere mortuam eam crederent? annuentibus cunctis opus aggressi sumus. Uterum dextro in latere incidentes, vitaturi placentam, in eandem pervenimus tamen. Hinc frustra copiosum sanguinem vi ex vasis linearum duarum lumine vidimus profilientem. Opposito igitur in latere mox secantes digiti ubique crassitudinem uteri offendimus. Craffior antea certe fuit, cum ab ipso primo sectionis inceptæ momento rivatim effluens cruor aliquem crassitudinis collapsum effecerit oporteat. Membranis pertusis vi aqua profiliit, infansque facie prona coxygem matris versus educebatur. An id elidit communem sententiam infantis se capite deorsum circa ultima graviditatis tempora duntaxat vertentis? Mortuus jam erat infans. Placentam prudenter ab uteri parte dextra separaturus, hic facile, ibi eam non nisi aut ejusdem, aut uteri læsione, solvere potui. In magna plaga facillime separata Placenta, sinus vidi plures, lacunasve, utero contiguas, cruore plenas, sed

ute-

uteri in eadem plaga deterfa superficies nihil mihi aperti, nihil ostendit finuosi. An uteri ibidem sectio primum facta, mutavit quidquam? Lineas quasdam albescentes, fibras referentes, vario modo per uteri fundum dispersas vidi; quæ an ipsissimæ illæ sint, quæ *Ruischio* ideam muscularis ibidem fabricæ dederint ignoro. Sed nihil difficilius fuit separatione Chorii ab utero: quantacumque enim prudentia id separare contende-
bam, erat cellulositatis & vasorum tantum robur, ut vel uterum lædere, vel membranæ Chorii lacinias deberem relinquere. Amnii a Chorio separatio facillima sine ulla læsione. An si peperisset hæc femina, membrana Chorii non mansisset utero affixa? & forsitan Placentæ pars? Confirmabit hanc veritatem historia uteri, sanie pessima distentissimi, & in sua substantia pollicem crassi, quam Cap. 8. §. 2. dabo.

Atque hæc de utero dicta sufficiant, ut convicti simus non nisi similium experimentorum raritate contigisse, ut uteri gravidæ extenuationem falso plurimi statuerint; & ab altera parte, ut inventam ejusdem 2. 3. 4. pollicum in fundo crassitudinem ad præternaturalia forte relegamus.

Solent etiam tubæ Fallopiæ, Ovaria, Hydatides, Cystici in superficie corporis tumores, eo crassiores habere tunicam, quo plus extenduntur. Sic habui tubam Fallopiam hac hyeme septem librarum; his diebus aliam, quam ob dissectionis distinctioris causam dilacerare ubique debui, adeoque ponderare non potui, sed plures certe libras habuissem. *Cyprianus* saccum hydropicum, ex tuba formatum, & 150. libras aquæ continentem, invenit librarum 30. pondere. Politi & æquabiles raro hi sacci sunt, passim aut alterutra, aut utraque superficie inæquales, tuberosi.

§. VIII. Unde demum patet scirrhus aliosque tumores Mesenterii, Pancreatis, Pylori, Omenti parvi, ac magni, Renis, (quem sex circiter libras pendentem præ-

præterito anno publice demonstravi), varios ventriculi morbos, ingestorumque vix mutatorum vomitum generare posse, nec tamen signa pathognomica adesse, quæ clare arguant, quænam potissimum pars hic peccet, adeoque sæpe nos ignorare utrum protopathicus sit, an deuteropathicus ventriculi morbus.

Equidem ventriculum circa pylorum comprimi ex ingestorum fere immutatorum vomitu concludunt Practici, dum vident cætera viscera inculpate se habere; sed falluntur, dum nonnunquam vitium totum in externis Abdominis partibus modo hæreat, cujus exempla!

In Tom. 1. Act. Chir. Paris. *Garengeot* descripsit nobis Herniam sub cartilagine ensiformi, a secedentibus binis rectis Abdominis musculis, illudque in spatium prolapsa parva ventriculi plaga. Aliam Herniæ ventriculi speciem habet, dum pars ejus prolabitur ab utroque latere ejusdem cartilaginis, in illo triangulari spatio, quod inter illam, & marginem vaginæ musculorum rectorum intercurrit; quo in loco vasa ad musculum pectoralem aliasque pectoris externas partes transeunt. Causam esse eam credit, quod solius Obliqui externi musculi, (non verout alibi, Obliqui interni, Transversique), Aponeurosis, hanc formet vaginam. Post *Camerarii* & *Renealmi* auctoritatem, laudat etiam collegas suos, *Andouillé*, & *Arnaud*, ut qui similia observassent. Historia adjecta evincit innumeros fere Medicos in Europa & America, annorum spatio, deceptos fuisse, dum pertinacis morbi causam ad varios affectos locos; & propter ingestorum vix mutatorum ejectionem, alvumque incredibili temporis spatio pertinaciter semper clausam, ad Pylorum, vel saltem ad proxime adjacentes partes, referrent: interea dum attentum examen loci demonstraverit veram ventriculi Herniam in causa esse, quam idonea compressio & ligatura vel curare, vel saltem, ut non noceat, palliare potue-


tuerit. Ut proinde in caufarum vomitus immutatorum ingeftorum recenfione, etiam opus fit ad hanc miram attendere caufam.

At nihilominus iudicio hic opus. Quotidie videmus, & proftant adhuc exempla in nofocomio, internas pectoris fuppurationes viam fibi in variis pectoris plagis quærere, & iisdem omnino locis, quos dixi, formare tumorem. Adeoque non omnis ibidem tumor Hernia ventriculi eft: quam tamen ut talem fufpicari quis poffet, licet vix vomitus adeffet, quandoquidem etiam inguinalis & femoralis Hernia per annos aliquando fine vomitu adfint. Egregius *Foubert* eodem *Chir. Paris.* Tomo primo, ejusmodi cafum defcribit, quem nonnulli Practici Herniam ventriculi effe crediderant, quem tamen ex præfentia Phthifis pulmonalis, preffique undulatione tumoris, purulentum pulmonis tuberculum effe affeveravit. Lubenter ut tale aperuiffet, nifi oppofitæ Medentium fententiæ, & conclamatus fere ægri ftatus, eum cohibuiffent. Infectione porro cadaveris intellexit falutarem forte futuram fuiffe aperturam viæ, quam pus ex concreto ibidem pulmone fibi quæfiverat.

Sed & hanc aperturam periculum habere fuam, Part. 5. Cap. 6. a pag. 83. ad 85. demonftravi, ubi omnia figna puris ex pulmone eo pergentis aderant, & Aneurysma tamen fub pure latitare deprehenfum eft.

Tandem ingeftorum vomitus infeparabilis caufa inventa fuit ab omnibus hucusque recenfitis profum aliena. Duo exempla notabilia habet *La Motte de Re Obfetr.* Lib. 4. Cap. 17. Obf. 375. alterum matris fuæ, alterum gravidæ feminæ. His intropreffa enfiformis cartilago ventriculum in continuos egit vomitus. Feminis his, thorace in genua reflexo, cartilaginem digitis fuis extrorfum duxit, hincque irritatione perpetua ventriculi ablata, curavit vomitum. Addit cafum frequen-

quentiorem esse, seque plures cujuscumque ætatis & sexus ab indomabili cæterum vomitu sic curavisse.



C A P U T V I I I.

De Vario Hydrope ac Tumore Abdominis.

§. I. *Tuba Fallopiana sinistra pendens Lib. 7. continens 32. Libr. liquidi. Disquisitio super puris generatione in hac femina. Etiam in Virgine uterinum systema inflammari, ac suppurari potest.* §. II. *Possibilitas demonstratur conceptus & incrementi fœtus in Tuba Fallop.* §. III. *Exemplum notabile extensarum ac materia repletarum ambarum tubarum, uteri, ac superioris Vaginæ partis, una cum vulgo dicta Imperforatione, sive Atresia. Digressio occasione Atresiae, ejusque variae species, ac curandi modi. Incurabilitas. Aliud mirum Atresiae exemplum, cum addita cura.* §. IV. *Tumores Ventris notabiles ab Hepatis, vel Lienis, vel utriusque, sanissimi, mole duntaxat aucta, juncto illi, aut non juncto, Hydrope. De incertitudine Diagnoseos in cunctis enarratis casibus.* §. V. *Novum genus tumoris cystici, quem Parisinorum methodo tractare natura ipsa indicabat; quemque incurabilem fuisse Anatome docuit. Novoque exemplo confirmatur id, quod ad §. I. de puris generatione dictum.*

QUamvis in pluribus hujus operis capitibus de vario Hydrope ac tumore Abdominis egi, abruptam tamen retexere telam cogor novarum observationum multitudine, quæ antedicta partim corrigant, partim augeant, confirmentque.

I. Femina 30. annorum innupta, bonæ famæ, rusticola, elapso abhinc quadriennio quartana laboraverat, quam debellare petitis undique, ut ruri potissimum fit, ad

ad id remediis, quocunque modo fategerat, ac debellaverat tandem. Febre libera, menstruis caruit, tumoremque mox in sinistro hypochondrio animadvertit, sensim crescentem eique demum universi abdominis junctum Asciten.

In *Nosocomio Pasmanniano*, ab optimo ibidem Physico D^{no}. *Collin* suscepta, & deobstruentibus atque diureticis ex arte tractata, a Mense Augusto 1760. multum lucrabatur. Sed anno hoc 1761. ineunte, anxietate victa Paracentesis subiit, eaque aquosi quidem nihil, liquidi autem gelatinosi libras 24. Medicas emisit. Detumescente inde ventre eo manifestior, palpabiliorque tumor descriptus percipiebatur. Malorum cumulo pectore tanta subito copia puris erupit, ut suffocaretur, & repleta pure tota trachæa inventa sit. Tumorem hunc una cum Utero, Vagina, Recto, excissum, D^{us} *Collin* ad me, publicæ demonstrationis ergo, perhumaniter misit.

Primo totum ponderavimus. Libras Medicas 31. æquabat. Deinde omnibus vero in situ positis; evidenter constitit Tubam Fallopianam sinistram esse, quæ tumorem formabat, adesse ceterum Ovarium, quod naturalem haud multum excederet magnitudinem. Porro ex hac tuba extraximus liquoris purulenti albi 18. libras. Tubæ substantia, seu membrana tumoris hic duas, tres illic, lineas crassa, erat intusa pure erosa, ac lacerata, extus vero vasis quam plurimis dives; quæ tamen minoris diametri erant, quam quidem ea aliis occasionibus videram.

At tumori huic sic aperto alius reperiebatur inclusus, membranæ suæ crassitie ut prior, continens liquidi fusci, tenuioris ac turbidi, libr. 4. Si unica libra addatur, quæ inter examen effluens, capta erat, si dematur pondus uteri & intestini recti, ac vesicæ, Tubæ degeneris pondus septem librarum fuit, & liquidorum libr.

Ut febres intermittentes sæpe salutare sunt, ita non raro vel per se, vel male curatæ, perniciem inferunt, obstructione pertinaci, & catameniorum defectu. Tubæ vitiosa ostendit, quemadmodum ubicunque locorum degenerascere inde corporis partes variæ potuissent, ita nunc se potissimum pati. Undenam vero dum nihil inflammationis in tota anamnesi habetur, dum corpus videtur a diathesi phlogistica profus alienum, undenam, inquam, tamen pus in sacco Tubæ? undenam pus in pulmone, tam copiosum, ut ruptis repagulis suis totum spatium aëreum pulmonis inundaverit, suffocaritque feminam? Sane ea nostrorum natura humorum est, ut citra topicas inflammationes, citra phlogisticas febres, diathesi inflammatoriam contrahant, eamque conservent perpetuo. Tomo 1. Cap. 11. hanc veritatem, nisi me animus fallit, demonstravi, & novis exemplis reliquorum annorum decursu evidenter confirmavi. Imo ex ipsis intermittentibus pus posse generari, *libro de Febris Cap. ultimo* invictis probavi exemplis. Phlogistice igitur noster cruor degener, aut naturalibus viis se eliminat, ut v. g. pulmone, rene, intestino; aut nova sibi via facta effluit, ut naribus, auribus, pudendis; aut format sibi receptacula nova; aut denique vias varias adit. In hac femina, & novum sibi receptaculum fecit, & obruit pulmonem. Et ne quis ob Tubæ hujus degenerationem feminæ hujus virginitatem suspectam habeat, monere debeo etiam totum genitale systema mulieris æque sedem degenerascentis humoris fieri posse (licet ea innupta, castaque sit) quam aliam quamcunque partem. Analogia utique id docet; plura Sanctimonialium exempla probant, & tertia ordine enarranda historia invictæ id demonstrabit.

II. *Cyprianus* ita Tubam descripsit, quæ libras 30. pendebat, & aquæ libras 150. continebat. Dum igitur quis hanc, & præcedentem historiam contemplatur, evidenter intelliget, qui fieri potuerit, ut maturi foetus
aut

aut inventi aliquoties in Tubis fuerint, aut vivente matre, sive integri, sive frustulatim, per aperturam umbilici, abdominisve, a natura factam, vel indicatam saltem, educti fuerint. Ipse *Abraham Cyprianus* olim *Leopardiæ*, pluribus & Medicis & Chirurgis præsentibus, eduxit foetum maturum post 21. menses a conceptu elapsos, ex umbilico: huic quippe connata ingens illa Tuba, ibidemque inflammata ac suppurata, inter omnino liberum ad foetum, ope placentæ adhuc cum Tuba sua nexum, concesserat.

III. Tuba ut alterutra, ita utraque potest affici. Longam, sed per omnia notabilem, historiam hic dabo; quæ quamvis plura continet, quam ad præsentem nostrum scopum faciunt, ad praxin tamen summopere omnia spectant, integra omnino enarranda est.

Virgo 24. annorum ab octo retro annis quodvis auxiliorum genus, ad menses provocandos, frustra experta, totum suum Hypogastrium tumidum, durumque habebat: quam duritiem durissima sed æquabilis zona ad umbilicum, per universam Abdominis amplitudinem terminabat. Octo annis miseriarum elapsis, demum ab obstetrice Atresia laborare deprehenditur: examine a præstantissimis Medico & Chirurgo repetito id confirmatur.

Unde hi 25. Jan. 1761. operationem instituere. At vero imperforatio sola hic non aderat, verum etiam tanta partium, situ, figura, structura, immutatio, ut impossibile plane fuerit operationem debitam perficere. Hymenis quippe lata facta sectione, stylo prius, deinde digito, amplum in cavum penetrantes, concludere debuerunt in vaginam penetrasse se se; conclusionem confirmari merito crediderunt profilientis ilico nigerrimi sanguinis, ex facta apertura, copia. Ita nempe solet res in bona operatione se habere. Sed certe ne sic quidem perforatam ullatenus virginem fuisse eventus docuit. Languens a longo tempore virgo triduo

H 2

post

post obiit. Optimi illi viri veniam secandi cadaveris sollicitaverunt, eamque adepti, me ad sectionem perhumaniter invitaverunt. Rem igitur sic invenimus.

Uteri stupenda moles, monstrosæque utrinque Tubæ, tumorem una formabant, qui totum hypogastrium explens, superiore sui parte illam zonam constituebat, quæ in vita deprehensa fuerat, totum veluti ventrem intus cingere. Multa copia nigræ turbidæ fatentis aquæ deprehendebatur cavum in ventrem effusa, sed examine constitit ex parvis hinc inde tubarum putridarum aperturis eam profluere. Ruptura sane hæc videtur mortis causa fuisse. Ovaria vix solitam figuram excedebant.

Ordine sic ad contemplandam vaginam ducebamur. Patuit Hymenis sectionem sufficienter amplam factam esse, ita quidem ut si vagina alias se secundum naturam habuisset, hæc eadem sectio Hymenem, adeoque vaginam, egregie aperuisset. Quoad modum sectionis Hymenis; *Celsus* eam binis se invicem decussantibus incisuris fieri oportere scribit; cui adstipulatur *Benivenius*: *Job van Meckeren* unica cæsura, sed obliqua, ut ne lædatur urethra: *Wierus* facta parva apertura ope novaculæ superius, ne urethram lædat, obtusæ, inducit instrumentum obtusum, digitumve, & prudenter tunc hinc & inde ad latera perscindit membranam. Alias idem *Wierus* speculum incurvum immisit, cujus dens superior urethram, ne læderetur, tegebat. *Aquapendens* unica, eaque recta sectione operationem perfecit. *Aquapendentem* optimi viri hi secuti, recta, eaque unica sectione, membranam aperuerunt. Monui antea omnes partes præter naturam se hic habuisse. Igitur sectio eorum in qua peragenda urethram evitare studuerunt, nunc inveniebatur per urethram in ipsam penetrasse vesicam; hinc illum omnem nigricantem cruorem facta sectione profilientem, non nisi ex læsis profiluisse vasis concludebant: adeoque quantumvis evitare

urethram studuissent, videbant se ob præternaturalem mox exponendam partium structuram, id præcise, quod evitare conati erant, effecisse, adeoque concludebant tutius se imposterum non *Aquapendentem*, sed alios, qui obliquam incisuram commendassent, secuturos; cum præternaturalis conditio partium nequeat prævideri.

Igitur Hymene perfecto, ne vestigium quidem Vaginæ adfuit, sed solidum corpus totam vaginam explens, pollicis diametrum, in amplitudine, sesqui pollicem in altitudine habens, eoque modo cum vagina unitum, ut proprie loquendo, ipsa vagina videretur undique incrassata fuisse, & ita in medio vaginæ centro, coagmentata, ut non nisi unicum solidum, sine concretionis vestigio, repræsentaret. Porro supra hoc carnosum solidum corpus, cavæ vaginæ erat portio, eaque adeo amplissima, ut caput infantis capere posset, plena sanie fusco-nigra; Tubæ immensæ utrinque molis eadem materia distentæ, licet hinc inde per foraminula multum ejusdem in cavum ventrem, quemadmodum supra jam narraveram, profudissent. Uterus pollicem in substantia crassus, ingenti amplissimoque suo cavo eandem nigram saniem continuit.

Igitur virgo, de cujus virginitate illibata nulla unquam quæstio erit, potest vaginæ, uteri, tubarum ambarum degenerationem tantam pati, quantam unquam gravidæ aut puerperæ; quod supra promiseram demonstrandum.

Singulare certe Atresiae exemplum est, cui simile me legisse, aut audivisse, non memini. Id tamen ex historia Medica concludi oportet, quod varius omnino sit in hoc vitio Naturæ lusus. Primo describitur Atresia cum Hymene integro, eoque vel clauso omnino, vel, (ut *Wolff* apud *Schenckium*, ut *Wierus*, ut Celeberrimus *Albinus* Exert. Acad. Lib. 4. Cap. 10.) rotundo foramine perforato; quod vel parvum omnino erat, vel

quemadmodum *Fallopious* viderat, digitum, aut ut *Albinus* in adulta femina detexerat, penem virilem admittebat. Imperforationis, membrana integra, aut leviter modo perforata, natæ, videtur meminisse *Hippocrates* Lib. de Sterilibus apud *Charter*. Tom. 7. pag. 851. Libro de natur. Mul. Cap. 68. Lib. de morb. mulierum Cap. 22. pag. 743. ut & *Celsus* Lib. 7. Cap. 28.

2. Imperforatio detecta a *Ruyschio* est Obs. 22. primo ab Hymene, qui perforatus, dein ab alia altiore membrana imperforata. Parturienti huic feminæ debuit discindere utramque. Etenim per Hymenis foramen imprægnata erat, via inde ad uterum tunc temporis libera; post imprægnationem vero videntur laxissima vaginæ latera mutuo se excoriasse affricu, mutuis coivisse parietibus.

3. *Celsus*, *Aquapendens*, *Ruysch*, a vero vaginæ coalitu solo Atresiam observarunt.

4. Hymenem non connatum, sed vitiose generatum. *J. N. Pechlinius* in Observ. phys. med. observavit, ab urina nempe acri, vulvam excoriante puellæ; ita ut a coalitu primo laterum in uno puncto, eorundemque iterum inde recessu, vera formaretur membrana.

5. Vidit idem *Autor* Nymphas & carunculas circa futuros menses ita crescere, ut vulvam, eo, inquit, modo clauderent, quo cor valvulæ tricuspidales; veroque glutine ita coirent, ut femina vi quadam hoc veluti sepimentum digitis remove, quo sanguis effluere posset, debuerit.

6. Atresia cæterum in vaginæ substantia ex tumoribus natis, viamque proinde plus minus angustantibus; eadem orta a vaginæ tumore, qui ad 2. 6. imo ad 12. libras extra vulvam pendeat; imperforationis denique species ea, quæ ab uteri vaginæque prolapsu, quem tempus induravit, adeoque ineptum reductioni reddidit; abunde describitur, & exemplis confirmatur a *Zacuto Lusitano*, *Ruyschio*, *Boneto* &c.

7. Sin-

7. Singularitatem habet casus observatus *Simoni Schultzio* apud *Manget*. Bibl. Chir. Tom. 4. Hymen quippe ante urethram erat; ita ut urina parvo tantum foraminulo membranæ stillaret foras, pessimis cum symptomatibus. Percindendo omnia curabantur.

Similem sed rariorem casum haud ita pridem in Nosocomio nostro habuimus. Juvencula 20. annorum, mensibus carens, ab anni retro spatio gravibus ventris doloribus corripiebatur. Cepti hi dolores supra umbilicum per latera se se, indeque ad pudenda diffundebant, tenesmos recti, vesicæque, exitantes. Pressis manu in hoc dolore inguinibus, urina promovebatur in paroxysmo, alvus vero sequente modo die demum sequebatur. Finito paroxysmo dolore toto eo die vacua ac sana fuit. Rediit similis exacerbatio die altera, rediit tertia, atque ita integro mense.

Advocabatur tunc optimus loci Physicus exp. *D. Josephus Schreyer*. Is a principio ad finem usque prudentis ac sapientis Medici partes explevit examissim omnes. Morbi symptomata mitigavit, dies nonnullos doloris expertes conciliavit, consilio cum Chirurgis inito Atresiam detexit, ejusque perforationem consilio Medicorum vicinorum, quod convocari petebat, voluit proponere. Parentes autem maluerunt *Viennam* adducere filiam, ac Medici sui epistolam afferentes consuluerunt.

Aug. 19. proxime elapso, puellam examinans, Atresiam vidi. Hymen fuit fere ad labia vulvæ producta, antè altius, ut quid superesset adhuc de vagina inter Hymenem & labia; posterius vero ad vaginæ finem erat sic, ut cum labiorum ac fossæ navicularis confunderetur substantia. A parte anteriore ultra lineæ, a vagina, distantiam, parvum foramen erat, quo inductus stylus primo difficulter adscendebat; prudenter autem postmodum agitatus, in vesicam urinariam libere pene-

netrabat. Utrunque ad latus foraminis levior eminentia erat, circa medium Hymenem sensim evanescens. An, quod nullæ Nymphæ repertæ, hæc vestigia Nympharum?

Turgebat porro concava superficie hymen, intro-pressusque pondus incumbentis designabat materiæ. An materies hæc sanguis menstruus collectus? Videbatur sic: nam cum foramen in hymene nullum, nisi quod in urethram continuaretur, sanguis menstruus nullam elabendi viam habuit.

Prognosin dubiam dedi. Brevem spopondi, felicemque curam, si hymenis præsentia unicus puellæ defectus esset: difficilem, si vagina, si uterus, si tubæ, si ovaria, notabiliter essent affecta, ut quidem prægressa symptomata forsitan innuebant: impossibilem, si casus similis illi, quem supra enarravi, existeret.

Circa sectionis modum cum Chirurgo nostro D^{no} *Leber* conveni, haud esse nobis sectione recta *Aquapendentem* sequendum, sed obliqua *Jobum van Meckeren*, urethræ vitandæ studio. Statim per aperturam prodire sanguinis nigri ac tenacissimi sic, ut vix flueret, unc. xxx. Forfex dein latera incidens cruciatam fecit sectionem *Celsi*, ut ne denuo latera coirent: magnaue turunda primum melle rosaceo, deinde digestivo illinita, suppurationem membranæ promovit. Cum urinæ exitus hinc impediretur, debuit prima & altera die toties educi, quoties urina urfit, postea vero libere secundum turundam effluxit. Emulsio paregorica illico ab operatione dabatur.

Brevi post operationem vix tumebat venter, sed querelæ die illo, alteroque, fiebant molesti ardoris ad vaginam, tertio die etiam ad Hypogastrium. Quarto autem die venter totus usque ad summum Epigastrium tendebatur magno cum dolore frequenti vomitu, & intolerabili plane febre. Ter vena secta, enemata emol-

lien-

lientia & oleosa continuo injecta, cataplasmata admota ventri, decocta emollientia ac leviter subacida, pargorica, haustus oleosi multi, demum effecere, ut 7. die ab operatione, 4. die a nato ventris dolore, Febris illa continua mitesceret, & prodiret urina flava cum multo crasso, gravi, subpurulento, sedimento.

Verum inde non est judicata. Continuae febris successit continua remittens, cum gravi exacerbatione matutina, cum gravissima pomeridiana: & quidem die tertio adeo vehementi, atque diuturna, tantoque cum vomitu, ut, ne hoc in paroxysmo moreretur, metueremus. Unde finito hoc paroxysmo, mox dedi misturam cum unc. 3. extr. cort. peruv. assumendam antequam sequens exacerbatio expectaretur, interea dum reliqua omnia interna continuabantur, externaque auxilia. Sic prosequendo vidimus hanc quoque febrim, hosque vomitus, 7. dierum spatio terminari.

Durante hac febre, urinae semper pauciores quidem, at flavae eadem, & constanter omnes gravi materie alba, puriformi, saturae. Febre absente urinae paulo copiosiores, simili autem materie perpetuo refertae.

Alvus toto febrium tempore cruda enematis prodiit; post corticis usum coctior, febre devicta sanorum instar, nisi quod a cortice fere nigra.

Toto morbi tempore injectio aquae hordei cum melle rosaceo ter die in vaginam facta, eduxit primo tenacis sanguinis reliquias, deinde saepius quid purulenti.

Quod ad ventris descriptum dolorem, ac tensionem attinet, id memorabile videtur, quod primo die a febre cessante in toto epigastrio dolor ac tensio cessaret, ex eoque tempore vomitus quoque siluerit; interea dum per universum quidem hypogastrium, maxime vero circa ilium sinistrum, summa, eaque dolentissima tensio observaretur; quod tertio die & hoc ilium sinistrum mollescere inceperit, dieque sexto nihil ultra aut do-

lentis, aut tenfi exhiberet; quod etiam deinceps medium hypogastrium & ileum mollius indolentiusque fit, & dum hæc scribo jam ileum dextrum totum concidat.

An spes est materiem morbi continuatis ejusmodi urinis posse solvi? saltem hucusque omnis urina hanc materiem constanter gerit.

Interim difficultatem explicandi summam hic casus habet. Fuit olim tumor imo quidem in ventre animadversus, verum quia nil tumidi ac tenfi primo post operationem tempore deprehenderimus, verosimiliter idem tumor a vagina, copioso sanguine immensum turgida, & uterum atque vesicam sursum trudente, oriundus fuisse videtur; unde etiam evacuata vagina, hypogastrium totum concidere debuit. Id si ita se habet, cur tertio ab operatione die ardor, quarto tenfio ac dolor totius abdominis, cum vehementissima febre? Si liceat per analogiam quid proferre, in sectione calculi vidimus anno 1760. triste exemplum ejus, quod ut periculosissimum Lithotomi adeo formidant, scilicet ventrem ab operatione summe tensum, dolentissimumque, cum febre violenta. Nunquid ergo vulnera nervosarum, adeoque sensibilibus admodum partium, ut vesicæ, hymenis &c. inexplicabili modo inflamment universum, aut externum saltem, abdomen?

Condonabitur, opinor, mihi hæc circa Atresiam digressio, quam explicatio, de variis abdominis tumoribus danda, necessariam utique & inevitabilem reddebat: abruptum retexam filum.

IV. Vir nobilissimus, bellicis induratus laboribus, procerus, hilaris, facetus, anno vitæ suæ 38. gravi contumelia afficitur, tacito animo concoquenda. Unde in summam, sed sine materie, ut loqui Arsamat, Melancholiam, dilabitur. Quindecim exinde elapsis mensibus, fortuna ridet, honosque ad contumelias prægressas delendas aptissimus, succedit. Sed, ô tristes mortaliū

lium calamitates ! radices adeo altas egerat prior animi affectus, ut corporea organa, viscera, nervos, humores, inficiens, morbum nunc ex spiritali materialem produxisset, verumque generasset Asciten. Nihil ars hic præstitit. *Carolinis* thermis semel in anno, octenni spatio, æger usus, Hydropis quidem experitur immutationem, at vero duritiem primo sinistro, deinde etiam in dextro abdominis latere, sensim crescentem, animadvertit.

Varietas sententiarum circa naturam morbi ingens fuit, eoque major, quo abdominis latex uno tempore copiosior, confusio rem redderet affectarum contactum partium; alio iterum tempore parcior, contactum præberet liberio rem. Lien sæpe accusabatur, & his quidem infarctus, alius vero scirrhusus. Tempus fuit, quo tumor duplex, alter loco lienis, alter lapideus fere, ventriculo adhærere quibusdam visus fuerit. Omentum postea accusarunt, Mesenterium dein, tandem tympaniticum Coli tumorem. Biennio ante mortem Ill. *Præses*, egoque, sententiam rogati, respondimus nec quænam potissimum partes, nec quonam illæ demum modo, affectæ essent, determinare certo nos posse. Contigit autem semianno ante mortem, ut illum primum præsens viderim, examinaverimque; contigit idem aliquoties postmodum; hydrops nonnunquam minor, suspicionem mihi lienis augere potuit, sed firmam sententiam pronunciare, frequens cadaverum, toties illusionem Medicorum manifestantium, recordatio prorsum vetabat.

Extra urbem morienti non adfui, nec corporis aperturæ; sed jecur & splenem corpore exemptum ad me miserunt. Insolitæ magnitudinis ac soliditatis ambo hæc viscera, ponderavi; ac jecinoris pondus novem libras cum $\frac{1}{4}$. splenis autem 6. cum dimidia libras æquare deprehendi, solidum utrumque, sed ne minime quidem scirrhusum. Ergo & qui solum lienem accusaverant,
&

& qui solum hepar, tum etiam qui scirrhum pronuntiaverant, erraverant. Nescio, qui fiat ut in corporibus, quæ ceterum emacientur, & tabescant, viscera nonnulla, ac præsertim jecur ac splen, in monstrosam molem, eamque cetera sanam, abeant? 21. Dec. 1758. publice exhibui splenem eadem, qua hepar, magnitudine, $4\frac{1}{2}$. libras æquantem, substantiæ plane bonæ ac sanæ; dum interim corpus a subito profligata intermittente febre obstructum, & asciticum, penitus contabuiisset. Et 2. Jan. 1759. demonstravi in corpore maxime cachectico, & vertebrarum omnium thoracis ac lumborum, ossis sacri, pluriumque costarum, pessima carie demum perempto, hepar adeo magnum, lienem ita ingentem, ut nec legerim, nec viderim unquam, hæc bina monstrosiora, doleamque exactum horum pondus in diariis meis desiderari; ambo hæc viscera ad pelvim usque extendebantur. Cap. 7. §. 5. enorme hepar, non morbosum omnino, in cachectico corpore quoque mirati sumus. Dum viventibus has partes tangimus, vix, quid tangamus pro certo affirmare possumus, tumores enim mesenterio enati, renes monstrosi, sacci degenerascentium viscerum variorum, ipse ventriculus, licet vomitu nonnunquam sui affectionem prodiderit, vel in alterutro, vel in utroque abdominis latere, simile quid, quod tale hepar aut lien, tactu exhibent. Cum autem, quo plura inciderimus cadavera, eo plures causas detegimus, quæ licet a se mutuo diversissimæ, tamen eundem aut similem contactum explorantibus exhibent, ideo discamus sententiam propriam dubitanter proferre, saltem eam contra alia opinantes non acriter defendere. Si cadaver post mortem incidatur, demonstrabit forte, quorumcunque erroneas sententias esse, & causam mali aut nunquam adhuc observatam, aut saltem ab iis medentium in dato casu alienam, dabit. Et si casu quis rem acu tetigerit, & inde velit magnus videri Apollo, facile in proximo futuro casu

casu suam inscitiam, & vanitatem aperto cadavere demonstratam videbit. Ut clarius inde convincamur, perpendamus sequentem historiam.

§. V. Dec. 4. anni 1760. puerum decennem suscepimus, cujus en vitæ historiam! Primo vitæ biennio sat sane vixisse dixere parentes, facie tamen inflatum perpetuo. Bienni ipsi post clamores nocturnos, crus fuisse veluti contractum, quod frictionibus mater emendasset; idem denuo octenni contigisse, iterumque frictione emendatum. Variolis inter 2. & 3. vitæ annum laborasse, & integris sex mensibus exinde pectore anxium fuisse, attamen & medicamentis ad id datis reconvalescere. Sanum utcunque præterea, quæ nunc enarrata, infantiam, & pueritiam, hucusque transegisse, at comatosum tamen perpetuo, idque potissimum singulo autumno; frigidum quippe semper, mox ubi hypocausti ignis cubiculum calefaceret, vix ab eo removendum fuisse, atque hinc magis somnolentam hyeme vitam egisse, buccisque utrinque pendulis hyeme adhuc plus apparuisse.

Præprimis autem hic notamus ab Autumno 1759. quo & comatosum, & crure sinistro affectum, eum intelleximus, tumorem in sinistro hypogastrio compa-ruisse, quem mater diligenti attentione de die in diem profecuta, supra pubem & inguen sinistrum primo, deinde ad cristam Ilei surgentem, sensimque ad costas, spinamque lumborum adscendentem observasse se aje-bat, & spinam dorsi ipsam tunc notabiliter fuisse incurvatam. Tumorem ipsi examinantes, non in hypogastrio, sed supra cristam Ilii, inter costas spurias, spinam, & hanc cristam, locatum deprehendimus, eumque durum totum, excepta plaga ejusdem superiore, & ad spinam proximiorē, quæ manifestam fluctuationem exhibuit. Pectore tussim & ronchum audivimus.

Circa naturam tumoris dubii fluctuantes, indicationes manifestas ilico sequebamur; expectorationem o-

xymelle squillitico promovendo, & tumorem cataplasmate ultra emolliendo. Emendata hinc respiratio est, & tumor sui aperturam, vel brevi sponte futuram, vel arte faciendam, indicabat.

Die 18. Dec. aperuimus, eduximusque plusquam 4. lib. crassi, flavi, nec foetentis puris. Specillum ad medium abdomen pene intravit. Ex illo tempore aperturam sæpius dilatavimus, ut commode pus exstillare posset: sane exstillavit illud ad mortem usque fere perpetuo, tussis ope multo copiosior. Bis die injectio aquæ hord. cum melle rosaceo facta est, toto morbi tempore; stylus postremis temporibus, & injectio ipsa, vix cavum ultra dari indicabant. Toto hoc tempore bono nutrimento, frictionibus, remediis primò attenuantibus, postmodum solventibus, tandem roborantibus, flaccidum corpus emendare conatus, æthiopem lavi. Imo a 15. Feb. 1751. crus sinistrum fungoso tumore ad malleolum primo internum, deinde ad externum affectum est; instar veræ spinæ ventosæ malum, dum tumor externe aperiretur, nuda jam ossa ostendebat.

Aprili finiente cum magna dorsi apertura, magna-que boni puris effluentis copia, febricitare cepit, & spina lumborum dorsique dolere. Febris exin continua fuit, sæpe cum vespertinis, sæpe cum vagis exacerbationibus, cum dolore spinæ fere perpetuo; quam accubitus puris ad illam, natæque inde rosioni, tribuebamus. A medio Majo febris intensior, diarrhœa argillacea, ut sæpe in suppuratis observamus, dysenteria nonnunquam cruenta, & a 22. Maji fungosi tumores ad articulum cubiti sinistri, ad dorsum dextri pedis. Tandem 7. Junii, finis miseriarum, mors.

Ingens ventriculus, bonum abdomen, nisi quod hinc inde, idque potissimum in pelvi, pauxillum flocculenti puris inveniretur, præterque illud tres propemodum lymphæ libræ. Stylus ulceri inductus moderabatur
sectio-

sectionem præcipuam. Hac lege deteximus faccum quendam, formatum a postica parte Quadrato lumborum, & Psoa magno; antè Psoa parvo, a majore multum remoto, albido, mucoso, & peritonæo; a latere interno, corpore quodam calloso, quod spinæ lateri accretum, quodque psoam parvum multum a majore removebat; a latere tandem externo, Transverso abdominis.

Porro tria hic summe notanda erant. 1^{mo}. Saccus nunc descriptus, qui descendebat super Iliacum internum, secundum magni Psoæ latus, ejusque tendinem, angusto ductu, eodemque calloso, donec cæco fine terminaretur inter tuberischii, & trochanterem majorem. 2^{do}. Apertura, quam Natura indicaverat, quamque 18. Dec. anni proxime elapsi feceramus, eo proprie loco fuit, quo Transversus abdominis incepit haud ultra a Quadrato lumborum tegi, eadem circiter cum suprema vertebra lumborum altitudine. 3^{tio}. In magno sacco prius descripto fistula lateralis erat, quæ stylum nostrum ducebat ad infimam dorsi vertebra, eamque scabram & erosam, deinde ascendendo secundum vertebra, usque ad quintam vertebra thoracis. Callositas vestiebat utrinque spinam, vertebra enumeratæ omnes & corporibus suis, & processibus, erosæ, consumptæ, ichore ac pure undique sordentes.

Considerando igitur 1^{mo}. puero huic, dudum antequam in Nosocomio susciperetur, spinam dorsi tam extrorsum, quam leviter introrsum, idque loco affecto potissimum, incurvatam fuisse: 2^{do}. Tumorem primum non in summo femore, ubi sacci finis erat, sed supra inguen sinistrum adverti incepisse: 3^{tio}. Cæcum omnino & callosum fuisse finem in femore sacci: 4^{to}. In sacco abdominis præter Psoæ parvi flaccitiem nihil degenerascentis repertum fuisse: 5^{to}. Ad fuisse lateralem sacci fistulam, quæ cum erosis undique vertebra communicaret: hæc, inquam, omnia considerando,
in

in eam facile sententiam imus, quod ad hujus cachectici, & cacochymici pueri, spinam dorsi, morbi origo hæserit; quod morbus inde inchoans, sibi viam inter musculos & peritonæum rodendo paraverit; quod copia ac pondere materiæ faccus deorsum elongatus fuerit; quod in fistulam oblongam ultra ossis pubis marginem abiverit; sed quod materia minorem resistantiam supra os pubis, quam infra inveniens, in tumorem primo in inguine collecta fuerit, deinde sensim altiora petiverit.

Sed undenam primo quatuor libræ puris, purisque continuus semianni spatium fluxus? Pus sane paucum intus delituit, nec in pulmone aut reliquo corpore ulla vomica fuit. Ex observationibus toties iteratis patuit ad purulentas excretiones annosas solam sanguinis phlogistici diathesin requiri, quæ continuo se inde liberet: adeoque sanguinem facile a spinæ carie phlogisticam reddi potuisse, & hanc eandem phlogisticam materiem circa spinam deposuisse, sensimque copia ac pondere suo faccum descriptum formasse.

Conclusio hujus capitis est, quod inter innumeros abdominis tumores & hydropes, in variis hujus operis partibus recensitos, ne bini quidem sibi similes reperiantur; quodque id omnino certum videatur, quo plura cadavera postliminio inciderimus, eo nos plures inter se dissimiles inventuros casus, quorum dissimilitudines in vita non potueramus deprehendere. Adeoque repeto quod pag. 120. monui. Conclusio denique est complures semper fuisse casus, itidemque semper futuros, qui Parisinorum curam (ut Tom. 1. Cap. 31. exposita fuit) nunquam admittant; esse quoque ejusmodi, in quibus hæc ipsa methodus a Natura per continuum puris effluvium indicata, unice palliet, neutiquam curet, quemadmodum historia pueri, ultimo enarrata, evincit.

De Hydrope Pectoris.

- §. I. *Hydrops Abdominis & Pectoris a nimio hæmorrhoidum fluore: Habitus ventris tympaniam mentiens. Pulmones toti degenerascentes & corrupti, itidemque universa pleura, & tamen nullus ullibi eorum coalitus. Anatome ut per omnia notabilis erat, ita notabilior ob defectum sanguinis in toto corpore.*
- §. II. *Hydrops pectoris per 14. dies præcipuo suo symptomate, signoque carens, sine nota causa. Anatome exhibet ingentem vitalium partium degenerationem, quæ non expectabatur; nulla calculosæ diatheseos signa in systemate urinoso, bilioso, pneumonico, quam suspicati haud immerito fuëramus. Respondetur ad quæstionem, cur homo hic præcipuo morbi sui signo aliquando caruerit?*
- §. III. *Phthisis pulmonalis abscondens notabilem Pectoris hydropem. Hydrops hic, etsi cognitus debito tempore fuisset, paracentesi non potuisset sanari. Singularis locus, in quo collecta aqua. Confirmatur ex his omnibus proposita Part. V. hujus morbi difficilis cognitio, difficillima curatio. Qui nocturnas anxietates in lecto evitaturi, in sedili se collocant, hos non semper easdem evitare, haud infrequens observatio docet.*

Parte hujus Operis V. multus fui in hoc morbo describendo, ejusque tum rariore cognitione, tum difficiliore, ne dicam impossibili curatione, enarrandis; quæ recens observata idem argumentum confirmant, nunc tradam.

Die 8. Jan. 1761. homo 30. ann. consilii causa in Nosocomium venit; triennium elapsum esse ajens, cum melancholia ex oppilatis abdominis visceribus laborans, Hæmorrhoidas sibi provocasset: ex eoque tempore easdem large fluentes quovis mense habuisse: nunc vero a 5. Septimanarum spatio tumidas se quidem

illas, at plane ficas, habere. Quatuordecim diebus, ab ultimo fluxu hæmorrhoidali elapsis, tussim sibi natam esse, eamque ficcam, & molestam, vires inde minui, jamque ab octiduo & ventrem sibi & crura tumere. Debilis totus homo apparuit, anhelus, macer, fusco-pallidus.

Homo hic, optimi Medici optimo consilio, fluorem hæmorrhoidalem ante triennium sibi adplicitis provocavit hirudinibus. Verum & optima consilia sua incommoda habent. Toties clari viri id notarunt, quod aperta vasa hæmorrhoidalia sæpe non sufficienter postmodum claudantur, hincque nimio fluore hydropem, ac mortem producant. A *Galeno* in hæc usque tempora id Medicos luxisse, tractatu *de hæmorrhoidibus* evici. Hinc infidum aliquando auxilium est. Pœnas certe inde homo noster luit. Cachexia dudum affuerat, Tussis accessit 14. die ab ultimo fluore, hydropem pectoris referens, manifestusque apparuit Hydrops abdominis & crurum, quo tempore prima vice deficiebat hic fluxus. Hinc evidentissimum fit, tussim ac hydropem non a suppressis, sed a nimis hæmorrhoidibus sumfisse originem.

Datis remediis, potissimum diureticis, hydrops minuebatur, sed sonus Tympaniticorum similis in ventre successit, tumorisque inæqualitas, referens Tympaniam: Diuretica, purgantia, & roborantia, aliquo tempore admota, mensis spatio omnem sustulere Hydropem. Sed nullam spem inde concepimus, cum vires decrescerent. 23. Feb. mortuus est.

Nihil tympanitici in abdomine inventum est: sed, quod nos deceperat, & tympanitidem erat mentitum, omentum fuit, quod in inæqualia oblongaque tubera degenerascens, ac peritonæo horum ope cohærens, ventrem more tympanitico inæqualem repræsentaverat: imminuto quippe plurimum hydrope, non poterat peritonæum sufficienter se ad intestina adplicare, præ-

tuberibus crassis densis omenti secum connati. Hinc intestina in vacua hæc spatia intrare, aëre sæpe distendi oportuit, adeoque percussum abdomen sonum edere, licet neutiquam in formam tympaniticam perpetuo extensa essent. Jucundum interim videre erat, quam mire decepti essemus. Omentum enim totum ab inferiore parte intestinorum remotum, atque in se revolutum, ab angulo coli sub hepate, usque ad flexuram ejusdem sub liene, induram, crassam, ac cartilagineam substantiam, digitum pluribus in locis densam, degeneraverat, ubique cum peritonæo connatum. Hinc anatome difficilis erat, præcipue cum intestina tenuia, omento non tecta, cum peritonæo levibus vinculis hinc inde cohærerent. Igitur degenerascens omentum, inæqualitate ventris; intestina, dum flatibus distenta loca inter tubera omenti vacua occuparent, sonitum tympaniticum in percussione abdominis dabant.

Cæterum, peritonæum totum, omnia intestina, integrum mesenterium, universa pleura, superficiem, substantiamque suam totam, granulofam habuere; granulis albis, multum eminentibus, durisque iisdem, & quam proxime sibi invicem adpositis. Hepar, lien, renes boni. Renibus pinguetudo nulla. Vix libræ tres lymphæ in toto ventre. Flavedo hujus lymphæ intensa; num a vehementer transsudante vesicula fellea? Bilis cystica profunde flava. Levis utroque pectoris in cavo hydrops, a libra dimidia in singulis aquæ fuscorubrae. Cor in substantia pallidum, in cavis utrisque multo grumoso cruore plenum: ad principia vasorum majorum paucus sanguis; sed mox inde complanata aorta, vena cava, vasa iliaca: percissaque eadem in longitudine, vix guttam sanguinis dabant. Nec putet quis vulneratis aliis id contigisse vasis; nam a principio ad finem usque, Cl. collega *Gasser*, totumque auditorium medicum, siccissimam anatomen mecum mirabantur. Pulmones toti quanti duriserant tuberculis, ad sensum

cartilagineis, pleni; transcissi autem, pus undique inter illa tubercula fuderunt. Quod autem mirum maxime, nullibi cum pleura accreti fuere.

Simulata tympanitide deceptos nos fuisse, supra ostendi: verum annos quoque non decepit pectoris perforatus hydrops? utique a tanta universi pulmonis degeneratione tussis, anxiae respirationis, anhelitusque, verosimilius causa deducitur, quam ab unica libra liquidi in utroque pectoris inventi cavo. Nisi statuere maluerimus, sicut diureticis & hydragogis aquam ventris, ita quoque eam pectoris evacuatam fuisse.

An granulosa tam substantia, quam superficies membranarum, ad vitae finem generata est a Phlogistico illo, quod toties invenimus transsudasse, & alias, quaedam ceu membrana, viscera, pleuram, ac peritonæum tegisse?

Cur sanissimi pulmones, ut toties vidimus, brevique novis confirmabo exemplis, tam sæpe ita accreti pleuræ, diaphragmati, mediastino, pericardio, ut nullo in puncto liberi sint; & in hoc homine, in quo corruptissimi erant, ubicumque liberi reperti sunt? Causam non bene capio: Hydropem pectoris forte olim copiosior, id non impedivisse, firmus teneo; primo quia concretionem hanc, majorem, minorem, in Hydrope pectoris passim invenimus; secundo quia ab aquis versus pectoris inferiora locatis, ut in Hydrope pectoris affolet, superna pulmonum pars versus jugulum a concretionem cum pleura prohiberi non potest.

§. II. Vir idem, cujus capacissimum ventriculum pag. 102. descripsi, dat nobis mirabilia observanda. Quippe tribus ille de causis a me aperiebatur. Primo quod calculo laborasset, plurimosque labentibus annis calculos urethra reddidisset; jamque ab anni retro spatium ita immunis a calculi vixisset ærumnis, ac si eodem laborasset nunquam. Secundo quod certo creditus pectore hydropicus, signis hujus morbi primariis, quæ nocte

nocte potissimum adfuerant, sub vitæ finem noctibus caruisset. Quod tertio suspicio orta esset, an non Hydrops pectoris, eo quod cessantibus, calculi excretionibus & cruciatibus natus esset, calculosis forte in pulmone concretionibus deberetur? Quod ad calculum attinet, id Cap. 13. dabo; impræsentiarum modo illa, quæ quæstionem de Hydrope pectoris elucident, enarrabo.

Annorum hic ultra quadraginta, cum diem fungeretur, multis ab annis calculo laboraverat, calculos plures urethra excreverat, donec demum remedio quopiam sumpto se calculorum exemptum cruciatu gauderet: ex quo autem hac a calculo immunitate fruebatur, pectore angī cepit, cruribus intumescere, ac tussi molesta, levioꝛeque cruoris sputo vexari. Crevere hæc symptomata ita, ut post elapsos 3. menses nequiverit, nisi in dextrum latus decumbere; anxietates a primo inito somno experiretur; cruribusque interea ac femoribus vehementer tumesceret; ventre interim multis retro ab annis semper a natura, haud vero a colluvie aquarum, tumidulo. Copiosum Oxymel squilliticum cum multis aliis diureticis, Kermes minerale, Gummi ferulacea, interposita Hydragoga, motus, frictiones, nihil profuere.

Sed insolitum quid contigit ultimis 14. vitæ diebus. Consuetas suas noctes calamitosas ne experiebatur quidem ultra, sed tranquillimo somno, sex, septem, horarum spatio, lætus fruebatur, ita ut primarium illud Hydropis pectoris signum prorsum evanesceret. Quod autem mirabile erat, si ad beatum hunc statum continuandum solito diutius decumberet, en sensim, quæ nocturnæ olim fuerant, nunc anxietates fiebant diurnæ; imo eundem sæpius in sedili positum invadebant. Crurum autem tumoris, ac universi corporis debilitatis, insigne fuit incrementum, & post 14. optimas noctes demum 12. Maji, cum levi ac vago delirio, obiit.

Sequenti die cadaver aperuimus, egregius Medicus

Aulicus nobilis *ab Hentschel*, Chirurgus *Leber*, egoque. Purpureum corpus ac lividum, spatio horarum 36. a morte elapso, ad humeros, jugulum, thoracisque tum superiora, tum latera. Venter longe quam in vita tumidior. Costarum cartilagine totæ, infimarum exceptis, ossæ. In dextro Thoracis latere octo libræ foetidæ subrubefcentisque aquæ, in sinistro vix uncia paucæ. Cordis bovinæ magnitudinis dexter ventriculus parietum tenuitate hic vix lineam, ibi sesqui lineam, crassus, cavitate magnus; sinister autem pollicis crassitie, exiguum valde cavum habuit. Aorta, carotides, subclaviæ, substantia crassissimæ, amplissimæ diametro. Polyposi quid utroque in cordis cavo. Lividi, flaccidi pulmones, quocumque in loco transcinderentur. Hepar lobo sinistro parvum, dextro monstrosum fere, longum ita, ut cum peritonæo circa cristam Ilei connatum esset. Flava ac multa bilis, nulli calculi biliiosi. Ventriculus ingens, ut pag. 102. Cap. 7. enarraui. Ren dexter quadruplo majus naturali, mollis, flaccidus, cætera bonus, sine calculo; ejusdem bonus ureter. Extenuatus ita ren sinister, ut nec longitudine, nec crassitie, digitum excederet, alias nec purulentus, nec calculosus. Naturalis omnino & sine Calculo vesica urinaria. Peritonæum pulvinaris instar tumens, lumbos totos in pelvim usque explebat; eo autem percisso patuit laxam, corruptamque cellulositatem esse, quæ tantum utrimque pulvinar componebat. Corrupti ac fere consumpti Psoæ.

Anatome igitur constitit 1^{mo}. indicationem Hydropis pectoris rite captam esse. 2^{do}. Nullas calcareas concretiones in pulmonibus esse inventas, ut quidem suspicio ferebat. 3^{tio}. Hominem hunc, qui summus olim Nephriticus numerosos calculos sæpius excrevisset, totam diathesim demum superasse, nec habuisse partium degeneraciones, ut vocant, essentielles; cum renis sinistri cætera sani parvitas, mole dextri compensaretur.

Ve-

Verum cur placidas adeo noctes ultimis vitæ 14. diebus egit? Phænomenon hoc mihi vix explicabile. Respondeo duntaxat me *Part. V. hujus Operis* evidenter demonstrasse ingentem Pectoris hydropem, in quo nocturnæ anxietates quinque mensibus filuerint: tum & alium validissimum Hydropem pectoris, cui anxietas illa nocturna affuerit nunquam: deinde mox datum me Hydropem pectoris a morte inventum, una cum Phthisi pulmonum, eorundemque pessima degeneratione, quo in homine Hæmoptoë cum sputis purulentis, ac febris hectica, veram Phthiseos pulmonalis ideam exhiberent, nullo vero modo eam Hydropis pectoris. Hinc quamvis Phænomeni dati causam non intelligo, merito tamen concludere videor id minime mirum nobis oportere videri, quod 14. diebus in vero Hydrope pectoris præcipuum signum deficiat; siquidem & longe diutius, & perpetuo defuisse, aperta cadavera demonstrent.

Quæ ultra circa calculosam hujus hominis diathesin, & cor, notata fuerint, hæc suis quæque locis dabo; enarrabo modo nunc, quam mox promissi, historiam.

Ineunte Junio proxime elapso cadaver aperuimus, Magn. *D. Kessler*, Expert. *Guarin*, egoque, hominis, apud quem olim ter, quater, fueram in consilium vocatus, & ubi ex copioso Baccho hæmoptoem, & sputa purulenta, copiosa, febrimque continuam remittentem, constanter animadvertentes, Phthisin pulmonalem adesse statuebamus; neutiquam vero, cujus nunquam signa videramus, Hydropem pectoris: nisi forte obscura quædam sub ultimis vitæ diebus adesse suspicari forsitan quis potuisset. En vero Anatomen! sex libras aquæ abdomen dabat, $7\frac{1}{2}$. libras dextrum Thoracis cavum, sinistrum libram unam. Pulmonum cartilaginea substantia longe durior, & pluribus in locis fere ossea; ut portione clam mecum lata, publice demonstravi: Vesicularis autem eorum fabrica plurimis

sebaceis corporibus plenissima. Substantia denique pulmonum tota fere diffuens præ corruptione. Mucosi tumores tremuli, gelatinæ instar, membranis conclusi, magnitudine pugni virilis, supra utrumque renem inventi. Ventriculus commode excipiebat libras 12. aquæ. In vesica fellea tres polygonati calculi.

Sed modus considerandus est, quo hydrops pectoris hic formatus. Non proprie, ut assolet, in cavo pectoris hærebat aqua, verum pulmo, inferiore sui parte, ad altitudinem trium digitorum supra locum, quo diaphragma thoraci connectitur, pleuræ, diaphragmati, mediastino, intime connatus; superiore autem parte undequaque latitudine duorum digitorum cum pleura unitus. Porro intra locum cohæsionis superioris, & inferioris, pleura nuda erat, & $7\frac{1}{2}$. libræ aquæ ad pleuram nudam accumbentes, removerant pulmones, eosque sursum, deorsum, atque ad mediastinum, compresferant, quo sibi spatium compararent. Eratque hoc spatium ad costarum arcus; ita ut pulmo ad latera sterni, & spinæ dorsi arctissime cohæreret, in medio vero thorace circa arcus costarum nihil pulmonis esset.

Hinc iterum concludo, polymorphum hunc morbum, gravem posse, diuturnumque adesse, quamvis sui vix signa edat. 2^{do}. Confirmari hinc quæ superiore anno super difficillima ejusdem diagnosi differuerim. 3^{tio}. Ex loco, quem hic aquæ occupaverint, itidem confirmari, quæ de morbi hujus per paracentesim curatione, ut theoretice potius, quam practice proposita, adnotaverim: Quippe loco solito instituta paracentesis, pulmonem accretum vulnerasset, nullas eduxisset aquas. Frequentia hujus accretionis, quæ tanta, ut tertiæ, saltem quartæ, mortalium parti contingere *Diemerbroeckio* visa sit, curam hanc, si instituere-tur, inutilem sæpe ostenderet.

Absoluturus hoc Caput, Lectoribus in memoriam revoco, quod *Part. V. Cap. 3. Pag. 43.* post *Pisonem*

nem notaveram; nempe pectore Hydropicos, cum subita corporis erectione, a nocturnis anxietatibus in primo somno invadentibus, se levare advertissent, voluisse easdem postmodum in sedili, erecto corpore dormiendo, prævenire, sed incassum: cum igitur etiam sic erectos dormientes anxietas invaderet, rationem hujus nocturnæ anxietatis nobis difficiliorem intellectu videri. Sane Historia penultima priores observationes confirmat, in eo adhuc notabilior, quod etiam de die in sedili dormientem anxietas caperet eadem. Non do equidem hanc observationem, ut universalem: dantur forte, quibus primum somnum in sedili transegisse profuerit; sed contraria *Pisonis*, meaue sæpius confirmata observatio, casum saltem haud infrequentem esse demonstrat.



C A P U T X.

Problemata, & Difficultates.

- §. I. *Laus Pathologiæ, & frequens certitudo; sed simul ejusdem curta sæpenumero supellex. Ratio est, quod Pathologia unico duntaxat modo vitam humanam utcumque intelligat, Adorandus vero vitæ Autor, & Fons, vitam humanam posset infinitis condere & conservare modis. Exempla, quæ id evincant.*
- §. II. *Historia curæ Aneurismatis spurii, quæ optime quidem feliciterque peracta, infelicissima tamen. ignotis de causis, fuit. Plenitudo vasorum cunctis conspicua signis, ad mortem usque; Vasorum tamen perfecta post mortem vacuitas.*
- §. III. *Anatome hominis, cui per annum ante mortem pulsus nunquam debilis, sed semper fortis, durusque, usque ad ultimam luctam mortis, in quo, nulla prægressa evacuatione, nullus sanguis fluidus, sed exile modo fi-*

lum polyposum in omnibus, iisque dilatatissimis corporis vasis, inventum est. Quædam horum similia, sed imperfectiora, ex Cl. Lieutaud. §. IV. Casus feminæ, quæ nunquam symptomata affecti cordis, majorumque vasorum passa, cor & vasa majora monstruosa ac vitiosa magnitudinis, totum fere thoracem occupantis, habuisse deprehensa fuit. §. V. Anatome portentosi cordis, in cujus substantia ossiculum, & cujus valvulæ tricuspidales non modo initia Coronariarum neutiquam tegere potuerunt, verum etiam Cor digiti amplitudine apertum semper reliquerunt. §. VI. Vita, & Respirationis non multum incommoda, cum Pleuræ, Diaphragmatis, Mediastini, Pulmonum, Pericardii, Cordis, majorum Vasorum, firmissima inter sese concretione, sic, ut, nonnisi unicam, eandemque immobilem prorsus molem, præ se ferrent. §. VII. Affecti ossis sterni, mortisque mirabilis historia, in qua nec sufficiens causa morbi in vita, nec vera causa mortis in cadavere, detecta est; & in qua febris hectica cum omnibus suis signis adfuit, excepto eo, quod & obesum, & torosum, ad ultimum usque vitæ halitum, corpus perseveraverit. §. VIII. Testis contusio generat horrenda in abdomine; itidem seminis abundantia & corruptio citra contusionem. Stupenda Anatome. Castratio proventum eousque morbum non tantum non curat, sed mortem accelerat calamitosam. Quædam in hanc rem ex Hildano, aliisque. Consilium præcavendi. §. IX. Tumor in Tibia ex contusione natus, 30. annis inculpate gestatus, tandem malignus factus, curatur enucleando. Recrescens irritamenta patitur, generatque Empyototonon, & Maxillæ Tetanon. Ablato tumore hæc symptomata perseverant, occidunt. Doctrina magni Hippocratis circa Tetanos. Calor urens in Ardente febre vix auctis Thermometri gradibus. Tetanus musculorum & tendinum, diu a morte superstes. §. X. Anatome intricatissima, in qua omnia intestina tenuia, & crassa, a sua externa tunica separa-

rata inveniebantur, & ex eadem, tanquam ex vagina, aut theca, evaginabantur illæsa. Demonstratio hinc confirmata 1^o. quod intestina suam tunicam extimam a Mesenterio, ac Mesocolo, mutuentur. 2^{do}. quod ligamenta coli a tunica externa potissimum oriantur. Determinatur justa Intestinorum longitudo. Difficultates circa veram hujus morbi naturam. §. XI Hernia intestinalis, vaginalis, & causa Ilei morbi vehemens, longis ab annis in corpore præsentis, sine ullis suis signis aut symptomatibus. Anatome.

Pathologia nititur quatuor potissimum fundamentis, quorum primum quidem Anatome est, quæ omnium humani corporis partium figuram, molem, situm, variumque cum aliis nexum, & harmoniam, docet. Alterum est Physiologia, una cum Mechanice, Hydraulice, ceterisque adscitis Physiologiæ disciplinis. Hæc partium per Anatomicen cognitarum destinationem, usumque, exponit, indeque humanarum functionum & actionum exercitium explanat. Tertium ejus fundamentum merito habetur experientia medica, eaque eo quidem tempore potissimum capta, quo illæ ipsæ functiones, earumque instrumenta, aut otiantur, aut læduntur, aut destruuntur. Quartum denique tum omnium in genere cadaverum inspectio est, tum præcipue eorum, quorum morbi, dum viverent, attente considerati fuerant, diligenterque adnotati.

His innixa Pathologia, sæpius morbos multos a principio ad finem ita explicat, ut nulla certior evidentiorque demonstratio haberi in Physicis queat. Constatque inde Pathologicum bonum esse neminem, qui non simul bonus Anatomicus, qui non accuratus existat Physiologus. Ut enim linea recta ad curvæ nos adducit cognitionem, ita sani, vegetique hominis, intellecta Natura, functionumque integritas, nos in intellectum ducit causarum, quæ earundem functionum læsionem,

per-

perversionem, destructionem, soleant producere.

Verum enim vero occurrunt nobis sæpenumero morbi quorum Phænomena laudatis hisce ac necessariis principiis haud modo non explicantur, sed iisdem plane adversantur. Ecqua tandem hujus causa portenti? Paucis dicam. Eorum quæ ad hominem pertinent, multa novimus, omnia non novimus; & quod res est, vitæ, ut ita dicam, ignoramus latitudinem. Perennat siquidem illa quandoque, idque notabiliore tempore, interea dum otari videantur, imò dum destructa, aut inepta saltem, ea organa, illa vitæ appareant instrumenta, quæ quidem ex veris Artis principiis ad vitam, vitæque functiones, absolute necessaria statueramus. Velimus, nolimus, hic, hic inquam, curtam nostri ingenii supellectilem fateamur oportet: incipimusque sub his velamentis Illum detegere, quem Fontem Vitæ Sacra vocitent, qui dum secundum nostra Anatomica, Physiologica, Mechanica, Hydrostatica, Hydraulica, Hygraulica principia, vitam conservat mortalibus, Naturæ se monstrat Autorem; dum vero reclamantibus hisce legibus eandem perpetuat, Omnipotentem sese, infinitarumque, ut ita dicam, Naturarum Creatorem esse, & ut paucis omnia comprehendam, libera voluntate cuncta se agere, ostendit.

Quum plura observata mea propria argumentum horum, quæ dixi, subministrant, præcipua collegi, & ordine enarrabo.

PROBLEMA PRIMUM.

FEmina 65. ann. optima sanitate semper gavisa; corripitur media nocte 22. Martii 1761. anxia respiratione ac leviori hæmoptoë. Vocatur extemplo, venam qui secet, balneator. Is porro, instrumento suo resiliente arteriam tundit, ingentique saltu profilientem cruorem comprimere satagens, non nisi tertio repetito adparatu compescit. Adstantes Chirurgum exonerant,

rant, retrotractum ab ægra brachium caufati.

Vulnus, ad 12. diem non amoto apparatu, vidimus 18. die ab eodem inflictō, deteximusque ingentem in humero ac brachio a compressionē tumorem. Pulsus in carpo fortis, & calor, vel arteriam haud valide compressam esse indicabant, vel nunc per laterales arterias ex Humeraria ortas, jamque dilatatas sanguinem in laterales arterias, quæ ex brachiali arteria ante, postque ejusdem bifurcationem egrediuntur, nunc retrogrado motu inferri in arteriam brachialem, aut radiæam, atque circuitum humorum in manu hoc modo resuscitari.

Sphacelus humeri præ foribus adstans, citam operationem poposcit. Perfecit eam D. *Leber* Assistentibus Dⁿis Chirurgis *Homburg, Fischer, & Reichberger*. Methodum comprimentem intercipienti prætulimus, ob rationes Tom. 1. Cap. 30. §. 10. laudatas. Apposita machina tortili supra arteriam humerariam, operator sondam cavam induxit in vulnus cutis, atque cava omnia esse detexit. Integumenta supra sondam cavam transcidit ad digiti longitudinem, eduxitque sanguinis grumosi, nec dum foetentis, libram dimidiam, & prudenti digito quasvis hujus massæ reliquias abstulit: tunc sondam prudenter deorsum in vulnus duxit, ut prius, ita & nunc, caute evitans vulnus arteriæ, arteriamque ipsam; ac congruatum ibidem sanguinem, cute ad pollicem latum percissa, eduxit.

His factis relaxavit paulisper comprimens instrumentum, quo rite contueremur Arteriæ vulnus. Horruimus profecto videntes idem quatuor lineas longum, ita ut accusatio retracti sub venæ sectione brachii confirmari videretur. Portio aponeuroticæ expansionis Bicipitis Brachii suo erat loco. Arteria vulnerata Humeraria fuit ante suam in Radiæam & Ulnarem divisionem. Quodque Tom. 1. Cap. 30. de corpore rotundo immobili, ad vulnus arteriæ notavi, idem hic quoque
in-

invenimus; formatum a vagina cellulosa arteriam, venam, nervosque, hic loci involvente. Hæc valida nimirum compressione a Chirurgo facta cum ipsa Arteria ubique conglutinatur, coalescitque, eo excepto loco, quo vulnus est. Vis enim sanguinis hanc cellulositatem a se repellit, suoque in illam impulsu tumidam atque rotundam efficit.

Adverteramus porro loco citato, in aliorum nostrisque casibus Aneurysmata spuria integre curari sola compressione externa, quando vagina hæc sic cum arteria coit, ut sanguis per vulnus arteriæ in saccum hunc se penetrans, nequeat amplius latera sacci, cum arteria coalita, ab eadem remove: curari vero minime, si compressione nec sufficienter, nec tam feliciter facta: impetus cruoris, in saccum insilientis, latera sacci hinc inde ab arteria removeat, seque hinc furtim per totam diffundat brachii humerique cellulositatem. Atque præsens casus cum sic se haberet, non poterat compressione sola, sed operatione quadam instituta, curari. Porro cum hoc sacco arcte unita Aponeurosis erat, vi compressionis.

Edocti igitur Aneurismata egregie curari relictis his cunctis concretis portionibus, eluimus primo brachii ac humeri vulnus, vulneri Aponeuroseos pulverem fungi Agarici inspersimus, totique sacco: dein Agarici rite compressi laminas ordine septem, sensim grandiores, imposuimus, & compressam, ut vocant, desuper; tandem idonea ligatura totum firmavimus adparatum. Brachio, humero, manui, fomentum vini, aqua calida diluti, adpositum est.

Conquesta licet ægra dolorem, bene tamen toto eo die habuit se, & usa Emulso cum Diacodio, ac Nitro, bene dormivit. Die sequenti bene habuit, ad vespertas autem febris magna orta est, cum anhelitu, stupiditate, desipientia levi, pulsuque celeri, forti, duro. Unde ad octavam vespertinam unc. vj. sanguinis sano de brachio edu-

eduximus, & misturam Aquæ Hyssopi, oxym. squill. ac stib. diaph. dedimus. Refrigeratus sanguis rubram insulam bene consistentem, crustamque inflamm. densam, hinc albescentem, inde leviter rubentem, formabat. Impetuosius vena exsilierat. Interim Brachium aneurysmaticum naturaliter calebat, infraque ligaturam pulsabat, circum ligaturam autem anxie circumspicientes, omnia sicca læti deprehendebamus. Ita ut hucusque nullam, hac saltem de causa, inquietudinem animo foveremus. Hora vero undecima adparatus leviter madere, tingique, observabatur. Ilico tamen hæmorrhagiam hanc incipientem constrictior Machina tortilis compressit. Ægra interea somnolenta fiebat, & ad mediam horam primam pulsus, etiam sub ligatura, fortior deprehensus est. Ad primam nocturnam expiravit, horis 41. ab operatione elapsis.

Ad 8. matutinam brachium examinantes, deprehendimus vix. 5. aut 6. uncias sanguinis hæmorrhagia illa exivisse: id enim exacte nos inspectis linteaminibus determinare didicisse Tom. 1. Cap. 34. evici. Ergo non periit hæmorrhagia; 1^{mo}. quod post cohibitam eandem, inventus sit fortior pulsus. 2^{do}. Quod modica admodum copia effluerit. 3^{tio}. Quod sanguis, dum paulo ante de Vena educeretur, valido jactu profilierit.

Neque a Gangræna, compressionem validiorem haud raro sequente, extincta est. Pulsus namque sub eadem semper manifestus ad mortem usque fuit, & manus egregie semper caluit, imo ipse anatomicus conspectus quamvis gangrænæ suspicionem amovit.

Examinantes deinde operationis apparatus, invenimus illum egregie adhærere, infimamque agarici lamellam adeo vulnere esse infixam, ut scalpello inde amovenda fuerit. Figuram vulneris eidem pulcre impressam, Clar. Profeffor *Gasser*, qui ipse eam a vulnere vi amoverat, nobis omnibus demonstrabat. Sanguis sub agarico in sacco congrumatus & consolidatus fere

totus. Quamobrem merito conclusisse videmur levem illam Hæmorrhagiam ex laterali vase, alicubi in integumentis non compresso satis, ortam fuisse.

Horum recensione crediderim, quosvis æquos rerum æstimatores concludere. 1^{mo}. Operationem egregie institutam fuisse. 2^{do}. Mortem neque ab Hæmorrhagia, neque a Gangræna, contigisse. Quænam igitur causa Mortis? Prosequamur reliquam Anatomiam.

Viscerum bona conditio. Sed vasa universi corporis, majora, minora, ita & flaccida, & vacua invenimus, ut ficciorem Anatomem nemo viderit. Sanguis unice inventus est fluidissimus in basi cranii ad unc. ij. copiam effusus, ita ut ibidem videatur vasculum fractum fuisse.

Repetamus igitur Historiam totam. Quinque ante mortem horis pulsus celer, fortis, durus, proinde phlogisticus, fuit. Sanguis de vena tusa vere inflammatus prodiit, saltu exsiliens, vi reprimendus, dum vena clauderetur. Exigua admodum Hæmorrhagia fuit. Post venæ sectionem & Hæmorrhagiam, dimidia ante mortem hora, fortior deprehensus pulsus est tam in affecto, quam sano brachio. Interim sanguis nullus in arteriis venisque fuit, ne ejusdem quidem illa minima columna, quam a minima arteriæ contractione manere oportere vulgo credimus. Vacuitas perfecta æque in venis, quam in arteriis.

Itaque mortis causam proximam video a compressione, quam ab effuso intra cranium sanguine Medulla oblongata, Nervorumque origines passi sint; vitam tamen ex sanguis corporis, cum signis ad mortem usque plenitudinis vasorum, cum non capio lubenter aliis, me in arte versatioribus, exponendam relinquo.

§. III. PROBLEMA ALTERUM.

ARthriticus homo, de quo Part. 5. Cap. 5. pag. 76. & in Dissertation. de Irritabil. & sensibil. pag. 25. egi, in omnibus suis calamitatibus, durum for-
tem-

temque pulsum nunquam non habuit; ut toties mecum per longum ejus morbum Medicinæ Studioſi obſervarunt mirabundi. Conſtanter hic pulſus adfuit, niſi morte jam adſtante præ foribus. Cum mortuum illum 2. Octobr. 1759. aperiremus, invenimus aortam univerſam, arterias emulgentes, iliacas, femorales, amplas quidem, ſed flaccidas, ſuo in cavo ad crura uſque, gerentes nihil, quam filum, ſive chordam tenuem, albam, polypofam, quæ craſſitudine inæqualis, in maxima ſua diametro vix ſeſqui lineam haberet, pluribus in locis lineam vix excederet, dum interea vas columnam digito craſſiorem ſine ulla extensione continere potuiſſet. Cor itidem craſſum, pallidum, vacuum, habens tantummodo dextra in auricula ſinuque quid polypofi, & in ſinu ſiniſtro pauculum grumofi cruoris, in ſubclaviis atque carotidibus arteriis, funis, ſive filum polypofum, vix lineæ fuit. Ad venas autem quod attinet, Cava, atque renales, diametro maximæ, ſed vacuæ; excepto filo, illi ſimili, quod in arteriis inventum, ſed hinc inde filo arterioſo linea craſſiore. Aquam multam utrumque pectoris cavum habuit, ſanguinem vero nullum; ita ut æque ſicca hæc, quam proxime præcedens Anatome fuerit.

Nullas evacuationes paſſus hic homo eſt, quia nec habuit ſufficientes: cum tranſpiratio, ſudor, alvus, urina, poſtremis vitæ diebus penitus deficerent; atque a menſis retro ſpatio parcius debito fluxiſſent. Quæ ergo vitæ ratio in illo homine fuit? Non ſanguis, ſed chorda polypoſa in vaſis fuit, tenuis adeo, ut vaſorum parietes ad columnam decuplo craſſiorem vix adplicare ſe ſe contrahendo potuiſſent. Interim homo vixit, & perpetuo forti ſuo, duroque pulſu, in diuturnis ſuis æumnis nos omnes in admirationem rapuit. Unde rogo, cum evacuationes non modo non præceſſerint, ſed quæ neceſſariæ, dudum & imminutæ, & ſuppreſſæ fuerint; cum nullus fere ſanguis cunctis fuerit in vaſis;

cum denique vasa amplissima amplecti filum hoc tenue, si fluidum adhuc in vita fuerit, nequiverint; unde nam vita hæc misera tamdiu protracta? & protracta quidem perpetuo, cum duro, fortique pullu?

Cl. *Lieutaud* in Epitome Med. Pract. 1759. *Parisiis* edita. ubi Annemiam ad classes morborum refert, asseverat vasa sanguinea interdum usque adeo sanguine vacua reperiri, ut caput, pectus, & abdomen, tam sicca sint, ut ceram referant, vasa minora tum omni carere sanguine, majora semiplena esse, utrumque genus aëre turgere. In Virgine, cui anni spatium sanguis centies detractus fuerat, subito extincta, cerebri vasa ne vestigium quidem sanguinis ostendisse. Homini ob frequentiores in morbo acuto venæsectiones *Leipothymia* post mensem, & mors contingunt. Adverterant tamen paulo ante mortem vires reparari, & pristinum redire homini colorem. In cadavere vasa cerebri penitus sicca, cor sanguine vacuum reperisse se, omnesque sectiones plane siccas fecisse, *Vir* clarus testatur. Sed evacuationes hic prægressæ sunt; in casibus vero binis nostris, vel vix notabilis evacuatio, vel nulla, prægressa est, in quam tantæ vacuitatis vasorum causam refundas. Quanquam in *Lieutautii* cadaveribus difficultatē non careat, vitam aliquantisper productam fuisse, cum tanta humorum penuria.

§. IV. PROBLEMA TERTIUM.

Femina 37. ann. mense Septembri 1760. in Nosocomio *Pasmaniano* ab Ictero curata, inde exivit, renitente optimo ibidem Physico *Collin*, cui mens erat eam firmioris sanitatis reddere, antequam domum repeteret: aucta postmodum debilitate, & difficili respiratione, Nosocomium repetiit, ineunte Decembri. Licet respiratio nunc difficilior esset, tamen nunquam sive quando ictero olim laborabat, sive nunc secundo uscepta, ullum cordis vel dolorem, vel palpitationem passa,

passa, conquestaque est; nunquam intermittentem, in-
 æqualem, remittentem, pulsum habuit, nisi ad mortem,
 quæ a febre, & extrema debilitate contigit 14. De-
 cemb. Cor cum pulmonibus exemptum Cl. *Collin*
 pro publica demonstratione ad me misit.

Ut in enarranda hac Anatome merite capiant bene-
 voli Lectores, monitos eosdem volo, in ponderibus
 numerandis me ubique pondus commune medicum 12.
 unc. intelligere; in mensuris autem capiendis me pedem
 sumere pollicemque *Viennensem*. Pollex *Viennensis* $\frac{4}{3}$
 lineæ minor est *Parisiensi*; $\frac{4}{3}$ longior *Rhenolandico*; di-
 midia linea longior *Londinensi*. Captæque fuerunt om-
 nes hæ mensuræ postquam cor 2 $\frac{1}{2}$ -diebus in spir. vini
 aquæ misto servatum, adeoque utcunque contractum
 esset.

Cor cum radicibus majorum vasorum elotum, de-
 terfum, mollique linteamine probe exsiccatum, pon-
 dus librarum duarum æquabat. Magnitudo autem
 cordis, pondusque, maxime a mole ventriculi sinistri
 nascebatur. Capacitas ventriculorum tanta, ut ultra
 duas libras caperent ambo, sicut exacte capta mensura
 docuit. Dexter ventriculus in longitudine perscissus,
 & situ naturali in tabella explanatus, sex pollicum, seu
 semipedis, latitudinem, prope basin cordis habuit; si-
 nister ventriculus octo pollicum. Circumferentia ba-
 sis cordis pedis integri cum $\frac{1}{3}$. pollicis. Ossea aorta ad
 basim cordis abscissa 4. pollicum in circumferentia
 fuit. Cordis sinistri densitas firma, compacta, dura,
 erat 10. linearum. Dextri autem crassities naturalis.
 Longitudo dextri ventriculi cum ea sinistri æqualis.
 Capacissima aorta ad Cæliacam usque, & in tunicis
 crassissima. Principiumque aortæ altitudine hinc 3.
 illinc 4. linearum, totoque in ambitu, osseum fuit; per
 universum autem ejus decursum insulæ osseæ, a se invi-
 cem remotiores, inventæ sunt. Pulmones boni qui-
 dem, sed ob cordis molem parvi, & in superiore thora-
 ce tantummodo inveniendi.

Si hæc omnes adeo insignes mutationes intra breve spatium prope mortem generari potuissent, in promptu responsum haberetur ad quæsitum, cur femina nunquam anxietatem ad vitalia, turbatos nunquam percepit pulsus? At vero Historia tota innuit a longo retro tempore enormem hanc vitalium viscerum degenerationem, sumfisse originem; dum interea, quæ eam denotarent, symptomata minime observarentur. Utique cor ita monstrosum, ut, explens maximam thoracis capacitatem, pulmones angustum in spatium cogat; cor idem præ densitate indurata vix contractile; adeo capax, ut ultra duas libras liquidi contineat; Osseus aortæ annulus; Aorta dilatatissima, atque indurata, pluribusque latis osseis infulis vitiata; hæc, inquam, omnia cum pulmone vix sanguinem transmittente, vix explicabili, debuerunt necessario ejusmodi humorum fecisse circulum, quem Physiologicæ leges explicare nequeunt.

§. V. PROBLEMA QUARTUM.

In consilium vocabar finiente Novembri 1760. ad Viduam quinquagenariam, cum pie defuncto D^{no} *Erndl*, & egregio Viro, Nosocomii Hispanici Medico, *Hasenörbl*, Autore egregiorum binorum tractatuum practitorum. Erat spasmis illa, anxietatibus, animi affectionibus, maxime iræ, perquam obnoxia. Paregoricis, ac Neuroticis, hinc olim levata, jam haud levabatur ultra; quin potius animo incepit linqui. Judicavimus omnes vitalia, si non protopathice, quod verosimile, saltem deuteropathice, affecta esse. Hydrops pectoris sui quidem suspicionem fecit, verum palam asseri, præ multorum defectu signorum, non potuit. Die 15. aut 16. exinde elapso, extincta est.

In cadavere hydrops pectoris demonstrabatur. Cor cum vasis exentum publico examini subjeci. Ambitus vacuati cordis fuit ad basin 9. poll. 7. lin. Ambitus

cor-

cordis in medio 9. poll. 5. lin. Altitudo a cuspide ad basin 4. poll. 2. lin. Officulum oblongum in substantia superioris partis sinistri ventriculi, digitum immissum mox afficiens, & sic se detegens, longitudine octo linearum, in media latitudine trium linearum, durissimum. Auricula sinistra repleta erat materie crassa, sebacea, inæquali, & cum auricula firmissime accreta: in dextræ auriculæ cornu quoque quid simile fuit.

Valvulæ tricuspidales ad aortam bonæ quidem figuræ, at durissimæ, totoque margine ossæ: corpuscula autem eorum rotunda, a *Morgagni* tam bene descripta, tum universa durissima erant, tum unum triplo majus, osseum. Valvulæ venæ pulmonalis fere unitæ in unicam, eamque latam Zonam, sed naturali duplo majorem; crassam, inæqualem, duas lineas densam.

Ambitus aortæ ad basin cordis 4. pollicum; ad curvaturam suam 4. poll. 2. lineis minus; ubi subclaviam generat $3\frac{1}{2}$. poll.; Ambitus arteriæ pulmonalis 3. poll. 8. lin. Trunci coronariarum semipoll.

Valvulæ ad aortam tegere, ac claudere coronarias non poterant, licet easdem tenaculis fortiter attraheremus. Hoc sæpe. Unde *Morgagni* ex 18. cadaveribus invenit 13. esse, in quibus idem observatum.

At non modo valvulæ non tegebant originem coronariarum, verum etiam breves, induratae, contractæ cum essent, haud tantum non claudebant aperturam arteriæ, sed tale, ad minimum, spatium in medio relinquebant, ut aorta communis magnitudinis per illud commode transivisset. Jamque dudum id ita fuisse, valvularum crassitudo & durities, osseumque in una corpusculum, demonstrabant.

Porro quis circulus, qualisnam sanguinis motus, corde sinistro semper aperto, & aperto ad tantam amplitudinem? certè in arteriæ systole dum ad arteriarum fines resistantia est, hac via patula, multum sanguinis in cor refundi oportuit. Valvulæ enim non ob-

stiteret. Proinde debuit cor continuo ex aorta se contrahente sanguinem copiosum recipere. Unaque modo columna a corde per arteriam, numquam intercepta, semper integra fuit. Nec spatium in hoc ventriculo fuisse videtur ad excipiendum pulmonalium venarum sanguinem. Si nunc consideremus vitium hoc antiquum fuisse, ut ante patuit, quæritur physiologica circulationis in hac femina, quantumvis vitiosa fuerit, expositio, & modus.

§. VI. PROBLEMA QUINTUM.

Revoco huc casum, quem Tom. 1. *Rat. med.* cap. 17. dedi, hominis scilicet, qui insolubili, & antiqua concretione, connatas mutuo inter sese quasunque Thoracis partes habuit, pleuram, mediastinum, integros pulmones, eosdemque iterum mutuis inter sese lobis, pericardium, cor totum; ut proprie loquendo omnes hæ partes nonnisi idem, unicumque viscus referrent. Nec singularis hic casus est, duos similes pueri & puellæ Cap. XII. dabit. Quæritur, quis hic vitæ fuerit circulationisque modus?

§. VII. PROBLEMA SEXTUM.

Puella 14. annorum anxia pectore, difficulterque respirans, cætera sana fuit. Nata 16. annos, mensium fluxum ter passa est, sequenti vero triennio nunquam. Anno vitæ 18. nascitur ipsi in sternum tumor, materiem fluctuatione designans. Cum hoc tumore prima vice ad nos accessit die Decemb. 30. anni 1758. Quia vagæ febres aderant, copiosamque materiem in hoc tumore, interno de pectore ortam suspicabamur, credidimus vel ab ejusdem resorptu, vel ab ossis carie, has febres nasci. Ea de causa aperuimus tumorem, ex eoque pus tum illo tempore, tum deinceps quotidie, vidimus effluere. Binis elapsis exinde mensibus, nempe finiente Februar. 1759. novus apparuit altiore ster-

ni loco fluctuans tumor; qui itidem apertus jugi fluore stillavit. Cortex peruvianus, & lactea diæta, febres egregie profligarunt. Aprili mense novus tumor cum ossis prominentia, sed is sponte recessit. A Majo mense ad Novembrem fluentibus jugiter ulceribus, sanissima vixit, res domesticas parentum in ædibus optime curavit. Menstruo fluxu Majo, Junio, Julio, Augusto, gaudebat, deinceps vero haud ultra. Nov. 16. eam denuo intra Nosocomium suscepi, eo quod novus tumor in depressiore sterni sede appareret. Apertus is, perpetuo deinceps fluxit. Sponte aperiebatur & quartus. Febres denuo continuæ remittentes, vix ultra cortice & lacte moderandæ, fecerunt vehementem materiæ ab osse sterni, vel forte ex mediastino resorptæ, suspicionem. Postremoque hoc tempore tussis accessit, ac puris sputum, tandemque vomitus, singultus, diarrhœa, consuetis immorigera remediis; superstitè nihilominus pulcra corporis, faciei que, torositate: ita ut cortex & lac corpus pulcre viderentur sustinere.

Hac rerum conditione in consilium vocavi optimos Chirurgos nostros: *Homburg* Chirurgum SS. MM. *Leber* Nosocomii Chirurgum, jamque Chirurgiæ in hac alma Universitate designatum Professore, *Reichberger* optimum ad *S. Marcum* Chirurgum, veteranum Chirurgiæ Doctorem *Reutter*; quibus sese, præter egregium Medicum *Erndl* adjungere dignatus est Ill. *Præses*. Quærebatur quæ morbi sedes, quæ ejus natura foret? Equidem sternum quatuor diversis, & manantibus, & inter sese, facta injectione, communicantibus foraminibus, pertusum erat; per aperturam autem inferiorem specillum ad profunditatem sesqui pollicis immergebatur, sursumque ductum libere aliquantis per ambulabat. Idem specillum superiori foramini inductum circa 3. & 4. costam lateraliter pollicis latitudine intrabat; ut communicatio sic esset a sterni ulceribus ad quandam seu fistulam seu cavitatem la-

teralem. Cavitas autem illa lateralis non videbatur in ipsam pulmonum abire substantiam, sed inter pleuram ac pulmonem; aut potius pleuram inter, costasque, & musculos: siquidem aër fortiter inspiratus, & expiratus, admotam candelam minime movebat. Pronum inde fuit cogitare forsitan in dilatato Mediastino vomicam latere, quæ sensim sibi viam per exteriora moliretur, & quæ ad superiora sterni lateralem haberet processum. Quærebatur 2^{do}. in hoc consilio foretne alia, quam quæ adhibita hucusque esset, adhibenda curandi norma? An perterebratio ossis, ut *Galenus* fecisse se scribit, qui quoque corrupti Pericardii portionem, osse terebrato, abstulit; nudique conspexit cordis motum? Qualem operationem quoque factam historia famosi *Adæmoni Becker* testatur, qui ipse in opposito ad parietem speculo proprii cordis motus contemplatus fuerat? Verum ab una parte sternum, inæquale, & gibbosum admodum, trepanum difficulter admissurum esset; & suspicio duntaxat, non certitudo, aderat, sub eodem inveniendæ in Mediastino vomicæ: siquidem non Mediastinum modo, verum etiam quævis partes, tum proxime adjacentes, tum remotius sitæ, circa sternum ea, qua turgent, materie, evacuare se possint; unde frustra forte foret terebratio. Ab altera parte quatuor diversis aperturis cum pus manaret, habebat Natura, quo se expurgaret.

Conclusio igitur fuit præsentia symptomata mitigare; corpus decocto Bardannæ, & lacte, implendo, & depurantibus injectionibus hucusque adhibitis substituendo novam, quæ aliquoties mire profuerit in similibus; scilicet cocta uncia media Colcotharis vitrioli in aqua per semihoram, ut libra liquidi superesset: quibus per aliquod tempus continuatis, novum consilium super agendis convocandum esset. Atqui vomitus, singultus, diarrhœa, nulla ratione curabantur, ulcera siccabantur, vires cito concidebant, octiduo post consilium elapso, moriebatur.

Cadaver pulcre torosum, pingue, crassum. Crassum omentum, adeo magnum, ut universum abdomen tegeret. Colon appendicibus innumeris pinguiferis cinctum. Ventriculus, intestina, diaphragma, jecur, splen, mediastinum, cor, pulmones, qui in dextro cavo thoracis multum, in sinistro parum, cum pleura cohærebant, optimi, sanissimi.

Cum igitur omnia viscera summam spirarent sanitatem, sternum examinandum accuratius fuit. In crassum illud, convexum valde, tribus in locis erosione perforatum, pluribus plagis nudum, carie exesum, ab interiore parte faccum gerens, quem pleura a sterni, costisque, recedens, formaverat; nempe ad trium digitorum latitudinem, in tota fere sterni longitudine, pleura utrinque recefferat a costarum cartilaginibus, & anteriore parte musc. intercost. internorum, una cum sua productione media, qua mediastinum format. Pollicis distantia pleura hic a sterni distabat, non tantum quia retropulsa a contenta materia, sed quia sternum, ut dixi, convexum erat. Paucum pus hic aderat, quia ab octiduo vix quid effluxerat, sed certo certius videtur a pure copiosiore hic collecto, formatus olim hic faccus, sive hoc puris receptaculum, fuisse.

Hoc ipsum receptaculum communicabat cum sinu, seu appendice ejusdem oblongo, cæco utrinque, in thorace locato, inter pleuram, & musculos intercostales, digiti longitudine. Pus nunc paucum inerat, ita ut vix intra thoracem hi sinus prominere. Offa costæ 3. & 4., numero a superioribus ducto, utroque thoracis in latere, circa sinus illos exesa, scabra, tamen alba: unica in plaga musculus intercostalis internus multum, externus parum, exesi erant.

Phænomena morbi mortisque considerando, mortis causam quærendo, hæreo aqua. Pure copioso olim fluente, sanissima vixit; domesticos alacriter peregit labores. Posthac quamvis pus copiose manaret, hæcticæ

febres, cortice insuperabiles, vomitus, singultus, diarrhœa, vehementer eam affligunt. Tandem siccis fere ulceribus, vomitu, diarrhœa, singultu, auctis, intra octiduum moritur. Perit quidem hæc juvencula omnibus quidem symptomatibus hæcticis, sed non modo citra hæcticam corporis, humorumque consumptionem, verum etiam cum venusta musculorum torositate, cum totius obesitate corporis. Colliquescens, seu ut in scholis loqui amant, colliquativa diarrhœa phthysicorum more, vitam extinxit; corporis pulchra torositas, & obesitas, viscerum omnium illibata integritas, colliquescentem morbum plane negant. Neque enim, si sterni territorium cum finibus suis lateralibus excipias, quidquam toto in corpore, quod sanissimum non fuerit, inveneris. Totum vitium fere extra leges circulationis hæsit.

An pus fundum receptaculi post sternum copia, ac pondere suo, in diaphragma preffit, atque illud convellendo, singultum vomitumque genuit? vix videtur, cum ultimis vitæ diebus sicca ulcera, & saccus fere vacuus fuerit, interea dum eadem symptomata pergerent.

Nunquid vitium in osse sterni natum prius fuerit, & quidem a valida thoraculi in sternum compressione, quam sero deteximus? An proinde nata sanguinis phlogistica diathesis ab osse affecto, quæ quotidie per idem os evacuaverit se sic, ut corpus maneret sanissimum? An hæc ita aucta postmodum diathesis, ut licet plurimum ulceribus efflueret, multum tamen sanguini intime commistum hæserit? Nunquid hinc 10. ante mortem septimanis diarrhœa, vomitus, singultus? Et denique an ultimis vitæ diebus, cum ulcera siccesserent, sanguis nimia copia phlogistici oneratus, adeoque per minima vascula transfluere ineptus, mortem induxerit?

Si simul corpus dudum extenuatum, & emaciatum
fuis-

fuiſſet; cauſam manifeſtam interitus deprehendere-
mus; prout *Tom. 1. Cap. 11.* & paſſim in plurimis ca-
pitibus, multorum cadaverum ſeſtione demonſtrare
conatus fui: verum quia viſcera omnia ſaniſſima, corpus
obeſitate ac toroſitate conſpicuum fuerit, explicatio
morbi mortisque deficit.

§. VIII. PROBLEMA SEPTIMUM.

JUvenis 25. annor. ad *Fratres Miſericordiæ* ſe contu-
lit, eo quod a contuſione ad inguen, teſtemque dex-
trum, ſibi ſexenni facta, dolorem jam tumorem-
que ingentem perciperet. Contulerat multum aug-
mento hujus, quod Herniam eſſe quidam rati, Brachie-
rium admoviſſent. Ventrem univerſum durum, ac do-
lentem, Religioſi invenere. Paucorum ſpatio dierum
miſeriis conſectus periit 7. die 1759.

Cadaveris ſeſtioni interfui; ſed cum Anatome quid
intricati, & monſtroſi habere videretur, totam abdo-
minis molem, peritonæo maximam partem involutam,
in publicum Pathologiæ Collegium afferri curavi.
Clariffimo Profefſore Anatomæ *Gaffer*, pluribusque
Chirurgis aſſiſtentibus, en quid invenimus!

Teſtis dexter molem capitis biennis Infantis habens,
durus, & dum perſcinderetur, hinc cartilagineus, illinc
ſteatomatoſus, ſcrotum explebat & inguen, haud ta-
men ultra ſuo de funiculo pendulus. Teſti quippe, toti
quanto, informis maſſa continuabatur, in inguine ſe di-
latans dextrorſum ac ſiniſtrorſum, ita ut expleret uni-
verſam pelvim & hypogaſtrium, utrinque ad ilia, &
poſterior ad lumborum vertebraſ. Aſſurgens a medio
lumborum tranſibat per medium Meſenterium, altius-
que ſub Ventrículo progreſſa, cum degeneraſcente
Pancreate confundebatur, & dextra portione Hepar
tangebatur, in ſiniſtro autem latere haud multo altius um-
bilico aſſurgens, ſpatium aliquod concedebatur, in quo
Ventriculus cum præcipua Inteſtinorum mole, arcte
lo-

locaretur: Colo intestino interim a latere tumoris, & Recto sub tumore, decurrentibus.

Itaque tumor superfcandendo Rectum, illud suo loco reliquerat at haud ita Vesicam urinariam. Urethram quippe, elevando vesicam, ita prolongaverat, ut ipsam vesicam in sinistro Hypochondrio versus cristam Ilei, supra molem hanc tumidam inveniremus, quo versus & ureterem dextrum, oblique transversim decurrentem, quoque deteximus. Sinistrum ureterem vero, & spermatica vasa, præ summa partium confusione, non vidimus. Testis sinister bonus, nisi quod Vaginalis ejusdem tunica ita incrassata esset, ut herniam carnosam referret.

Quid unicus non efficiat testiculus affectus? Quamque insons diu malum, brevi aliquando summum obtineat atrocitatis gradum? At, quod plus est, horrenda mala Testis minime contusus, sed a causa interna, inflammatione, obstructione, semine retento, depravato, affectus, producit. Cogitabitis forte castratione hæc quacunque de causa orta præcaveri: sed ut experientia testatur, Testis extirpatio summa mala præcavet, si funiculus spermaticus adhuc sanus sit; extirpatio Testis, funiculo affecto, malignitatem exasperat potius, quam mitigat.

Juvat *Hildanum* legere Cent. 4. N°. 64. ubi de Hernia spuria, carnosam dicta, agit. Recensitis Veterum placitis, credit ipse Herniam carnosam a semine stagnante, & corrupto oriri. 2^{do}: In dextro potius quam in sinistro reperiri; saltem se, inter plures casus, semel modo in sinistro vidisse: quemadmodum e contrario Herniam aquosam in sinistro teste frequenter, rarissime in dextro, vidisset. 3^{tio}. Hujusmodi Hernias ut plurimum in Juvenibus, qui sanguine ac semine abundant, quique in coelibatu vivant, accidere solere. Historias autem horrendas recenset, interque eas unam Sacerdotis, cui dexter non modo testis, sed & vasa spermatica lapideam

induissent naturam; ita ut abdomen manu comprimens, eandem profecto duritiem in dextro hypochondrio deprehenderet. „ Malum autem, ait, ad ipsam usque originem vasorum Spermaticorum adscendere, dolor ipse, quem e regione vasorum Spermaticorum ad renem usque dextrum continuo, persentiebat, indicabat. Aderat præterea vomitus, & appetitus prostratio, non tamen propter Herniam, ut quidam, qui ipsum ante me inviserat, statuit, (notavimus eundem errorem in nostro homine commissum) sed ratione tumoris dolorosi, & duri, e regione fundi ventriculi existentis, quique compresso abdomine tactu facile percipi potuit.

Ulhoorn in notis ad *Heisteri* Chirurgiam pag. 937. habet plura similia exempla, unumque præ cæteris hominis junioris, amissa juvene uxore, dudum cœlibis, quem similia eorum, quæ *Hildani* Presbytero contigerant, dudum passum, tandemque mortuum, aperuerat. Invenit a Teste duro, pugnum virilem magno, corpus durum oriri, hinc inde fungosum, & ad lumbos ichore refertum; quod umbilico demum altius, majorem lobum Hepatis trudebat extrorsum. Similia in praxi vidi.

Contusiones, ut vidimus antea, tremendum hunc morbum generant; sed semine retento, corruptoque, eadem generari, experientia fidem facit. Pluresque forte existunt, quam quas hucusque recensuimus, causæ. Dum a quarta specie gonorrhœæ virulentæ urethra prope caput gallinaceum exesa, emunctoria seminis cicatrice coaluerint, ac sanitas postmodum redierit, ejusmodi mala oriri in proclivi est. Inepti enim, qui semen ejaculent, coacervant illud. Unica his medela est sobrietatem per omnia colere, ut semen testibus paucum conficiatur; quodque conficitur, in sanguinem redeat, virileque adaugeat robur, Quod quoque unicum his consilium superest, qui vel in Matrimonio semen copiosum

osum emittere soliti, jam uxores notabiliore tempore ad conjugium ineptos habeant; vel qui quondam sive Onania, sive Scortatione, multum profuderint seminis, jamque aut resipiscant, aut Religiosum, Ecclesiasticumve statum, sint amplexi. Horret animus considerando impune alibi libros tolerari, qui scelestissimis consiliis scateant. Lucrantur, inquiunt, hoc modo sanitatem, non attendentes ad Evangelicam exclamationem Matth. Cap. 16. v. 26. *Quid prodest homini, si mundum universum lucretur, animæ autem suæ detrimentum patiatur? Aut quam dabit homo commutationem pro Anima sua?* Cura conservandæ sanitatis in omnes incumbit; sed legitimis conservandæ adminiculis, haud vero iis, quæ lex Divina citra ullam exceptionem condemnat.

Quæritur utrum a miranda Testis fabrica, an ab inexplicabili seminis natura fiat, ut prægressis, quas enarravi, internis, externisve causis, & Testis & Funiculus in monstrosam, adeo molem mutantur? Si a fabrica Testis, cur etiam totus Funiculus sic fiat, qui non habet similem fabricam? si a semine detento, corrupto, cur Funiculus horrendius degeneret, quam ipse Testis? An forte materia seminis jam in sanguine Arteriæ spermaticæ est, quæ in testem contusum, obstructum, deponi nequeens, sensim ita cellulositatem, arteriis venisque spermaticis circumfusam, infarciat? Aut quæ alia causa?

§. IX. PROBLEMA OCTAVUM.

Homo 20. annorum contudit dextram tibiam, quæ inde tumens pugni demum molem æquabat, ipatio tamen, mirum dictu! 30. annorum indolens. Dolere tunc demum homo cepit, idque sponte; & quinque postea elapsis mensibus febre quotidiana, in tertiam septimanam producta, laboravit. Sub finem hujus febris Chirurgus facta cruciali incisione enucleavit tumorem, optimaque consolidavit cicatrice. Tu-

morem frustum crudæ carnis retulisse ferunt. In quintum exinde mensem bene habuit; eo vero exacto repululat malum, ac spatio 6. septimanarum sic augefcit, ut in majore diametro pollices duos, unum in minore æquaret; altitudine depressior fungum æmulabatur, cujus pedunculus brevis quidem, at pollicem crassus esset. Cysticus ut olim, jam non est, & inferius erosus, apertusque, nihil stillat. Quod porro apertus sit, imprudentia contigit Balneatoris, qui homini ruricolæ lapidem infernalem dederat, ut ter de die tumorem inde tangeret. Consumi hinc non videbatur, sed erodi, ac purpurascere. Accessere autem spasmi abdominis, quibus demum respiratio anhelosa successit, maxillaque inferior obriguit.

Hoc misero statu primum in Nosocomium cum uxore venit, moxque coram me emprostotonos fit, summo cum anhelitu, & Tetano maxillæ; qui Tetanus ad mortem usque plus minus duravit. Tristi & ipsi, & Auditoribus, facta prognosi, eum in Nosocomium suscepimus.

Anxie admodum in naturam inquisivimus mali horribilis, magis anxie in medelam. Post facilem 30. annorum tolerantiam (quis homini perpetuam immunitatem non esset facile pollicitus?) tumor hic quinque mensium spatio dolens, febrimque generans, enucleatus quidem fuit; at vero in osse, periosteove, quid corrupti mansisse, testari videbatur idem tumor post 5. menses renatus, tantaque malignitate comitatus, ut spasmos tetanosque crearet. Quæstio erat, utrum ita malignus natura existeret, an vero lapidis infernalis irritamento? At lapis externa modo tetigerat, quod etiam alibi haud ita malum. Ulcera, vulnera, tubercula, ejusdem attactum inculpate ferunt, etiam in locis admodum nervosis; ut v. g. in glande penis. Hæsimus suspensi, saltem a quacumque causa hæc symptomata oriebantur, erant semper formidolosa, ac periculossima.

ma. Tetano Maxillæ impedita deglutitio per se jungebatur; quæ sane prognosin funestiores reddidit.

Dixerat *Hippocrates Aphor. 5. - 6.* „ Qui a Tetano „ corripuntur, in quatuor diebus pereunt; si vero hos „ effugerint, sanescunt. „ Mitigat prognosin hanc Lib. de Morb. apud *Foes. pag. 491.* „ Tertio, aut 5. aut „ 7. aut 14. die perit, quos si effugerit convalescit.” Et magis adhuc libr. de intern. affect. pag. 561. de Opistotono agens. „ Hic vero morbus, inquit, ut longissime ad dies 40. detinet, quos si effugerit, convalescit.” Hæc quoad prognosin ille.

Diagnosin autem generalem pulcre format Libr. de dieb. Judic. pag. 51. „ Maxillæ velut ligna rigescunt, „ os aperire non potest. Oculi illacrymantur frequenter, & contrahuntur, dorsum rigidum est, neque crura, neque manus, neque spinam inflectere potest. *Cum vero letalis fuerit, potus & edulia, quæ prius devoravit, per nares interdum exeunt: In Opistotono æger in reliquis eodem modo afficitur.*” In laudatis textibus ex libr. 3. de morb. & libr. de intern. affect. de hisce symptomatibus & præcipue de impotentia deglutitionis, similia refert. Porro tribus diversis in locis agit libr. de dieb. Judicat. de his nervorum morbis *ab ulcere externo* ortis: & licet post 40. diem adhuc mortem homo effugere queat, absolute tamen eum moriturum pronuntiat, *si potus, cibis, mucus, per nares exeunt.*

Curam suscepturus Cöus, quemadmodum laudatis mox textibus, in unum collectis, patet, dat primo acria quædam devoranda ex Pipere, & Helleboro nigro. An veluti nos acribus spasmus uno in loco excitamus, quo illum sopiamus in alio? Hæc vero cum nocere per se possent, simul pingua jura superpotanda dedit. Estque hæc cura læsæ Deglutitioni anterior, quippe post illam impossibilis. 2^{do}. Sternutamenta adhibet, scopo forte eodem, quo acres pilulas deglutiendas dederat: haud incongrue sane; cum hoc modo spasmos nonnunquam,

fin-

singultusque, ipso illo Aph. 6 — 13. notante, solvamus. 3^{to}. Partes tetano affectos emollientissimis fovebat, ut pro rigiditate adipiscerentur mollitiem. Sed 4^{to}. emollientibus hisce stimulantia addebat, ut fibræ relaxatæ in naturalem contractionem abirent. 5^{to}. Corpus interim quantum poterat, emollientissimis implebat. 6^{to}. Si deglutitio cessaret, naribus injici liquorem jubebat, ut, dum rigida maxilla admittere alimenta ac medicamenta, eorumque deglutitionem adjuvare, renueret, liquor per nares injectus fauces subiret. Hoc porro ultimum mihi difficultatem parit. Experimentum tentavi in me, & compluribus aliis, sine successu. Patitur homo utcumque, si os apertum est, & lingua obsequiosa; at vero quicumque nostrum simulato maxillæ tetano, (sine quo experimentum nihil est) hanc per nares injectionem sive debilius, sive fortius, factam sustinuit, fere suffocabatur. 7^{mo}. Peculiarem curam tetani habet injectu, affusu, frigidaæ ad corpus aquæ; religiose tamen casum nostrum ab hac cura excipiendo. „ Est vero inquit Aph. 5 — 21. ubi in Tetano 1^{mo}. sine ulcere (noster ulcus habebat) juveni bene carnoso (noster quinquagenarius est) ætate media (nobis inchoabat Aprilis) Frigidæ multæ affusio caloris revocationem facit: calor autem hæc solvit.” Et Libr. 3. de Morb. adjungit: „ post affusam plurimam frigidam, vestimenta tenuia pura superinjecito, tuncque ignem ne adhibeto.”

Multis exemplis vir magnus didicisse videtur tetanos non modo non curari injectu frigidaæ, verum etiam eosdem, si nondum adsint, generari. Ait enim Aph. 5 — 22. „ Frigidum mordax ulceribus facit . . . spasmos, tetanos.” Unde & vetat Aph. 5 — 23. affusiones frigidaæ in ulcere vetusto, in Erysipelate ulceroso. Usu quoque cognovisse videtur tetanos in remotioribus locis frigidaæ aquæ affusione non sanari, nisi affusio illa in ipsum locum fieret, unde tetani causa;

alioqui ulcera sic claudi possent, ut frigida iisdem minime noceret, interea dum ad tetanoideam plagam frigidam affunderemus. Vel consideravit, ut Doctiss. *Russicus Archiater* in hunc Aphorismum advertit, tetanos tum a nimia humorum copia, rarefactione, ac motu, oriundos; tum a prava materia ulcerum: in his nocere affusam aquam frigidam, cum ulcera prava frigore in pejus ruant, adeoque tetanos inde jam genitos, insolubiliores reddant; illis vero prodesse, quia, quamvis contractionem automaticam frigida augeat, minuit tamen contractionem vitalem: at vero casum rariorem esse tetani ab hac causa orti, frequentiore alium ex prava materie. Hinc concludimus dicente illo: *Est vero ubi in Tetano, &c.* id perinde esse, ac si diceret: *Contingit vero nonnumquam in Tetano.* Sicque illud optimi interpretes intellexere. Hinc, quia & anceps hæc cura, & rara est, & tot exigit cautiones, & casum nostrum penitus excludit, eandem haud instituimus.

Videbantur autem duo maxime hic indicari. Primo causam tetani in ulcere aggredi. Secundo effectus sopire causæ. Certa utique mors erat, si causa in tibia non mutaretur; nonnulla spes, (pauca tamen ob mali progressum) poterat, causa ablata, concipi. Nervi ob iram, vindictam, zelotypiam, mirifice affecti, ablata causa afficiente, sæpe pacantur; at sæpe minime, quando affectus causæ, ablatae quamvis, tantus fuerit, ut ipse ille nunc sufficiens causa sit perpetuandi motus. Exemplo viri militaris Cap. 8. N°. 3. id patuit. At tamen causa manente, effectus perennes erunt; ablata illa, spes est aliqua curationis, dummodo effectus causæ jam non fungantur vice causarum. Igitur auferendum tumorem tibiæ conclusimus, maxime cum remedia demulcentia & paregorica jam frustra a sapiente Medico adhibita essent. At vero qua methodo auferendum? Enucleatione? jam tumor minime cysticus adparet. An collum ejus ligando? Sed & collum nimis

mis amplum est, & tempus ampli colli ligatura solvendi nimis longum, & dolor inde oriundus, novis convulsionibus, tetanisque creandis, aptus natus. Prudenti igitur cultro auferendus. At vero ingens hæmorrhagia, quam ante octiduum ulcere prodiisse narrat, an non contra indicat? Hanc tortili machina arteriæ femorali circumponenda præventuros nos sperabamus. Unde 1. Aprilis *D. Leber* tam suspensa manu tumorem excidit, ut id æger ignoraret, nisi ultimo momento. Ablatus tumor partim carnosam, partim adiposam, partimque cartilagineam materiem, & multa vasa sanguinea iisdem intertexta, referebat. Paregorica & Camphorata emulsione patiens usus, tetanodes nihilominus mansit, & insequente nocte factus est emprostotonus.

Sed mox ab operatione loca tetanoidea externis remediis aggressi sumus. Egregium effectum in juvene, tetanum maxillæ ex lue venerea habente, videramus a *Paræi* consilio, firmum equinum adplicandi. At tentamen hoc effectum caruit. Inutilia quoque cataplasmata erant seu emollientia sola, five emollientia cum camphora. Enematibus communibus prægressis, vicissim alia tum nutrientia, tum opiata immissa sunt. Expertus pluries in spasmò, deglutationem integro die plane impediende, enematis, unciiis 5. 6. lactis, laudani gr. 3. 4. parati, mirandos effectus, idem tentavi, sed frustra. Incassum quoque pluries injectum in anum oleum. Nec juvere multæ siccæ cucurbitæ ad guttur & maxillam pluries, ac numerosæ, admotæ. Acria cataplasmata, vesicantia ad eundem locum, ut & alibi adhibita, sine effectum constante. Immo tumor intra triduum avellanæ magnitudine repullulavit; qui, consilio habito, denuo ad periosteum, maiore tamen quam prius dolore, excindebatur. Febris vere ardens juncta post binos a prima operatione dies fuit, cum pulsu durissimo. Spatio sex dierum durante illa, sanguis quinquies ad notabilem

copiam detractus, semper crustam densissimam gessit, ægerque diu noctuque caloris intolerabilitatem conquestus est; interea dum Thermometrum, bis die octo minutis adhibitum, passim 98. aut 99. gradum, semel modo 100. notaret: ultimis quinque diebus paucæ duntaxat urinæ guttulæ prodierunt: nono die periit.

Anatome notanda hæc dedit. Tribus diebus, minus sex horis, a morte elapsis, nemo, nisi summam vim adhibendo, maxillam vel leviter diducere potuit. Idem antea observaveram in femina, quæ a tetano maxillæ, rabida ira suscepto, in Nosocomio obierat. An igitur contractio, eaque tam valida, tanto a morte tempore, in tendinibus ac musculis perennare potuit? Totum Palatum fornicatum, Velum pendulum, Uvula, Oesophagus totus, albedinem, non ab adnata crusta, sed ab ipsa sua politissima substantia referebant. Ventriculus non nihil reservaverat suæ villosæ tunicæ, ut etiam quibusdam in locis intestina; at vero eadem intestina hinc inde magnis inflammata plagis, coloreque purpurea, eandem habuere glabritiem. Pinguetudo immensa in toto interno corpore, atque massa ingens pinguedinosa, ventriculum duos in saccos comprimendo dividens, ut jam Cap. 7. N°. 4. notavi, licet homo hic nullam habuisset in vomitus propensionem. Coli ligamenta tenuissima, unde idem contractum valde in longitudine, amplitudine autem expansissimum. Bilis vesica nigerimæ bilis duas uncias continebat. Vesica urinaria prorsum vacua; unde patebat, quando urina 5. dierum spatio vix paucula excernebatur, defectum secretionis, sive ischuriam spuriam, ante mortem adfuisse. Ad mediastinum, ac pericardium, multa vasa, quæ & magna, & turgida. Paries dextri cordis tenuis admodum, crassa sinistri. Aorta a corde usque ad absolutam suam curvaturam in saccum naturali duplo ampliorem dilatata erat. Polypi crassi in utraque majori arteria; polypus ex arteria in cor pendulus, bulbi instar, exterius

rius flavus, coagulatus, interius autem cavus, ac sanguine purpurascente, omninoque fluido, plenus. Aspera arteria cum pulmonibus bona. Cartilago thyroidea plane ossea. Reliqua viscera, partesque sanissimæ.

Quod jam ad os tibiæ adtinet, tres supra illud eminentias exiguas, cum periosteo haud cohærentes, sed in cellulositate libere locatas, deprehendimus: os autem tibiæ ipsum tophum pollicis lati magnitudine habuit. Osse ferra diviso, bona medulla, bonaque ossis interna superficies.

Nunquid lapis infernalis afficiundo nervum in tumore, sic alios in corpore nervos affecit, ut, causa ablata, nervi, tendinesque, & muscoli, contractionem suam perpetuarint? Imo ad expletos fere tres a morte dies in maxilla continuarint? Et postremum hoc, quibus demum Physiologiæ legibus explicabimus?

§. X. PROBLEMA NONUM.

Hujus anni 27: Martii Expertissimus & Eruditissimus Medicus *Guarin* copiam mihi fecit cadaveris juvenis 19. ann. qui elapsis exinde 5. septimanis ad Nosoc. *Fr. Misericordiæ*, cujus vigilantissimus Physicus est, delatus, debilis, vix anteaactorum memor, sui morbi anamnesim dare non potuit; id unice deplorans, quod præ miseranda rerum omnium egestatē in has calamitates incidisset. In hac debilitate dextro latere doluit, difficulter animam duxit, tussim frequentem habuit, pulsumque celerem, ac debilem; sitibundus, alvo obstructus. Prudenti remediorum usu spatio octidui recreari primo visus, anxietate dein ingenti correptus est, & 12. anxietatis hora exspiravit.

Aperto abdomine, peritonæum hic lineam, ibi tres, quatuorve, crassum, cæterum album, granulosum, tuberosum, ubique. Omentum non inveniebamus. An ideo tam crassum peritonæum, quod omentum a nexu suo cum colo & ventriculo solutum, in unam informem

membranam cum illo degeneraverit? Quidquam tamen, omento simile, veluti extensum, atque connatum, cum intestinis, apparuit nobis; verum minime omentum fuit, cum marsupii instar æque tegeret intestina ad dorsum, quam ad anteriora, arcte cum illis ubique coeuns. Probe autem & lente producto examine, vidimus clare externam omnium intestinorum tunicam ab intestinis omnibus secessisse, & cum vicini intestini tunica secedente coaluisse. Erat autem tunicae externae secessus in toto intestini cujusque ambitu. Quando enim uno in loco percideram hanc extimam tunicam, digito sub illa potui perambulare circum totum intestinum, ipsiusque intestini ex hac vaginaeducti portionem adtrahens, evaginavi omnia intestina ex sua tunica externa, sine vel minima laceratione. Stupentes omnes hunc mirum casum, mesenterium dein & mesocolon contemplabamur: in illis mirabamur nunc laminas utriusque sic abire in vaginam hanc, seu tunicam olim externam intestinorum, ut nonnisi una videretur eademque membrana. Utque superficies tunicae intestinalis obsita erat innumeris ubique flavis granulis, ita & mesenterium, ac mesocolon. Verbo dixerim nullam differentiam inter mesenterium & mesocolon ab una parte, & extimam intestinorum tunicam, jam ablatis intestinis adparuisse, præterquam quod laminæ illorum cellulositate unitæ essent, hujus vero a se invicem liberæ. Proinde clare demonstrabatur id, quod Anatome docet, tunicam externam a mesenterio & mesocolo intestinis dari; 2^{do}. Ligamenta coli ab hac tunica nasci, manserant enim in illa hæc; evaginato autem colo, levis modo tensio, minorque tantummodo extensilitas, quo in loco affuerant ligamenta, aderat. Quod porro in principio ideam unitæ membranae, omenti instar, universam anteriorem intestinorum molem posterioremque tegentis apparuerat, id inde natum esse posthac intelleximus, quod tunica hæc

externa, pluribus in locis lacera, cum lacera parte vicinæ intestini tunicæ, coivisset, hincque unicam atque æquabilem membranam repræsentaret. Unde intestina, in parte a mesenterio averfa, sua hac tunica destituta erant; & prope Mesenterium ab eadem sine cohæsi-
one contegebantur.

Intestinorum longitudinem definire difficile, hincque variare in hac definienda videmus Anatomicos. Si a Mesenterio separantur, longiora brevioraque erunt, prout plus minus de Mesenterio adhæserit. Estque in homine uno præ alio differentia quandoque magna. Cæterum vix differret mensura multorum; nisi proprio errore nostro differentiam mensurarum ingentem statueremus. Id ut evitetur, notities requiritur varietatis ulnarum pedumque apud varias gentes. In pedibus paucior est diversitas, quam ut notabilem differentiam in longis corporibus mensurandis inducat, quemadmodum pag. 143. ostendi. Hinc quando v. g. *Glissonius* tenuibus dat 33. pedes, *Garengeotte* 22., statuendum est, aut *Glissonii* hominem multum ab eo *Garengeotti* differre, aut *Glissonium* Intestina curatius a Mesenterio solviffe. Ubi vero Autores longitudinem ulnis definiunt, accuratius attendendum est. *Hollandicam* v. g. ulnam *Viennensis* $\frac{1}{4}$. excedit; *Parisina* $\frac{1}{2}$. *Viennensem*. Optimam mensurandi facultatem evaginata nostra Intestina dabant: elongatiora quidem extrahendo facta, primum ad naturalem amplitudinem aëre inflabantur. Tenuia æquabant 12. ulnis *Viennensibus*, crassa sesquiulnæ: habebant igitur una sumta 31. pedes *Viennenses*. Differentia autem pedis *Viennensis* cum aliis pag. 143. notata fuit.

Si igitur homo sit 5. pedum, & intestina ejus 31. pedes longa sint, habebitur paulo plus quam sextupla longitudo intestinorum, quam quæ est hominis. Porro ipsi homines ratione Intestinorum inter sese differre queunt, idque naturaliter (neque de monstrosa brevitate in-

Chirurgia *Dionis* descripta, aut de similibus, hic sermo est); adeoque quintuplo aut sextuplo Intestinatorum longitudo major, quam corporis, unde desumpta sunt, definita a variis Autoribus, haud multum a nostra observatione differt.

Præcipue autem hic quæritur, cujusnam generis hic morbus fuit? quove nomine appellandus? Quantum mihi nota Historia medica est, similem nondum reperi. Qualisnam Intestinatorum maxime crassorum, actio, qua, datis ad id remediis, pluries sese ante mortem evacuaverint? Qua de causa genita hæc universalis intestinatorum, ab externa sua tunica, solutio? Cur nulla inde læsionata, aut affectio observata Intestinatorum? Malum enim antiquum fuisse, absoluta omni in loco separatio tunicæ ab intestinis; firma tunicæ externæ, in locis mutui contactus, cohæsiō talis, ut unam modo membranam referret; abunde evicerunt.


§. XI. PROBLEMA DECIMUM.

Femina Lue Venerea affecta magnum corpus intra dilatatissimam Vaginam, ex eadem vix propendens, gessit. Sex septimanis in *Pasmaniano* Nosocomio fuit, alvum bonam (quod præprimis notandum) semper habuit ibidem, morbi autem gravitate circa medium Januarii hujus anni obiit. Uterum, Vaginam, Intestina, expertissimus ibidem Physicus *Collin* mihi ad publicam demonstrationem misit.

Ileum intestinum utero arctissime unitum erat, ope duri tumoris, pugnum virilem magni, in Intestini parte a Mesenterio averfa hærentis, idemque ideo ultra pugni magnitudinem extendentis. Nulla tamen prava symptomata hinc orta fuere; cum Intestini pars, Mesenterio nexa, canale sufficienter amplo transitum Chylo concederet. Fuit hernia intestinalis intra Vaginam, qualem *Garengeotte*, aliique notarunt. Igitur femina hæc cum tumore pugni magnitudinis in ipso Ilei cavo, cum
her-

hernia Intestinali intra Vaginam, sine ullis letalibus alterutrius morbi symptomatibus, longo admodum tempore vixit.

In Hernia ejusmodi, ubi portio intestini ita intercepta est, ut quæ intra abdomen portio sit, libera maneat, apertamque viam Chylo aut fecibus conciliet, mortem toties, post omnia Herniæ incarceratæ symptomata, ortam vidimus; idque, ut videtur, a producta aut inflammatione, aut spasmo, a parte constricta ad eam, quæ libera est. Hic pars Ileii intestini pugni magnitudinis tumorem habuit, cum utero intime, lateque concrevit, & ab uteri latere in Vagina pependit. Cur nunquam affecti adeo graviter & monstrose intestini, cur nunquam Herniæ Vaginalis, symptomata apparuerint? Prævideo, qui problematis solutionem tenere se autument; sed rogatos eosdem volo, an ipsi, si multos casus practicos Ileorum & Herniarum viderint, sibi met tali solutione satisfaciant?



C A P U T X I.

De Calculo vesicæ Urinariæ, & Lithotomia.

§. I. *Quinam aut nullam, aut notabilem, aut integram quietem, in calculi tormentis, ab Aqua Calcis, & Uva Ursi, adipiscantur. An, qui nullam, his dissuadenda sectio, ob degenerem viscerum suorum conditionem? Comuni modernorum methodo instituta sectio, dissuadenda sane; quæ vero methodo Fratris Cosmi, suadenda, eo quod non periculosa, & qui post illam moriuntur, non ab illa pereant, sed quod morbus ipsorum jam letalis existat. Unde data hac prognosi videtur posse tuto institui. Occasio cur in Nosocomio hæc celebris fuerit.* §. II. *Prima sectio cum ambigua admodum prognosi instituta; cujus occasione ipsa Methodus exacte enarratur, cum*

omnibus cautelis in eadem observandis, ratione patientis, operatoris, adjutorum. Mors patientis, & Anatomie. Observata necessaria ex cadavere petita in Methodi laudem. Historia secunda fortunatam sectionem habet. Historia tertia sequitur, ubi in congenito malo, prognosi ambigua formata, sectio optima fuit; sed puris perenni confectione a degeneratione partium nata, & effluxu, vulnus post se longo tempore apertum reliquit. Historia quarta exhibet sectionem in congenito quoque, ut videtur, malo, quæ post ambiguum prognosin, felicissima fuit. Et quinta historia in connata Lithiasi perfectam sectionem refert. Historia sexta in desperato fere casu ingens a sectione levamen, non perfectam tamen curam, habet. Historia septima, omni ex parte felicissima, licet morbus congenitus videatur. Historia octava Casum refert pueri ante annum communi methodo, hoc ipso anno bis secundum eam Fr. Cosmi, secti, ubi comparatione facta inter symptomata, quæ hic puer a sectione modernorum primum, & nunc ab eadem methodo Fr. Cosmi bis instituta, habuit. Simul hujus præstantia præ illa patet. Historia nona felicem omnino curam refert. Historia decima optimam quoque curationem continet, sed ob quandam in methodo mutationem, quæ communi modernorum sectioni laterali similis erat, symptomatibus comitatam gravioribus. §. III. Ex omnibus antedictis 23. Scholia sequuntur, quæ agunt de variis secandi methodis, deque ea Fr. Cosmi dicta, tum de variis in tota cura observandis, de urina, glutine, pure calculosorum.

§. I. **D**E hoc morbo Austriæ Endemio, plebejis tamen, quam nobilioribus familiariore, ut in omnibus hujus Operis Partibus egi, ita ob experimentorum crebritatem de eodem hoc capite iterum fuisse agere decrevi. Ac primo quidem loco, quæ toties antea dixi, repetam: iteratis experimentis liquido constare 1^{mo}. Plures numero homines esse, quibus aut Aqua Cal-

Calcis cum Sapone, aut Uva Urſi, ejusmodi levamen afferant, ut cum præſente calculo ſint adeo ſani, & in functionibus ſuis præſertim Ouropoietica, adeo valentes, quam ſi prorſum liberi a calculo eſſent. 2^{do}. Dari nonnullos, quos ad tempus quidem, haud vero conſtanter, levant. 3^{io}. Non paucos quoque reperiri, quibus nehilum quidem opitulentur. Hos ultimos repetitis experimentis didici nonnullas habere partes, Veſicam, puta, aut Ureteres, aut Renes, aut horum plures ſimul, ſic a ſtatu ſano degeneres, ut reſtitui nequeant, hincque remedio dato, vel non dato, antiquas ærumnas continent. Qua eadem in cauſa, eosdem Lithotomia ſaneſcere poſſe nego, quod hæc calculum auferendo, degeneres notabiliter partes non redintegret.

Hiſne igitur ſectionem diſſuadebimus? Profecto ſi a ſectione multi pereant, ut Diaria ſectionum luculenter demonſtrant, parvum illud ſolamen, quod nonnulli inde percipiunt, ut vitam paullo minus miſeram ad tempus protrahant, mortemque procrastinent, non poteſt acceleratæ multorum æquiparari pernicipi. At vero ſi talis ſit ſecandi methodus, ut vix inde, niſi penitus deſperati moriantur; ſi ea ſit ſectionis fortuna, ut etiam ii, quibus degeneres utcumque hæ partes, vel inſigne levamen habeant, ve etiam in integrum reſtituantur; ſi denique illud artis emolumentum ſit, ut calculum nullo cum vitæ periculo educat; erit ſectio fere omnibus commendanda. Quinimo cum longe tutius eſt calculi cruciatu liberari, ablato, quam remanente calculo, erit hæc præſtantiffima ſecandi ars quibuſcunque ſymptomatum curandorum methodis præferenda.

Porro ejusmodi eſt ſecandi methodus *Fratriſ Coſmi*. Quod ne precario aſſeruiſſe videar, hujus methodi hiſtoriam paucis adornabo.

Aderat hac hyeme cum *Regia Principe Lotharingia* ejusdem Conſiliarius & Chirurgus *Cambon*, vir in omnibus fere, quæ perfectum Chirurgum formant inſtruc-

tissimus scientia, peritia, dexteritate, probitate. Narrabat mihi se hanc normam secandi primo *Parisiis* sub auspiciis Reverendi Autoris feliciter exercuisse, posteaque alibi frequentius. Exhibebat mihi famosum illum, quem *absconditum* vocant, cultrum Autoris examinandum. Noveram autem contradictiones, quas *Cosmus* a parte haud incelebrium in Arte Magistrorum, ac si ars ejusdem perniciosissima foret, perferendas habuerit. Extat in hanc rem liber, cui titulus: *Receuil de Pieces importantes sur l'Operation de la Taille, faite par le Lithotome caché, Paris 1751.* in quo de hac re utrinque deceptatur. Porro experimenta, in vivis facta, eo tempore pauciora extabant, quam ut Autor methodum suam contra vehementes Adversariorum clamores fartam tectam præstaret. Verum curæ, quas sane numerosas egregius *Cambon* feliciter perfecerat, convincebant me de methodi præstantia. Unde humaniter ab ipso petivi, ut suam in Nosocomio nostro dexteritatem vellet exercere; id quod cum lubenter annuisset, operam dedi ut in urbe, in suburbiis, in vicinioribus pagis, sufficiens Calculosorum numerus colligeretur, quorum historiæ ordine sequuntur. Præsentia sua operationes istas cohonestarunt sæpe celeberrimi in Arte Viri, Magnificus Rector de Fetzer, Ill. Præses L. B. Van Swieten, Spectabilis Decanus Dietmann, omnes Magnifici Dⁿⁱ Archiatri, semel quoque SS. MM. Oculista dexterrimus Wincel, ac multi alii Medici & Chirurghi.

HISTORIA I.

N. Keller, biennis infans, stranguriam dudum jam passus, 26. Aug. 1757. ad me adductus est. Cum D^{no} *Leber* illum examinans asperum calculum detexi. Dedi Uvam Ursi à granis 4. de die incipiendo, & augendo sensim ad grana 40., interpositis ob miserandos infantis ejulatus paregoricis; exiguum initio levamen fuit, dein-

deinceps vero infigne; ita ut annos 1758. 1759. tolerabilissime transegerit, modo remedium aliquando non negligeret. Contigit autem ut Autumno 1760. quotidiana febre, & anxietate pectoris laborans, spatio 10. dierum in Nosocomio detineretur, eoque tempore Uvam Ursi minime assumens, urinam tamen sanorum more optime, crebriorem tamen & pauciolem, redderet; idque post hac, parentibus eum repetentibus redditus, integro mensis spatio continuaret. Exinde vero malum remedio haud ultra obedivit. Unde degenerationem partium jam præsentem, & ni caveretur, futuram demum irreparabilem metuens, obtuli hunc puerum, nunc quinquennem, secandum D. *Cambon*, id præfatus, quod metuerem ne forsitan malum jam incurabile esset; quod tamen, cum & tuta adeo & blanda ejus methodus esset, nihil nos periclitaremur, efficiundo, ut minus miser, tardiusque, puer moreretur.

Igitur purgatione prægressa, & ventre etiam paucis ante operationem horis enemate eluto, D. *Cambon* operationem fecit 15. Dec. 1660. En autem methodum.

Operator in pulvinari mensæ imposito locat puerum, capite paulum elato, manuum carpis laqueo circum arabicam & referente, cum tibiis molliter ligatis, & femoribus versus abdomen, sed extrorsum, utrinque ab apto famulo detentis; sic ut anus tangat marginem tabellæ. Inducit primo Itinerarium dictum, crena in dorso suo excavatum, & adhuc, pro more, ejusdem apice se facit de calculi præsentia certiolem. Versus sinistrum latus tunc inclinat Itinerarium, quasi tuber ossis ischii sinistri quæsiturus. Deinde dat perito Assistenti illud sic firmatum, & dorso suo ad sinistrum perinæi latus oblique appressum, manu firma tenendum. Notandum tamen os ischii præter propter tantum dirigere itinerarium, nam non diverso modo in sexu, sed in sexu virili etiam, tuber ischii nunc remotius, nunc propius, abest a media pube, vel coxyge.

Re-

Rebus sic præparatis digito quærit locum itinerarii, digitoque supra illud posito, operator facit cultello communi aperturam in elevatiore parte, donec cultello suo tangat nudam itinerarii crenam, & apice cultri in crena firmato, ducit cultrum per integumenta per aliquot lineas, oblique deorsum, quo viam paret sequenti instrumento.

Reposito primo cultro, apprehendit cultrum, lithotomum occultum vocatum, qui prius adaptatus est ad angustiores, amplioresve sectionem, prout major minorve calculus judicatur, aut junior est, adultiorve is, cui operatio fit. Numeri sunt notati in ambitu hexagoni manubrii illius instrumenti, quod in hoc cultro occulto vice vaginæ fungitur. Numeri hi designant, 5. lineas, 7. lineas, 9. lineas, 11. lineas, 15. lineas longitudinis faciendi vulneris. Manubrium gladioli, in vagina reclusi, tunc adaptatur ad numerum requisitum, & notatum in manubrio instrumenti vaginalis.

Hoc facto, apex cultri lithotomi occulti per factam aperturam adplicatur ad crenam itinerarii. Operator cum cultro lithotomo quærit apicem itinerarii, ubi crenae ejus repagulum, sive aggerem habet, impediens ne cultri lithotomi apex, aut exeat ultra, aut elaboratur ex crena. Jam igitur habens suum punctum certitudinis, quod in vesica sit, eoque ejus, quo oportet loco, educit itinerarium ex vesica. Dirigit tunc cultrum lithotomum in vulnere, ut gibbum ejus dorsum ad inferiora spectet, & ut anterior cultri, seu potius ejusdem vaginæ, pars, suum punctum fixum ad os pubis habeat. Hæcque omnia ita dirigit, ut simul manubrium circiter horizontaliter ponatur. Et ubi primototum cultrum ita tenet, ut dorsi acuties recta deorsum vertatur, tunc ad lineæ latitudinem circiter leniter inflectit manubrium superiore sua parte introrsum, versus medium pubis, ut culter scissurus sit in illa obliqua linea, in qua prior sectio viam jam monstrat, quæque sic oblique

que versus tuber Ischii dirigitur. Firmiter tunc manubrium majus seu vaginæ, tenens, premit manubrium gladioli, qui gladiolus, dum operator instrumentum ad se trahit, exacte tot linearum vulnus facit, quam antea definitum fuerat, scindendo sic ab interioribus extrorsum versus.

Via igitur ampla jam patet. Per illam forceps inducitur, digito in vulnus missio viam monstrante, vel inducto conductore, & calculus quæritur. A principio operationis, id est, ab inductione itinerarii, tria minuta elapsa erant, quartumque minutum calculi explevisset eductio, ni adeo friabilis is fuisset, ut in grumos facisceret. Hinc grumis quærendis, educendisque, adhuc quatuor minuta præterlabebantur. Cum vix semoveret tota operatione, vix clamaret infans, exemplum dedit insensibilitatis in parte sensibilissima, absque conclusione, quod vesica, muscoli, nervi, cutis, non sentiant. Pro more fomentum olei rosacei ventri imponebatur; sed venter unquam nec tumuit, nec doluit. Nulla facta est vulneris deligatio, ut esset liberum stillicidium urinæ, liber exitus relictorum forsitan ramentorum calculi. Suasi aliquoties fieri injectiones olei lini cum aq. hord. quo ea ramenta certius eximerentur. Emulsa paregorica dedi per plures dies. Suasu quoque Operatoris dedi quavis hora unc. iij. aq. hord. & omni trihorio rotidem juris carnis sine pane, post diem tertium panadellam. Hæc in omnibus ægris nostris exacte observavimus, cum optimus Operator sæpe assereret sine multo admodum potu, & tali diluto nutrimento, non raro symptomata prava observari, quæ alioqui non observarentur. Si res pro votis cedat, sensim dantur post 8. diem carnes teneriores, & legumina.

Interim febris continua remittens perpetuo aderat: quæ cum die 10. adhuc continuaret, imo augesceret, communi consilio cortex peruvianus dabatur, cui ob

vera

vermium symptomata semen fantonici additum est. Et vermes quidem teretes tres excrevit, febrim autem jugiter habuit. Respiratio nunquam ipsi aut ante operationem, nisi ante tres menses in morbo, aut post operationem, impedita fuit; nec ulla unquam tussis. Verum per urethram non minxit unquam, nisi bis pauxillum, ex quo operatio facta fuit. Febre demum totus consumebatur, & quatuor ultimis vitæ diebus respirationem cum roncho habebat, anxius maxime erat, ita ut quovis momento alium corporis situm quæreret, tandem 60. ab operatione die obiit.

Cum Operatore, Chirurgo nostro, aliisque præsentibus, Anatomen feci. Cicatrix formata vulneris sex septem lineas æquabat; punctulum modo in cicatrice apertum erat, per quod juge fuerat urinæ stillicidium. Patuit tunc evidenter factam esse sectionem per totum vesicæ collum, ita ut superior ejus pars leviter tangeret vesicæ cavum, inferior pars principium urethræ prope collum. Sit mihi fas nunc in supino cadavere secundum situm naturalem loqui, & inferiorem vocare urethram, superiorem vesicam: quamquam paullo ante inverso ordine has partes nominaverim, dum jacente ægro in mensa, femoribus ad abdomen reflexis, operationem explicarem.

Igitur cultellus ordinarius facit sectionem supra crenam itinerarii in principio urethræ, principioque colli vesicæ. Culter lithotomus in hanc aperturam ductus, perscindit collum totum, & in hoc puero, cum culter lithotomus ad vulnus septem modo linearum adaptatus esset, portionem duntaxat parvam vesicæ. Porro dum idem culter lithotomus in vesica positus, ab interioribus exteriora versus omnia æquabiliter perscindit, simul æquabilissime transcindit totam prostatam.

In vesica porro ne grumulus quidem calculi supererat. Quia vero impossibile fuit in operatione omne grumosum simul & semel cochleari auferre, fateri o-

por-

portet hanc methodum, qua post sectionem vulnus sibi dimittatur, ea saltem de causa laudandam esse, quod, libero per vulnus urinæ effluxu, quævis calculi diffractamenta, imo & alter, si affuerit, calculus, commode integreque exeant. Eandemque ob causam repetitas in vesicam injectiones utiles esse.

Obliquitas sectionis, prout exposita est, si in cadavere examinatur, evitat exacte Rectum intestinum, modo id non turgat. Hinc recte cura habenda ante operationem, ut illud purgatione, enematibusque, a fœcibus & flatibus rite expurgatum, adeoque ut flaccidum sit. Alioqui fatendum est, hac secandi norma Rectum rarissimo casu posse lædi. Cum sæpius ex Nosocomio civico nobis cadavera compararemus, ut in iisdem hanc methodum exercentes, videremus ejusdem effectus, semel nobis hicce casus contigit. *Franconiana* methodo vesicam supra pubem incidentes, calculum duos pollices in majori, unum in minori diametro habentem, eidem imposuimus, vulnus consuimus. Operationem cultro lithotomo occulto secundum exactas regulas perfecimus. Erat corpus adulti, & magnus calculus: hinc gladiolum aptavimus ad 15. lineas. At minus foramen fuit, quam ut tantæ molis calculus, una cum forcipe transiret. Apertura cultello tribus lineis producta, lapis educebatur. Curatissime tunc effectum sectionis per omnes difficissimas partes examinautes, invenimus Rectum, quod antea evacuatum non esset, perfcissum fuisse. Quare Recti intestini probe evacuandi cura religiosissime semper est observanda. Equidem asseverabat operator id se necdum vidisse unquam, qui hanc operationem tam in mortuis, quam in vivis, octuagesies & quater jam peregisset. Attamen quod nobis in hoc cadavere contigit, contingere pluries potest, si cura evacuandi negligatur.

Iteratis cadaverum experimentis, & tunc, & postea sæpius, didicimus eos, qui in operatione femora

dirigant, multum posse ad faciliorem, difficilioremque calculi educationem facere. Si crus sic gubernent, ut genu ducatur multum extrorsum, spatium inter tuber ischii & ossa pubis, angustatur; sin vero genu introrsum magis ducatur, hoc spatium ampliatur. Observatio hæc videtur attentionem in operando mereri.

Vesica urinaria tam parva erat, ut duarum unciarum calculum vix potuisset comprehendere, crassitudinem ceterum trium linearum fere ubique habebat, unde etiam compactissima fuit. Similes calculosorum vesicas prioribus Partibus plures descripsi. Nunquid dudum tam parva ac crassa vesica fuit? aut demum post operationem sic reddita est? Utrique sententiæ militant rationes. Ita eam dudum fuisse, ut negemus, operatio videtur suadere, in qua varia instrumenta vix moveri potuisse apparet, si adeo & contracta, & præ crassitie vix dilatanda vesica fuisset. Attamen cum vesica calculum unciarum duarum fere potuerit continere, parvusque adeo hic calculus fuerit, ut omnia collectaamenta pondus 71. gran. non excederent, spatium utique ad admittendum itinerarium, & cultrum lithotomum, iisque eductis forcipem, qui certe leviter modo intravit, adfuisse videtur. Potuit ergo vesica fuisse tam parva ante operationem; sed reapse tam parvam, contractamque eandem ante operationem jam fuisse, arguunt sequentia. 1^{mo}. Quod calculi sectio non soleat sic reddere vesicam. 2^{do}. Quod vesicas ita contractissimas invenerimus in calculosis non sectis. 3^{tio}. Quod in morbo ante tres menses in Nosocomio observato, commode quidem puer, sed exigua tamen copia, urinam redderet. 4^{to}. Quod injectio post operationem illico facta, copię licet paucissimæ, ex parvo siphunculo, & tunc, & semper, actutum exsiliret. Unde si puer in vivis mansisset, habuisset profecto semper id vitium, ut non diu retinuisset urinam, etiamsi externum vulnus probe claudi potuisset. Sed quoque vesica adeo &

con-

contracta, & crassa, inepta videtur fuisse ad bonam cicatricem formandam; unde etiam videtur perpetuo fistulosus futurus fuisse, si vixisset.

Ad reliquam Anatomem quod spectat, erant glandulæ mesenterii numerosissimæ, durissimæ. Ingens pancreas unus scirrhus. Hepar cum multis tuberculis siccum ac durum. Parvis scirrhis lien plenus. Pulmo dexter non nisi unus scirrhus; sinister in quadam mollitudine innumeros scirrhos gessit. Ad Tracheæ dichotomiam glandulæ scirrhosæ castaneæ magnitudinis. Itidem thymus. Exsangue & macilentissimum corpus universon.

Ut ex anamnesi constitit, tussi ac febre ante operationem non laboravit, nisi quando per paucos dies ante tres menses ægrotaverat. Inter operationem pueri torositatem omnes mirabamur. Ergo spatio 60. dierum, quibus ab operatione vixit, degeneratio hæc videtur probabiliter nata. Utique in sano etiam corpore Febris diuturnior omnia solida fluidaque pervertendo, letales facit obstructions, scirrhos, &c. An vesicæ vulnus, ob callositatem in integrum incurabile, ab acrimonia exstillantis urinæ alcalinæ continuo irritatum? imo an acris hæc urina ad cellulosa vulneris labia resorpta, hanc non potuerit generare febrim? maxime primo mense, quando magna erant labia vulneris?

HISTORIA II.

Puer decennis in *Luxemburgo* calculi symptomatibus a quadriennio laboraverat. Præstantissimus *Lauter* loci Medicus, quem optimæ spei virum immatura mors hisce diebus sustulit, Uvam ursi ipsi dedit. Negligentissime ea æger usus, vix levamen inde percepit. 22. Dec. 1760. D. *Cambon* sua methodo secuit illum. Tria minuta effluxere a principio, usque ad forcipis inductionem. Verum calculus tum levis (pondus enim 52. gran. modo fuit) & echinatus, hirtus innumeris

pinnis 2. 3. lineas longis, vix forcipe tenendus, undecim minutorum operationem fecit. Ejulavit, & vociferatus est hicce eo vehementius, quo minus prior. Sed & vociferabatur, jam ad inductionem itinerarii, ut vix quatuor hominibus esset continendus. Primis quatuor ab operatione horis dolores acerbos conquerebatur, exinde vero semper se doloris cujuscumque expertem esse testabatur. Venter nunquam intumuit, non induruit, non doluit. Tota ejus cura fuit, ut prioris. 25. Dec. nonnihil sanguinis vulnere, urethra, & naribus simul effluxit, at brevi filuit. Optime jugiter habuit, optime dormivit, appetiit, egeffit. Vulnus diu apertum mansit; licet operator a 3. Jan. 1761. suasset puerum, vulnere manu clauso ad mingendum per urethram adjuvare; deinde finiente Jan. & ineunte Febr. labia vulneris lapide infernali tangi, puerumque ligatis ad se femoribus sedere jussisset. Febr. 6. demum clausum fuit. Toto autem tempore quo ante & post clausum vulnus minxit, urinam semper pallidam, ac foetentem, sæpe opacam, sæpe simul cum glutine calculosorum onustam, reddidit. Tandem gluten, & foetor urinæ defuit, sed copiam ejus non nisi unc. j. simul emisit. Triduo diarrhœam passus, usu rhei cum myrobalano; & vespertina theriaca, convaluit. 21. Febr. perfecte sanus ac torosus puer domum rediit, & perfecte etiamnum valet.

HISTORIA III.

Ignatius Stigler 10. ann. ex quo meminit, semper plus minus in mictu doluit. Septem anni nunc sunt, quod parentes ad auctos dolores ipsi aquam petroselini longo tempore bibendam dederint, quod primo aliquid, postmodum nihil attulit opis. Exinde in Orphanotrophio susceptus, integroque inibi moratus quinquennio, delatus est ad Nosocomium *S. Marci*, curandus. Vim uvæ ursi frustra ibidem spatio 9. mensium

expertus est. Tandem illum a me petitum, ad nostrum Nosocomium optimus *Reichberger* misit, mox ineunte hoc, quo vivimus, anno.

Secundum hunc D. *Cambon* proposui, curam licet veritus sive incertam, sive inutilem. Quippe augmentum diuturni mali mortem demum illaturum; hinc methodum ejus blandam posse institui, cum ex ejusdem frequenti experientia mortis periculum non augeatur, nisi forte in rariore casu, quemadmodum ille Historiæ primæ: cæterum inde mortem fere præsentem procrastinari, hominumque tormenta tolli, plurimumve mitigari. Non juvantem autem operationem non methodo, sed degeneribus oportere tribui partibus. Annuit igitur ille, & 7. Jan. 1761. illum spatio quatuor minutorum perfectissime secuit. Suspicionem majoris calculi culter lithotomus ad vulnus undecim linearum adaptabatur. Verum neque hoc sufficiens, ad 2. 3. lineas inter extractionem calculi ultra dilatatum est. Calculus fuit ponderis unc. 2. & $5\frac{1}{2}$. dragm.

Nullus quidem tumor, aut dolor ventris, sed febris continua mox post operationem adfuit; impedita valde deglutitione comitata, quæ demum die 5. critice soluta per diarrhœam. Octiduo integro bene habuit. Sequuta tunc est febris continua remittens, vespere semper ingravescens, quam demum Cortice oportuit moderari. Post 18. ab operatione diem hæc febris cessavit. Cum vulnus crudissimum maneret, continuavi usum Corticis; ea spe ut, quemadmodum alibi, ita quoque hic, bonam suppurationem in vulnere generaret. At incassum. Nec tamen destitit a cortice, ne urina putridissima, in plicis labiorum vulneris stagnans, atque resorpta, febrem novam generaret, & ut contra hanc putredinem sanguinem condirem.

Nihilominus, bene valente puero, vulnus haviit semper, & fistulam in perinæo produxit; quæ penitus perfecta mensis dein spatio perfecte curata est. Superest

autem semper parva in vulnere apertura, per quam urina perpetuo exstillat. Scarificationes, pulveres farcotici, lapis infernalis, fasciis femora juncta, quæ auxilia in Hist. 2. juverant, hic frustra fuerunt; tandem vero incunte Sept. ulcus claudi cepit, jamque septimana sexta, qua hæc scribo, clausum manet.

HISTORIA IV.

Joannes Georgius Sick 14. annorum, a parentibus rescit, se ab incunabulis minxisse arenas. Ipse quoque ab 1. vel 2. retro annis meminit doloris lumborum, magnique in meiendo ardoris & doloris. Calculus detectus est. Jan. 12. idem operator cum spatio septem minutorum calculo secuit. Passim observavimus ad tertium, quartumve minutum forcipem jam in vesica esse, reliquum temporis quærendo, tenendoque calculo, impendi. Calculus parvus, oblongus, asper, granulofus, ponderis granorum 50.

Vix per horam doluit, febre caruit, ventrem nec durum, nec dolentem unquam habuit. Ab ipso die operationis per urethram minxit, primo libram sanguinis, sequentibus diebus sanguinem dilutum, octavo die urinam sine ullo sanguine, cum albo sedimine, & rubra, aut flava arena, nunquam vero mucum calculosorum. Intra 14. dies vulnus clausum fuit. Febr. 7. sanus repetivit donum.

HISTORIA V.

Carolus Heigner 20. annos natus, accessit me 3. Jan. 1761. narrans se ex quo meminerit, cum ardore & dolore minxisse, frequenter veras habuisse strangurias, ab intensiore motu corporis urinas reddidisse rubras, cæterum pallidas, ac glutinosas. Explorando calculum deteximus. Quamvis in morbo fere congenito vix quid a medicamentis sperarem, animus tamen fuit, quid uva ursi præstaret, explorare. Ad irrita 14. dierum conamina,

mina, juvenem in Nosocomium demum recepi. Jan. 19. operator spatio trium minutorum integram perfecit operationem. Calculus ovalis fuit, planus, ponderis unc. $1\frac{1}{2}$. dr. $1\frac{1}{2}$. hæmorrhagia magna successit. Conus ex agarico formatus vulnere immissus & affixus, opium largiter datum, hæmorrhagiam sensim sic stiterunt, ut intra 24. horas plane sileret, nec ad remotum post 48. horas apparatus rediret. Die 23. Jan. cum dolore expressit vulnere fragmenta duo, quæ in operatione soluta a calculo fuerant. Minxitque per urethram unc. 2. urinæ, gluten tenacissimum, foetidissimumque habentis. Eodem hoc die, & sequentibus, de molesto admodum in inguine dolore conqueritur, quem quidem ante operationem adfuisse, jam vero multo validiorem esse, testatur. Parva in inguine glandula indurata adparuit. Jan. 25. plura ramenta vulnere emisit, veluti calculi externa putamina, cum dolore, & tantilla hæmorrhagia. Postea pectus tussicula cepit quati; sed dato decocto pectorali tussis cessit. Incepit a 29. Jan. libras 2. urinæ per urethram mittere, minus foetidæ, minus glutinosæ. Prima Febr. tumor ac dolor in inferiore scroti parte, a latere sectionis, altera die magna inflammatio. Cataplasma adhibetur. 3. Febr. abscessus maturus adparet. Aperitur. Effluit pus per decem dies. 14. Febr. totum curatum est. Urina copiosa tunc urethra prodiit, vix gluten, nisi diu stetisset, habens. Vulnus ad 20. ab operatione diem clausum fuit. 21. Febr. sanus abiit, seque postea bene valentem aliquoties exhibuit.

HISTORIA VI.

Matthias Kolb 57. annor. futor, primum adiit me 21. Jul. 1760. Stranguriose minxerat a $2\frac{1}{2}$. annis, subinde sanguinem excreverat, albumque sabulosum, ac tenax admodum sedimentum; quibus tenesmi atque prolapsus intestini adjunxerant se se. Calculum explorando

non invenimus. Uva ursi malum tolerabile gessit, usque ad finem Octobris. Ex eo ultra non juvit. Magnum atque scabrum nunc deteximus calculum. Usque ad 7. Jan. 1761. nunc cum levamine, nunc sine eo, varia assumpsit: Uvā ursi in decocto, in pulvere, emulsa, mucagines, opium. Tunc, consilio cujusdam cepit uti semicochleari Raphani hortensis rasi, misti cum oleo olivarum, quotidie. Triduo hoc usus, convenit me, solamen narraturus. Continuaret, suasi. Binorum mensium spatio tolerabiliter inde se habens, demum in priores incidit miseras, vires amisit, ac facie ex pallido lividus fiebat. Idem hic vir a 22. retro annis cæcas ut vocant hæmorrhoidas passus, ab ultimo bienio habuit easdem fluentes, hocque jam tempore a continuis vesicæ tenesmis fere perpetuas. Conclufi ex omnibus, quod toties auditoribus de eo monueram, systema urinosum pessime in illo degenerasse a statu sano, & demum lenta morte consumendum videri; unicum, sed anceps admodum, superesse remedium, sectionem. Hanc methodo enarrata peractam vix quid habere periculi, imo potius dare spem palliandi egregiam, quemadmodum casus docuerat. His sub conditionibus operationem *D. Cambon* proposui. 24. Martii calculum extraxit 4. minutorum spatio, lithotomi gladiolo ad 15. gradum adaptato. Calculus, circularis, planus, gibbus ab una parte, ab altera leviter excavatus, ruber, granulofus, pondere unc. j. & scrup. ij. Sub operatione hæmorrhagia, intruso cono Agarici mox quidem cessavit, sed bihorio post rediit copiosa. Arteriam intercipere animus erat, at vero invenire eam impossibile fuit. An quod nimis interna? Mictus tum urinæ, tum sanguinis, æque per urethram, quam per vulnus, eo ac sequenti die animadversus, forte id innueret. Fecimus proinde quod potuimus, & tandem intruso, ac bene affirmato, vulnere cono Agarici, & liberaliter per epicrasim dato opio, hæmorrhagiam bre-

vi stitimus, eamque penitus curatam esse, dum quarto die propter fætorem immanem urinæ apparatus solvebatur, læti vidimus. Verum quod dolebamus, jam per vulnus omnis, nulla per urethram urina fluxit. Unde quoque inflammatio, & continua excoriatio scroti, interfeminei, nariumque, quamcunque curam diu noctuque nos, ægrorumque adhiberent custodes. Hinc nascentibus ubique gangrænis oportuit continuo mederi. Diathesis ad calculum in hoc homine terribilis! gluten putridissimum ad plicas angulosque vulneris crudi adhærens, spatio nocthemeri in veros abiverat lapillos; quemadmodum etiam collectum gluten in charta emporctica in crassam abibat ac calcaream materiem. Cum demum averruncandæ gangrænæ ultra non essemus, corticem peruvianum dedimus, malum superavimus, & diu post curationem continuavimus, cum hoc remedium tam belle ferret, eoque cacochymiam sædam pulchre superaret. Cum cortice fiebant quoque detergentes in vesicam injectiones. Labiis vulneris digestivum, aut mel rosaceum, cortice peruviano mista, adplicabantur. Præter varia autem unguenta ad vicinarum partium gangrænam præcavendam, plurimum profuit lotio ex aq. samb. libr. j. & una uncia aceti Lithargyrii. Tandem post continuas curas & sollicitudines nostras vulnus minui cepit, urina putridissima per urethram reddi, Maji 4. vulnus coire vesicæ, & paucis postea diebus vulnus integrum. Domum rediit 14. Maji. Sæpius posthæc me convenit, corticem repetiturus, quod inde adeo mirifice se refici & roborari perciperet, sanitatem sat bonam testatus, nisi quod crebro cogeretur mingere. Stranguriam postea conquerenti uvam ursi dedi.

Palliatio mali sane tam pulcra est, & fortunata, quam potuisset unquam expectari. Præcipue si consideremus etiam fluentes hæmorrhoidas, Rectique prolapsam, nunc quoque non amplius observari.

HISTORIA VII.

Sebastianus Niedermayer, quintum annum agens, die 28. Martii in Nosocomium illatus est. Narraverunt parentes hunc suum filium signa in mejendo doloris ab ipsa nativitate dedisse, deinde, biennem illum, pisi magnitudine minxisse calculum; exinde duobus circiter annis liberum fuisse a quocunque symptomate, verum jam ab anni spatio se tam misere habere, ut urinam redderet uno tempore sanguineam, alio tempore plane glutinosam, ac putridissimam, tandemque a continuis mejendi conatibus, & tenesmis, intestini recti pateretur ab octiduo prolapsum. Examine constitit calculum adesse.

Cum optimus *Cambon* abitum meditaretur, petivi, ut liceret Chirurgis nostris, ejusdem sub auspicio, calculum secare. Quod ille, pro eo, quo est, candore, mox mihi annuit. D. *Leber* hunc puerum perfecte secuit. Calculus quidem magnus erat, sed pumicosissimus, intra forcipem grumescens. Collecta fragmenta una cum corpore calculi septem scrup. pondere æquabant.

Puer a prima hora operationis nec doluit, nec ægravavit, optime appetivit, tota die in lecto lusit, urinam brevi per urethram misit, quæ primo glutine multo, eoque fœtente, deinde paucio, prodibat. Vulnus 20. die clausum est. Die 25. sanus suis tradebatur parentibus.

HISTORIA VIII.

N. *Osfeld* anno 1760. Maji 26. in nostro Nosocomio feliciter calculum sectus fuerat a D. *Leber*; prout tota sectionis historia Part. 5. a pag. 65. ad 69. data est. Abundantia muci & puris perpetua urinarum, nephritica pueri dispositio, me coëgerunt, ut 4. mensibus illi, in Nosocomio servato, uvam ursi darem. Tandem cum

cum perfecte ab hisce liber Patri redderetur, adhuc monui, eo medicamento uteretur perpetuo. Hinc per omnia sanus vixit usque ad Martium 1761. quando post neglectum medicamenti hujus denuo pati inciperet, peteretque eosdem sibi pulveres dari. Incassum sumfit. Aprilis 10. cathetere eum explorantes, nihil deteximus præ tumma vesicæ constrictione: Qua altero die laxata, calculum invenimus. Aprilis 13. *D. Homburg* Chirurgus SS. MM. sub auspiciis *D. Cambon* sectionem egregie fecit. Cicatrix antiqua sponte viam monstrabat. Iterum hic diffiliens calculus cum collectis grumis grana 71. pependit. Puer a fine primi diei optime se habuit, nullum eorum symptomatum passus, quæ in prima Sectione eum perpeßum esse Part. V. narravi. Pro more vesicam quotidie eluimus. Cumque jam ab octiduo nihil grumorum ultra exiret, & injectionis materies redeuns puram doceret vesicam, tentare Chirurgus voluit, an sicco plumaceolo, emplastroque desuper, clausum, curatumque demum vulnus, nos non eximeret ab ærumnis, quas in ægro N°. 2. N°. 3. & maxime N°. 6. ob calculosam diathesin antiquam observaveramus. Res pro votis successit. Vulnus 13. die coaluit. Nulla symptomata superfuere.

Notari meretur in priore sectione vulnus ilico clausum fuisse plumaceolo & emplastro, & demum 21. die coaluisse; nunc vero 5^{to}. die ab imposito emplastro. Interim curatus denuo lumborum conqueritur dolorem.

Hinc quia metus erat ne brevi novus ex rene descenderet calculus, dedi uvam ursi, sed mense Julio rediit ad nos, præsentis in vesica calculi questurus symptomata. Examine factò calculus in vesica deprehensus est 18. Augusti. Verum ajebat puer, quod nunquam antea, se ab omni prorsus lumborum dolore nunc liberum esse. Quia nunc spes major integræ curæ affulgebat, die Aug. 21. purgante, & 22. enemate alvus ipsi eluta

eluta est, & eodem die Chirurgus noster eum methodo eadem calculo liberavit. Trium minutorum spatio omnia perfecisset, sed primo retardabat calculi fragmentum cochleari detectum, secundo alter calculus. Unde decem minuta infumta sunt. Via jam bis aperta prodegerat inventione sua facili oberat valde duriore cicatrice. Calculus prior rubellus dr. j. & gr. 4. pependit; alter 52. grana.

Per octo horas ab operatione doluit, postea autem nox tranquilla successit. Sequentie die modica febris duntaxat, & quisquam vulneris ardor adfuit, ceterum bene se habuit, & appetitum testatus est. A die tertia nulla amplius febris. Die 5. & 6. multa urina per urethram reddita est, quæ glutinis quid perpetuo habebat; tandem vero gluten fere defecit. Die 8. cum omnia in vesica nitida esse injectio testaretur, vulnus emplastro clausum est. Die 12. id consolidatum fuit, & puer domum potuit repetere.

HISTORIA IX.

Franciscus Domijanitsch 9. annos & 4. menses natus 21. Apr. 1761. allatus est nobis, a biennio stranguriosus postquam Calculum pisi magnitudinis minxisset. Calculum cum nunc habere cathetere mox deprehendimus. Cum *D. Cambon* cum *Sua Regia Celsitudine* profectus in *Belgium* esset, *D. Leber* hunc puerum eadem methodo felicissime secuit, spatio 5. minutorum; licet calculum longitudine primo arreptum, dimittere, latitudineque deinde capiendum, quærere deberet. Ponderis fuit unc. 1. & gr. 45. Febricitavit puer parumper, sudavitque prima die, noctem optimam habuit, sequenti die poterat sanus dici, vesicam Chirurgus bis die probe eluit, & quarto die plumaceolo sicco, & emplastro, texit; unde factum est, ut octava post sectionem die penitus clausum esset. Pallida quidem toto eo tempore urina fuit, purulentique quidquam sæpe habuit, nunquam

quam vero gluten calculosorum. Intra duas septimanas potuit abire.

HISTORIA X.

Simon Senis annor 4., totidemque mensium, 27. Aprilis 1761 adducitur. Biennium erat, quod cum dolore mingere cepisset; annus, quod tolerabiliter habuisset. Quippe anno abhinc elapso Mater eum ad ædes *D. Leber* adduxerat, qui calculum explorans, invenit illum in vesicæ sphinctere, principioque hærentem urethræ, catheteris autem apicem repulit in vesicam. Matri proposuit sectionem, sed cum repulso calculo puer nulla calculi signa fere unquam haberet, risit Mater posthac Chirurgi consilium. Jam vero 27. Aprilis eum ad Nosocomium duxit, utpote quem ab octiduo antiquæ vexarent ærumnæ.

Calculo invento, 29. April. sectus est consueta methodo, ea tantum differentia, ut primo vulnere facto jam non culter occultus adhiberetur, sed prior culter integram perficeret sectionem, perinde atque in communi sectione laterali fit. Calculus granorum 35. spatio septem modo minorum exsectus est. Ast plus inde, quam a cultro occulto, videtur perpeffus. Dolor, inflatum scrotum, inflammatumque, febris magna, valida deinde scroti suppuratio, eum octiduo vexarunt. Eo vero elapso cito convaluit, & vulnus tunc linteo carpato, & emplastro, tegi ceptum, quatrduo postea consolidatum fuit. Pallida quidem sed vix glutinosa urina. Post. 3. septimanas abiit.

§. III. Qui attenta mente considerat enarratas hasce undecim sectiones, is legendo dissertationem Gallicam supra laudatam, quæ hinc vituperat illinc laudat, *Fratri Cosmi* methodum, haud ultra, arbitror, hæsitabit, an illam sit laudaturus. Equidem poterat exemplorum raritas ante 10. annos lectores fluctuantes reddere; præsens vero eorundem crebritas, tum egregii

Cam-

Cambon experientia, tum frequenti nostri Nosocomii exemplo demonstrata, omnem hæsitantem animam firmat, & de præstantia hujus methodi præ omnibus aliis secandi modis, abunde convincit. Si enim sine præjudicio omnes consideremus effectus aliarum methodorum, adeoque etiam *ultimæ correctæ lateralis*, eosque cum effectibus hujusce conferamus, vix ultra extitutum quempiam credimus, qui hanc non præferat illis, qui hanc non semper adhibeat.

1. Enim præparatio brevis est. Haud insumimus menses ad humores immutandos, ad reparanda solida. Hæc namque vitia, manente causa, non curantur, imo temporis lapsu pejorantur; causa autem ablata, vel cessant si cura integra est, vel saltem mitigantur, si vita brevī alioquin collapsura, nunc prolongetur. Plethora vix unquam hic venæ sectionem suadet, raro quippe præsens: Remedium purgans, & unum, alterumve enema, totam præparationem faciunt.

2. Breve, quo fit, tempus eam commendat cum maxime. In quacunque methodo remoratur operationem calculi friabilitas; in omni methodo calculum extrahere difficile est, quando oblongioris figuræ ille, juxta longitudinem arripitur, quando nimia levitate vix uno loco consistit, quando figura hirta ac echinea, ut in *Hist. 2.*, vix se finit capi, quando major est, quam ut per factum vulnus educatur, quando ad fundum trianguli quem forcipes faciunt, dilabens, prehensusque, apices forficum ita a se mutuo dimoveat, ut educi tantanequeant latitudine, denique quando hæmorrhagia notabilior contigit. Sed hæc ut communia omnibus methodis, nihil contra nostram faciunt. Unde hisce exceptis, certum est hanc methodum Itinerario, cultello, Lithotomo occulto, Conductore, & Forcipe, 3. 4. 5. minorum spatio passim absolvi. Quin & ipsa infortunia nonnisi duplum exegisse spatium enarratæ convincere historiæ. Certe vel ideo sua se se brevitate hæc me-

thodus commendat, & ad illam amplectendam cogit, quia 1^{mo} vitæ, commodique, mortalium arbitri non sumus, sed ministri, & promotores, & conservatores, adeoque conscientia & humanitate constringimur, ad dolores illorum tum mitigandos, tum abbreviandos. 2^{do} Quia quo & gravius & diutius hi dolent, eo graviores febres, eo tetriora symptomata, metuenda habemus. Ita ut si hæc methodus aliis modo par foret, dictas ob causas ceteris esset præferenda.

3. Nec in suis *D. Cambon*, nec nos in nostris unquam vel minimum ventris dolorem, duritiem, tumorem, invenimus; quod tamen adeo frequens in aliis methodis est, & post inflammationem Vesicæ, vulneris, integumentorum, musculorum, morte haud raro terminatur.

4. Febrim pauci notabilem, aut durabilem, habere; iique modo, qui non simpliciter calculo, sed degenerare viscerum fabrica laborabant. Ceterum per aliquot horas levissime duntaxat febricitarunt.

5. Bis in hac Methodo hæmorrhagiam habuimus; verum 1^{mo} nulla methodus est, maxime lateralis; in qua hæc non contingat aliquando. 2^{do} Levi negotio eandem stitimus: laudandus iterum hic Agaricus.

6. In his qui simpliciter calculo laborarunt, urina cito, copioseque, per urethram fluxit 1. 2. 3. die, vulnere quamvis aperto.

7. Methodus vulnus apertum servandi præstantissima videtur, ne quid aut calculosi, aut grumosi sanguinis, remaneat in vesica, quod novo calculo basin præstaret. Juvenis Hist. 5. sic per vices calculi veluti putamina vulnere expulit, alioqui permansura. Et vesica illius qui N^o. 1. sectus, ac mortuus est, tam nitida a morte reperta est, ut quamvis calculus in illa penitus diffractus fuisset, ne minimum tamen ejusdem superesset.

1. Posse nihilominus vulnus, quando per octiduum

vesica quotidie probe eluta est, adeoque ita expurgata, ut heterogenei nihil superesse possit, sicco plumaceolo, & emplastro tegi; tum ut eo citius omnis per urethram urina reddatur, tum ut vulnus maturius coëat, hominesque citius convalescant.

9. Nunquam vidimus cannula opus fuisse, qua vulneri immissa urina transfiret. Effluxit quippe illa in nostris jugitur sine cannula. Equidem acris admodum urina, assiduoque his effluens gluten, metum quibusdam incutere callosorum labiorum possunt; sed an continua cannulæ frictio idem quoque non faciat? Urina acris hæmorrhagiæ formidinem; at vero an mechanica cannulæ frictio eidem producendæ non est apta nata? Uti-que quod in his, quibus totus morbus calculus esset, nec callositas, neque post primum diem animadversa hæmorrhagia fuerit, modo labia vulneris melle rosaceo sæpe innungerentur, cannula in illis opus non esse judicavimus.

10. Ligatura mollis genuum ne divaricent, in omnibus nostris adhibita, urinæ fluxum, ac ramentorum calculi exitum, nunquam impedivit: ut merito vanus eorum metus sit, qui id ligatis impediri cruribus suspicati sint.

11. Non modo instrumentorum paucitas, temporisque brevitates, tormenta operationis abbreviant, sed etiam eadem reddunt longe mitiora. Culter lithotomus occultus bene inductus, & ad os pubis, ut ad punctum fixum affirmatus, dum uno, eodemque momento incipit perscindere cervicem vesicæ, vesicæ ipsius partem, prostaticam, musculum transversalem penis, seu transversum Perinæi, pinguedinem, cutem, epidermidem, tam æquabiliter, & haud interrupte, omnia transcendit, ut totum vulnus duo æquabilissima plana habeat, & nullam fibram trahat, dilaceretve. Præstat sane hac sola de causa omnibus aliis instrumentis, ut ut subtiliter, ingenioseque, a magnis in arte viris, exco-
gi-

gitatis. Præstat experimento in hist. 10. instituto, ut ibidem patuit. Quippe effectus docent vulnus (ceteris paribus) sufficienter ampliatur, citius curari, minus doloris in operatione, minus symptomatum post eandem creare, quam vulnera, quæ quod exiliora sint, magnam extensionem ac dilacerationem pati debent: id quod in *apparatu magno ac laterali* passim observatur, dum calculus utcumque major est. Et licet in *apparatu parvo* idque in pueris, calculus facile in Perinæo secatur, dum ille digitis in intestino Recto impositis ad interfemineum adprimitur; tamen quia nonnunquam asperior calculus (ut v. g. ille Hist. 2.) inæqualem ac dilacerantem integumentorum ac Vesicæ sectionem facit, unde prava symptomata nasci debent; quia denique blanda tutaque per sese *Fratri Cosmi* Methodus, hisce exempta incommodis est, erit etiam in pueris præferenda *apparatui parvo* seu dictæ *Celsi* methodo.

12. Pag. 173. monui rarissimi casus Intestini Recti, Lithotomo occulto transcissi, quo infortunio adversarii hanc methodum criminantur, Verum id nobis in cadavere contingebat, haud elutis primo Intestinis, intrusoque in vesicam supra pubem tantæ molis silice, ut vulnus 15. linearum adhuc dilatandum fuerit. Quoties cunque autem sive in vivis sive in cadaveribus, cum ista præcautione, hanc operationem fecimus, nunquam id contigit nobis. Ut proinde tot experimentis suffulti audacter pronuntiemus inanem eorum formidinem esse, qui instrumento hoc aut non usi, aut perperam usi, illud veluti Rectum facile perscindens, dum hoc proba elutione flaccescit, criminati sunt.

13. In moderandis in tabula secandorum cruribus, notabilis observatio, quam in cadaveribus didicimus, prodesse potest, prout pag. 174. enarrata habetur. Quod in cadavere, hoc in nobis possumus examinare dum lecto jacentes, femore in ventrem reflexo, varios edimus motus: experimur mox utcumque angustius

esse spatium inter pubem & tuber ischii, genu multum extrorsum flexo; spatium vero mox latefcere utcumque, dum genu versus umbilicum ducitur.

14. Positio horizontalis Calculosorum, cum exiguo tantum sub capite pulvinari, dum secantur, semiverticali videtur præferenda; quamvis hæc, præsertim in *apparatu magno*, eligitur, & a pluribus in *sectione laterali*, commendatur. Moles intestinorum *magis* in spinam, *minus* in peritonæi expansionem, quæ vesicam tegit, incumbere videtur: quin & splenis, ventriculi, jecorisque pondus, minus in intestina premit. Hinc eandem positionem in nostris perpetuo servavimus.

15. Errorem fateri debeo, in quo olim versabar. Tom. 1. Cap. 35. pag. 359. Intestini Recti prolapsus, veluti unam de causis, sectionem procrastinantibus, considerabam, notabam: at vero jam ægrorum frequentia me convicit, etiam graves Intestini prolapsus tenesmis a calculo excitatis deberi, impedimento in sectione non esse; educto autem calculo brevi cessare, & nullo ferme auxilio curari, quo tempore ægri propter sectionem jacent, & blande nutriti, alternoque aut tertio die enemate expurgati, fœces duras minime coacervant.

16. Nunquam approbare potuimus scrupulosam plurimorum tum Autorum, tum Operatorum timiditatem, qua, calculo olim quidem detecto, jam vero, dum itinerarium immittitur, neutiquam percepto, operationem conficere nolunt. Si enim ab una parte frequentem illam experientiam consideremus, qua uno die invenitur, altero non invenitur calculus; si ab altera parte noscamus eundem semel bene, manifestoque, repperitum, non posse aut deliquescere, aut aliorsum aufugere; non est cur totam hanc lugubrem scenam repetere velimus, ægrum minus forsitan dispositum, ad subeundam sectionem, postliminio inventuri. Profecto semel de eo certi, operationem non distulimus, etiam si illum paulo ante non perciperemus.

Equidem, fateor, contingere nobis posset, ut calculus perceptus quidem olim, sed vel postica parte inuretere detentus (ut casus habet *Tom. 1. Cap. 26. pag. 211.*) vel ex sacculo privato tantum leviter eminens, suaque mole majore, sic illo in sacco inclusus, ut extrahi inde non posset; qualis viri militaris calculus, de quo *Tom. 1. Cap. 26. pag. 211.* sed quia id antea certo sciri nequit, & quia si calculus in operatione percipitur, operatio semper instituitur, hinc observationes illæ extraordinariæ nihil hic immutare possunt. Frequenti exploratione didicimus esse calculos liberos, qui quotiescumque explorantur, eodem fere loco perpetuo detegantur: esse alios pariter liberos, qui nunc altius, nunc depresso locati deprehendantur. Ut postremi hi, ita calculi firmiter adhærentes, in expansiore vesica remotius, in contractiore propius, detegantur, sine ullo signo adhæSIONem testante. Ergo, ut dixi, regula certa id detegendi non adest, & habet hic casus extraordinarius eandem quavis in methodo difficultatem.

17. Urinam Calculosorum pallidam esse passim observavimus. An id ab alcali calculi? Utique urinæ sanæ acida fossilia rubedinem conciliant; sal aut liquor, alcalinus pallorem: Dixi *sanæ urinæ*: nam si homo prius quædam medicamenta sumserit, potest color ab affusis ad urinam rebus mire variari. Sed calculo sectione ducto, in omnibus nostris urina pallida perpetuo fuit, etiam curato dudum vulnere. An igitur id a glutine, quod in vesica cum calculo copiosum aderat, & adhuc dudum adest? Attamen is qui (*Hist. 1.*) a morte examinatus est, & glutinis nihil in vesica habebat, & urinam semper pallidam, fætidadque, reddiderat. Suspiciabitur forte quisquam a Renum calculis urinas notæ alcalina imbui: sed ille idem, de quo nunc fermo est, cum nitida vesica nitidos, liberosque a calculo, aut pure, renes habuit.

18. Quod Part. V. de glutine Calculosorum in cal-

caream abeunte materiem dixi, id hoc anno constanter novis vidi experimentis confirmatum; imo ut ex Hist. 6. pag. 179. patuit, in labiis vulneris stagnans gluten, maxime circa labiorum commissuram, in lapillos calcareos abiverat. Quid autem proprie illud gluten est? In charta emporetica liquefcit, transitque, ut concreta calx fere sola superfit. Si aëri hoc gluten exponatur in vitro, disparet quoque omne humidum sola calce superflite. Ergo non est de natura mucii, quod collæ instar indurefcit. Fors est aliquid, quod ex vesica secretum se unit cum ramentis terrestribus, quæ a solidis abrafa nostris, urina continentur; quodque dein calculo in ambitum adplicatum, putamina illa format, quæ toties calculis humanis, alia aliis incumbentia, circumcreta inveniuntur, quæque etiam toties in sectione calculi ab eodem inter forcipes separantur. An pulveres, qui falso dictum Lithontripticon Stepfenianum ingrediuntur, apti quoque sunt, qui cum humoribus, ipsa in vesica secretis, in laminas calcareas abeant, calculo accrescant, putaminumque in morem ad uncias & libras excernantur, dum interea ipse calculus persistens ut erat, educendus sectione est; vide Part. 5. Cap. 5. pag. 71. huius exemplum.

19. Cur dantur Calculosi, quibus vix ullum adpareat in urina gluten? Videtur hic impedita humoris de quo N°. 18. in vesica secretio; ita ut abrafa solidorum ramenta partim cum calculo concrefcant, partim urinis expellantur. Si qua datur in Phycis attractio, liquor vesicæ secretus haberet tunc fortem vim hæc ramenta attrahendi, quam calculus quoque tunc per se haberet: absente illo liquore, Calculus solus attraheret, quantum posset.

An omnium Calculosorum gluten in calcem abit? Part. 5. non ausus fui id asserere. Hoc anno innumera experimenta mihi constanter hoc phænomenon dedere; uno alterove excepto ubi parum admodum ejus adfuit.


fuit. Hinc hucusque respondeo, in multiplicibus meis experimentis omnium calculosorum mucum plus minus calcis exhibuisse; id tamen contingere posse, ut quis multorum experimentorum occasione gaudens, incideret in nonnullos calculosos, quibus hoc phænomenon forte deëssset. Experimenta mea multiplicia observationis frequentiam docent; contrariam forte aliorum observationem non explodunt.

20. Quam est observationum fertilis historia calculi? Cernimus ex omnibus antedictis majores calculos nonnunquam sibi viam per urethram pandere, hominemque ad tempus notabile exemptum vivere dolore; minores e contrario in hanc viam nunquam impelli, & perpetuo cruciari. Advertimus exiles admodum calculos tam vehementes, diuturnosque creare dolores, tenesmos, Recti prolapsus, mucum calcareum, urinam & putridissimam & pallidissimam, summamque vitæ intolerabilitatem, quam unquam producere queunt calculi majores.

21. Si calculus, ut in *Hist.* 10. ex collo vesicæ intra eandem repulsus, anno integro ita latuit, ut vix ulla sui signa dederit; si idem anno illo elapso, tormenta calculi resuscitet, jam non iterum in collum pulsus sed manens in vesica; nonne verisimilitudo crescit problematis, quod Part. V. sub ipsum capitis §. finem, pag. 79. proposui?

22. Dictus *Osfeld Hist.* 8. intra septemdecim menses ter calculo a nobis sectus est, & ultima vice gemino calculo. Absentia doloris ad lumbos, qui olim illi familiaris integram forsitan salutem promittit; fors fallax spes, novos calculos dabit. Eo in casu historiam renovare poterit Mercatoris, qui narrante *Volkammero M. N. C. Dec. 2. Obser. 177.* jam quater a peritissimo Lithotomo sectus, singulo anno novum calculum secandum afferret. Porro hoc incommodum est cuique Methodo commune. Nos saltem certi sumus, enarrato

hoc nostro agendi modo, nihil in vesica restitare posse calculosi; adeoque si novus iterum adsit, cum vel novam plane creaturam esse vel ex renibus fuisse delapsum. Hinc non mirarer, quod decies & ultra idem homo indigeret sectione. Simile quid subolfaciens *Aretæus* Lib. 2. Cur. Chron. Cap. 3. „ Calculorum, inquit, „ procreationem e fœcunda sterilem reddere nemo „ potest: ῥηϊτερόν μὲν γὰρ μήτηρ ἀτοκὸν δέμεναι, ἢ νεφρὸς „ λιθιῶντας ἀλίδας. Facilius est enim uterum sterilem „ efficere, quam calculiferos renes ita disponere, ut „ eosdem haud generent ultra.” Igitur ter quaterque beatum genus humanum, quod nunc quotiescumque opus fuerit, adeo facile eo hoste queat liberari!



C A P U T X I I.

De Cranii Ustione in Pertinacioribus Capitis Vitiis.

§. I. *Diversus quidem modus admoventi ferri candentis, tam veterum, quam posteriorum; universorum tamen calculo expers periculo creditus.* §. II. *Experimentum primum hujus infelicissime in Nosocomio institutum. Mors inopina inde. Respirationis modus juxta communes humani corporis leges vix explicandus. Exemplum inflammati & gangrænosæ majorem partem ventriculi, sine febre, sine dolore, & cum bono appetitu. Examen Anatomicum nullas in Cranio, Oculisve, Amauroseos causas detexit.* §. III. *Alter infœustissimus Cauterii Cranii effectus. Historia morbi antecedentis datur, ideo notabilis, quod plurima, & exquisita remedia, ordine adhibita, effectum plane caruerint. Conamina nostra, ad imminens a Cauterio discrimen Trepano averruncandum, enarrantur, & inutilia demonstrantur. Hydrops Ventriculi superioris cerebri. Portentosum infundibulum,*

lum, ejusque mira ægritudo, ut causa inventa Guttæ serenæ. Respirandi modus, æque parum, quam in priorre Historia intelligendus. §. IV. Experimenta multa, in Craniis facta, enarrantur, quæ hanc operationem nunquam, nisi cum summo vitæ discrimine, institui posse evidenter arguant. §. V. Ex omnibus hisce Rationum medicum, & seria formatur conclusio. §. VI, Quædam de Trepano in Epilepsia, Cephalæa, &c. admovendo.

§. I. **A**b ipso Hippocrate, in hodiernum usquediem, Cauterii actualis in arte dicti applicatio ad Cranium, ita omnium ore laudatur, ut nesciam ullum esse artis auxilium, quod plurimorum suffragiis fulciatur. Si enim Zecchium, & qui Zecchii autoritate permotus fuit, Sennertum, paucissimosque forte alios exceperitis, uno omnes ore hanc operationem commendant.

Haud idem tamen cunctis inurendi modus. Quantum ex Hippocratis textibus concludere licet, Libr. 2. de morbis, & libr. de locis in hom. Ferrum quidem candens capitis pluribus, imo octo diversis locis, sed ad integumenta duntaxat, admovit: nihilominus vim ustionis ad ossa penetrasse credibile fit, quia quam ustionem juxta nasum in cantho oculi interno, ita fieri jubet, ut crusta ibidem inuratur, ea sane sine ossis ustione vix peragi posse videtur. Quin & ubi sic loca circa aures inuri præcipit, ut desinant a pulsando Arteriæ, profunde satis videtur ussisse.

Aretæus Cappadox non explicat libr. 1. de cura Chron. Cap. 4. de Epileps. quo velit uri modo, paucis tantum, opus est, ait, etiam ignem capiti inferre; proficit enim.

Cælius Aurelianus Libr. 1. Chron. Cap. 4. refert, „Tetisonem consuluisse cutis capitis usturam, qua testasquamulis despumatur.

Celsus Libr. 7. Cap. 7. §. 15. in oculorum pituita:
 „ Quidam atramento duas lineas duxerunt a media
 „ aure, ad mediam alteram aurem, deinde a naribus ad
 „ verticem; tum ubi lineæ committebantur, scalpel-
 „ lo inciderunt, & post sanguinem effusum os ibidem
 „ adusserunt. Nihilominus autem & in temporibus, &
 „ inter frontem, atque verticem, eminentibus venis
 „ idem ferrum candens admoverunt. Frequens curatio
 „ est venas in temporibus adurere valentior ta-
 „ men Medicina est venas incidere, & sangui-
 „ nem mittere: ubi satis fluxit, tenuibus ferramentis
 „ adurere. Contra tempora quidem timide, ne subjecti
 „ muscoli, qui maxillas tenent, sentiant: inter fron-
 „ tem vero & verticem vehementer sic, ut squama ab
 „ osse recedat. Efficaciter tamen etiamnum est A fro-
 „ rum curatio, qui verticem usque ad os adurunt sic,
 „ ut squamam remittat.

Traditionem omnium sæculorum de hujus curæ præ-
 stantia collegit nobis *M. A. Severinus*, in suis libris *de*
efficaci Medicina, *Pyrotechn. Chir. Lib. 2. pag. 1. testi-*
moniis Pauli Æginetæ, Aëtii, Actuarii, Mesues, Rhases,
Albucaſis, Arnoldi Villanovani, Andreæ Cæſalpini, Pe-
tri Salii, Paræi, Gualtheri Bruelis, Theodorici, Fumanel-
li, Rondeletii, L. Mercati, Lanfranci, Jacobi Sylvii, Ni-
colai Pisonis, Garioponti, Bertrucii Bononiensis Cæſaris
Machæ, Joannis Heurnii, Epiphani Fernandez, Fontani,
J. B. Theodosii. Ipſusque ille *Severinus* maximus extitit
 hujus curæ promotor.

Si ordine laudatos omnes hos Scriptores evolvimus,
 patet nonnullos quidem prope futuras, plerosque vero
 in ipsis futuris, & maxime in commiffura Sagittalis
 cum Coronali, candens ferrum imposuisse; plures insu-
 per monuisse, ut uſtio deberet ad ipsam penetrare di-
 ploën; omnes autem curas admirandas plane & ſtupen-
 das inde a ſe ſe perpetratas gloriari. Ex multis pauca at-
 tulisse ſufficiat. „ Quod meo quidem experimento, in-
 quit,

quit *Severinus*, confirmare possum. Suturae sagittalis, coronalisque confinio perusto, *Franciscus ab Angelo, Castrinovenfis*, ab ingenti cephalæa liberatus est.

Et *Epiphanius*: „Mirum est, ait, quam his Cauteriis refrigeretur cerebrum, & pravi, tetrique vapores dissipentur: & licet primis diebus soleant concitare aliquem gradum caloris, tamen majus est emolumentum, quod postmodum inde sequitur, quam pusillum aliquod damnum, ex impresso igne. Nos quoque quinque, quandoque septem Cauteria, amentibus admoveamus, qui fuere curati, maxime ubi non viget capitis tanta caliditas; ob quam quidem in hac muliere (cujus historiam dederat) tantum unum fieri curavimus. Est & e novissimis *Cæsar Macha*, Principum subalpinorum Medicus, qui consil. 140. feminam inde restitutam testatur, septem jam menses insanientem.

Idem *Fernandez Hist. Medicinal. 47.* „Testor Deum Cauteriis in capite quandoque tribus, quandoque quatuor & quinque factis, ad loca futurarum, curasse annis elapsis socrum *Magistri Gentilis*, cui jam erat memoria abolita, & duos alios stolidos & insanientes juvenes.

J. Heurnius, primus Med. Pract. Professor, in condita anno 1575. Universitate Lugduno-Batava, ait chirurgum *Ultrajectinum* a se curatum Cauterio ab immedicabili cephalæa, in determinata capitis plaga sæviente. Et in *Aphor. 2. Sect. 7* „Vir, cui erat caput totum tuberosum, Cauterio id ad os usque aperuimus; quod exesum erat fere usque ad *Diploën*, abrasimus sensim, iterumque aliam partem aperiebamus ad os, ita sensim totum fere caput abrasimus. Evasisit.

Platerus Libr. 1. pag. 61. „Quo pacto modo natis *Florentiæ*, ut fertur, verticem perurentes, Epilepsiam, quæ iis in locis infantibus consueta est, solent

„ avertere. Quibus de causis, & experientia moti, fer-
 „ ro candenti ustionem moliri non inconsultum
 „ esse putamus. Scilicet ut ante monuerat, si pertina-
 „ cis mali causa in capite lateat.

Hier. Fabr. ab Aquapendente pro inurendo Fonticulo
 infutura Coronali, peculiare Cauterium excogitavit;
 quod apud ipsum, & apud *Scultetum*, qui hanc metho-
 dum quoque laudat, videas.

Hollerius in scholio ad suum primum caput *de morb.*
intern. „ Applicatur, inquit, Cauterium actuale in me-
 „ dia parte capitis prope futuras. „ *Duretus* in sua in
 hunc *Hollerii* textum enarratione, etiam candens fer-
 rum commendat.

Fallopins de Cauteriis, pag. 340. ipsis quidem in su-
 turis non suadet, „ cæterum, ait, capiti Cauterium
 „ tute imponere possumus.

Riverius Cap. de Mania pag. 227. „ Denique Cau-
 „ terium futuræ coronali adplicatum maxime proba-
 „ tur a *Gordonio*, ejusque utilitatem confirmat historia
 „ cujusdam Maniaci, cui cum esset vulnus inflictum
 „ capiti, cum cranii fractura, quamdiu vulnus aper-
 „ tum, tamdiu bene habuit, vulnere curato, reversa est
 „ Mania. „ Et Cap. de dol. cap. pag. 236. Cauterium
 futuræ coronali admotum, dolorem capitis contuma-
 „ cem aliquando radicitus abstulit. Multo majoris est
 „ efficaciam, si temporibus admoveatur, de qua vide *Po-*
 „ *terium* Obs. cent. 3. Cap. 8. & observationes nostras
 „ publico communicatas. Porro in obs. cent. 2. N°. 39.
 „ idem *Riverius*. Ad puerum epilepticum vocatus,
 „ præscribo apozema ex Cephalicis, & Epilepsiæ
 „ specificis, cum purgantibus ad quatuor doses. Dein-
 „ de inuritur Causticum futuræ coronali. Et his duo-
 „ bus remediis a morbo liberatus est.

Lambswerde in Tom. 2. *Sculteti* Obs. 9. Cephalæam
 veneream curat cauterio actuali in futura Coronali &
 Obs. 11. Epilepticam puellam curavit cute primum
 trans-

transversim secta, actuali cauterio futurarum coronalis & sagittalis concursum, *satis profunde* inurendo.

Nuckius Operat. & exp. chir. N°. 1., Facili, inquit, negotio operatio hæc sequenti instituitur modo: inuratur loco modo notato (per fila in medio capite se decussantia, ut ante ex *Celso* vidimus) profundum satis foramen cauterio quodam actuali.

Fred. Deckers, Exercit. pract. pag. 109. Puellæ cæcæ historiam refert, cui Chirurgus fonticulum in futura coronali & sagittali inussit, ad primam calvariæ laminam usque urendo, quod cum instabile daret levamen, alius Chirurgus inussit ad diploen usque, unde magna, rotunda portio separata fuit; separatam hanc portionem figura exhibet autor, habentem diametrum decem linearum: imo cum auxilium esset inconstans, tertium cauterium sustinuit, & tunc recte vidit. Etiam Guttam serenam, & Epilepsiam, sic curatas se vidisse affirmat.

Clariss. *Viennensis* Professor P. de *Sorbait*, prax. pag. 285. Cap. de Cataracta & Amaur. „ Setaceum quoque multis fuit auxilio: loco cujus in delicatulis (videtur tamen operatio longe crudelior setaceo) subrogari potest Cauterium, quod non tantum Nuchæ, sed etiam futuræ Coronali impositum plurimos juvit. Et pag. 598. 599. Cauteria adplicanda sunt . . . in capite supra futuram coronalem, longitudine digiti extensi supra nasum, contra Phthysim. Cauterium autem quo magis est candens, eo minorem affert dolorem.

Cl. *Hoffmannus*, Tom. 4. Part. 4. med. Syst. Rat. pag. 118. Edit. in 4. de Amaurosi: „ Magnum profecto præsidium est in cauterio actuali, syncipiti vel nuchæ inusto.

M. G. *Purmann*, famosus multos per annos apud *Breslavienses* Chirurgus primarius, in curiosis observationibus invictis. Imp. *Josepho* dicatis, historiam puellæ

læ Breslaviensis refert, quam invincibili cæterum Epilepsia curavit cauterio actuali, in confinio toties dictarum futurarum; quarum commissuram statuit contra omnes qui id negent, constanter reperiri in puncto, quo *fila, Celsi* modo ducta, decussant se se. Videturque sæpius eandem operationem peregisse, cum asserat ustionem eo in puncto se semper fecisse. Et in scholio suo. "Der

„ Wund - Ark hat auch keine Gefahr zu scheuen / und der
 „ Patient stehet dis gern / und noch ein mehreres aus. Und
 „ wer wolte dis nicht auch gerne thun / um der grossen / und
 „ der bösen Krankheit wegen / und um der grossen Hofnung /
 „ daß man solche miserable Plage verliethet? wäre auch zu
 „ wünschen / daß dieses edle Hilfs - Mittel mehr in usu wä-
 „ re / als es jeko ist / und diese Krankheit leider! in unseren
 „ Hospitalern so einreißt / daß es zu erbarmen.

Quadraginta igitur & ultra Autores tum Medici, tum Chirurghi, eosque inter plurimi sua in arte celebres, & famosi, hanc operationem & suaserunt, & exemplis utilissimam demonstrarunt, nullius unquam infortunii meminerunt; quidam audacter omnis dixerunt periculi expertem: operationem porro laudavere sic, ut vel integumenta simul cum osse adurerentur, vel integumentis, ac pericranio primum perscissis, separatisque, os solum adureretur, idque aut prope futuras, quod quibusdam placuit, aut in ipso futurarum contactu, quod plerisque visum: hancque sic institutam operationem plane innocuam esse plurimi assueverunt.

Proinde cum nullum existeret sive Medicinæ, sive Chirurgiæ caput, quod gravioribus autoritatibus ac testimoniis fulciretur, piaculum fore credidi in difficilioribus ac incurabilibus casibus idem omittere. Tres porro morbi videbantur mihi præcipue hanc curam poscere, Cephalæa pertinax cum Hemicrania, inemendabilis Epilepsia, Gutta serena. Erantque nobis tales ægri præsentēs, in quibus curam horum mor-

borum hac lege exerceceremus. Sed præcipue nos miserebat duorum, quos Gutta serena ad Mercurium, ad Corticem, ad Machinam electrinam, ad cujuscunque generis Evacuantia, ad variacapitis Epithemata, ad Vesicantia, ad Seracea &c. omnino rebellis & pertinax, misere affligebat.

§. II. Igitur 3. Junii proxime elapsi, operationem fecimus in Adolescente 12. annorum, rustico, robusto, toto quadrato, quem Amaurosis affligebat, probabiliter nata ex contuso capite, postquam sex mensium spatio in periodicos vomitus, quos cephalæa semper prænunciabat, inciderat. Amaurosis porro ejusmodi erat, ut noctem inter diemque nihil distingueret, summam tamen, agilemque pupillæ utriusque constrictionem, & dilatationem ad majus, minusve lumen haberet. Unde contra eruditissimi *Halleri* opinionem sensibilitas pupillæ demonstrari videtur; Retinam enim plane inertem fuisse, perfectissima cæcitas evicit.

Quia & sine integumentorum incisione, & cum eadem, hæc operatio fit, ultimum modum prætulit *D. Leber*; cum eandem didicisset, fortunatoque applicatam a suo Magistro, dexterrimo, dum viveret, Chirurgo *Laudes*, vidisset; qui idem Magister Discipulos, adstantesque Chirurgos, serio hortatus erat hanc simplici ustioni semper præferrent, metu convulsionum, quas ustionem sine sectione generare statuebat.

Integumentorum hæc separatio, validum dolorem excitabat; leviolem, pericranii abrasio; maximum vero, ustio; quam valide urentem agebat, licet nihil eorum, quæ circum se gerebantur, sciret. Examina-
bam, an vagina, intra quam Cauterium, ne labiis perficissis noceat, capiti imponitur, a Cauterio candesceret, & ustionis dolor potius ab integumentis ustis, quam a perusto cranio gigneretur; verum vaginam illam ego, adstantesque tangentes, vix calentem deprehendimus.

Dolor primis horis magnus, postea modicus, bonus appetitus, semel modo levis vomitus, qui cæterum ipsi consuetus, observabatur. Utebatur jure carni, aqua hordei mellita, & emulso leviter paregorico. Altero die optime habuit. Die tertio, fumo aromatico prunis ardentibus injecto, ac capiti admoto, apparatus examinavimus, lintea carpta sanguine imbuta amovimus, inspersoque vulnere pulvere Mastiches, labia suis singula locis adposuimus. Bona hæc, sed contracta ita, ut inustum ossi locum exacte liberum & nudum servarent. Tenaci Emplastro ea ad se mutuo jungebamus; omnia deligabamus sicce, ac raro deligandum locum postmodum esse, *Cæsaris Magati* consilio decernebamus. Nox optima, alvus ab Ene-mate bona. Die 6. Junii, scilicet ab operatione quarto, pulsus sanus, naturalis, bonus appetitus, nullus capitis, nisi ab ejusdem motitatione, dolor. Hora octava vespertina cum illo locutus sum, affirmantemque palam audivi, se nullibi in toto corpore, imo ne in capite quidem, dolere, suumque jus eadem vespera egregie sibi sapuisse. Tandem bonam illi noctem apprecatus, pulsus adhuc tetigi scrupulose, eumque tam bonum inveni, quam unquam sanus homo habere potest. Idem testati mihi sunt Medicinæ & Chirurgiæ Assistentes, qui post me pulsus examinaverunt. Interim visus emendationem observare se nullam æger conquirebatur. Solabamur illum ea spe, quam optimæ operationis tolerantia merito dabat. Sed, o spem fallacem! mox a media nocte vomere cepit; quod quia ipsi familiare, custos neglexit primo, verum ronchum in respiratione advertens. Assistentes Nosocomii vocavit. Qui morientem viderunt hora secunda prope finem diei quarti.

Quod me, nosque omnes, nec opinatus casus perculerit, & attonitos reddiderit, nemo dubitabit. Nec recte me suspicantem, ne forte vomitus violentia in
syn-

syncopen lapsus esset, curavisse, ut pectus ipsi valide agigaretur, & bis injecto Enemate Fumi Tabaci intestina irritarentur. Sed mortuus erat hac vice non resurrecturus.

Cadaver examinantes, nihil mali externo in cranio deteximus. Labia quippe vulneris bona, suppurantia, se jam cum pericranio unire ceperant in loco ab inustione remotiore. Olla cranii ablata, videbamus cranium adeo leviter igne tactum fuisse, ut facta usti abrasione, vix quid de ossea periisse videretur substantia.

Igitur ustio non erat aut profunda, aut etiam ad usque diploën producta, quemadmodum Autores jubent, sed vix tangens, adeoque insufficiens. Attamen quis credat! Dura mater inustæ plagæ subjecta, jam ab externa sui parte, qua os tangit, suppurari leviter inceperat; Arachnoidea videbatur ibidem loci cum pia matre corrugata: cerebrum autem integerrimum. Cæterum per universum cranium ambæ Meninges admodum inflammatae.

Igitur, quod hic præprimis notandum, ustio vix leviter externum cranium tetigerat, & nihilominus effectum in omnibus ediderat cerebri membranis. Et quidni? Cranium internum ipsum ad distantiam duarum linearum a loco usto leviter fissum fuit. Tantane vis ignis, effectusque leviori tactu? Quid si ad diploën penetrasset? Præstitit sane nos in urendo meticulosiores fuisse cum hocce cranium, crassi licet rustici, adeo tenuæ & transparens esset, ut vix mediam solitæ crassitudinis partem haberet.

Præter hæc nullum in cranio vitium, ne in opticis quidem nervis cui Guttæ serenæ adscriberemus causam.

Dum vomitus a semianno periodicus fuerat, operæ pretium erat causas indagare. Ventriculus ore superiore suo initioque Oesophagi, solito multo amplior, ita sanguine omnibus suis in vasis turgens, ut hæc in nonnullis locis duarum, in aliis trium linearum diametrum

haberent; purpureus. cæterum toto fundo suo, binis, que in plagis tam interne, quam externe; gangrænosus; circa Pylorum bonus.

Univerſi Pulmones lateribus undique, Mediastino, Diaphragmati, Pericardio, Spinæ dorsi lateri, Jugulo, quolibet in puncto adeo indissolubiliter accreti erant; ut sine alterutrius destructione impossibile esset eosdem solvere; utque ubique, potissimum vero in toto dextro latere, lacerati pulmonis reliquiæ thoracem investirent. Quemadmodum porro Pulmones cum vicinis partibus, ita quoque mutuis inter se lobis coalescebant.

Quod autem maxime mirabile, Adolescens nunquam in nostro Nosocomio difficilem aut læsam Respirationem ostendit, neque hujus quidpiam matris habuit Anamnesis. Unice affirmare possumus sesqui hora modo ante mortem Respirationis, pulsusque, vitia adparuisse.

Nec minus mirabilis ventriculi & obstructi, & perquam inflammati, & gangrænosi, contemplatio, ubi ad mortem fere usque nec signa febris, aut gangrænæ in pulsu, nec signa doloris in hoc viscere, nec signa alicujus in ejusdem functione defectus, apparuerunt. Igitur obstructio adeo notabilis, inflammatio adeo sæva, gangræna adeo vehemens, ut penetret totam ventriculi substantiam, citra dolorem, citraque febrem contingunt? bono cum appetitu formantur? cum integra visceris perficiuntur functione? Neque enim fore crediderim, qui statuatur, omnia hæc sesqui horæ spatio nata & perfecta fuisse. Nunquid etiam illæsam semper Respirationem facile intelligimus cum universali adeo, cum indissolubili concretione Pulmonum? Cordisque expediti motum perennem, cujus pericardium dictis de causis immobile fuisse videatur? Merito videor hunc casum ad *Cap. 10. de Problematis* referre adeoque ut *Problema II. ad pag. 165.* adjungere.

Sed ut e bivio in viam; futuros prævideo, qui ex in-

tegra hac historia concludant, levem hanc uestionem causam mortis neutiquam extitisse, sed in corpore adeo vitioso mortem aliunde duxisse originem. Hos obsecro velint sequentem perpendere casum.

§. III. Die 4. Junii cauterium eodem modo juven-
culæ 20. annorum admovimus, altera scilicet die ab eo-
dem adplicito adolescenti: Hæc Gutta serena labora-
verat a fine anni 1759. post vomitum spontaneum 14.
dierum postque trimestrem defectum catameniorum.
Datis purgantibus, vomitus cessaverat, redierant men-
ses, visusque. Toto anno optime valuit. Sub finem an-
ni 1760. menses deficient, vomitus redit, perit visus.
Eo in statu nostrum Nosocomium infertur. Video A-
maurosin, quæ cum immobili utraque pupilla, inter
diem noctemque, imo posthac de die album inter ni-
grumque, distingueret: contra quam in Adolescente,
cui cum mobilissimis a luce pupillis perfectissima cæci-
tas fuerit. Cum anno elapso purgantibus sanitatem &
visionem recuperasset, eadem ipsi, sed jam incassum,
præscripsi. Cumque demum purgantibus opio inter-
posito vomitum superassem, menses & visus deficere
pergebant. Amaurosis jam bis vomitum diuturnum,
cumque violentum; vomitus jam bis retardatos inse-
quebatur menses: unde in mensium defectum, si non
omnis, saltem aliqua causa vomitus videretur refunden-
da. Quare postquam appetitus bonus cessante vomitu
rediisset, methodica ad menses revocandos cura exac-
tissime; eaque nonjuvante, quævis empyrica, pruden-
ter adhibita fuit. Cum demum nihil juvaret, nisi quod
semel iterumque leve quoddam initium mensium vide-
retur conspici, tandem quod *Tract. de Hæmorrhoidibus*
pag. 73. ex *Anglicis Observ.* laudavi auxilium, Machi-
næ tortilis ad arterias crurales admotæ post Aloëticum
purgans, Balneaque Vaporis; hoc, inquam auxilium
ad tres varias usque vices adhibui, circa id tempus, quo
menses, ni turbatus naturæ ordo fuisset, redire debuis-
sent,

sent. Sed & hoc frustra fuit. Diu demum post menses rediere, sed irregulariter semper; vomitus non nisi raro rediit, passim adhuc bonus appetitus, bona digestio, egestio commoda, virium, torositatisque incrementum. Ast vero omnia hæc cum perseverante Amaurosi, & continuo repetentibus capitis, atque oculorum, doloribus.

Videbatur ex hisce concludi oportere, quod visus olim rediisset ad catameniorum restitutionem, quia necdum quid notabiliter aut læsi, aut impacti, obstructique, in Encephalo erat; jam vero ex vomituum tum repetitione, tum diuturnitate, vitium topicum in cranio foret, propter quod Gutta serena ad restitutos menses perennasset: quodque proinde occasio opportuna adesset ejus curam Cauterio tentandi, id quod tutum, quod securum, quod nunquam noxium, sæpe vero efficacissimum, hucusque credideramus.

Altera ergo die, ut monui, qua in puero, operationem eodem modo in hac puella fecimus. Symptomata dolorum ad varias operationis partes, confuse primo; sedatis vero doloribus, eodem se percepisse modo, quo Adolescens narraverat, declaravit. Appetitu gaudentem eodem, quo puerum, modo sustentavimus. Prima nocte vix dormivit, & dolorem in utroque cervicis latere conquesta est; altera die melius: tertia die bene se habuit, excepta febricula; quarta die pejus. Sanguinem tunc misimus, qui pessime phlogisticus. Jamque vox deficere incepit, & caput hebes fieri.

Igitur inopina morte pueri perculsi, mortem puellæ tristes quoque prævidimus. De *Trepano* interea cogitatum. Ne vero illud frustra periclitaremur, plura crania primum cauterio inuffimus, trepanumque adhibuimus; & primo quidem ipso ustionis loco. Sed mox stylus Trepani in adusto fundo vacillabat, deinde plus adhuc stylus Trepani maris; ita ut vestigium sufficiens haud potuerit imprimi, quo Trepanum femina dictum tuto

ageret. Quapropter idem eo tentavimus loco, qui ad ulationem proximus, ut circulus Trepani eam una tangeret, eoque modo ad affectum in cranio locum quoque deveniremus. Etenim tam proxime ad ustam plagam Trepanum adhibendum esse suadebat hac ipsa hora facta pueri Anatome, quæ ambas meningas ibidem affectas ostendebat. Verum & hoc impossibile. Dum enim in pertenui cranio (quod ad tutius experimentum eligebamus) corona Trepani partem cranii non ustam vix tetigerat, profundius jam ad ustam partem penetrabat; & bis, ter adhuc, licet prudentissime, suspensissimeque, modiolum agitando, ossis festuæ, ab ustione fragiliores, in cerebri membranas infigebantur, interea dum diu adhuc perterebranda ea esset portio ossis, quæ adusta non fuerat, ut rotum frustulum eximi posset: unde conclusimus evidens mortis periculum periculosissima & incertissima operatione averti non oportere. Mediæ die quinto periit, cum leviori faciei convulsione.

In externo cranio omnia ut in bono vulnere. Ossa cranii resecta ustionem non modo multum non penetrasse, sed crassum hoc cranium vix attigisse patebat; parte enim adusta, abrafa, vix de ossis substantia quidquam ablutum apparebat. Nihilominus sub hoc crasso, vixque ab igne tacto cranio, dura mater suppurata inventa est, ac totum sinistrum cerebri hemisphærium, in quo (ut mox patebit) ustio erat, magna copia puris inter utramque meninga scatebat. Et, ut in priore, in utroque cerebri latere utraque Meninx vehementer inflammata erat. Aër autem copiosus, ubique se movens, separatim a sanguine in harum membranarum vasis sanguineis, potissimum in hemisphærio sinistro, miro sane spectaculo, inventus est. Ventriculus superior in sinistro latere Hydropicus tria plena cochlearia lymphæ gessit, dexter solitam copiam. Cerebrum pone locum ustionis flavum, & solito mollius, ac fere liquidum.

Notabile autem maxime Infundibulum. 1^{mo} Maximum fuit, octo vel novem linearum diametrum habens. 2^{do} Repletum fuit materia grisea, quæ partim pultacea, partim calcaria fuit. 3^{tio} Concretum erat cum pia matre Opticos involvente. 4^{to} Insidebat, premebatque ipsum Opticorum coalitum; non quidem ita ut Optici nervi post coalitum marcescerent, sed saltem sic, ut videretur illorum actio interturbata fuisse, puellaque cæca fuisse mansura, etiam si male haud successisset operatio.

Pulmones, ut in puero præcedente, ubique, ne minima quidem plaga excepta, indissolubiliter cum omnibus in Thorace partibus, mutuisque inter se lobis, connati erant. Oesophagus, & orificium superius ventriculi, duplo, quam solent, ampliores; Pylorus tam arctus, ut calamus scriptorium haud admitteret, in crastinam autem demonstrationem reservatus, hac constrictione, an spasmo evanido? caruit. Ex præcedentibus quippe patuit spasmos a morte non raro superesse.

§. IV. His ita enarratis, seriatim & tranquilla mente examen doctrinæ de adurendo cranio instituendum est. Collato lugubri utroque hoc casu cum allata 40. & ultra Doctorum doctrina, dico 1^{mo} minime verum esse, quod operatio hæc quovis periculo vacet. Et periculosissimam esse, & utrisque nostris letalem fuisse, Historia utraque palam facit.

2^{do} Cauterium in nostris levissime modo crania tetigit, letum induxit: quid non sequatur, necesse est, si uratur profundius?

3^{tio} Si cauterium jussu Autorum, tam profunde adactum fuisset, ut probabiliter ad Diploen penetrasset, ipsum cerebrum immediate adustum fuisset; nam eximie tenuitatis cranium fuit. An non ea de causa plures, hæc ita instituta operatione, perierint cito, necesse est?

Sed 4^{to} Etiam levissimo cauterii attactu validissima,

nocentissimaque ustio fit. In primo nostro casu levior, gravior longe in secundo, suppuratio inventa est, in utrisque universi capitis inflammatio, tum & aëris perceptibilis intra vasa sanguinea collectio magna, varia, in omni loco membranarum, ut ignis in liquoribus aërem, antea non ut talem, jam vero ut aërem existentem, bullisque manifestantem se se, gignere solet. Hoc experti nos a leviuscula adustione, quid illi a penetrantiore experti non fuerint?

5^{to} Crania quævis, crassissima æque quam tenuissima, suspensio tacta cauterio, intus ardent sic, ut digitus suppositus uratur, & ni retraxeris, ejusdem solvatur cuticula. Hoc experimentum pluries in publico Collegio iteravi, ut plusquam 20. homines digitum supponentes, ilico eundem retrahere deberent. Eum in finem sumsi varias veteres calvas, tenuiores, crassiores, interque easdem unam cujus Bregmatum crassities lineas quatuor æquabat. Vix per tres minuti horæ secundas candens ferrum os tetigerat, quin chirurgus digitum eo tempore admotum, in bullas elevatum doleret. Ergo dura mater, & reliquæ subjectæ partes, plus minus aurantur, necesse est. Igiturne adeo mirum fuit, quod ambo nostri ad ustionem vix tenuem ossis superficiem confumentem, se aduri lamentarentur, licet nec ignem videre possent, nec ejusdem applicandi moniti essent.

6^{to} Omnes postmodum experimentorum occasiones captantes, in quovis recenter oblato cranio varia exploravimus. Ubi vix tangit cauterium os, jam ab interna parte bullæ nascuntur fervidæ, veluti quid ebulliret. Ergo in quacumque etiam levissima adustione ingens fervor ad interiora percipiatur oportet.

7^{mo} Et maximus, & perniciosissimus ille caloris gradus est, qui ab ebulliente oleo, quod fervente aqua fere triplo calidius est, gignitur. Varium experimentum id nos docuit. In homine recenter mortuo quatuor diversis in plagis cranium cauterio leviter tetigimus. Inversa

tunc olla cranii flava macula in his ipsis quatuor locis inusta erat. Inuffimus idem alio loco $\frac{1}{3}$ minuti, id est 20. secundarum spatio: vix os externum ustum erat, quin interiora bullis flavis, foetidisque, excoquerentur, & digitus suppositus valide exureretur.

8^{vo} Si ad Diploen inurere usque, ut plures Autores jubent, oportet, indigebat ferrum candens tribus, imo pluribus horæ minutis, pro diversa craniorum crassitudine; prout in recentioribus craniis deprehendebamus, loca adusta postmodum abradendo. At vero in vivis ab ustione in uno cranio unius minuti, sesqui minuti in altero, transsudans fervidum oleum ussit jam, corrugavitque omnes meningas, & albam cætera cerebri medullam in flavam convertit. Monitos autem eos velim, qui hæc mea experimenta repetituri sint, ut sumant consuetum Artificum Cauterium, ut *Aquapendens*, *Paræus*, *Hildanus*, *Sculdetus* &c. describunt; alioqui nollem de experimenti effectu respondere, si v. g. clavo, vel alio ferro candefacto, vel si non penitus ignito, cranium inurerent.

9^{no} Inconstantius quoque nihil decursu futurarum. Sumimus plura vetera, plura deinde ad singulas oblatas occasiones crania recentia, & numerosa inter illa deprehendimus, in quibus futura coronalis pollice inferior ad frontem, vel superior versus futuram Lambdoideam inveniebatur. Intra hoc pollicis spatium futuræ coronales inter sese $\frac{1}{4}$ $\frac{1}{2}$ $\frac{3}{4}$. altitudinis differunt. Neque constanti lege sagittalis futura in medio est. In puero mortuo os parietale sinistrum longe amplius dextro. Unde cum ipsi in media linea ustio facta esset, invenimus illam $\frac{1}{4}$. pollicis a futura sagittali distantem. Nonnullis futuræ omnes, vel quædam desunt, imperfecteve adsunt. In puella mortua totum os frontis, & parietale dextrum, nonnisi unicum solidum os fuit, sine vel minimo futuræ vestigio. Quare quod plurimi disertis verbis sicrem constanter se habere affirmant, operationem-

nemque oportere semper in ipso decussantium se se florum puncto fieri, ut in futurarum commissuram cadat, inania verba sunt, experientiæ contraria. Equidem posse quemquam in decem ac plures incidere calvas, quarum ejusmodi commissura sit futurarum, inficias haud ivero, sed concedere demum mihi debebit, quo plures calvarias examinaverit, eo numerosiores inter illas se invenire dissimilitudines.

10^{mo}. Fateri oportet laudatorum Scriptorum hinc inde unum reperiri, qui operationem quidem commendans, eandem tamen remotius a futuris esse velit; ita quippe *Fallopious*: vel alium æque meticulosum, qui futuras quidem, sed non confinium ipsum binarum futurarum, suaserit aduri. Sed priori satisfacimus in puero, in quo uestio ab utraque futura multum distabat: alteri casu auscultavimus in puella, ubi uestio fuit pollice altius futura coronali. Et nihilominus utrisque hisce meticulosus casu satisfaciens, ægros utrosque morte amissimus.

§. V. Candide ergo omnibus sic expositis, quid demum consequitur? 1^{mo}. Veterum recentiorumque complures haud ea, quæ viderint, expertique fuerint, verum ea duntaxat, quæ alibi audiverint, legerintve, scriptisse; Artem proinde istos non experientia, sed onerosis auxisse voluminibus.

2. Fuisse dubio procul, qui forte semel operationem viderint, eamque (sive quod inflammatio Meningum resoluta fuerit, sive quod meticulosior Artifex aut non penitus candefecerit ferrum, aut cranium vix tetigerit,) letiferam non fuisse; imo, quod fonticulus inde excitatus morbum levaverit, profuisse observaverint: pessime vero ex rariore observatione generalissimas regulas posteris tradidisse.

3. Qui vero pluries hanc cranii adustionem perfecerrint & non nisi faustissimam descripserint eandem, hos suos paucos fortunatos casus enarrasse modo, plures re-

ticuisse infaustos. Eundem, quippe ignem qui nobis est, ipsis fuisse; eadem ipsis, quæ nobis, crania: effectus proinde ejusdem ignis, in consimilia crania, fuisse consimiles. Cum igitur demonstratum sit a mitiore, (quam jusserint illi, inustione mortem contigisse, quid non sæpius illos letiferi observasse necesse est, qui adusserint altius?

4. Hos præprimis culpandos esse, fraudisque notandos, eo quod infortunia sua celaverint, suppresserint, conticuerint. Dum enim nihil nisi fausta cecinerint, alios ad imitandum audaces suo reddidere exemplo, eosdemque, ut nos, fero imprudentis imitationis poenitentes.

5. Solam proinde ac genuinam Artis promovendæ eam esse normam, qua solius amore veritatis, qua unico opitulandi studio, summo cum candore, & Christiana simplicitate, sic facta enarrentur, ut non minus infausta, quam fausta, innotescant. Quo demum efficitur id, ut qui hos Autores consulant, maturius & secum, & cum aliis, deliberent, incertamque forment Prognosim, antequam necessitas forsitan cogeret similes operationes, curasve, confingere.

6. Quam triste est mores Circumforaneorum & Agyrtarum lucripetos, vaniloquos, ambitiosos, adeo multis Medicorum atque Chirurgorum inhærere animis, ut id, quod haud verbis modo, sed etiam factis vilipendunt, detestanturque, nonnunquam tamen nimio systematis ardore excæcati, turpissime imitentur! Profecto non possumus sufficienter nobis invigilare, ne proprio præoccupati amore, aut vana illecti gloriola & coævis inponamus, & posteris. Ad pondus Sanctuarii omnes in Medicina & Chirurgia appendendæ sunt observationes, priusquam in lucem prodeant, ut ars inde capiat augmentum. Etenim dicente veridico *Hippocrate*: „ Vita brevis, ars longa, occasio celeris, experimentum periculosum, judicium difficile. ” hinc utimur vere demonstratis aliorum, ut tempori parcamus

mus, hisque instructi, ad ulteriora invenienda, & demonstranda annitamur. Et hisce nostris suffulti Nepotes nova adjicient. At vero si non artis amore, sed potius turpis lucri, immeritæ famæ, detestabilis in bonos invidiæ, studio ducimur; si Peregrinatorum complurium similes, mirandarum rerum magis, quam verarum, cupimus scriptores esse; turpiter incautos decipimus in detrimentum Artis, in damnum, perniciemque mortalium, cautos vero animabimus, ut malam nostram fidem orbi patefaciant; quod antequam iteratis experimentis effecerint, millenos errores ii committent, qui nobis, ut candidis veritatis præconibus, fidem adhibuerint.

§. VI. Igiturne hæc operatio ex arte proscribenda? Et in desperatis, aut difficillimis morbis, quorum causa probabiliter in capite hæret, an nihil ultra tentandum est?

Ad primum respondeo, quia operatio multo levius instituta in nostris binis ægris, quam Autores jubent, mortem utrique intulit; quia experimenta in cadaveribus, & in separatis craniis evicere, nunquam sine ingenti discrimine vitæ eam institui posse; merito concludi posse, ac debere id, quod sit ex Arte proscribenda. Et enim rarior operationis hujus felicitas plurimorum interitum non compensat.

Ad alterum dico *Trepanon* in hisce superesse casibus. Est equidem & illud, quod ultro fatendum est, anceps sæpe auxilium, eo quod Cephalearum, Epilepsiarumque causas, non nisi conjecturemus in capite præsentem esse, vel in ea, quam suspicamur, capitis plaga; Attamen incertitudinis facta prognosi, si ægri velint extrema tentari, novimus per certa experimenta *Trepanon*, erudita manu adplicatum, per se letale nunquam esse; etiam si prima terebratione irrita, altera vice, pluribusve, ad aliam cranii plagam adplicetur. Hinc, quia non sola Autorum fide, sed quotidiana, in contusis, ac vul-

neratis, experientia discimus non esse per se periculofum Trepanum, sponte admittimus, quæ *Ballonius Paradig.* N°. 19. quæ *Hollerius* Libro *Observ.* quæ *Duretus* in Annotatione in suam enarrationem in Cap. 2. *Holl.* de morbis internis pag. 27. quæ *Rhodius* Cent. 1. *Observ.* 69. quæ *P. Forestus*, Libr. 9. Cap. 2. in Scholio, alique, tum docuerunt, tum exemplis confirmarunt. Quare perperam *Willisus* de An. Brut. Lib. 2. Cap. 2. pag. 75. Edit. in fol. ait., „Laudari aperturam
 „capitis a multis, sed a nemine, quod sciam tentatam.
 „Ingentem *Harvæum* Nobili feminæ ob invincibilem
 „Cephalæam proposuisse, & spem exinde fecisse,
 „se, sed neminem facere operationem voluisse., „Uti-
 que ex allatis Scriptoribus patet sæpius fuisse eandem
 summo cum effectu institutam.



C A P U T X I I I.

De Peculiari Quorundam Medicamentorum Virtute.

§. I. Ratio cur hoc anno minora numero experimenta circa
Aquam Calcis, & *Uvam Ursinam*, describantur §. II.
Examen an Ononis prodest calculosis? Anatome. Eadem
quæstio de Raphano hortensi. §. III. Laus *Verbenæ*:
 eaque occasione enarratio diræ cephalææ ad quam cu-
 randam frustra Artis fere omnis exhausta supellex §.
 IV. Præstantia *Foliorum Aurantiorum* in Pulvere,
 & in Decocto. Admonitio de Prudentia quæ in Viribus
Medicamentorum detegendis, determinandis, limitan-
 disque, necessario adhibenda sit. §. V. De communibus
 dictis *Anti-Epileptis*.

§. I. **D**E *Aquæ Calcis*, & *Uvæ Ursi* viribus, minus
 hoc anno dicendum habeo, 1^{mo}. quia ho-
 mie

minum calculo laborantium numerus longe minor ad Nosocomium accessit. 2^{do}. Quia ad facilem secandi methodum demonstrandam, & amplificandam, plures eorum, quibus ceteroqui alterutrum horum dedissem, calculo secari curavi. 3^{to}. Quoniam in his morbis etiam aliorum simplicium vires explorare animus fuit. Cæterum plures eorum, quorum, his remediis curatorum, historiam part præcedentibus dedi, denuo videre contigit, & perfecte sanos, omnibusque calculi symptomatibus liberos esse, constitit. Inutilia quoque hæc remedia esse, in quibus degeneres admodum systematis Europæi partes erant, novis constitit observatis; attamen educto calculo iisdem levamen hinc multum sæpe contingere.

§. II. Casu historiam notabilem didici effectus *Ononidis*, dictæ C B 1. *Restæ Bovis*; quam Autores Medico-Botanici ab omni tempore in variis obstructionibus, & calculo, laudarunt. Senator ille, (quem antea Cap. 9 §. 2. Hydrope pectoris extinctum consideravimus,) longis ab annis calculi martyr, & plures minores aliquando excernens, demum a peregrino Patre *Franciscano* id consilii accepit, ut pugillum herbæ *Ononidis*, cum semilibra aquæ pauxillum coctum, quovis mane biberet; ac primo quidem spatio longiore, deinde, levamine insigni inde percepto, repeteret quater in anno idem remedium, spatio 14. dierum. Consilio parens, levamen primo incredibile habuit, deinde liber ab omni calculi symptomate, per aliquot ante mortem annos, sic fuit, ac si eodem laborasset nunquam; nisi semel iterumque, repetitionem remedii aut neglectu, aut studio, procrastinando.

Inspiciendi hujus cadaveris facultatem, ut Cap. 9. jam monui, omni modo quærebam. 1^{mo}. Ob dubia quæpiam, quæ in Hydrope pectoris ejus occurrebant, ut Cap. 9. §. 2. monui. 2^{do}. Ob vires indagandas *Ononidis*, utrum nempe egisset modo, ut *Uva Ursi*, sympto-

ptomata auferendo, an vero tollendo ipsam Diathesin.
 3^{tio}. An, quia cessantibus calculi doloribus, pulmo æ-
 grotare cepit, calculosa Diathesis pulmonem obside-
 ret, ibidemque primo Asthma, deinde Hydropem pec-
 toris, creavisset. Eximius Medicus Aulicus Nobilis a
Hentschel, qui tanta cum laude inclytæ Facultatis De-
 canatu integro triennio functus est, & quocum aliquo-
 ties super hoc morbo in consilium vocatus fueram, ve-
 niam incidendi procuravit.

Ad prima dubia circa Hydropem pectoris respondi
 cap. 9. pag. 130.

Quoad alterum, nihil aut calculosi, aut degeneris,
 in toto systemate urinario invenimus; id modo notaba-
 mus, quod Ren dexter quadruplo major, cum naturali
 uretere, sinister Ren quadruplo minor mole esset. Ad
 tertium dubium quod spectat, pulmones flaccidi qui-
 dem lividique erant; at vero quacumque in plaga exa-
 minati, nihil gerebant calculosi, aut calcarei; neque
 unquam in vita quid simile sputis reddiderat.

An ergo *Ononis* diathesin calculosam, expulsis jam
 antea, qui aderant, calculis, penitus emendavit? sustu-
 lit? Nunquid repullulantem eandem diathesin ad re-
 medii neglectum, idem mox suppressit? Multiplico
 experimenta, sed nondum certi quidquam determinare
 possum.

Raphani hortensis succum cum oleo sumtum pag. 180.
 vidimus bimestre tempus tolerabile reddidisse calculo-
 so. Erit & hoc in aliis tentandum.

§. III. Laudanda hic *Verbena* venit, seu *Verbenaga*
 dicta, *Verbena communis* flore ceruleo, *Verbena recta* C.
 B. P. 246. Eisen-Kraut / Stal-Kraut.

Galenus de comp. med, sec. loc. Libr. 2. Cap. 2.
 „ Omnium porro maxime discutit, & perfecte robo-
 „ rat, *Verbena Recta* περισπερών ἢ ὀρθός, maxime viri-
 „ dis, imo & arida, cum radicibus, & simul cum ser-
 „ pillo oleo incocto quin & ipsam per se *Verbena-*

„ *cam*, si oleo incoxeris, caputque inde rigaveris, om-
 „ ni capitis dolori antiquo, ex frigidityte, aut ex cras-
 „ sis humoribus oborto medeberis.

Archigenes inter περιάπτα hanc herbam recensuit, quod
 & posteriores; *Galenus* vero improbavit id. „ *Libe-*
 „ rat, ait, a capitis dolore, dicit *Archigenes*, *Verben-*
 „ *ca herba*, quam aliqui *sacram* vocant, tum coronæ
 „ modo circumposita, tum illita ex Rosaceo & aceto:
 „ hoc auxilium oportebat eum non nunc inter Amule-
 „ ta, sed prius inter medicamenta referre; siquidem
 „ revera ei confidit, per longam experientiam cogni-
 „ to & probato.

Dioscorides Libr. 4. Cap. 50. 51. *Herbam sacram* quam
 Amuleti vice adhibent, aliam *Verbenacam*, περιεπεών
 intelligit, non illam *Rectam*.

Cæterum *Dodonæus* *Verbenam* sive *Verbenacam Rec-*
tam statuit illam esse, quæ capiti applicata, ejusdem
 medeatur doloribus.

Platerus Libr. 2. Cap. 3. pag. 243. edit. in 4^o. eodem
 modo quo *Dodonæus* loquitur.

Forestus L. 9. in Schol, ad Obs. 52. „ *Famulus qui-*
 „ *dam* capite supramodum dolebat. Cum nulla reme-
 „ dia juvarent, tandem ad collum *Verbenam* viridem
 „ aliquo modo tritam, ut ab adstantibus non cognosce-
 „ retur, appendebam, idque nocte, dormienti, & in-
 „ scio, antequam malum invaderet: & adstantibus
 „ mandabam, ne æger, a somno solutus, herbam col-
 „ lo suspensam dimoveret: qua hujus herbæ solius su-
 „ spensione, miraculi instar hic æger curatus est. *Ver-*
 „ *ben*a a collo suspensa amoveri non debet, nisi exsic-
 „ cata tandem per se cadat.

Et in prax. Chymiatri. *Joan. Hartmannus*. „ In omni
 „ dolore capitis tanquam Arcanum appropriatum, A-
 „ qua *Verbenæ* destillata commendatur, sæpe assump-
 „ ta ad unc. iv. cum gtt. iv. Spir. Vitriol. juvat e-
 „ tiam *Verbena* tota contusa, & capiti imposita.

J. B. *Montagnanus* Confil. 20. *Verbenam* quoque inter cephalica laudat. Cum hæc de *Verbena* invenissem, applicui eandem juvenculæ, cujus casus paulo altius repetendus est, ut medicamento hujus pateat efficacia.

Hæc femina 25. annos nata, venit ad me 2. Julii 1760. præ diuturno & intolerabili capitis dolore petitura consilium. Mater narrabat, hanc suam filiam ex brachio ancillæ cecidisse, capite in terram alliso; natum inde apostema, & copiosum pus auribus effluxisse. Deinde sexto vitæ anno variolis eam decubuisse adeo malignis, ut tota fere cutis capillata capitis suppurando secesserit. Non recte memoria suggerit matri, utrum lapsui memorato an remedio ignoto, quo cito caput infantis suppurans post variolas exsiccaverit, causam, originemque cephalææ tribuere debeat; cum infantes minus soleant conqueri, & an tunc aliquando puella conquereretur, penitus oblita sit. Cæterum, post variolas meminit mater, post suum decimum annum meminit juvencula, dolores capitis frequentes dirosque adfuisse, verum usque ad 19. ætatis annum eosdem tantum unico sævisse die, nocte siluisse, diebusque insequentibus pluribus, numero incertis; eodemque annorum spatio frequentissimos vomitus ac narium hæmorrhagias, capitis doloribus junctas fuisse, eadem forsan de causa brevioribus, rarioribus. Ab anno vero ætatis 19. graviores capitis dolores diuturnioresque sævisse, cum longe rariore vomitu ac hæmorrhagia. Ab elapso biennio incepisse vomitus fieri violentos, æruginosos, quos emetico ac purgantibus & tunc sustulerit, & semianno deinde, cum redissent. Modus porro doloris sic se habebat nunc: Cephalæa totum quidem caput obsidebat; sinistro vero in latere vehementius; cum auditu gravi, & tinnitu auris sinistrae, cum colli dolentis, pulsantisque, Emprostotono, quando erecta est capite, haud ita quando decumbit. Tussim quoque siccam conquerebatur, cor palpitans, infomnes præ doloribus noctes, in quartum & quintum diem re-

tardantem alvum; menses a 19. anno ætatis regulares quidem passim, spatioque 6. 7. 8. dierum fluentes, at paucos eosdem, pallidosque; cæterum non dolentes ferre; quamvis caput sub idem tempus gravius doleret. Post ultimos æruginosos vomitus a mense Novemb. 1759. ad Apr. 1760. lecto hæsit, acerbitate dolorum, affixa. Paulo ante, quam ad me accederet, dolores vehementer post venæ sectionem increverant.

Hac Anamnesi sic adornata, & tempore meo elapso, dedi ipsi purgans, quo præ alvo obstructissima egebat, & jussi posthac rediret, ut ad æquatam si fieri posset, indicationem formaremus.

Non rediit porro, nisi quatuor elapsis integris postliminio mensibus, eo quod præ doloris perseverantia domo exire haud potuisset. Hinc eam de salute desperandam blande erexi, in Nosocomio servavi, ejusque occasione dissertationem coram Medicinæ Studiosis feci, in qua a nata Medicina, in nostra usque tempora, hujus morbi causas, symptomata, diagnosin, prognosin, & curationem, expiscatus, prosequutusque sum; & circa quam ab ipso Januario usque ad Ferias majores iidem domini Studiosi hebdomadali disputatione inter se se disceptarunt.

Applicatis quibuscumque causis morbi, quas Anatome unquam, observatioque detexit, ad casum datum, conclusimus Cephalæam protopathicam esse, eandemque vel ex encephali suppuratione post lapsum, vel ex maturiore capitis post cutem capillatam suppurando ablatam exsiccatione, trahere originem. Equidem in ventriculum nonnulla, fateor, suspicio cadebat, quia toties vomitus contigerat, isque post emetica cephalæam sæpius sedasse visus erat; verum contra, ventriculus insons ab encephalo affecto in consensum rapitur, docentibus id manifesto capitis contusionibus, & vulneribus. Præterquam quod haud raro contingat, ut causa in capite hærente proritetur ven-

trculus in vomitus bilis flavæ, porraceæ, isatodis, æruginosæ, (quemadmodum etiam nostra ægra aliquoties vomitu reddiderat,) a qua, inter plicas residua, ventriculus posthac leviter expurgandus sit, ni velimus eum ægrotare.

Prognosiñ ambigui feci, ob morbi diuturnitatem, atque altius irradicatam ejus causam. Quum tamen artis industria ejusmodi desperatas fere cephalæas aut egregie mitigatas, aut etiam penitus curatas fuisse constabat, varia auxilia vario ordine admovi.

Ac primo quidem arridebat setaceum ad Nucham, quo quandam revulsionem procuraremus; eundemque in finem data sunt purgantia hydragoga bis in septimana, dum interea spir. frumenti cum sublimato, & larga bardanæ decocta cum lacte, ad humores veteres emendandos, novosque regenerandos, perpetuo darentur. Primis 20. diebus, nihil inde, postmodum vero tantopere lucrata est, ut primo integro, dein binis, ternis, pluribusve diebus, cephalæa vacaret, ac tandem integris 5. septimanis prorsum libera, ac sanissima esset. Petivit dimitti, & remedia sibi dari, quibus domi continuatis, corpus contra recidivam muniret. Jussa igitur eadem continuare, & bonam setacei curam habere, 24. Jan. 1761. dimissa est.

Domi sana, horum usu, sex septimanis vixit, sed deinceps cephalæam diram remittentem quidem, sed nunquam intermittentem, relapsa, ad 3. Martii denuo intra Nosocomium recepta est. Cum antiquis remediis minus feliciter continuantes, cetera artis auxilia ordine admovimus.

Ac primo quidem hirudines plures ad tempora frontemque adhiberi curavi, quæ cruoris quidem sufficientem copiam, iterato ad 4. usque diem in pleno Auditorio experimento, eduxere, haud juvarunt tamen. Unde 2^{do}. Cucurbitas tum siccas, tum scarificatas, adposui, fronti, vertici, temporibus; idque ad tres vicēs, cum

cum debita cruoris evacuatione. Nihil inde opis. Igitur 3^{to}. auxilium a vena jugulari secta expetivimus. Etiam hinc spe frustratus 4^{to}. caput rasum emolliente cataplasmate totum fovi quatrduo; quod practici jubent eo consilio, ut ajunt, ut apertis suturarum poris via panderetur, qua prava de encephalo exhalarent. Arteriotomen non feci, quia ea & per Hirudines, & scarificatas Cucurbitas, sufficienter facta erat. Quinto empl. de meliloto cum $\frac{1}{4}$ empl. vesic. mistum universo capiti octiduo spatium admotum est; quo indomadente, ac stillante, pauxillum principio, nihil levaminis postliminio, percepit. Sexto *Bartholini* consilii memor, qui in *Anglia* didicerat antiquas cephalæas curari, datis quotidie aliquot guttis liquoris, qui adulta hyeme de vulnerata radice arboris *Juglandis* exstillans, appensa excipitur lagena, etiam hunc succum puellæ non ad guttulas, sed ad duas de die uncias spatium 14. dierum, dedi.

Nihil ergo tot tantisque proficiens, tandem *Verbenam* adhibui. Hæc 13. Aprilis sicca appensa collo est, & 25. Aprilis recens collecta, tum & aqua ejusdem stillatitia ad unc. IV. de die cum gtt. IV. Spir. vitrioli, data est. Subitum sane inde levamen habuit, subitoque integram doloris absentiam, sine ulla vel unius diei recidiva, spatium primum duorum mensium. Tumque ipsi, indicanti mihi, quod semper ad sinistrum oculum punctum dolens superesset, quem olim Spir. frumenti cum sublimato sublatum meminisset, internum verbenæ usum detraxi, spiritumque hunc substitui. Continuavit domi suæ spiritum, & verbenæ amuletum, ad diem 6. Julii, quo cephalæa rediit, dira adjuncta cardialgia, & vomitu frequenti, cum brachiorum introtorsione inter vomendum. Purgantibus, scuto stomachico, paregorico, nervinis, roborantibus, & verbenæ capiti adpena, integre convaleuit sub finem Julii, & bene hucusque habet.

§. IV. *Aurantiorum folia* usum in Medicina pulcrum habent. Eximius Medicus, vetus meus candidissimusque amicus, *Haganus* Poliater, *Abr. Westerbhoff*, plusquam elapso abhinc anno, coactus fuerat splendorum personarum hortatu, remedium quoddam arcanum suscipere, ea onerosa lege, ut quid esset, id, nisi consentiente Autore, nemini patefaceret. Cum Amicorum omnia communia sint, mihi aliquam ejusdem copiam fecit, ut data oportunitate in morbis convulsivis, in quibus non semper, sed sæpe, mirifice prodest, nocet vero nunquam, ut expertus testabatur, vim ejusdem explorarem. Offerebat se se mense Januario currentis anni apta occasio. Puella 18. ann. quam materna AUGUSTISSIMÆ liberalitas, ut multos alios centenos pueros, puellasque, clam alit, convulsiones patiebatur adeo miras, adeo horrendas, ut rarissimi sane exempli essent, utque nullum genus convulsionum notum sit, quod hic non adesset: nulla pars corporis libera mansit, & nova atque insueta symptomata scenam hanc terribilem fere quotidie mutabant: projectumque in altum corpus fuit sic, ac si fortissimi viri illud in sublime projicerent. Spatio 3. septimanarum quidquid artis, quidquid experientiæ esset, indefessa opera adplicaverat veteranus Medicus, expertissimus Practicus, Dominus *ab Hentschel*, sed frustra. Cum AUGUSTISSIMÆ mandato optimo huic viro jungerer, totamque pene artem exhaustam frustra cernerem, subito ilico Arcani memoria. Collegæ narro innocuum per se, at stupendum quandoque medicamentum. Annuitt. *Damus*. Quid plura? Scrupuli unius dosi cum potu Chocoladæ mista primo die, quæ 12. horis integris perseveraverant convulsiones, trihorio finiuntur; altero die semihora, tertio vix umbra levis malorum, prætereaque nihil; cito autem vires rediere, corpori sua mentique alacritas. Scrupulum tamen pulveris quotidie dedi ad 14. diem usque. Exinde semper sana fuit.

Industria ac dexteritate sua celeberrimus, Ocularius *Win-
cel*, dum hac hyeme suam cataractas extrahendi artem,
tanta cum laude *Viennæ* exerceret, ajebat Arcanum il-
lud *Haganum* nonnisi folia *Aurantiorum* continere, &
decocti quidem forma ad Chocoladam componendam
adhiberi, at vero pulverem e foliis hisce paratum quo-
que simili potui admisceri posse, ac prodesse. Cum id
tot rationibus asseveraret, curavit Ill. D. *Præses* mag-
nam copiam foliorum ubique colligi, & ad omnia No-
socomia, Orphanotrophia, Gerotrophia, Ptochotro-
phia mitti, ad experimenta capienda. Dedi pulverem
desperato epileptico ultra mensis spatium, sed incassum.
Idem puellæ, choreæ *S. Viti* reliquiis adhuc labo-
ranti, pulverem hunc frustra longo tempore dedi;
posthac vero, cum *Hagani* pulveris decem superstites
scrupulos eidem decem diebus dedissem, penitus con-
valuit. An ergo in *Hagano* pulvere quid admistum ali-
ud? Nunquid ex tot *Aurantiorum* speciebus determi-
natam speciem *Haganus* habet, quæ veluti præ reliquis
Aurantiis specifica esset? An vero, si idem sit, hic con-
tingit, quod sæpe, ut principio vix quid Medicina præ-
stet, in fine autem juvet egregie? Usus docebit.

Decoctum illud, unde Chocolada paratur, dictante
nobis egregio *Wincel*, sic & fit, & datur. Fol. 30. 36.
Aurantiorum cum libra aquæ coquuntur ad $\frac{1}{3}$ consum-
tionem, potumque Chocoladam inde formatum ægri
bibunt, repetendo post 4. aut 5. dies idem. Præparata
autem corpora volunt, triduo usu aquæ mellitæ, & de-
in purgante: altera tunc die post purgans exhibent
hoc medicamentum. Alii descripti decocti tertiam
partem tribus subsequenter diebus dant cum Cho-
colada, quam sine adjunctis calidis esse jubent. Sua-
dentque illi in lecto hunc potum sumere, & bihorio
deinde quiescere. Porro & ternos hos potus matuti-
nos, & prævias purgationes, toties esse repetendas,
quoties id exigit pertinacia morbi.

Optimus Medicus, integerrimus Amicus, Senator & Poliater *Haganus C. H. Velse*, communicavit mecum hanc Decocti formam. ℞. Fol. Aurantior. N°. 120. (id est circiter unc. j. & dr. vj.) in Aq. pluv. unc. xx. decoque spatio 2. vel 3. horarum, vase clauso; colato adde vini rubr. unc. x. Sacchar. cononid. q. s. ad gratiam. Sumat æger bis, ter, quater, prout necessitas jubet, unc. iij. iv. quotidie, aut solas, aut mistas cum levi Chocolada. Testatur idem hocce remedium mire reficere, & roborare ægros; egregie aliquando *Colicam Pictorum* mitigare; Colicæ hujus sedare vomitus; & quæ purgantia, atque opiata hætenus operata non essent, ope decocti nunc operari. In Hystericis convulsionibus necdum multa experimenta se habere, reticere se tamen non posse notabilem casum biennis infantis, fatui, ut videbatur, futuri: qui anni ab illinc spatio levioribus convulsionibus quotidie vexatus; a semianno clamoribus convulsivis, nonnunquam epilepsiæ, quandoque catalepsios, contortus symptomatibus; sumserat ter die quid hujus decocti spatio 20. dierum citra levamen notabile, posthac vero eo cum effectu, ut elapso demum mense ne umbram quidem morbi amplius haberet, hilarisque idem, atque ingenuus, adpareret.

Profecto hujus efficaciam decocti mirificam, & ego expertus fui in viro quinquagenario, qui post hemiplegiam in horridas faciei convulsiones 20. 30. una die repetentes, inciderat. Junxeratque se se ea memoriæ labes, ut noscens, qui accederent, omnes, noscens omnia, quæ videret, tangeretque, tamen nomina indicare propria ipsis non posset, passimque per omnia balbutiret: & quamvis gallice, aut italice, interrogatus, si quid utcumque intelligibile responderet, id germanice duntaxat, præter omnem sane morem, fuit. Unc. ij. quovis bihorio decocti datæ, sensim notabiliter mutarunt, tandem spatio sex dierum integre

sustulerunt hunc morbum, cum omnibus suis stupendis symptomatibus, omnesque restituerunt functiones.

Puella 16. annorum febre scarlatina correpta mense Septembri anno 1760., dein convulsione 7. Octobr. latere dextro paralytica facta est, & perfecte aphona. Cum nihil consueta Artis auxilia juvarent, misit eam Ill. Præses ad meam Machinam electream. Pauxillum quidem spatio 6. mensium lucrabatur, ut articulare voces quasdam potuerit, ut etiam paralyfis minueretur; verum pauca illa emendatio cum non augeretur, dedi tria decocta Aurantium, posteaque pulveres, interea dum ad Machinam diligenter quotidie accederet. Mensis spatio sic pergens, lucratur voce incredibiliter, ut nunc spes sit ejusdem restituendæ, & paralyseos penitus curandæ. Observatio hæc incitavit me, ut cunctis, quibus vim electrinam nunc adplico, simul pulveres fol. aurant. darem, visurus an plura exempla colligere queam felicioris successus vis electrinæ ope horum.

In Epilepticis nec decocto, nec pulvere foliorum, aliquid hucusque profeci; data tamen occasione repetam experimentum, cum audio id aliis succedere. In tremore post terrorem superstitie videbar primo victor morbi futurus, deinceps vero minime, tandem vero iterum multum. Vidi a laudatissimo Physico Nosocomii civici *Schreibers* homini, choream *S. Viti* ab annis pessime habenti, idem ultra mensis spatium dari, cum aliqua duntaxat emendatione in principio, ita ut levior illa emendatio non augeretur, licet idem decoctum longo temporis spatio continuaretur: fatendum est tamen inceptam illam emendationem constanter permanere.

Porro indigebit remedium istud, ut & *Verbena*, pluraque alia, maturiore ac diuturniore examine, priusquam quid certi circa idem concludatur. Nunquam enim in similibus tentandis, evulgandisque, sufficienter cauti esse possumus. Coævius scribimus, & posteris. Hi,

institutiis iisdem experimentis, aut eadem, quæ nos; aut aliter, quam nos; aut nihil omnino, quod nos; videbunt. Si nos rite, casteque & prudenter, nostra notaverimus, tam fausta quam adversa, quam inutilia, quam imperfecta; profecto dum Coætanei, ferique Nepotes, eadem prudentia experimenta nostra repetiverint, idem, quod nos, semper adnotabunt.

Hoc demum modo Canones formabuntur practici, qui limitent morbos, gradusque morborum, in quibus profit, non profit, noceatve, medicamentum. Sin vero aut perfunctorie, aut nimis glorianter, aut immeritata cupidine famæ, experimenta evulgaverimus, consequetur necessario id, ut nos, & præsens ætas, & posteritas, jure condemnent. Remedium sustulisse morbum videri potest, nec forte sustulit: ut si alia simul data fuerint, quæ emendare morbum potuerint; aut si periodici morbi sint, ut plures Cardialgiæ, Cephalææ, Hemicrania, Arthritides, Rheumatismi, &c. qui vel sponte, vel mutatis aëre, vitæ genere, alimentis, vel naturæ opera, aut mitigentur, aut fileant, aut penitus sæpe superentur. Securos quoque nos esse oportet, quod ægri summa accuratione remedium adhibuerint; quodque non clam alia aut prætulerint, aut intermiscuerint saltem, & tamen ne forte irascamur, neve illi careant nostra amicitia, gratia, patrocinio, tribuant nobis gloriam curæ. Hæc ut mihi contingere, contingunt & cæteris.

Hinc monitos Lectores meos volo, ut quæ observata communico, ea novis dignentur experimentis urgere, sique forsitan violasse hinc inde prudentiæ regulas videar, ut id publico, meo etiam expresso nomine, palam faciant. Erit profecto unde gratias illis perpetuas agam. DEO vivimus, & proximo; vivimus veritati, non patri fallaciæ & mendacii, diabolo.

§. V. Quæ Priscis Anti-Epileptica dicta, *Pæonia* mas, *Valeriana Sylvestris*, *Viscus quercinum*, pluribus

experimentis etiam hoc anno factis, vere Anti-Epileptica esse novi, docui, demonstravi; at vero aut modicæ, aut nullius omnino efficacæ esse, in multis, imo forte crebrioribus in casibus, quoque expertus dolui. Hi tamen casus non derogant illis, modo suos intra limites singuli coërceantur. *Valerianæ Sylvestris* in *Fabio* efficacia effecit forsitan, ut debito celebrior illa inclaresceret, utque fallax sæpius vilesceret multis. Mansit tamen, æternumque Anti-Epileptica Planta manebit, suis determinatis in casibus. Suspikor simile quid fore de *Aurantiorum* foliis.



Handwritten text in a cursive script, likely a letter or document. The text is heavily faded and difficult to decipher, but appears to be organized into several lines. The ink is dark, and the paper shows signs of aging and staining.



ANTONII DE HAEN

*Consilarii Aulici, ac Medicinæ Practicæ, in
Alma ac Antiquissima Universitate Vindo-
bonensi, Professoris Primarii,*

P A R S S E P T I M A

RATIONIS MEDENDI

I N

NOSOCOMIO PRACTICO

VINDOBONENSI.



LUGDUNI BATAVORUM,

Apud PETRUM VAN DER EYK,

MDCCLXIII.

W. E. B. DUBOIS

THE PHILADELPHIA

ANTHROPOLOGICAL EXHIBITION

OF THE AMERICAN INDIAN

ART

AND ETHNOGRAPHY

AT THE



LIBRARY OF THE

UNIVERSITY OF PENNSYLVANIA

PHILADELPHIA

E L E N C H U S C A P I T U M

C A P U T X I V.

De Aneurysmate externo Spurio. Pag. 229.

C A P U T X V.

De Aneurysmate vero. 259

C A P U T X V I.

De Hydrope Cystico, & de Hydatidibus. 276

C A P U T X V I I.

*De Intestino in Inguine perforato, excrementis-
que inde foras expulsis.* 298

C A P U T X V I I I.

Varia. 317

R A-

EL ENOIS
CAPITOL

OFFICE OF THE
CLERK OF THE HOUSE OF REPRESENTATIVES


CHAS. H. HARRIS
CLERK OF THE HOUSE OF REPRESENTATIVES

CHAS. H. HARRIS
CLERK OF THE HOUSE OF REPRESENTATIVES

CHAS. H. HARRIS
CLERK OF THE HOUSE OF REPRESENTATIVES

CHAS. H. HARRIS
CLERK OF THE HOUSE OF REPRESENTATIVES

CHAS. H. HARRIS
CLERK OF THE HOUSE OF REPRESENTATIVES



RATIO MEDENDI IN NOSOCOMIO PRACTICO VINDOBONENSI.



C A P U T XIV.

De Aneurysmate Externo, Spurio.

- §. I. *Aneurysma spurium in Brachio, a missione sanguinis natum, Compressione curatum. Biga observationum adjungitur, quæ quantumvis per se simplices, & cuique obviæ censerî possint, ob frequentem nihilominus earundem in Clinicis neglectum, nova commendatione indigent.* §. II. *Aneurysmatis Spurii trunci ipsius arteriæ Femoralis, inflicto vulnere nati, Interceptio. Gangrænæ, & Sphaceli, assiduo, diuturno, copioso, ac, ni fallor, citra exemplum hucusque interne, externeque dato, Cortice Peruviano, felicissima curatio.* §. III. *Apologia Corticis adversus ejusdem detractatores, audaciorisque nostræ eundem exhibendi dosis.* §. IV. *In Urinam plurimo curæ tempore a nostro vulnerato redditam, quædam observationes, ea intentione collectæ, ut constaret, an in Diagnosi ac Prognosi quid lucis afferrent, nec ne?* §. V. *Disquisitio num Fungi Agarici ad arteriæ vulnus non modo lamellatim facta adplicatio, verum etiam ejusdem pulveris per totum vulnus conspersio, laudanda sit?*

§. I.



ericulosissimi hujus, frequentis-
que Chirurgici morbi, plura
exempla dedi in hujus Operis
Tomo I. cap. 30. Tom. II. cap. 6.
& Tom. ejusd. cap. 10. Fausta-
que simul & infausta nostra conami-
na communicavi. Septimam hanc partem ab eo-
dem argumento, quod annus Academicus nova ei-
dem argumenta suppeditârit, auspicabor.

Anno 1761. Nov. 10. instrumento resiliēte Bal-
neator Pictori 25. annorum, pectoris ardorem & rau-
cedinem conquerenti, venam tudit; mirante ægro
quod momento temporis tria vasa replerentur,
vimque profiliētis cruoris Chirurgus ægre re-
tunderet. Tumens porro præ validiore compres-
sione brachium, spiritu quopiam fricare ille jus-
sit, effecitque inde ut artum, a tribus retro septima-
nis immobilem, fauciatus iterum flectere, artemque
pictoriam, quamvis non expedite, tamen exercere
posset. Quem interea Balneator solabatur integræ
spe curæ, quidquid supererat impedimenti a lym-
pha duntaxat, quæ ad venæ, cutisque vulnus af-
flueret, oriri ratus.

At vero contrarium expertus est homo infelix, tu-
more intra 7. aut 8. septimanarum spatium ovum gal-
linaceum mole referente. De eventu sollicitus, adiit
5. Jan. hujus, quem vivimus, anni, Exp. D. *Reut-*
ter, Chirurgiæ Doctorem, Virum curis experientia-
que clarum; qui postquam in decimum diem machi-
nam comprimentem externam frustra adplicuisset,
hominem demum meis curis commendavit.

Origo mali, ac progrediendi modus, Aneurysma
spurium esse declarabant. Carebat tamen pulsatio-
ne, nec non motu illo tremulo, de quo Tomo I.
egi: verum nos, ab effuso cruore, eodemque coagu-
lato, per brachii cellulositatem, pulsuum perceptio-
nem,

nem, tremulumque motum, suffocari coniecimus.

Die Jan. 16. dexterrimus Chirurgiæ Proffessor *Leber*, operationem peregit; præsentibus Magnifico Domino Archiatro, & inclytæ Facultatis Medicæ Vice-Præside *Kestler*, egregio Medico, & sollertissimo Nosocomii Civici Physico, *Schreibers*, Chirurgo S. S. M. M. *ab Hombourg*, Chirurgiæ Doctore *Reutter*, Aulico Chirurgo *Fischer*, Doctissimo, ac plurimæ spei Chirurgo, *Scherer*, aliisque pluribus Medicinæ, Chirurgiæque cultoribus.

Dilatato fursum, deorsumque vulnere, globosum corpus apparuit, ambiguum utrum tendo Bicipitis brachii esset, an membrana fortis, quam validior brachii compressio ex membrana cellulosa formasset? Non esse tendinem, sed compressione natam membranam, plura mox evincebant. 1^{mo} Tendo si fuisset, oportuisset illum a cohæsione sua naturali cum cute, ope cellulositatis genita, solvere: verum stylus libere intrabat fursum, deorsumque. 2^{do} Amotis integumentis, debuisset brachium extensum quoque tendinis extenti rigiditatem ostendere; verum id neuti-quam. 3^{tio} Amotis integumentis figura rotunda erat, hemisphærii, extrorsum versi, instar, atque ad superiorem partem subito declivis: ut evidenter adpareret de tendinea expansione nihil superesse. 4^{to} Si tendo fuisset cruori coagulato superextensus, tumorem utique, dum brachium extendebamus, comprimere debuisset; at vero tumor æque globosus esse perseveravit. 5^{to} Facta levi tumoris incisione, & vulnere dilatato in longitudine, necessum fuisset ut porrecto in longitudinem brachio apertura clauderetur; verum ea mansit æque aperta. 6^{to}. Educto cruore, nulla tensio partis aderat, dum arteriam vulneratam quærentes, brachium vario modo extendebamus: porro si Aponeurosis inclusisset tumorem, aperturam longitudinalem a nobis factam, extento brachio, claudere debuisset.

Igitur tumor ipse cum sua membrana exacte sic se habuit, quemadmodum *Rat. Med. Tom. I. cap. 30.* exposui. Nempe sanguis arteriosus in cellulositatem illam, quæ arteriam, venam, nervumque, laxè colligit, effusus, eandem dilatat, extendit, expandit, in crassiores compingit membranam; eoque facilius, quo Chirurgus tum diutius, tum fortius, brachium compresserit. Scilicet vis cruoris, arteriæ vulnere pulsi, locum foramini proximum ampliat, cellulositatem removendo, & cavum quoddam format, quod ideo hemisphærium refert, quia cellulositas in extremo circulo tumoris ad arteriam arcte adpressa & agglutinata, coïvit cum eadem. Saccus proinde sic producitur clausus. Si vis sanguinis non solvat hanc in ambitu cohæsionem, durum trumbum formare cogitur, arteriæ foramen ita demum obturantem, ut effluere queat nihil. Atque ita sola compressio externa, citra ullam loci aperturam factam, perfecte Aneurysma curat, ut *Tomo I. cap. citat.* exemplis demonstravi. Sin vero profilientis de vulnere sanguinis vis tanta est, ut sacculi cellulosi, per ambitum cum arteria accreti, plagam forte debiliorem solvat, aut laceret, sanguis effunditur per adiposam membranam, inter, sub, supraque musculos, cutem elevat, citoque ita putrescit sæpe, ut brachium, imo aliquando totus homo, sphacelo pereat. Unde cita operatione tunc opus esse intelligitur. Ita femina *Tomo I. cap. 30.*, ut & *Tom. II. cap. 6.*, sic etiam pictor noster.

Igitur incisa globosæ hujus massæ membrana, prodiit sanguis congrumatus, isque haud de sacco duntaxat, verum ex lacerato ambitu sacculi versus brachium superius & inferius olim effusus.

Eluto vulnere, & laxata tortili machina, videbamus videre arteriam mox supra bifurcationem sauciata, & quidem ab interno suo latere. Utique

resiliente Chirurgorum instrumento vas sic vulnerari potest.

Videbamus, inquam, videre: nam cum arteria & ante bifurcationem suam, & post eandem, emittat ramos plures, decipere nos posset ramus oriundus ex arteria cubitæa, si ille forte adpareret solito amplior. Hinc in Aneurysmate cum plurimo sanguine effuso, ubi longiore incisione opus, accuratius rem hanc definimus, minus accurate in incisione breviori; ut in casu præsentis: quatuor enim pondere unciaseductus non superabat cruor. Fatendum tamen est a magnitudine arteriarum, trunco quodam prodeuntium, conjecturam probabiliorē sæpius reddi.

Laterale arteriæ vulnus suspensos tenuit animos, utrum Agarico, & compressione artificiosa, in vasis latus forte minus premente, hac comprimendi methodo uteremur: an vero tutius interceptione? Attamen mira Agarici virtus, qui etiam in pulverem versus applicari ubique possit, atque cum vase veluti conglutinetur, vota adstantium in consuetam compressionem nostram vertit: ea tamen lege, ut filo munitæ acus perpetuo ad manus forent, ad arteriæ interceptionem, minus prosperante compressionē, faciendam.

Chirurgus igitur parva, eademque rite complanata Agarici lamella, vulnere imposita, me suadente vicina per ambitum loca ejusdem pulvere contexit, nec non etiam vulneris ambitum omnis; siquidem alias cavasa, quæ ex arteria, vulnere superiore, nascuntur, hæmorrhagia haud raro turbant, labefactantque apparatus. Postmodum stratum, ut ajunt, super stratum, ampliores sensim Agarici lamellas imposuit, donec, quæ imposita duodecima erat, debitam monstraret altitudinem, quam deinde plumaceolis ficcis, compressisque admotis, idonea ligatura firmabat.

Manus friguerat sub operatione: at vero illa post operationem mox fota calido vino & aqua, intra ho-

ram calere cepit. Bihoriorum elapso testabatur aeger admodum leve sibi toto in brachio esse, doloremque perquam tolerabilem. Caluit bene manus, pulsusque percipi in carpo ceptus. Nemo sane horum, quos in nosocomio similes curavi, tolerabilius ab hac operatione habuit; nunquam inquietus, vix unquam febricitans, noctibus gavisus tranquillis, adpetitu pollens, contentum perpetuo & tranquillum testatus animum.

Ad 5. diem, (hyems quippe erat,) prima deligatio facta est. Sanguis ex ambitu vulneris transsudans, adparatum parumper maculaverat, & etiamnum, amotis plumaceolis, effluebat aliquantillum: Agaricus vero suo fixus in loco inventus est. Hinc vulnus, ut prius, deligavimus. Excoriatio tamen cum exulceratione nata a tortili machina, solvere hanc, prospicere illi, aliamque machinam admoveere, suadebat. Quo in opere læti deprehendebamus quod ablato per aliquot minuta toto hoc vinculo, vulnere ita inhæreret Agaricus, ut nihil de vulnere effluxisse apparatus doceret.

Die ab operatione octavo altera, die undecimo tertia deligatio facta, Fungi optimam adhæSIONem, laxata etiam machina tortili, ostendit.

Die 15. incipiente, nempe 30. Jan. in quarta deligatione totus cecidit Agarici acervus, laxataque machina nihil de vulnere exiit. Novas tamen lamellas eidem, majoris securitatis gratia, imposuimus.

Biduo exinde elapso novus excidit de vulnere Agaricus. Vulnus optimum undecumque. Agaricus alius impositus. Laxata machina tortili ne gutta sanguinis effluxisse visa. Exin quovis die deligatio. Agarico jam tertium elapso, novum non substituimus; inchoantem undique incarnationem, ita dictam, impediturum rati. Ineunte Martio optima cicatrix. Martio circiter medio domum sanus repetiit, serio monitus ne integro biennio hoc brachium ad gravius aliquod onus tollendum, laboresve validiores perferendos, adhibe-

hiberet; prætereaquæ quovis 14. die me conveniret examinandi causa. Redeuntem sæpius in sanitate perseverantem deprehendimus.

Observationem practicam hic oportet geminam adjungere. 1^{mo} Licet, qui hanc operationem subierint, longiore tempore lecto affixi, alvum, vix egerant, non est tamen, quod nos sollicitos reddat; eo quod solo jure carniū cum optimo pane nutriti vix sibi coacervent fæces. Fracto crure citra detrimentum homines mensis, & ultra, spatio, alvo inculpate carent. Imo præstat raram habere eandem, ne frequentiore corporis ad egerendum motu solvatur adparatus, artusque flectatur. Utique noster homo, ad 13. diem usque, nec natura ad alvum sollicitatus, nec per artem admotus fuit. Cum autem ad 13. diem nonnulla desidendi conamina adverteret, suppositorio immisso posuit alvum siccam, copiosam; non in excipulum, fellamve perforatam, sed in supposita linteamina; ne motu facto deligatio brachii quid pateretur. Alteram alvum septimo postea die, suppositorio iterum adjutus, reddidit; ex quo vero plenius nutriebatur, sponte & quotidie.

Altera observatio practica circa cautelam versatur, quæ in ægris, diuturniore tempore lecto affixis, excoriationem, gangrænam, & sphacelum averruncet; cautelam, quam hinc inde observo in ægrorum damna haud satis adhiberi. Toto octennio, & quod plus est, ex quo ægrorum publicam gessi in nosocomio curam, nulla unquam visa est partium excoriatio; eo quod mature cunctis decumbentibus, sive Acuto morbo, sive Chronico, sive Vulnere detentis, tota corporis, qua incumbunt, pars, bis die, unguento molli lavetur; composito ex albumine binorum ovorum, quod primo bene conquassatum, dein modico igni, quo leviter incalescat, impositum, continuoque motum, sensim, ac guttatim fere, cum unciiis vj. spir. vini com-

miscetur. Prudentes ægrorum nostrorum Custodes norunt etiam his, qui citra piaculum verti in latera nequeant, postica corporis innocue inungere.

§. II. Ordine secundus, qui sequitur æger, multam suppeditat tum medicam doctrinam, tum chirurgicam: ac præterea docet quantumcumque veteranos Practicos discendi occasionem quotidie nancisci.

Juvenis 24. annorum, procerus, robustus, braxator, anno 1761. Nov. 15. in femoris sinistri media, eademque interiore plaga, vulnus accipit valde profundum quidem, sed angustum admodum, plurimum sanguinis principio fundens, intra octiduum autem sponte coalescens. Deinde ambitus cicatriculæ tumere cepit, posthac autem totum femur, quin & integrum crus œdematosum, frigidumque redditum fuit; ut 27. post acceptum vulnus die, ad nos delatus, exhibuit, Horrebamus collapsam hominis pallidamque faciem, febrim cum debili pulsu, tussiculam continuam, pectoris anxitudinem. Adornando anamnesin, intelleximus Chirurgum bis venam tudisse, ut sanguinis arteriosi impetum compesceret; Aneurysma pronuntiasse; verum nec per se, nec per alios, quod saltem debuisset, si aptus ipse non esset, requisita auxilia adhibuisse. Cum vel sorti suæ, adeoque certæ morti, homo miserrime emaciatus ac debilitatus, committendus esset, vel anceps auxilium ilico tentandum, operationem sequenti die, scilicet 12. Dec. sequenti modo instituimus.

Admoto primum tortili instrumento, vulnus per longitudinem sursum, deorsumque dilatatum est, eoque eductæ ferme quinque libræ grumosi cruoris. Ipsa Cruralis (Femoralis dicenda potius) arteria perfossa deprehendebatur; id quod profiliens, laxata machina, sanguis demonstrabat evidenter. Cum vulnus quatuor & ultra pollicum profunditatem haberet, dilatandum sursum ac deorsum ultra fuit, ut in fundo

opera-

operaremur; tumque tandem arteriam ipsam massa partim fibrosa, partim callosa, informi, digitum hinc inde crassa, circumvolutam, ac connatam, deprehendimus. Si locus compressioni, priori in homine institutæ, aptus fuisset, minus de hoc alieno corpore solliciti fuisset, utpote illi ejus loco, unde cruor exsiliret, admoturi Agaricum, vimque compressionis maximam; jam vero ad ingentem adeo Arteriam, ad profundissimam adeo plagam, tantæque magnitudinis vulnus, veriti ut firmus, ut in latera haud vacillans, vix figeretur Agaricus, compressionem solitam periclitari ausi non fuimus, sed interceptionem prætulimus.

Equidem, fateor, Cl. Vir *L. Heisterus*, curam felicem sola comprimendi methodo perfecit arteriæ femoralis, at vero ille hominem mox a vulnere suscepto, hominem cætera sanum ac vegetum; nos autem semimortuum, a 27. retro diebus neglectum, in quo nil liceret periclitari, sed omnium tutissimum illico adhibendum foret, in cura suscepimus. Vid. *Disput. Chirurg.* ab eximio *Hall. coll. Tom. 5. N. 132.*

Tentata igitur Interceptio fuit. Sed in eadem facienda jubet ars Nervum separare, ne comprehensus ille atque constrictus, convulsiones, tetanos, mortemque producat. Id vero hic visum impossibile, cum neque circumcretam massam, supra descriptam, ab arteria solvere, neque in eadem massa confusa, callosa, informi tota, nervum invenire possemus. Cum tamen necessaria omnino interceptio visa esset, tria nos utcumque consolabantur. Ae. 1^{mo} quidem quod Nervus, si arteriæ propinquus, unaque cum illa in massa informi involutus, cum arteria ligaretur, minus ob eandem hanc massam a filo constringeretur, ideoque tantas haud generaret convulsiones. 2^{da}. Quod Nervus subito cum Arteria ligatus haud in singulis operationibus convulsiones faceret;

experientia illorum, qui Nervum nunquam separent, id confirmante. 3^{io} Cum aliquando Nervos majores, digiti, imo pollicis, latitudine ab arteria femorali in cadaveribus deprehendissemus remotos, spes blandiebatur fore, ut hic quoque remotior locaretur. Vid. *Disp. Chir. Hall. Tom. 5. N. 140.*, in qua cautela hæc a *Dionis*, aliisque adeo inculcata, minus necessaria esse judicatur. Saltem hic adhiberi non poterat.

Eloto igitur probe vulnere Cl. Chir. Professor acu longissima atque incurva, filis pluribus bene ceratis instructa, arteriam subiit, tenaculo acum, post arteriam positam, indeque leviter emergentem, ad se adduxit, atque ita arteriam, interposito splenio, ne ligando perfcinderetur, interceptit, constrixit. Laxata machina tortili, vulnus vasis egregie clausum esse apparuit, sanguine non nisi lateralibus de vasis saltu profluente, unde vulnus linteo carpto oppletum, factaque ligatura est.

His peractis multorum animos dubitatio subiit, an ligata arteria tanta, crus inevitabili gangræna haud periret, adeoque & homo totus? Et num propterea amputatio, cujus apparatus omnis ad manum erat, non esset instituenda? Sed ab eadem omnino dehortabar validas, ni fallor, ob causas. Primo, quod hujus arteriæ interceptionem *primi* non tentaremus. Secundo, quod Anatome abunde nos convincat pluribus in locis, ligata arteria insuperioribus, laterales arterias dari, quæ *anastomizando*, cum arteriis lateralibus, infra ligatam arteriam oriundis, ita sensim cum illis dilatantur, ut defectum intercepti trunci suppleant abunde, quemadmodum sola contemplatio Tab. 23. *Eustachii* docet. Tandem, quod in ægro hoc amputatio non nisi summo in femore institui posset, ubi passim letalis; eoque magis hic, quod quatuor septimanarum spatio res neglecta vires ægri, sanguinemque, dilapidasset; ut haud inanis

nis ille metus esset ne inevitabili inter amputandum hæmorrhagia, nostris sub manibus expiraret. Amputationem autem rebar, si reparatis viribus propter enarratam causam adhuc indicaretur, tutius deinceps posse institui.

Sed alter scrupulus mentes aliorum invasit, scilicet ne sanguis, qui inter operandum multus effluerat, adeoque in tam magno vulnere, inter musculos, dudum ante a se mutuo disjunctos, copiosus hærebat, nec propter hominis, sub operatione fere deficientis, languorem, eximi vix poterat, ne, inquam, ille putrefactionem summam excitaret, resorptusque mortem; dum non nisi pluribus posthac diebus prima deligatio fieret: adeoque prudentiæ esse, ut quiete aliquot horarum concessa, vulnus circumspecte aperiretur, & grumofus educeretur cruor. Nimis forte facilis, concessi. Verum enormis adeo hæmorrhagia aderat, ut veriti ne, non modo ex lateralibus vasis discissis, sed etiam forte ex vasis lateralibus integris, communicantibus anastomosi cum trunco sub ejusdem ligatura, de vulnere arteriæ efflueret, (neque enim ligaturam, nisi supra ejusdem vulnus unicam, fecerant,) ut, inquam, binas Agarici lamellas vulneratæ arteriæ adplicuerimus, linteo carpto cuncta repleverimus, & firmissima ligatura muniverimus universam plagam.

Facile hanc historiam, quippe ad rem ipsam nihil facientem, omisisse potuissem, ni nonnullæ rationes candidam ejusdem relationem postulassent. 1^{mo} Ut pateat in morbis Indicantia & Contra-indicantia nunquam ita urgere utrinque, ut, ultra sequaris, plane ambigas. 2^{do} Ut mature examinemus an illorum methodus, qui tam infra, quam supra vulnus, arteriam intercipiunt, præ simplici ligatura non præstet: ne id, quod nostro in casu verebamur, aliis in casibus re vera contingens, operationem redderet

infelicem; cum vel hinc, vel tam forti e contrario arteriæ constrictione, ut gangræna inferiorum sequeretur, homo periret?

Atque hæc de ipsa operatione dicta sunt. Emulsionis Libræ 4. cum unc. ij. Syr. Diac. dabantur spatio 24. horarum, intermedioque tempore sæpius juris carnis pauxillum. Integro hoc die pectoris anxietas, tussis, sitis, parvus idemque frequens pulsus, agrypnia, observabantur; & ut pridie operationis, ita jam, prodiit urina jumentosa, nisi quod exactis 24. horis nonnihil deponeret crassamenti.

Cruri porro universo, œdematoso eidem ac frigido, mox ab operatione calidum fomentum circumdedimus, compositum ex Scordio, Absinthio, Aliaria, Abrotano, Floribus Chamom. & Samb. aqua, vinoque incoctis, quavis hora, &, si opus, quavis dimidia hora renovandum: cum autem ad frigidiorrem partem fomenta mox frigeant, calefactum eidem ex lana stragulum circumvolvimus. Effectum hinc. ut femur, crus, ac pes, modice calerent perpetuo.

Dec. 13. Sudor mane, pleniore paulo cum pulsu. Jus, & Emulsio, ut die prima. Aqua hordei sitim sedavit. Jus ipsi placuit præprimis. Lingua humida & alba. Urina post meridiem naturalis. Post sudorem pulsus melior, anxietas tolerabilior. Nunquid secundum egregium *La Motte* post puerperium, nunquid post magnas cruoris evacuationes, sudor laudandus? Laudandusque veluti indicium retusi ad apertas arterias impetus sanguinis, ejusdemque ad cutem derivati?

Dec. 14. ab hora post mediam noctem tertia, ad decimam, breves habuit, bonosque somnos. Pes probe calet, etiamsi fomentum ad horam renovetur duntaxat, ubi heri vix suffecerat ejusdem ad mediam horam renovatio. Pauca febris, exigua anxietas, pul-
sus

fus non parvus, appetitus. Fœtor ad vulneris adparatum multus, cui forte symbolam contulit sanguis, qui brevi post deligationem transfudando universum maculaverat adparatum.

Dec. 15. somni mediæ horæ, iique frequentes, adfuere, dummodo Machina tortilis pauxillum relaxaretur. Appetitus. Deligatio prima, aut si mavis altera, facta est; ea tamen cautione, ut & lintea carpta versus arteriam, & Agaricus, loco linquerentur suo. Planta pedis, quod fomento esset corrugata, magno gaudio nostro dolebat.

Dec. 16. in deligatione ob fœtorem iterata, pus comparuit. Somni meliores. Pedis naturalis calor.

Dec. 17. fœtor immanis matutinam suavitatem, vespertinamque deligationem. Vespere quid sanguinis prodiiit, binæque cecidere Agarici lamellæ. Fluor autem cruoris lentus erat, isque omni vulneris in ambitu. Qui porro, sive venosus, sive etiam arteriosus, sufficienter docuit ab instrumento tortili haud ita comprimi arteriam, quin transitus sanguini concederetur. Docuit præterea anastomoses a longo forte tempore, (dum & copioso, eoque coagulato cruore, & valido Balneatoris apparatu, compressa arteria esset,) fieri ceptas, officio jam fungi suo: vel si quis id eo tempore necdum concedere vellet, saltem sanguinem ad femur advehi per alias arterias, quam quæ ab intercepta, interceptæve ramis: *Eustach. Alb. Tab. 24. Lit. A. D. E.* Dolor cum in pede, tum in vulnere; in vulnere autem nunc magis. Hac vespere primam alvum reddidit sponte. Nocte utcumque dormivit.

Decembris 18. deligatio utraque quid sanguinis ostendit, per lintea carpta transsudantis, nonnihilque puris. Vix ultra febrilis pulsus, ac cætera bonus. Hucusque Urinæ, unica ea 13. Dec. excepta, vel jumentosæ redditæ, vel, quæ limpidæ redditæ, hæc

tum rubicundiores fuere, tum cito factæ jumentosæ. Sedimen. porro posuere tarde, imo sæpe altero modo die.

Dec. 19. omnia ut heri, sed sordidius vulnus.

Dec. 20. universa vulneris facies gangrænosa. Unde ad externum Corticis Peruviani usum, internumque deventum est. Assumfit quotidie Extr. Cort. unciam mediam, mistam cum unc. iv. Aq. Samb. & unc. ij. Mellis. Fomentum parabatur ex unc. iv. pulv. Cort. bihorio cum aqua coctis, ita ut superessent modo Libræ duæ. Hinc involvebatur femur universum, interea dum crus & pes solito tegerentur fomento. Decoctum idem corticis, cui inditum tantillum spiritus thereb., vulneri imponebatur plumaceolis exceptum. Sensim hinc omne gangrænosum, factis hinc inde scarificationibus levioribus, separebatur, partim emendabatur, mutabaturque in sanum.

Urinas ad usque nonum diem descripsi: ab illo vero die hæ minus jumentosæ prodire, citiusque deponentes, omnes vero naturali rubicundiores. Neque febrilis pulsus ab 8. vel 9. die observatus amplius est. Emulsio cum cortice, de nocte potissimum, semper assumpta est. Spiritum thereb. nunc parciorum fomento, nunc copiosum addidimus, prout major, minorve esset gangrænæ metus, aut prout nonnulla vulneris vascula plus minus sanguinis fundarent. Resistit enim potenter hic spiritus putredini, & oscula vasorum constringit. Cum dosis corticis extracti sufficere non videbatur, cumque alias experientia nos docuerat ejusmodi dari hominum, morborumque naturas, quibus ille in decocto, quam in extracto aut pulvere, efficacior esset, curavi ejusdem triti uncias ij. bihorio cum aqua coqui, atque colati liquidi libris duabus uncias mellis tres admisceri, singuloque absumi nycthemeri spatio.

At-

Atque sic sat prospere peracta res est ad usque 26. Decembris. Hoc vero die æger denuo conquestus est anxietates, prostratum penitus appetitum, vehementem a cortice horrorem. Vulnus quod purum esset, corticis usui 24. horis supersedi. Inde nunc minui anxietates, reddique sibi appetitum testabatur æger. Monitus autem, convictus immo de corticis peruviani necessitate, denuo assumsit illum, vique se cogens, eidem assumendo assuevit tandem.

28. Dec. moderatior hucusque tussis, atque notabilem tenacis glutinis copiam quotidie ejiciens, nunc laboriosior fiebat, acriorque. Lenivit autem eandem oleosus, idemque paregoricus, linctus. Digtos pedis belle movit.

1762. Jan. 2. & 3. urinæ naturales; at vero Jan. 4. 5. 6. 7. eadem quæ priores, pag. præc. descriptæ. Ab 8. Jan. rubicundiores cum crasso, eodemque subalbido, citoque adparente, sedimento; cum tenuioribus per universam urinam furfuribus ad superficiem usque dispersis, cumque pellicula in superficie, ad certos luminis adspectus varios referente colores, & pingui quidem adparente, sed examine instituto pingui non reperta. Microscopio enim pellicula hæc exhibebat nihil, nisi opacam hinc inde, informemque massam, nullibi pellucidam, nulla spicula salina gerentem. Combusta vero in carbonem mutabatur, qui microscopio conspectus longa gerebat, eademque alba, atque splendentia corpuscula: hæc examine chemico ulterius explorare me tunc neglexisse, est quod nunc doleam. Singulo biduo, triduoque, alvus commode soluta est.

Pus interim ad singulam duodecimam deligationis horam bonum quidem, at vero superans vulneris rationem. Tandem 11. Jan. comperiimus, ad variam partium pressionem pus foetidum, & a profundiore plaga ea, in qua filum hærebat, & ab inferiore vul-
neris

neris angulo, in cavum vulnus effluere; specillo interim magnam utriusque hujus loci altitudinem non monstrante. Posthac pressum internum externumque femur vulneris cavum pure replevit, quod sanguine mistum perquam foetebat. Neque id mirabamur valdopere: etenim ingens effusi, ejusdemque congrumati sanguinis, copia, longiore ante operationem tempore, varios inter musculos sibi sinus foderat; unde a semiconsumta cellulositate, ipsoque corrupto cruore, pus hoc saniosum, ac foetidum, oriri necessum fuit.

Notandum est urinas mox descriptas, cum puris primo copiosioris, deinde saniosi, in vulnus affluxu, una comparuisse. An ab ejusdem portione intra sanguinem resorpta?

His igitur ita visis, vulnus perluimus, & in omnes ejusdem sinus, anfractusque, injecimus decoctum saturatum corticis spiritu therebinthinæ mistum.

Jan. 15. & 16. pure & modico, & vix foetido, in vulnus affluente, urinæ vix ultra id crassum sedimen habuere, vix in superficie pellem, vix præternaturalem ultra colorem.

Necdum ligatæ filum arteriæ vacillat, licet jam sit dies ab operatione peracta quintus & trigesimus. Egregius *Monroo* Tom. 2. *Act. Edimb.* narrat in Arteriæ Brachialis interceptione, post elapsos demum binos cum dimidio menses, filum cecidisse: in nostro igitur homine, considerato crasso illo, quod involvit Arteriam, corpore, tarditatem solutionis fili non mirabamur.

Feliciter aliquantisper progressi, 8. Febr. iterum vidimus, quid in vulnere subnasci grangrænosi, indiesque idem augeri, nec non vagam oriri febriculam, cum horrore ingenti. Patiens percepit horrorem febrilem de ipso vulneris suboriri cavo, inde ad dorsum, universumque tandem corpus invadere;

du-

durare autem illum uno tempore per bihorium, per horam alio, nonnunquam media hora, vel & horæ quadrante, aut & minus. Longiores principio horrores insequutus calor est; horrores vero illi, qui multo breviores, nec cavo de vulnere oriebantur, nec excipientem sese habuere calorem.

Cortex igitur hucusque quamvis maxime indicatus, scopo non satisfaciebat tamen: dosi proinde, eadem indicatione non manente duntaxat, sed multum aucta, augendus erat. Dedimus quotidie decoctum 3. unciarum, triduoque post unc: 4. idque, ut patebit, tempore longissimo.

Urinas durante gangræna denuo tum crassas vidimus, sive jumentosas, tum oleosa tectas crassaque pelle, tum tandem crassum sedimen ponentes.

Ad 16. Febr. liquefacto omni gangrænoso, vulnus adparuit triplo amplius. In eoque sinum versus locum susceptionis ampliorem deprehendentes, & exacte ibidem omnia perquirentes, ansam fili deteximus laxam circum arteriam, mobilemque, ac proinde inutilem; imo mole & irritatione noxiam. Doccebatque amplitudo ansæ consumtum jam esse, quod arteriæ circumcretum fuerat, corpus informe; nec non arteriam ipsam dudum in ligamentum conversam esse, cum alioqui hæmorrhagiæ exortæ fuissent: confirmabat idem defectus eo in loco pulsationis, confirmabat etiam Machinæ tortilis citra vel minimam sanguinis guttulam integra relaxatio. Filum igitur hoc crassum, quippe octuplex, pure putrido turgens, ob idque noxium, abscidimus.

Ab hoc die observata multa emendatio est. Febr. 17. vagi horrores cessarunt, gangrænaque victa sic, ut ad 21. Februar. vix superesset quidquam. Cessante gangræna, Urinæ per aliquot horas jumentosæ, brevi crassum deposuere ac farinaceum sedimen, cum pellicula leviori, vixque pingui visa: a 25. vero Febr.

colore naturales vix ultra sedimen ponebant. Purum jam vulnus, superstita tamen sinu, quo in loco filum hæserat, cujus in fundum stylus ad $\frac{2}{3}$ pollicis intrabat: cæterum bonus appetitus, somnus, alvus. Aeger in lecto sæpius sedet.

28. Febr. vespertina septima horruit valde, ac de super incaluit; Martii 1. ad 8. matutinam pariter. In vulnere tamen eousque nil observabamus sinistri. Hora nona febris cum horrore modico. Siccius vespere vulnus, novusque horror. Vulneris majores de nocte dolores. Martii 2. bis & horruit, & caluit. Crassa est urina, & cum pelliculis variegato, ut olim, colore.

Die demum 3. Martii gangræna iterum in vulnere visa. Die 4. magis, & quidem sic, ut undique stigmata nigra conspicerentur, ut fundus versus arteriam totus esset, profundeque, sphacelatus, & ut sanies foetida cavum repleret universum. Inutilisne hinc cortex? An copiosior dandus? Utique ejusdem indicatio, si unquam, si ullibi, hic saltem maxima. Igitur cum dec. Cort. unc. iv. quotidie evacuando unciam pulveris ejusdem commiscui; sextoque exin die uncias pulveris duas. Etiam digestivo plurimum spiritus Therebinthinæ adjectum est.

Mirabamur toto octiduo hoc urinas, non ut olim, sed naturales præter propter prodire. Copiosiorne corticis hic quid contulit usus?

Interim superandæ gangrænæ non eramus. Doctiss. *Schreibers* narrabat egregios in bello se vidisse effectus in similibus a Theriaca Andromachi, cum æquali copia spiritus therebintinæ mista: Quo remedio non, nisi in principio, satisfaciente, imposuit Cl. Chirurgiæ Professor Unguentum de styrace cum $\frac{1}{4}$ ung. ægyptiaci. Juvante neque illo, imo sequente deligatione cuncta sphacelata exhibente, suasi corticem peruv. primum toti inspergere vulnere,

de-

deinde cum digestivo eundem misceri; hinc tridui spatium elapso mirum quam purum vulnus adpareret.

Oportet autem exacte nihil non notare. Cum æger a vulneris mundatione doleret, solatio ipsi magno fuit pus, vel saniem, siphonis ope educi. Gangræna igitur toties redeunte, subdubitare cepimus an suctio siphonis, auferendo toties, ac valide, atmosphæræ compressionem, has carnes fungosiores non redderet, adeoque in gangrænam proniores? Immo, quandoquidem adversis in rebus undecumque petatur nocumentorum suspicio, etiam ab injectione ad vulneris depurationem, siphone faciendâ, abstinendum esse decrevimus, ne aer cum injecta materie ad nudas has fungosasque ac semimortuas carnes vi repetita adpressus, noceret iisdem. Saltem ex quo ad 22. Martii plumaceolæ mollissimæ vulnus expurgarunt, similesque injectionis materia madentes cuncta perluere, gangræna fissi, pedetentimque minui visa est, amplius non reditura.

Quo toto porro tempore cum eadem hucusque pugnaveramus, urinæ fere naturales fuere, unico eo ab ea saniorum discrepantes, quod nubeculam paululo crassiores, ac veluti farina crassiuscula referant, gererent: ex quo vero malum superari ceptum, urinæ tum parciore fuere, tum fuscorubræ, tum etiam per integras 12. horas aliquoties jumentosæ, idque crassiore, partim oroboidæo, partim furfureo, cum sedimento. Horrores autem cum, vel absque, insequente calore, quales ante anteriores gangrænas, æger ante hanc postremam, eamque vehementem, perpeffus non est. An quod plus nunc assumserit Corticis?

Hac igitur methodo Corticem tum assumendi, tum adplicandi, citra vel minimam adversitatem, Aprilem, Majumque mensem, transegit æger. Mayo finiente vulnus penitus clausum fuit, vires au-

etæ, cruris immanis tumor sensim concidit, ejusdemque sic est restitutus usus, ut binis primo scipionibus, postmodum unico, demum sine ullius ope, ambulare disceret. Cum vero toto flaccefferet corpore, ac crure penitus non detumesceret, Corticis usum sensim quidem parciorem, integrum autem non detraxi, nisi Augusto mense finiente; crure interea probe frictō, & genu curvi immobilitate unguentis mollissimis, frictionibusque, emendata.

Sumtum, quos Nosocomium pro homine, septem cum dimidio mensium spatio, profudit, rationem ineuntes, comperiimus eum assumpsisse in Extracto uncias Corticis 7. in pulvere Libras $6\frac{1}{2}$ in Decoctis Libras $34\frac{1}{2}$ præter Libras 11. infomentis. Ita ut solvere debuerimus, pro Libris Corticis 52. & 7. unc. Extracti ejusdem, Aureos præterpropter quadraginta.

Rariora exempla, arbitror, sunt dati, adplicitique, enormi hac quantitate, Corticis; unde expediet super eodem paucis differere: sepositis tamen, & intactis perpetuo iis observationibus, quas a *Revelatione* habemus, in tot SS. Scripturarum locis docente DEUM, quas sive nutritias vires, sive medicatas, creatis infererit rebus, sæpe easdem illis auferre, & e contrario ipsas illas vires hisce infundere, quæ prius inde destituerentur. Hisce, inquam, sepositis, sic ratio-cinor: Corticem peruvianum, ut anti-gangrænosum, practici multis ab annis, quidquid contra mustitarent nonnulli, salutarunt. Haud raro tamen aut vis morbi superior, aut alia causa quæcumque, omnem ejusdem elusit efficaciam. Sed hoc etiam quævis cum Specifica habent, tum methodica remedia. Hinc faustorum eventuum inquirendæ nobis sunt, infauistorumque causæ.

Harum prima in ipso remedio invenitur, quod circumscriptum limitibus est, quos ultra citraque progredi nefas.

Secundo, in corpore assumentis latere illa potest. Ut ab una parte Alimenta, instituto CREATORIS, corpora nutriunt, longosque sustentant in annos; utque ab altera parte ejusmodi homines dari advertimus, qui sive a morbo noto, sive a nulla nobis manifesta causa, minime inde nutriantur, imo debita cum alimentorum copia decrescant, contabescantque, & pereant; ita Medicamenta sæpius quidem organa corporis assumentis apta inveniunt, a quibus per quoscumque corporis anfractus, per genus humorum omne, adeoque per locos quoscumque, ubi latet origo mali, circumferantur, viresque sic suas exercent, attamen diffiteri non possumus selectissima Medamina aliquando ejusmodi adplicari corporibus, quorum organicæ partes prorsum ineptæ sint, quæ illud circumducant, præparent, subigant, causisque admoveant morbos. Itaque iners hac lege cum sit, ut in nutritione inepta alimenta considerabamus, morbus pergit, donec vita in auras fatiscat.

Tertio erit & aliunde derivanda causa. Potest ad agendum quam optimum cum Alimentum, tum Medicamentum esse; potest etiam ad circumferendum, ad subigendum, ad adplicandum, corpus Assumentis validum esse; dum interea nec illo corpus reficiatur, neque hoc tollatur morbus. Cuivis id manifestum puto. Quicumque Medici legis Hippocraticæ de nutriendis ægris ignari, diætam tenuissimam a primordiis, perque omnem decursum Acutorum, observant, neque fere mutant reconvalescentibus, hi neque morbum integre debellant, nec firmam revocant sanitatem: nocentque eo magis, quo plenior diæta homo usus in sanitate fuerat.

Ut hic alimenta, ita sæpe se medicamenta habent. Bona hæc quidem, & selecta, haud magis emendabunt morbum, debito parcius si exhibueris, quam alimenta parcius data non restituunt vires reconvalescentium:

tum quod ad morbi magnitudinem, ac violentiam, exhibendi auxilii iusta requiratur proportio, tum quod medicamentorum multorum ea sæpe natura sit, ut parcius data plus noceant, quam profint. Nonne purgans pharmacum, perparce datum, sæpe torminum atque anxietatum autor, cum alvo clausa? Et restrictius exhibita *Nepenthe*, an non sæpe insomnia pro somnis, pro dolorum lenimine anxietates, caloresque conciliet? Nunquid, *Sydenhamo* autore, præstat quibusdam sanguinem non, quam haud sufficienter, misisse?

Tandem quarto, inertiae five alimenti, five medellæ, ea merito causa est, quod, viribus illa mutandi dudum dilapidatis, exhibeantur, provecto scilicet sic morbo, ut homo certa & inevitabili lege in mortem tendat.

Porro si quatuor has considerationes ad energiam medicamentorum applicuerimus, &, de quo potissimum agitur, ad *Corticem peruvianum*, mox manifestam, cur sæpe hic nil operetur, rationem capiemus. Ponatur ille, ubi non indicetur, datus, frustra expectabitur ab eo morbi sanatio. Detur rite indicatus, sed inepto ad cooperandum corpori, sed ægro irreparabiliter exhausto, neque vires exferet suas. Dederis optima cum indicatione corpori aptissimo, haud id, quod intenderis, obtinebis, apta ni dederis dosi. At vero aptam quam demum vocabimus dosin? Qui rite indicatum *Corticem* noverit, rite inventurus dosin ejusdem est, prudenter augendo, donec cernat agentem. Neque pondus hic quidquam, aut mensura, determinat, sed morbi levamen. Nunquid eandem observationem alia quæcumque medicamenta non demonstrent? Corpora dantur, quæ alvo purgare difficillimum; ne dicam impossibile: purgans sextuplo fortius solito, sed forma liquida, sed per epicrasin datum donec operetur, optatum ferit scopum. Admi-

ran-

randus per omnia *Sydenham* inanem excussit nobis de Opio formidinem, tum universis in morbis, tum in Variolis. An non aucta vehementer opii dosi letalem alioqui Ileum solutum vidimus, *Rat. Med. Tom. I, pag. 184.*? Quindecim forte anni sunt, cum feminæ, intolerabilibus uterini canceri doloribus desperabundæ ac furibundæ, unicum possem ab opio atferre solamen. Granis paucioribus delusus, adscendi sensim, donec septuaginta ac duobus granis spatio 24. hor. datis, sedamen dolorum, virium refectionem, citra vel minimum tamen somnum, aliquot horarum spatio, cernerem.

Quæ si ita se habent, nonne audacioris dosi Corticis adornata Apologia est? Effectusque egregius, ab interno ejusdem externoque usu observatus, an hanc non approbet, non tueatur, non laudet audaciam? Nunquid etiam tum hoc notabile exemplum, tum complura alia, non demonstrent inanem eorum metum prorsum ridiculum esse, qui vel a mediocri Corticis usu meticulosi, vel cum purgantibus illum sociant, vel purgantia exhibeant post eundem; quibus demum innocui remedii imaginariam malignitatem, obstructionum genitricem, se eliminare arbitrentur?

Novi equidem, audioque, optimos hos viros ad experientiam provocare, qua a peruviano Cortice Lienis, Hepatis, Mesenterii, &c. obstructiones, & cum maxime Hydropem ac Scorbutum, innuente jam dudum *Sydenhamo*, productos fuisse, evincere conentur. Sed pace horum, quos veneror, Virorum, parumper subdubitare fas sit, an experientia decantata illa rite capta, adeoque an valida sit? Quid enim? Febres intermittentes, dimissæ sibi, generant obstructiones viscerum, & Icterus, & Cachexiam, & Scorbutum, & Hydropa: quique letalis per se morbus non est, hoc demum modo homini letalis fit. Fiunt porro hæc Febre penitus sibi, etiam citra ullam medicinam, dimis-

fa ; omnium sæculorum experientia , id testante , magno *Boerhaavio* colligente & describente *Cap. de Febr. in gen. & de Febr. Interm.*

Si proinde ejusmodi esse queat febrium sibi dimissarum funestus effectus , quo demum jure effectus dicatur Corticis ? Opponentem quidem expecto autoritatem *Sydenhami*, *Boerhaavii*, Illustrissimique nostri Præsidis *B. van Zwieten*, uno id ore affirmantium ; fateorque lubens tres hosce celeberrimos Autores ita scripsisse ; verum simul reperio ita mitigatam a posteriore priorum binorum sententiam fuisse , ut deesse non potuerit quin *Comm. Tom. III. pag. 599.* hæc scriberet : " Antea - - - notatum fuit quod post has (intermittentes) Febres , imprimis si diuturnæ & validæ fuerint , humores crassi & acres reddantur , si mulque solidæ partes corporis debilitentur ; unde ob laxa vasa , & liquida crassa , atque acria simul , Febres intermittentes aliquando terminarentur in Scorbutum , & alios morbos Chronicos. *Ubi autem pertinacibus talibus Febribus curandis adhibetur Cortex Peruvianus , tunc mutationes humorum & solidarum partium corporis , per ipsam Febrim prægressam factæ , male adscribuntur usui Corticis Peruviani.*

Et quantum ad nostros ægros , qui per octo annos in nosocomio nostro copiosissimo usi Cortice fuerint , nondum ulla Chronica inde mala notare potuimus : neque in viro , quo de agitur , nulla scorbuti signa nobis aut oculi exhibent , aut gingivæ , aut artus ; imo cachecticum habitum , inchoantemque hydropem , largo Corticis usu sublatum esse læti conspiciamus. Ut proinde rariores videantur , qui id innuant , arguantve , casus.

Imo si vera promere datur , Chronica mala inde orta experti in nosocomio fuimus , quod vel meticulosiores Medici , vel præparci , aut egeni ægri , Corticem nec sat magna dosi , nec sufficiente post morbum

bum devictum tempore, assumerent. Unde nos ne-
tquam contenti quod ægri quovis 14. die a curata fe-
bre dosin Corticis tumerent, semper binarum, trium,
pluriumque septimanarum spatio, continuavimus e-
jusdem usum, donec integram restitutam cerneremus
stabilemque sanitatem.

Interim vix possibile creditu, quantum detrimen-
ti humano generi afferat præjudicata hæc opinio. U-
tique centenos ægros perdit quotannis. Neque juvat
quidquam aliorum experimentis convinci, siquidem
præjudicium, alta mente repositum, contraria ex-
perimenta admittit quidem, laudatque, non sequi-
tur tamen. Clarorum virorum epistolas possideo,
qui ad lecta mea opuscula me laudibus accumulantes,
curam febrium malignarum abundantiore Cor-
tice peractam, vehementer quidem admirabantur,
atque laudabant, at vero nunquam imitatu-
ros sese profitebantur, eo quod Hydropem, aliaque infortunia,
a Corticis liberaliore exhibitione observasse se autu-
marent. Feminam a frequentiore abortu, atque e-
normibus hæmorrhagiis ferme enectam, frequentio-
re Corticis usu reviviscentem salutaveram; at vero
brevis in veteres ærurnas relapsam dolui, postquam
cum medentium, tum matronarum turba, lamenta-
bili voce perniciosos diuturnioris Corticis peruviani
effectus enarrarent, auribusque ejusdem tamdiu ob-
streperent, ut tandem ipsis infelix auscultaret.

Verum demus tandem id contingere nonnunquam,
quod magni in arte viri tantopere formidarint, e-
go vero necdum potuerim observare. An ergo, quod
Scorbutus, quod Hydrops, quod Obstructiones,
liberaliori Corticis dosi nascantur nonnunquam, eo
demum adigere nos debeat, ut miseros mortales, aut
sine Cortice, aut sine eodem copiosissimo, certissi-
me perituros, cumque eodem largissimo servandos,
iniquæ ipsorum sorti dimittamus potius, quam ut

concedamus illos in vitam Cortice revocatos discrimen subire Scorbuti, Hydropis, aliusve cujuscumque morbi chronici? Profecto aut nihil in Medicis intelligo, aut sententia hæc mea veris ac genuinis Artis præceptis innititur, qua statuo vitali indicatione merito nos urgeri, ut vitam servemus præprimis, prospecturi postliminio symptomatibus pravis, hic, ut creditur, inevitabilibus, mox ubi vel levissima eorundem primordia advertemus.

Atque hæc de Cortice dicta sunt. Verbo nunc urinas commemorem, quarum varia phænomena in universo morbi decursu exacte, sæpiusque de die; in chartas conjeci. Crassas eas, inque crassitudine perseverantes, & pridie operationis, & spatio 10. dierum post illam, conspeximus. Dein a principio dati, dosi moderata, Corticis, minus jumentosas, citiusque deponentes, quasvis autem naturali urina tinctiores.

Januarii 2. & 3. rebus bene satis se habentibus urinae fere naturales; quatuor vero deinde subsequis diebus, prioribus iterum similes. Demum vero ab 8. Jan. rubicundiores cum crasso, subalbido, eoque cito apparente, sedimento, cum furfuribus tenuioribus, ad superficiem usque dispersis, cumque pellicula pingui, eademque crassa, in superficie, ad varios luminis adspectus rubellis, flavis, purpureis, viridibus, donata coloribus. Quo porro tempore ejusmodi urina erat, pus ratione vulneris copiosius fuit, simulque quod in sinibus delitescibat, foetidum. Januarii 14. & 15. pure modico iterum, vixque foetido, urina pariter vix ultra sedimen habuit, vix pelliculam, vix alium a naturali colorem. Gangræna posthac adparente cum febribus horrificis, crassæ iterum urinae, jumentosæ, eadem, qua antea, pelle tectæ, crassum, postquam diutius stetissent, deponentes sedimen: Gangræna devicta, jumentosæ quidem, ast brevi subsidentes, pel-
le

le tenuiore vix tectæ, tandem fere naturales. Febre vaga horrida magnam gangrænam 28. Febr. denunciantem, urinæ crassæ iterum ac returbatæ, fursureæ, pelle eadem, qua olim, tectæ. Sub hac gangræna, quacum diu incassum luctabamur, aucta multum Corticis dosi, mirabamur urinas prope naturales esse, exceptis toto hoc 3. septimanarum tempore binis tantummodo vicibus. Prope naturales eas ideo vocor quia eo solo a naturalibus differebant, quod nubeculam paulo crassiolem, in eaque pauxillum crassioris gererent farinæ.

Sphacelo stante, imminuente, superato, urinæ tum parciore fuerunt, tum fusco rubræ, per semidiem nonnunquam turbatæ, cum sedimine partim fursureo, partim oroboideo. Tandem post superatum morbum coëunte sensim vulnere, varietatem multam exhibuerunt, aliquando penitus naturales, alio tempore fere naturales, hæud raro etiam cum oroboideo, crassoque sedimento.

Doctrina implicata satis de urinis num forsan hinc illustraretur, hujus excursionis causa est. Sed quam obscura sæpe, quam abdita, quam inexplicabilis illa! Ordinem servabant urinæ aliquem, ad explicationem aptum, usque ad posterioris gangrænæ finem; nullum vero observarunt postea. Corticis ope videbantur in prioribus gangrænis in melius mutatæ; post gangrænam ultimam, Corticis dosi eadem data, miras continuo exhibuere varietates. Et cur urinæ hic toties turbatæ ac jumentosæ? In Acutis adparentes notant pertinacem fere cruditatem cum inchoante, sed inani ad coctionem nisu; hic vero gangrænam imo sphacelum: „ pellicula, qualis hic, notat in morbis Acutis abundantiam terræ & salis hebetioris in sanguine, „ hinc scorbuti, calculique præsaga; hi morbi post curam observati non sunt, & pellis hæc comitata perpetuo gangrænam fuit. Habuimus sæpius urinas
fere

fere rubras, cum sedimine aut ruffo, aut furfuraceo, aut orobo tosto, tritoque simili, aut squamoso: designat illa „ 1. antegressum esse motum attritus vehementem. 2. Vasa laxa. 3. Cruorem acrem, salinum, solutum, nutritioni ineptum. 4. Febres intermittentes valido paroxysmo defunctas. 5. In oris septentrionalibus his scorbutum. Præfagit. „ 1. longitudinem morbi. 2. Vasculorum attritionem, debilitationem, destructionem. 3. Sudores, urinas, salivam, diarrhoeas, colliquativas. 4. Atrophiam. 5. Hydropes quoscumque. Ita magnus *Boerhaave* in incomparabili capite *de Urinis*. Attamen urinæ ejusmodi neque in Diagnosi, neque in Prognosi, horum vix quidquam habuere, quin contraria potius. Quid enim attritui valido magis contrarium languore perpetuo?

Non ea porro mente hæc scribo, ut doctrinæ de urinis detraham quidquam. Magnificatio quippe eandem, & in nosocomio, ad Diagnosin atque Prognosin instruendam, oportunam judico, doceoque. Nihilominus hanc ipsam doctrinam necdum esse ad perfectionem deductam, tum me præsens casus, tum aliæ multæ observationes, convincunt. Interim hæc nos, quo certiores illam reddamus, potenter existimulant.

Super Fungo Agarici quæstionem proponendo, hoc caput terminabo. *Rat. Med. Tom. I. pag. 265.* & in præsentis capitis casu priore, enarravi nos & Agarici lamellas vulneri solius Arteriæ, & pulverem ejusdem toti quanto vulnere admovisse; hosque tres homines, SUMMO NUMINE AUSPICANTE, integræ reddidisse sanitati. At vero cum idem fecerimus in homine de quo *Part. V. pag. 88.* & in femina, de qua *Part. VI. pag. 138.* eosque morte amiserimus ambos; quæritur, laudandane sit Agarici pulveris inspersio, an vituperanda?

Respondeo 1^{mo} Hominem *Part. V. pag. 88.* hæmorrhagia haud compescenda post crus amputatum periisse, mortis proinde causam citra Agaricum manifestam esse.

2^{do} Feminae, de qua *Part. VI. pag. 138.* adeo esse miram historiam, adeo quasvis Physiologiæ regulas excedentem, ut plane inexplicabilis cunctis suis in partibus adpareat, utque hinc examen Agarici pulveris faciat nihil.

3^{tio} Tres nostras fortunatas curas id manifesto docuisse, quod aut vulnere, aut vulneratis, sinistri nihil inde contigerit: imo in duobus viris toto curæ tempore, sanitatem ejusmodi adfuisse, ut, nisi oculis contuiti, vix credere potuissemus.

4^{to} Neque me capere, cur noceret, causam. Ignoramus forte veram ejusdem agendi rationem: sed sive agat vulnus arteriæ constringendo; sive cruorem de vulnere profilientem mox condensando, solidumque in trumbum, qui vasis aperturam indissolubiliter consolidet, coagmentetque, cogendo; sive denique utroque modo; utique alios ab his effectus in aperta reliquorum vulneris vasorum oscula, inque illum, qui vel in his vasis continetur, vel ex vasis profluit, sanguinem, non producat. Hoc si verum, tunc hæmorrhagiam impedit cunctorum in toto vulnere vasorum; quæ alioquin vasa ipsa, quamdiu machina tortilis aliquem admittit, quem admittere debet, circulum sanguinis, fundere cruorem possunt, effuso cruore Agaricum ab arteriæ vulnere solvere, generare in vulnere putredinem, purisque impedire generationem. Unde jure concludere videor hanc pulveris insersionem omnibus de causis utilem, necessariamque esse.

At vero resorbeaturne Agaricus? Resorptusque sitne sanguini, ceterisque Venenum humoribus?

Qualitatem venenatam Agaricum, qua Agaricum,
Possi-

possidere, necdum demonstratum est: nihilominus mechanice id forte verum erit, quod tenuis ejusdem pulvis, qua pulvis, resorptus, cum humoribus circumductus, minimisque vasis impulsus, generare obstructions possit, easdemque in corticis cerebri, cerebellique vasis perniciosas & letales. Quæritur proinde num resorbetur? Minime, neque etiam resorberi videtur posse. Constringendo enim coagulandoque, prohibet toto vulneris in ambitu resorptionem; id quod cum ceteris tum adstringentibus, tum coagulantibus, commune habet. Quid enim? An pulveres ad hæmorrhagias siue compescendas, siue averruncandas; pulveres, inquam, rebus compositis ejusmodi, quæ tam qualitate propria, quam mechanica rigiditate, venena sunt, vulneribus inculparte non insperguntur? Vitriola puta, Alumen, Aeruginem Aeris? An decoctum Colcotharis Vitrioli, quod quamvis colatum, millenas in se continet venenatas particulas, tuto non applicatur crudis tum vulneribus, tum ulceribus? Et spiritum Therebinthinæ, præsentaneum, si humoribus nostris admisceatur, venenum, nonne citra metum resorptionis adplicamus audacter? Quantumne emolumenti vulnera & ulcera ab unguento ægyptiaco non capiunt, quod ejusmodi tamen continet, quæ mista humoribus, veneno sint? Unde in femoris gangræna ac sphacelo, prout in hac ipsa morbi hystoria patuit, sine ullo resorptionis metu tum spiritum Therebinthinæ, tum unguentum ægyptiacum, Chirurgi adplicuerunt.

De Aneurysmate vero.

§. I. *Resumitur Historia mulieris data Part. V. pag. 83. eo quod nunc cadavere suo præteriti nostri erroris nos convicerit. Conjectura super causis, quæ Aneurysmatis veri ideam nobis olim creaverant, & confirmatio repetitæ toties difficultatis dijudicandorum Aneurysmatum.* §. II. *Aneurysma spatio 40. annorum citra noxam, citraque incrementum, gestatum.* §. III. *Aneurysmatis veri, nec non Asthmatis, ceterorumque Chronicorum pectoris morborum, Apoplexiæ præterea, ac variarum capitis ægritudinum, causas sufficientes, easdemque superabundantes, in se homo, dum viveret, gessit, citra effectum, inde physice expectandum.* §. IV. *Alia historia priori perquam similis.* §. IV. *Digressio occasione hac facta, circa causam morborum petendam aut non petendam, a pulmonum cum vicinis sibi partibus coalitu.*

§. I. **D**e Aneurysmate interno novas, quas adjiciam, observationes habeo. Femina binæ, de quibus *Part. V. & VI.* eadem methodo, quam ibidem descripsi, vitam miseram pergunt tolerabiliter agere, licet in una Aneurysma supra claviculam jam extet binorum pollicum diametro, quod ipsum forte non nisi continuatio sit illius, quod dudum intra pectus gessit. Verum ea femina, cujus ampla historia data est *Part. V. pag. 83. §. 2.* post abcessum in externo pectore apertum aneurysmatica visa nobis, sic quidem ut internum pectoris aneurysma nunc inter cartilagine costarum extrorsum verti crederetur, hæc, inquam, femina, cum morte sua veram mali naturam exhibuerit nobis, Lectorum poscit attentionem.

Miseranda hæc femina, postquam ea contigerant, quæ relata *Part. V.*, vitam perpetuo ærumnosam duxit,

duxit, tum Aneurysmatis, tum pulmonis partim obstructi, partimque nonnihil suppurati, symptomatibus; sic nihilominus, ut alio atque alio tempore tolerabilia hæcce, vehementiorave, essent. Qui in pectore apertus a nobis tumor fuerat, vehementerque pulsans in fundo suo tuberculum exhibuerat, ad finem Octobris 1760. haud pulsavit amplius; at vero ejusdem viciniae toto in ambitu pulsatio talis, ut viderentur inde attolli costæ. Ineunte Decembri ne vestigium quidem tumoris superfuit, at vero toto scrobis cordis in ambitu perennis pulsatio; quo autem loco infederat tumor, perpetuum observatur Lymphæ stillicidium, consolidationem aperturæ prohibens; nec exsiccatum, nisi cum Hydrops intercus ante mortem medio præterpropter anno, corpore inferiore oboriretur. Sputa pauca ejecit mucosa, aut purulenta, aut sanguine tincta, purum imo sanguinem nonnunquam. Quæ aberat nunquam anxietas, sic demum crevit, ut tribus ultimis vitæ mensibus federe erecta dies debuerit noctesque, idque in sedili duntaxat, pendulis perpetuo cruribus, ob idque etiam indies tumidioribus. Decimo quarto die ante mortem, crura sponte aperta copioso sero fluxere, nec sine ingenti labore, saturatoque Corticis Peruviani fomento, præservari a Sphacelo potuere. Animi deliquia leviora a dimidio ante mortem anno pati ceperat; pulsationes autem consueto loco per totum id tempus nullas, sed internas tam validas, ut haud ipsa tantummodo, verum & adstantes easdem oculis, auribusque perciperent. Ita demum 23. Febr. 1762. vita miserrima functa est.

In cadaveris lustratione prima nostra sollicitudo erat illius plagæ in thorace examinandæ, quam olim abscessum, postmodum Aneurysma, idque evanidum tandem, arbitrati eramus. Rimati hunc locum, & supra costas, & post illas, intraque easdem,

dem, Aneurysmatis, aliusve tumoris vestigium, frustra quæсивimus. Unde ad alia conversi, Pericardium univèrsùm tenue quidem vidimus, at versùs basin cordis præ tenuitate omnino pellucidum. Cor totum tactu durum, ac dextrum quidem cum durtie depressum, sinistrum autem rotundius. Auricula dextra cum sinu distentissima erat a polyposo corpore, quod ultra duos in diametro pollices habens, constansque idem externa alba, neutiquam vasculosa, membrana, interne copioso coagulato sanguine, tandem utroque suo latere quædam veluti ligamenta crassa, albaque emittebat, quibuscum sese columnis plicisque auriculæ, ut & inter columnas, affigebat. Erant porro columnæ ac plicæ auriculæ hujus eadem proportionè quoad molem auctæ, qua moles totius auctæ auriculæ esset. Polyposo hoc corpore in finem dextrum maxime extenso sinus hic amplissimus ita replebatur, ut sanguis non nisi furtim post polypum in cor dextrum potuerit illabi. Arteria pulmonalis longum habuit fortemque polypum, accretum uni semilunarium valvularum. Cor dextrum consuetæ quidem in pariete crassitudinis fuit, columnas musculosas autem tum numerosas valde, tum crassas adeo durasque, ut nulla earum carnem, veram omnes cartilaginem, referrent. Adeo ampla hujus cavitas, ut junctos meos tres digitos commode caperet. Lævus vero ventriculus & durus erat, & digitum pariete crassus, angustus autem ita, ut indicem digitum meum vix locaret, paucissimis demum columnis instructus, hisque non liberis, sed ipso cum pariete intime nexis. Liberi in thorace pulmones, excepta levi cum jugulo, & utrinque cum diaphragmate cohæsiōe, pleni utrique plurimis, iisdemque duris, ac sanioso pure refertis, tuberculis. Tuberculorum diversa moles; sic, ut majora semicohleare puris continerent. In abdomine

nihil inventum, quod ad morbum referri posset. Coli enim ac ventriculi forma, & decursus præternaturales hujus subsellii non sunt, sed ad alia reservandi.

Sub Anatome, postque eandem, alii alios intuebamur, hæsitabundi quærebatamus num olim decepti essemus? Et si decepti, quamnam ob causam? Equidem Aneurysma verum adesse posse, idemque manifesto deprehensum esse, posteaque prorsum evanuisse, notabili exemplo *Tomo I. cap. 30. p. 252. & 258.* constiterat. Verumtamen id ipsum Aneurysma a costis quidem, quas inter se penetraverat olim, remotius, & ad costas superiores nunc proximius, nihilominus a morte inveniebatur, loco mutatum duntaxat; hic vero nullum Aneurysmatis tota in vicinia vestigium. Undenam ergo perceptio manifestissima pulsantis tumoris? Eaque integro percepta biennio? Deinde tumor cur evanidus? Et cui causæ adscribunda est totius circa scrobem cordis plagæ pulsatio? Quid, quod internæ pulsationis violentia tanta fuerit, ut visu, audituque etiam ab adstantibus perciperetur?

Tuberculorum pulmonis signa, ordine priora, Historia morbi notavit, & signa Aneurysmatis illis posteriora. Igitur a natis, sensimque crescentibus, hisce tuberculis, capimus facile cordi dextro nasci demum resistantiam, augerique, quo suum sanguinem difficilius transmittere potuerit per pulmonem. Utique subito hujus resistantiæ incremento cor brevi suffocatum, enectaque femina fuisset; sed malorum lento adeo, ut vix advertatur, incremento, vitalia assuescere, ex tot exemplis in variis *Rat. Med. Part.* allatis conclusimus, ut hic faciles idem admittamus. Cor igitur dextrum tota fabrica sua, cum sinu atque auricula extensum, columnis crassioribus, durioribus, numerosioribusque instructum; cor sinistrum, forte quod minus sanguinis

his a pulmone reciperet, angustum, liberis columnis musculosis destitutum, in parietibus vehementer incrassatum, rigidumque, nec ultra fere contractile; cor, inquam, hoc non nisi vitiosissimas actiones edere debuit, & basi sua, auricula, sinuque vario tempore variis impleri, deplerique, modis. Adeone inepte suspicaremur hoc mirabile cor degenerascentes suas, extensasque partes, certo quodam tempore ad costas ac latera sterni admovisse; alioque tempore ab illis removisse, quemadmodum *Tom. I.* locis citatis torum Aneurysma & costis admovebat sese, & removerat?

Hæc porro si probabilia videantur, ponatur tandem, quo tempore hoc cor cum suis tumidis appendicibus hærebat costis proximius, ponatur, inquam, a communi quacumque alia causa tumorum, natus hoc eodem loco tumor quisquam, qui primo durus, dein pro parte purulentus, effusoque pure fundum adhuc durum, suppurari necdum aptum, habens; numquid ille a pulsu vehementi cartilaginum costarum etiam pulsare non debuerit? & si sub illo tumore veluti centrum pulsationis hujus degenerascentis, costisque admoti cordis fuit, an similitudo cum vero Aneurysmate magna non fuerit?

Interim jure merito videor jam toties monuisse, quam incerta sæpe erroneave sit vera Aneurysmatum diagnosi! Quamque ridiculum sit in hisce incertitudinibus, & errorum discrimine, Medicorum ac Chirurgorum chorum inter sese mutuo altercari; dum sæpe Anatome neminem rem acu tetigisse, manifestat! Juvat proinde nosse varios Naturæ errores, ut sæpius, quid esse dato in casu possit, quam quid sit, sententiam super eo rogati, respondere queamus. Quæ sequuntur proxime, hoc meum monitum confirmabunt.

§. II. Quantumvis periculo plena res Aneurysma;

inculpate potest 30, 40. annorum spatio Aneurysma externum geri. Femina quadragenaria habet a quo tempore meminit, & ut putat, a nativitate, parvum Aneurysma ad superiorem, eamque lateralem cartilagini Thyroidæ partem dextram, pisi magnitudine, nec majus unquam, nec minus; nunc magis conspicuum, quod ex biennio, cum primum me adiret, a diuturniore lactatione vehementer emacruerit. Videtur Aneurysma Carotidis externæ rami primi; quem *Winslow* anteriorem, sive internum carotidis externæ ramum, vocat.

§. III. Dantur in corpore humano causæ Aneurysmatum validæ, imo Aneurysmata ipsa interna valida, citra sui indicia, alios potius morbos, quam hæc, mentita.

Homo ille, qui *Part. VI. cap. 13.* foliis Aurantium a terrificis suis convulsionibus liberatus, ac sanescere inde visus erat, perfectam non recuperavit sanitatem, aut saltem non constantem, ex quo ejus historiam dedi. Cum sanitatem anni abhinc spatio recuperasse videbatur, servavit semper pulsum, qui ipsi a triennio perpetuus fuerat, tum naturali omnium hominum pulsu, tum suo ipsius pristino, celeriore, fortiore; & quotiescumque per diem explorabatur, semper miram exhibentem in ipsa illa celeritate, ac fortitudine varietatem, imo remissiones quandoque & duritiem. Hic, inquam, pulsus, ipsi a triennio ante morbum familiaris, eundem a morbo perpetuo concomitatus est. Deinde quæ a biennio eum vexaverat molesta tussis, a morbo rediit, sputa educens aut serosa, aut glutinosa, nunquam vero, nisi sub vitæ finem, idque tum raro, tum parce, purulenta. Hæc igitur bina, quorum alterum a triennio, alterum a biennio, affuerat, sanus nunc iterum visus æger, pati denuo cepit.

Resolventia, attenuantia, humectantia, emollientia,

ria, cujusvis generis longo tempore ipsi præscripta sunt, nonnihilque profuerunt: at vero sive morbus arte superior, sive negligentia in assumendo, sive notabiles in usu VI. rer. non nat. excessus, emendationem nec notabilem ægro produxerunt, nec constantem.

Sensim symptomata accessere, quæ vias dictas primas affectas esse innuerent. Flatuum quippe incredibile prorsum quantam vim maxime ore, nonnunquam etiam ano, redderet. Vix unquam simile vidi. Equidem ipsi id fuerat ab adolescentia familiare, ut si quis ipsi, scienti quantumvis, ac videnti, manum brachiumve rudius attingebat, copiosos mox ore dimitteret flatus; ita ut miris nervorum affectionibus obnoxius jam tum haberetur: at vero nunc citra ejusmodi causas, flatus aut erupere, aut si non erumperent, continuo anxietates in ventre vel ad præcordia, ipsosve colicos generarunt dolores; evanida mox iterum symptomata, dum frequentes, fortes, ac sonori ructus, flatusque, explodebantur.

Docebant hæc, inquam, primarum viarum affectionem. Verum a quibusnam affectis partibus? Sane totius abdominis externe tactinaturalis mollitudo, optima alvus, bilis præsentia laudabilis, appetitus egregius, summa viarum primarum, dum flatus non urgerent, libertas atque integritas; notabile viarum primarum vitium non admittebant.

Historia morbi, præcedenti parte relata, verosimile id ponebat, quod convulsionum sedes in capite esset. Dolor siquidem capitis supra oculum fixus, vertigo, tinnitus aurium, sæpius longe ante convulsionem, interque easdem percepti, id insinuabant: at vero ne illis viæ primæ symbolam conferrent, flatus post singulam convulsionem emissi, eandemque terminantes, haud levem dabant suspicionem.

Quin & aliud quid confusionem formandæ diag-

noſeos peperit. Febris ante natas convulſiones Parte VI. deſcriptas, quatuor menſium ſpatio ægrum tenuerat. Eodemque tempore pulſus de die fortis, ac frequens, ſæpiusque durus, obſervabatur ad vesp̄ras debilis, ac celer; cum frigore non horrifico, trihorii, aut quadrihorii ſpatio, durante: Aegro interim nec ſitiente vesp̄ere, nec lectum petente, imo exeunte, ſpectaculis ſe recreante, hominumque domi, forisque, frequentante ſocietatem. Convulſionibus porro curatis, continuatoque poſt eaſdem curatas Aurantiorum foliorum ultra menſem decocto, exulavit penitus hæc Febris, nec niſi ultimo vitæ menſe poſt quartam pomeridianam frigore ac calore conſpicua, 10. 12. horarum ſpatio ægrum vexavit: ſed de iis, quæ prope mortem contigere, mox acturus, ea, quæ diu antea obſervata, modo proſequar.

Igitur dum tuſſis pluribus filebat horis, dum incommodo flatus non erant, dum Febris vel penitus aberat, vel vesp̄ere vexabat duntaxat, dum denique frequens, ac fortis, ſæpeque durus pulſus, in ceteris hominibus febrilis vocandus, homini perſeverabat; nemo ſane, qui multi affuere, Medicorum toto ejus in corpore accuſare aut culp̄are quidquam potuit. Caput ſerenum; Reſpiratio, etiam valido in motu, fortis, conſtans, profunda; validus appetitus; naturalis, debitoque tempore reddita alvus; lingua perpetuo pura; molle abdomen, videbantur iterum omnem viarum primarum affectarum, affectorum primario Thoracis viſcerum, ſuſpicionem abigere.

Hæc cum ſic ſe haberent, frequenter convocata Medicorum conſilia non niſi palliative, ut vocant, agendum eſſe concluſerunt; notabile quid latere ſeſe credere conſtanter faſſi. Remedia igitur hoc ſcopo data, etiam poſthac ſumta, quam olim, accuratius, nunquam emendationem genuere conſtantem. Quæ glutini

mini ac tussi dicata, nullius erant frugis. Quæ ad flatum dissipandos laudamus, apta, multa, ac varia, & efficacissima, usu passim cassa fuere. Ipseque Peruvianus Cortex imminuit quidem, sed non sustulit Febrem; isque alias & debilioris pulsus animator, & frequentioris moderator nullam unquam in consuetu ægri pulsu mutationem produxit. Egregius *Boerhaave* censebat in ejusmodi pulsu Acre adesse, quod moveret validius, & crassum quod minora vasa obstrueret. Acrimonix singularis species nullis unquam signis determinanda fuit, sed suspicionem ejusdem latentis nonnulli tum juvenilis vitæ, tum virilis, formabant errores: Verum nec Mercurius, nec saturata Sarsæ parillæ decocta, quidquam profuerunt.

Atque ita ad vitæ terminum properabatur. Crurum tumor sensim ad genua, femoraque conscendens, prioribus se junxit ærumnis. Sponte sæpe sua, Medicorum hortatu nonnunquam, Sedlicensibus aquis abundanter se purgantibus, depellere has aquas, sed frustra, annisus est. Demum ultimo vitæ mense anxietates, interno in pectore dolores, respiratio nonnihil debilis, appetitus prostratus, explosio flatuum continua; dolor brachiorum vagus, ac tumor; tussis per semihoram & ultra continuans, cum sputis aut serosis, aut mucosis, aut, quod rarius tamen, purulentis; decumbendi impossibilitas, insomnia, vitam fere intolerabilem reddiderunt, metumque, ne forsitan Hydrops pectoris, aut tetrius quid in thorace generaretur, incusserunt. Gravis per ultimum octiduum Peripneumonia densum ac phlogisticum sanguinem iterato pertusa vena ostendit. Tandem anxietatibus auctis, jamque perpetuis expiravit.

Invenimus in Cadavere cranium crassum cum copiosa diploë; sinum longitudinalem vacuum fere; in cranio, supra orbitam dextram, plagam denarii magnitudine cariosam, cui meninges accretæ, ipsum-

sumque eodem in loco cerebrum leviter inde mutatum. Sub pia Matre toto quidem in cerebro, sed in sinistro hemisphærio plus, effusum serum. Piæ Matris vasa turgidiora sanguine, in hemisphærio dextro. Ventriculi superiores fere vacui; plexus choroidæi exsanguis, ac veluti repleti muco. Aëris nonnihil cum paucis admodum cruore in Arteria Cervicali *Willisii*. Et quos in ventriculo quarto plexus choroidæos solemus invenire, horum hic ne reliquias quidem. Nervos opticos ante coalitum quidem æquales, post eundem vero ita inæquales reperiimus, ut sinister ab ipso coalitu, ad usque orbitam, crassitudine dextrum longè superaret. In thorace nullus hydrops, neque pus; pulmones obscure rubri, hinc inde lividi, flaccidi ita, ut hinc inde inter attactum diffuerent fere, at vero nihil omnino purulenti. Asperæ arteriæ annuli cartilaginei plane ossei erant; ossei & illi Bronchiorum: horum priores ad Bronchiorum initia, divisionesque, sua ossea extremitate, sed interna Bronchiorum membrana tecta, intra cavum aëreum, idque pluribus in locis, utrinque prominebant. Cor magnum, sed flaccidum, coagulato cruore utroque in cavo plenum, parietibus suis, ac potissimum sinistris, extenuatum valde, columnis carneis in utraque cavitate instructum exilibus, debilibusque. Valvularum mitralium margines sinistri cordis duræ, fereque osseæ, ex sese genuerunt quandam penitus osseam substantiam, oblongamque eandem, & phalangi primæ digiti minimi magnitudine parem, in cor ipsum sua pendulam gravitate. In Abdomine Ventriculus decem librarum, capta mensura, capax, non crassus. Magnum Omentum. Jecur, Splen, Pancreas, Renes, maxime dexter, debito longe flaccidiores. Copiosa, fusco-flava, Bilis. Ad Genitalia nihil repertum vitiosi.

Ostendit hæc, ni fallor, Historia anatomica abunde

unde id, quod dixeram, posse scilicet esse præsentem in corpore Aneurysmatum causas, citra eorundem symptomata. Cor utroque in cavo flaccidum, extenuatum, extenuatius in sinistro, oportuisset aneurysmaticum fieri. Corpus osseum mole adeo magnum ad mitrales Venæ pulmonalis valvulas intime, lataque basi, nexum, cum sanguine a pulmonibus omni momento in sinistrum cor pulsum, ac proinde hoc cor præternaturaliter irritans, vicissimque contrahente se corde ad valvulas repulsum; corpus, inquam hoc, & cor, & venam pulmonalem, perpetuo irritans, sanguinisque transitum turbans, debuisset necessario hoc cor extenuatum reddere aneurysmaticum, & Venarum pulmonalium communem alveum vehementer varicosum.

Ut causa Aneurysmatis sine effectu, ita Asthmatis, Dyspnœæ, Orthopnœæ, manifestissimas causas, citra horum morborum in vita præsentiam in cadavere experti sumus. Non enim annuli Asperæ arteriæ tantummodo, verum & Bronchiorum vel si mavis intimorum Bronchiorum frustra cartilaginea, plane ossea erant, quæ ad majorum Bronchiorum divisiones intra cavum aëreum notabiliter prominula, cum inspirato, tum expirato aëri, impedimento & offendiculo esse eminentia sua, & coarctatione, debuerunt. Attamen non nisi brevi ante mortem, ab hisce causis, quas longa modo dies generat, quidquam Asthmatici, affinisque illi symptomatibus simile pertulit æger. Interim non advertimus in quinquagenario homine cartilagineorum horum annulorum naturam in osseam mutari, sed solummodo, & nonnunquam, in decrepito senio; ut bene notat incomparabilis *Morgagni lib. 2. Epist. Anat. Med. 15. Artic. 18. pag. 133.* Nihilominus observavimus in ægro nostro Respirationem illibatam, profundam, fortem, lentam, non mutatam a motu

& loquela, constantem; verbo talem, qua meliorem habere nemo mortalium possit. Ergone ossa hæc degenerationis solius invincibilis tussis, non aliorum morborum causa fuit? In hoc homine sic videtur saltem.

Verum & Apoplexiæ variorumque capitis morborum causas idem gessit, quos habuit nunquam. Pauculum seri supra cerebrum effusum, quod integris ejus membranis & crassum esse, & pelluciditate vitreum, videtur; quodque perfectis membranis, tenuis modo lymphæ est; Apoplexiam, Mortes subitaneas, Paralyfes; Convulsiones, sæpe producit, ut me toties Anatome docuit, ut casuum anatomicorum Collectores referunt, ut evidentissimis exemplis, tum *Valsavæ*, tum suis, *Morgagni* demonstravit, *Lib. 1. Epist. Anat. Med. 4.* Equidem affuere ex hisce Convulsiones; sed an hæc inde? Dubitatum fuisse, innui supra, num a viis primis haud oriundæ, quod flatus, ore pulsi, harum paroxysmos constanti lege terminarent. Sed demus neque hinc easdem ortas esse; demus a causis in encephalo agentibus, id quod tam sæpe observamus, Ventriculum fuisse spasmodice affectum; nonne ex Anatome constitit binas notabiles causas, convulsionibus generandis aptas natas, in cranio repertas esse? Serum scilicet effusum pauculum, & caries cranii cum concretione membranarum, & cerebri degeneratione, ad locum cariosum: quarum posterior ad id longe potentior priore adparet.

Interim utraque harum ortas convulsiones credideris, mirari mecum debebis, quod causæ hæc mechanicæ ultimis octo vitæ mensibus integre siluerint. Nunquid vis *Fol. Aurant.* adeo energica, ut causas tales mechanicas liget, ne queant ultra effectus producere suos?

Quam ardua aliquando res, morborum diagnosi! Quam indignum honori artis, velle in ejusmodi consultationibus ob fallaces similitudines aliquid ita propug-

pugnare, ut haud ita sentientium famæ inde detra-
hatur! Mortui sæpe veriora, quam vivi, loquun-
tur.

§. IV. Sed en haud abfimilem casum! Juvenis
28. annorum sicci, &, ut videbatur, spasmodici Asth-
matis, paroxysmis a biennio affligebatur, causæ, præ-
ter nimias forte lucubrationes, ignarus. Consulue-
rat me morbum per annum passus, dein alios, tan-
dem me convenit iterum die 17. Septembris proxime
elapsi. Contigit porro ut eo tempore coram me, plu-
ribusque Studiosis, paroxysmo invaderetur. Sederet
suasi; renuit, mitius sibi esse, citiusque stanti parox-
ysmum terminari, ratus. Respiratio anhelosa, cita,
brevis; nisi ipso eam ita cohibente, & retinente, ut
cuncti horreremus. Unicum in respiratione cohiben-
da solatium situm esse testabatur. Pulsus eodem tem-
pore parvus, tempore rythmoque inæqualis. Spatio
5. aut 6. minutorum terminabatur accessus; post
quem rite valentem se semper agebat. Quandoquidem
selectissimis remediis a variis Medicis præscriptis tan-
to tempore frustra usus esset, autor fui, ut quovis
trihorio aut etiam bihorio fumeret guttulas 5. 6. 7.
cum aqua spiritus salis ammon. cui ad perfectam sa-
turationem additus esset sal succini volatilis; fumeret
autem spiritum hunc sine calce viva paratum, liqui-
dem paratus cum illa, non effervesceret, adeoque
perfectum non indicaret saturationis punctum; no-
tante ita in Chemia sua *Hofmanno*. Bene inde habuit,
usque ad 21. Sept. cum perfecte sanum se perhibens,
circa horam 10. vespertinam paroxysmo correptus,
ad horam dimidiam post mediam noctem expiraret.

Die 24. Sept. Anatomen feci, præsentem Viro Il-
lustrissimo *Mac-neven ô Kelli*, inclytæ Facultatis Me-
dicæ *Pragensis* Directore per universum *Bohemiæ* Re-
gnum, ac Professore, Clarissimo Domino *Pachner*,
Foundationis *Windhagianæ* Physico laudatissimo & cir-
cum-

cumstante magna Studioforum corona.

Pulmo dexter universus pleuræ, diaphragmati, ac jugulo accretus; antèrius ad Sternum quidem levius, ad posteriorem autem inferioremque thoracis partem firmitus, indissolubiliter vero ad jugulum; quin & ipsi inter se mutuo coaluerant lobi. Notabamus autem qua parte lobus superior jugulo cohærebat, inæqualem duritiem, ac tubercula fere cartilaginea, continentia partim pus saniosum, partim duram ac ferme caseosam materiem. Pulmo sinister perfectè sanus, undique liber.

Annuli asperæ arteriæ, Bronchiorumque tum annuli, tum frustra cartilaginea, rigiditate ossæam æmulabantur naturam; ut mecum clari, qui adstabant, Viri, studioforumque seniores, judicabant.

Cor magnum valde. In pericardio aqua modica. In corde utroque, inque vasis majoribus, imo & percissis multis minoribus, fluidissimus, absque vel minima alicubi concretione polyposa, sanguis; contra quam in iteratis toties luctis, & animæ retentionibus, expectari poterat. Cor dextrum tenue valde in parietibus, sinistrum valde crassum, durum, ac rigidum. Capax satis cor dextrum, ut tres digitos junctos, eosdemque fere medios, capere posset; capacissimum adeo sinistrum, ut totus pugnus in eo absconderetur, vertereturque. Copia in utroque fluidi sanguinis, in dextro major.

Aorta arteria ampla valde a basi cordis usque ultra suum ita vocatum angulum; inde parum angustior, sensim denuo dilatabatur in amplitudinem duplo majorem, ad iliacas fere usque; ita quidem, ut ibidem primo longitudine sex latorum digitorum dilatata, tandem solitam capacitatem, Iliacas datura, affectaret.

Ventriculus magnus, altitudinis quidem solitæ, sed duplo majoris latitudinis. Ingens hepar, pondere-

resum, compactum, lobo sinistro suo magnam finistri Epigastrii plagam explens. In vesicula fellea bilis tenuissima, colore ichoris, aut loturæ carniū rubicundioris. Splendurus admodum, figuræ triangularis, angulo acutiore ventriculum contegens. Colon totum contractissimum & vacuum.

Igitur cor dextrum, ratione finistri, parvum, ac debile; cor sinistrum duritie ac densitate non modo robustum, sed non sufficienter flexile atque obsequiosum, capacitate autem aneurysmaticum. Aneurysmatica magna sui portione Aorta. Pulmo in toto latere dextro vicinis partibus concretus, in lobo superiore intime connatus, & tuberculis durissimis ultra medium obfessus. Hæc, inquam, & multa, & capitalia, vitia deteximus, interea dum nulla in vita signa Aneurysmatis sive Cordis, sive Aortæ; nulla signa affecti primario a cohæsione, a corruptione, ab annulorum cartilagineorum rigiditate, pulmonis, comparerent. Et cum causis adeo valentibus morborum tum gravissimorum, tum perpetuorum, non adfuit integro biennio nisi periodicus morbus cum intermedia sanitate, qui similitudinem gessit affectionis spasmodicæ mesochondriacorum forte musculorum; quam detento, dilatato, calefacto, rarefactoque aëre, solvere conabatur.

§. V. Terminarem hanc historiam, nisi obviam eundum foret iis, qui forte mirabuntur, minus versati in Anatomicis, quod inter causas majorum morborum hic videar cohæsionem cum pleura pulmonum collocare. Imitatus fui varios *Sepulcreti anatomici*, ac *Medicinæ septentrionalis* Autores; imitatus etiam *Boerhaviū Instit.* §. 835. Sano autem sensu hæc intelligenda sunt.

In cadaveribus secandis raro deprehendimus liberos ab omni cohæsione pulmones; ut haud inepte *Diemerbroeckius* tertiam aut quartam mortalium partem


tem, hac cohæfione minore majoreve laborantem, suspicatus fuerit; idque sæpenumero sic, ut nulla ejusdem in vita signa, aut suspicio, affuerint. E contrario, in gravissimis, iisdemque annosis pectoris, pulmonisque morbis, nullam, aut vix memorabilem adhæfionem detegimus, ut hoc ipso capite bina observatione constitit. An nihilominus his positis nulli ab hac causa aut possibiles morbi, aut inevitabiles? Difficilius admittunt, qui pulmones pleuræ perpetuo contiguos esse statuunt. Demus autem verius hoc systema esse eo, quod id neget, an ideo cohæfio hæc nunquam morbifica est? An sufficienter considerant illi, quanta intersit differentia inter pulmones pleuræ, exhalante rore intermedio, semper admotos, liberos tamen sanosque; & pulmones sive totos, sive medios, cum pleura unitos, & non raro, eodem rore deficiente, induratos? Equidem ad experimentum provocant, quo toties a morte inventa cohæfio integra, sine ejusdem in vita notato indicio. Sed quærant primo hi diligentius apud casuum collectores num vera narrent? Examinent, num frequentes sint casus connatorum undique pulmonum, cum respiratione in viventibus illibata? Afferere ausim vix paucos inveniendos fore. Hinc 2^{do} dico unico pulmone connato, altero libero; vel datis minoribus utriusque, alterutriusve pulmonis adhæfionibus, videri nonnunquam sic assuescere naturam, ut homines quidem initio male habeant, quales utique novi, deinceps vero assuescant, nec multo ante obitum tempore notas ejusdem exhibeant. Verum an ideo nulli, qui inde male habeant? Et cognovisse me tales puto; & descriptos ab observatoribus ejusmodi casus lego, qui nullam aliam notam læsæ respirationis causam, præter hanc, notent; & magnum *Boerhaavium* hanc etiam morbi recensentem causam deprehendo. Sed tertio, demus tandem inventos in cadaveribus pulmo-

mones undique connatos utrosque, respiratione in vita neutiquam læsa, qualem unum, alterumve casum ipse descripsi, an ideo integra hæc concretio ex morborum erit expungenda causis? Anatome detexit cerebrum cum membranis suis æque exacte implere calvariam, quam pulmones, secundum multorum sententiam, exacte semper repleant thoracem: Ergone connata pia meninx cum dura, arctiusque hæc cum illa concreta, nunquam venient inter causas recensendæ morborum? Præsertim cum ex anatomicis constet hæc sic gesta in vita fuisse, nullis comparentibus signis? Certe & inculpate hæc tolerata fuisse novi; sed simul, aut Apoplexiæ, aut Epilepsiæ, aut Convulsionis, aut Maniæ, aliorumve capitis nervorumque morborum, unicam extitisse detexi a morte causam. Pericardium secundum *Halleri* in *Addendis* ad *Tom. I. Elem. Phys.* sententiam, exacte tegitur perpetuo a superficie cordis, „ nisi „ quantum tenuis aquula intercedat; an ideo pericardium cum corde concretum nunquam extiterit cordis palpitantis, aliorumve morborum, origo? Experientia mea in cadaveribus propria, notisque a scriptoribus casibus, novi & inculpate quandoque nunc cordis cum pericardio coalitum toleratum, at sæpius non, nisi cum vita penitus miseranda, gestum.

Si tamen quis a me petierit quid causæ credam, cur hos pulmonum, cerebri meningum, pericardii, coalitus, hi inculpate ferant, graviter illi? respondeo quidem in genere, ut supra, videri nonnullos sic ærumnarum assuescere causis, ut validis vitæ viribus easdem superent: alios vero esse, quibus vita imbecillior nequeat earundem causarum suffocare activitatem; attamen insufficientem ad plures casus solvendo hanc responsionem esse facile quisque perspiciat, qui mecum considerat historias ab autoribus,

ribus, & etiam a me *Tom. I. & Part. VI.* hujus operis, communicatas, quæ pro omni responsione doceant nostram crassam vitæ humanæ, ejusdemque latitudinis, ignorantiam. Videantur in hanc rem *Vindiciæ* meæ contra *Hallerum*, a pag. 232. ad 236.

Tandem ex hisce & innumeris tum in Partibus prioribus, tum a casuum collectoribus recensitis, sectionibus anatomicis, evidenter capimus causas mechanicas, fixas, validas, diuturnas, perennium morborum, in corpore humano latere, quæ vel nunquam in actum ducantur, vel per paroxysmos duntaxat, vel etiam perpetuos generent morbos: unde qui malo non perpetuo perpetuas negaret causas, sæpe vehementer falleretur. Causæ hæ perpetuæ, si morbum continuant, proægumenæ simul & procatarcticæ causæ vicem gerunt; sin vero intermittentem, videntur proægumenæ præsentibus sæpe carere procatarcticis. Cur autem causæ completæ & proximæ, vere existentes, morbum non generent, ad hoc supra respondi.



C A P U T XVI.

De Hydrope Cystico, & Hydatibus.

- §. I. Repetitur mirus feminae morbus, qui longe lateque descriptus Tomo I. cap. 31. & Part. V. cap. 2. §. 4. ac tandem ejusdem additur per mortem finis. Stupenda Anatome, doctrinam illustrans de Hydatibus. Quæstio de usu ac natura ventriculorum superiorum cerebri. §. II. Fecur scirrhosum in vita visum, a morte inventum est mirifice hydaticum. §. III. Binæ Hydatides Mammarum, quas scirrhi in cancerum vergentis larva nobis imposuisse, ipsa chirurgi-

ea enucleatio nos docuit. §. IV. Glandula ingens Thyroidæa, præter quodcumque fere genus tumorum, exhibuit nobis quoque ingentes Hydatidas, aquosas, ichthiosas, saniosas, sanguineas. §. V. Induratos glandularum, partiumque glandulosarum, tumores, haud raro mentiri naturam scrophulosam, scirrhosamve, variis exemplis, tum a Clarissimo Morgagni, tum a propria experientia petitis, demonstratur. §. VI. Mirandæ origo Hydatidum in Viro, quæ specie Herniæ inguinalis incompletæ, scirrhorumve in ventre tumorum, nos luserat, Anatome detecta. §. VII. Examen universæ de Hydatidibus doctrinæ, quæ tandem apparet potius quid non sit Hydatis, quam quid sit, exposuisse §. VIII. Caduntur ex cunctis hucusque enarratis Theoremata decem pathologica, & præctica.

§. I. **I**n variis hujus operis partibus multus fui, longusque, in hoc articulo; talis denuo futurus, eo quod similium observationum finis nunquam detur.

Inchoabo a retexendo filo, quod abruptum fuit *Parte V. cap. 2. §. 4.* quandoquidem feminæ hujus calamitatibus mors finem imposuit, adeoque causas morbi obscurioris rimandi fecit copiam.

Anni 1760. autumnum, maximamque hyemis partem, incommode ac misere citra auxilium transegit, quia auxilium noluit. Anno 1761. Febr. 3. me iterum convenit, monstroso plane, ac veluti in acumen prominulo ventre, citra vel minimam, excepta exigua sinistri Epigastrii plaga, fluctuationem.

Tertiam Paracentesin petivit. Diu super illa inter nos deliberantes, dubii pependimus. Constabat enim ex prioribus & Abdominis laborare, & Cystidis hydrope. Hydrops abdominis autem nunc, ut dixi, fluctuatione vix percipiendus erat. Interim

T

urfit

urfit adeo vitalis indicatio, adeo proxime suffocanda mulier nobis visa est, adeo anxietates arcebant somnum, ut integris septem septimanis oculis non vidisset illum, adeo denique citam operationem a nobis per DEUM flagitabat, ut paracentesin demum eo epigastrii a latere umbilici loco, in quo levem fluctuationem nos percepisse supra monui, instituerimus; ea videlicet spe, ut aquæ hydropicæ abdominis certo quodam corporis positu, lenique abdominis ab inferioribus eo ducta directaque pressione, hinc totæ effluerent.

Spes autem hæc fefellit nos. Qui locus fluctuare nobis visus, is verus faccus fuit, plenus humore glutinoso, tres pollices profundus, nec fere quidquam, præ tenacitate effundens.

Porro infelix nostrum conamen incussit nobis metum, ne ad aperturam, id quod in similibus solemne, Gangræna fieret. Hinc tussi quidem mistura cum Oxym. sq. prospexi, Gangrænæ autem Cortice. Unde sola Gangræna averruncabatur, cetera vero symptomata increvere, nausæque ac vomitus frequentissimi, pertinacissimique, una cum deletio penitus appetitu, se prioribus adjunxerunt.

Quod hanc calamitatem unice moderabatur, vinum fuit. Unde per aliquot dies nihil ipsi dedi, quam ovorum vitellos cum vino & aqua conquassatos, pauxilloque tosti panis. Præterea Enema injectum quotidie est. Mirum sane quantopere hinc refocillaretur mulier, quam blando somno inde recrearetur, quamque bonum appetitum, ac digestionem etiam aliorum ciborum inde nancisceretur! Unde lares suos repetere avida, nosocomio dimitti petivit. Abiit 5. Martii.

Tandem, ultimoque, ad 10. Junii reducebatur, ventre tumidissimo, cum ejusdem leviori fluctuantis liquidi verisimilitudine, cum vaginæ prolapsu,

ocu-

oculis ac facie collapsis, pulsu vix percipiundo, jamque in tertium diem continuato vomitu. Vomitu ad sextum diem superato, calamitates reliquæ actæ sunt; ipsaque insomnis, delira, & integro tri-duo cum morte luctata, expiravit Junii 17.

Factu difficilis anatome fuit, eademque adhuc difficilior explicatu. Ita ut qui præsens eandem non viderit, ejusdem legitimam ideam vix formare sibi possit.

Ut in vita, ita in cadavere nihil non extenuatissimum, solo ventre excepto. Animus erat, ablatis integumentis ac musculis, Peritonæum prudentissime aperire; quo in situ immutato & acuminatum tumorem, & totum contemplaremur abdomen. Conamen vero hoc nostrum elusit idem Peritonæum, indissolubiliter, ac frequentissime, cum contentis in ventre partibus, connatum. Pertundendum ergo ubique fuit, eoque facto gelatum flavum, separatis in loculis inclusum, prodiit undecumque. Digitus singulos intrusus in loculos, aliorum loculorum se-pimenta detexit; e quibus pertusis, pressisque, liquor priori similis, præ tenacitate vix fluens, prodiit.

Lento demum, ac tædiofo, fordidoque plane examine, constitit degenerascentem uterum non esse, qui corpus adeo prominens in abdomine produceret, ut forte suspicati *Part. V. pag. 28.* eramus. Uterum enim invenimus mole naturali minorem, vaginam autem ejus elongatam & productam ad altitudinem illam, quæ quatuor digitis latis altior pelvi esset. In latere sinistro Ovarium durius quidem, sed mole non majus, parvaque cum tuba. Uterus apertus facultatem dabat stylo prudenter subeundi orificium Tubæ dextræ, atque ita docuit hanc tubam ad latum ab utero digitum mox abire in saccum ingentem sic, ut totum hoc monstruosum abdomen tam

in sinistro hypogastrio, ac ventre, quam in dextro, expleret. Crassus præterea hic sacculus erat, informis, interne politus, ac glutinosissima sanie repletus.

Deprehendebatur autem idem duos includere tumores; alterum suo in fundo prope uterum, ovalem, depressum, palmæ manus magnitudine parem, polita membrana vestitum, ast loculis simili glutinosa sanie refertis divisum; alterum in suo dextro latere, rotundum, rubrum, tuberosum, biennis pueri pugnum æquantem.

Cum Ovarium dextrum non inveniremus, alterutrum horum tumorum suspicabamur Ovarium esse, verosimilius autem eum, qui utero propior; idque ita contigisse, ut tuba primo Ovario extenso accrevisset, ac postmodum inferiora Ovarii præternaturaliter circumplexa, idem demum intra suum cavum locasset.

Atque hi quidem tumores ii erant, qui in cavo sacco prominebant: ceterum plures cernere erat, minores, majores, unum pugno majorem, intra crassam sacculi substantiam locatos, ob idque internam ejusdem externamque superficiem inæqualem admodum ac tuberosam efficientes. Erant & hi, haud secus, quam priores, sanioso glutine repleti.

Porro in Epigastrio erat sacculi fundus. Dixeram sacculum replere cum dextrum finistrumque hypogastrium, tum ventrem: non replebat tamen spatium anterius circa umbilicum, infraque eundem; spatium, inquam, illud, in quo venter quondam adparens acuminatus, graviditatem mentitus erat, ut *pag. 28. Part. V.* relatum est. Erat igitur in spatio descripto alius peculiaris tumor, magno sacco anterius adnatus, capitis humani magnitudinem æquans, posterius planus, anterius protuberans, compositus quoque numerosissimis Hydatidibus, per sua latera

mutuo accretis, hincque referens totidem separatos oculos, hic tenues, ibi densos, membranis tuberosos, omnes autem tenacissimo glutine, in alio fusciscente, in alio flavescente, alio iterum viridescente, repletos.

Jamque Peritonæum aliud spectaculum dabat. Concreverat siquidem id cum sacco magno, in toto ejusdem ambitu, quo contiguum illi erat; verum ita, ut Peritonæum esse crederet nemo nostrum. Etenim, & qua parte saccum magnum contingebat, & qua reliquum cingebat abdomen, & qua viscera abdominis includebat, gerebat ubique tubercula plurima, quæ in oculos divisa, eandem glutinosam materiem continebant: eorundemque oculorum ope etiam Hydatidibus cum magno illo ac glomerato ad umbilicum tumore intime & commistum, & confusum, deprehendimus.

Vix Intestina cognovimus. Ea quippe, tam crassa, quam tenuia, adeo inter sese commista erant, adeo concreta & connata, ut primo intuitu nihil minus quam intestina referrent. Vera horum ratio erat quod Hydatides in universo Intestinarum ambitu, & in utraque Mesenterii ac Mesocoli superficie excrevissent, inter sese coivissent, ob idque ita omnia intestina inter se mutuo adunassent, conglomerassent, contraxissentque, ut nihil intestinis simile referrent. Sed & Hydatidas easdem glutinosissimus ichor, saniesve, expleverat. Interea mirabamur vesicam urinariam loco locatam suo, ita ut a peritonæo suo in loco servata illa, vagina & sursum excrevisset, uti antea dictum, & deorsum relaxata esset, cum prolapsum formasset; suo tamen cum vesica nexu mansisset immobilis. Forte pondus incumbentis sacci impedivit vesicam sursum pergere, & vaginam sequi: dum e contrario in historia relata *Part. VI. cap. 10. pag. 152.* degenerascens testiculus dexter, re-

cto intestino immoto, vesicam urinariam viri in cristam Ilei sinistri usque dimovisset, adeoque urethram elongasset.

Thoracis angusta valde capacitas. In dextra camera Gibbum Diaphragmatis distabat a summo jugulo digitis latis quatuor, quinque digitis in sinistra. Pulmones nec mali, nec compacti, nec ullibi pleuræ, nisi versus jugulum, accreti. Cor in dextro ventriculo Polypum gerebat magnum, atque album, adscendentem in Arteriam Pulmonalem; in sinistro suo ventriculo duplo minorem, eumque cum alio, qui in Auricula, polypo, connatum.

Vasa Piæ Matris sanguine turgida. Ventriculi laterales, sive superiores cerebri, vix guttulas lymphæ paucas gerebant; egregie licet distenti, magni, fornicati. Quid causæ, cur, ubi omnia in cranio tam plena, ut mox a compressionem externa ablata cerebrum excrescat in fungos, tamen vacuos toties a nobis repertos hos ventriculos non comprimat, non deleat, vis reliqua molis cerebri, sanguinisque appellentis? Cur in vacuis ventriculis Plexus Choroideus non perpetuo aneurysmaticus, varicosus, hydaticus?

Si totam anatomen respiciamus, quid monstri Mortales sæpe sinu alunt suo! Quam frequens mutatio exiguæ tubæ Fallopiianæ in massam enormem, ac prope incognitam! Sed causa, origoque, tot millenarum in quovis viscere, in quavis membranaea parte, Hydatidum, quæ assignanda demum? Confer cum hisce historiam Hydatidum in ventre feminae, *Tomo I. cap. 31. pag. 290.* Obscuram totam hanc Medicinæ partem esse sequentes confirmabunt Historiæ.

§. II Eruditissimus Medicus, nosocomii Hispanici vigilantissimus Physicus, *Hazenohrl*, ejusque solertissimus Assistens *Lasowitz*, 14. Febr. hujus anni,

anni, copiam mihi fecere hepatis hominis, pridie ibidem denati, una cum morbi historia.

Juvenis 24. annorum, tumido Epigastrio quidem toto, in medio autem ac dextro longe tumidiore, a quadriennio laboraverat. Impedimento id tamen non erat, quo minus Chirurgiam addisceret, jamque in Nosocomio Hispanico Assistentis Chirurgiæ munere fungeretur, donec 4. Febr. acute decumbere ceperit. Die febris quinto delirare cepit, inque nonum delirans, obiit.

Nihil lymphæ in tumido ventre, sed jecur monstruosæ molis, ac pluribus veluti scirrhis videbatur obsessum. Horum unum Vir præstantissimus cum suo Assistente aperuerat, cumque insoliti quid ibidem detegeret, Hepar cum reliquis tumoribus intactum ad me mittere decrevit. Igitur ille aperto isto tumore magno, in visceris hujus lobi dextri anteriore parte, utcumque versum lobum minorem sito, mox erumpentem, inque sese infilientem Lympham ad plures, ut putat, mensuras, (inopinato quippe in casu vas ad manum haud erat) stupens vidit. Elapsa autem Lympha, invenit membranam albam, crassam, multis in plagis diaphanam, excavatum in jecinore locum exacte quidem contingentem, verum nullibi adhaerentem illi, cum eove connexam. Hanc loco repositam, una cum Hepate toto ad me misit.

Membranam dixi, quod, qua alia eam voce nominem, non habeo; verum quo sensu alias membranam vocamus, eo sane membrana vocanda non erat. Alba quidem crassaque erat; sed sive bono nudoque oculo, sive microscopio intuebaris, nullis omnino sive vasis sive fibris apparebat composita; ovi albumini ad latam patinam effuso, atque coagulato, quam simillima; lacerabilis ita, ac si cultro quis eam percidisset. Erat etiam lævis, politissimæque excavati jecoris superficies.

Jamque alterum eodem in lobo tumorem aperiens,

deprehendi Hydatidas, non, ut in priore, quæ totum cavum exacte expleret, unicam, sed numerosas, libere fluctuantes, citra vel minimam alicubi adhæſionem, citra ullius pedunculi vestigia, ejus molis inter sese differentiæ, ut minimæ vix lineam in diametro haberent, deinde crescente ordine majores pollicis essent, imo & sesquipollicis diametri.

Cavum tertium in lobo sinistro similes omnino Hydatidas gerebat.

Deinde quarto similes reperii non in cavo hepatis, sed in magno eoque oblongo corpore, quod ad lateris extremi sinistri lobi superiora accretum, figura Lienem referret, quodque tamen Lien non esset; coquod is, in cadavere, separatus ab illo tumore, inventus fuisset. Aquam continuit cum omnis generis Hydatibus.

Quintus locus erat a latere dextro prioris maximi, que cavi, hepar tam profunde excavans, ut pugnus in eo locari posset; isque non, quemadmodum omnes præcedentes, aqua limpida, verum amurca nigra, tactuque arenacea, repletus: membrana porro unica, explens totum cavum, hanc amurcam continebat, lacera hinc inde ac complicata, & ab aspera amurca adhærente valde indurata.

Pars dextra superiorque lobi dextri continebat *Sextum* cavum, priore majus, biloculare, crassa itidem ac pingui amurca plenum.

Vesicula fellea paucam quidem, attamen flavam bilem habuit. Pararuntne Hepatis non excavati portiones hanc bilem? An vera ipsius Cystidis felleæ parata fabrica fuit?

In altero, tertioque, ac quarto cavo, multas hydatidas confractas reperire fuit, unde forte aqua illa, in qua reliquæ integræ libere fluctuarunt. In quinto & sexto nulla aqua, sed amurca.

§. III. Scirrhum in Cancrum vergentem olim cum
dex-

dexterrimo Chirurgo in *Hollandia* enucleaturus, obstupui, ablatis integumentis, inchoatoque enucleationis opere, tumorem subito frangi, & effluente aqua copiosa, totam concidere mammam. Curato vulnere recrevit tumor, qui magnos excitans dolores, ablatus non fuit; femina, nescio a quo morbo, brevi extincta.

Contigit mihi idem *Viennæ*. Doctissimus Chirurgiæ Professor *Leber*, egoque, certo statuebamus verum in Mamma scirrhum adesse, liberumque eundem, & enucleandum. Sub operatione constitit pugni magnitudinis Hydatida esse, quæ a circumcreta, compressuque indurata cellulositate inæquali, scirrho inæqualitatem referret. Habebat pellem externam albam crassam, lacerabilem, nihil omnino aut fibrosam, aut vasculosam, ea de causa non fractam duntaxat, quantumvis debilem, quod ab integumentis & circumcreta indurataque cellulositate æqualiter premeretur. Præter Lympham, qua turgebat, continuit quatuor exiguas hydatidas, liberrimas, pedunculi vestigio omnino carentes.

§. IV. Glandulam Thyroidæam tumentem nonnulli *Austriacorum* habent, plus *Styri*, his magis *Carinthi*, omnium autem minime *Tyrolenses*, amplissimæ salubrisque Provinciæ incolæ; quibus tamen ab Autoribus familiarissima dici solet: hos, inquam, omnium minime eidem obnoxios esse, bis beatam hanc provinciam peragratus, attentus in rem, expertus sum.

In cadavere horrendam mole Thyroidæam glandulam nactus, publice dissecai. Mecum Auditores mirabantur nullum fere genus tumorum dari, quin in hac sola Thyroidæa inveniretur. Hic enim Steatoma, ibi Atheroma, alio in loco Purulentus tumor, in alio Hydaticus, in alio erat coagulatus sanguis, fluidus fere in alio, imo hinc glutine locus plenus e-

rat, alibi calce cum sebo mista, &c. Hæc autem omnia in una eademque Thyroidæa glandula.

§. V. Anno 1757. in *Tom. I. Rat. Med. cap. 20.* varia exempla attuli similium tumorum, maxime in cadavere pueri decennis *pag. ibid. 127.-128.* addidique *pag. 130.* quosdam similium tumorum plane incurabiles esse; alios curari quidem, sed redire; nonnullos vero perfecte curari, non redituros. Curabiliore profecto hydatikos tumores pronuntiabimus, cum fracta aut consumpta pellicula, resorberi lymphæ possit, & membrana hydatica fundi, indurataque cellulositas inflammando, suppurandoque consumi. Sed & omnis forbilis materia, ut puta sanguis, ichor, pus, sanies, aqua, serum, cum forberi a massa humorum possit, collabentes suos tumores exhibere sæpe debet. Unde hi vel sponte, vel post data remedia non raro evanescent, iterum, vel minime, redituri.

Uxori optimi *Morgagni, Epist. 50.* tumor nuci avellanæ par, forma, duritie, magnitudine, subito de nocte evanescit; redit; repente iterum disparet, non rediturus.

Et ejusd. *Epist. n. 27.* „ Ipsam vero glandulam,
 „ Febri nulla prævia, sensim intumescere, & du-
 „ ram fieri, non secus, ac alias in collo subjectas,
 „ cum in strumas grandescunt, nimis omnibus no-
 „ tum est, quibus magnum plerumque negotium fa-
 „ cessunt, Medicis & Chirurgis. Nonnunquam ta-
 „ men longe facilius, quam sperari posset, resolvun-
 „ tur. Sic in septenni Puella *Veneta* Parotidem me-
 „ mini duram factam, ac valde tumentem, nec si-
 „ ne dolore jam tangendam, omni quæ substitit, at-
 „ paulatim quidem, sed penitus, discussa, materie,
 „ ad naturæ modum rediisse, uno, ut vidi inunctio-
 „ nis ex *Oleo Philosophorum* auxilio.

Pergit ille porro: „ De Strumis autem *Valisne-*
 „ rium

„ *rium* nostrum audivi haud semel testantem, cum
 „ rustica mulier filiolum ad ipsum adduxisset stru-
 „ mosam, ipse autem ut pauperculæ, & puellulæ,
 „ nihil nisi vinum tenue sumendum imperasset, in
 „ quo infecta, quæ Asellos vocant, essent macera-
 „ ta, mulierque ex iisdem vel plura, quam ipse di-
 „ xerat, in vinum semper injecisset, plurimasque
 „ urinas sic movisset, exacto mense cum filia redi-
 „ isse, non sine sui admiratione persanata.

Idem *Morgagni Epist.* 50. a n. 31. ad 36. plura
 exempla habet durorum tumorum, a sola materie li-
 quida eosdem extendente. Omnium vero notabilissi-
 mum *Epist.* 29. n. 12.

Similem & nos, hoc ipso ineunte anno, in no-
 socomio habuimus. Mulier quadragenaria, biennio
 antea enixa, suum primo infantem, deinde cum eo-
 dem & alium lactat. Visa aliquantisper id ferre in-
 culcate, demum medio Martio 1761. dolore lateris
 affici cepit, idque in æstatem usque. Ablactato tunc
 infante utroque, venaque tusa, sensim quidem la-
 teris dolorem abivisse ajebat, ambas vero mammas in
 tumores duros, a se mutuo separatos, mammamque
 vehementer extendentes, ac valide demum dolen-
 tes, permutatas esse.

Consilium empiricum adplicandi ad dorsum Nu-
 cistæ folia, ea spe, fore ut inde mammæ emollesce-
 rent, scrupulose sequitur; ita ut trium septimana-
 rum spatio, quinquies die, integrum horum folio-
 rum manipulum dorso admoveat. Cessanti demum ab
 hac adplicatione, tumor in dorso observatur Avella-
 næ magnitudine, quo mole sensim aucto, dolentes
 tumidæque mammæ pedetentim minuebantur; dor-
 sique tumore, binos viriles pugnos exsuperante, ita
 concidisse mammas, ut quæ torosas easdem; formo-
 sasque habere solebat, vix nunc earum exhibere no-
 bis reliquias posset.

Pau-

Pauperrima cum esset, & publicæ instructioni apta censeretur, a Viro Exp. & Practico felicissimo *J. Schreibers* ad nosocomium nostrum missa est, 9. Jan. hujus quem vivimus anni. Accesserat prioribus ærumnis, quod a 14. diebus singultu, tussi, ac meri cruoris sputo frequenter laboraret. Igitur capitis instar tumorem video, eumque a metastatica mammarum materie natum ratus, fluctuantemque in eo deprehendens materiem, pertundi curavi. Copioso pure cum sanguine effluente, vix imminuta apparebat tumoris moles. Plurima cellulositas semilacera indies magnis solvebatur laciniis, concidebatque sic demum tumor, ut sesquimensis spatio curaretur.

Quæstio est utrum sponte Naturæ facta sit materiæ ad dorsum transmigratio, an vi foliorum Nucistæ? Vis aromatica, ac proinde stimulans, his foliis inest: vim solventem, dissipantem, roborantem, legimus iisdem adscriptam esse. Et egregius *Fr. Hoffman* laudat oleum Nucistæ ut paregoricum; & *Essentiam Nucistæ*, cum ea *Croci*, & *Aqua Anhaltina*, pro linimento loci spasmus affecti.

Experimentis iteratis quæstio hæc determinanda est. Interim quod supra relatum, & a *Morgagni* observatum, denuo hic confirmatur: materiem liquidam duras reddentem tumidasque partes, posse vel integre, vel pro parte; ad tempus, vel perpetuo; deferere has partes, & vel novas sibi vias tumoresve formare, vel consuetis corporis viis eliminari.

§. VI. Anno 1744. ineunte, Vir procerus, eufarcos, tenebricosa nocte cadit de Promontorio *Delphensi* in flumen præceps, undaque ægre ereptus, & per summa frigora iter plurium dierum, publicus Reipublicæ Nuntius, prosequutus, tumorem percepit in inguine lævo: quem, quod molestus non esset, celavit integro anni spatio. Anno 1745. inchoante, tumor pollices fere quatuor in majore diametro,

tro, duos in minore, habens, levem finistri cruris cum stuporem creare, tum dolorem, cepit. Cumque jam prava, ut mox patebit, symptomata se jungerent, me cum binis Chirurgis in consilium vocavit. Tumor ipse inveniebatur durus, inæqualis, indolens, sub expansione Aponeurotica obliqui externi musculi veluti ex Abdomine natus, ac partim sursum, partimque deorsum sese extendens. Attactu tumoris vix doluit homo, sed vagas imo in ventre anxietates (sic enim aiebat) passus sæpius est, easque nocte adeo molestas, ut lectum relinquere pluries cogeretur: Alvus vix, nisi vi, mota unquam, urina parca, nausea frequens, vomitus sed parcus idem rarusque; una cum cruris finistri œdemate. Ambigua primum Herniæ femoralis signa, ambigua deinde signa tumoris scirrhusæ prope duritie; tumoris, qui longa radice intra pelvim productus, Intestinum Rectum, & Vesicam urinariam premere videbatur, animos nostros in varia auxilia frustra convertisse facile quisque per se videt. Levia denique animi deliquia accessere, quæ ægrum 25. die, ex quo affueram ipsi, sustulerunt.

In Cadavere invenimus tumorem illum intus cavum, plenum ichore, muco, & puriformi quadam materia, ex inguine continuatum per sinistram pelvis partem, Rectumque inter ac Vesicam interponentem se; &, ut in inguine, ita quoque in pelvi, tumoribus cavis muco, ichore, pure, repletis, constantem. Hydatides præterea duas in sinistro, eodemque admodum magno, Rene, alteram diametri semipollicis, alteram pollicis integri, ambas autem non ad Renem, sed intra ipsius magni Renis corticalem substantiam reconditas. Cætera omnia in corpore bona.

Igitur terror, violentia præcipitis casus, frigusque & tunc, & in itinere deinceps perceptum, Hy-
da-

datidas in Peritonæo generarunt, quæ sensim durioribus callosisque involucris instructæ, nervos & inguinalia vasa, intestinum rectum, vesicam, suis in functionibus turbarunt; quæque, lege consueta, anxietates, nauseas, vomitus, vigilias, leipothymias, ipsamque mortem, demum genuerunt.

Multis igitur observationibus sic collectis atque enarratis, operæ pretium fore videtur in naturam tumorum Cysticorum, præprimis autem Hydatidum, pathologice inquirere.

§. VII. De Hydatidum, non quo sensu *Hippocrates* veterumque plures, sed quo nos eas intelligimus, origine, fabrica, progressu, fuit dudum ab Anatomicis, Medicisque disceptatum; certi tamen quid nunquam adhuc prolatum. Scripsere de Hydatide in *Sepulcreti* Tom. II. *Spigelius*, *Th. Bartholinus*, *Diemerbroeck*, *Etmüller*: in *Actis Acad. Reg. Sc. Paris*. Viri egregii *Maloet*, & *Morand*; in *Actis Edimb.* egregius *Monroo*, *Comment. Literaria Norimbergensia*; & sparsim plures, ut *Warthon*, peculiari tractatu *Bidloo*, *Hofmannus* quoque, & egregius *Boerhaave* in *Epist. de Glandulis ad Ruischium*, ut etiam dissertatione peculiari doctissimus *Grashuis*: præterquam quod nonnulli Græcorum Medicinæ parentum earundem meminerint.

Collectis horum omnium sententiis, fuere Imo, qui a degenerascentibus ipsis glandulis Hydatidum deduxerint originem. Non sufficienter hæc sententia experimentis fulcitur. Dum in glandulosa fabrica humor contentus est, degenerem fabricam glandulæ detegimus, & in cadavere maxime: in plerisque autem Hydatidibus, quarum data historia a nobis fuit, nihil similis fabricæ detectum est, imo prorsus contrarium. Id porro huic sententiæ concedemus, quod glandulæ sæpius inventæ fuerunt a materia aquosa, ichorosa, sanguinea, purulenta, saniosa, distentæ,

at-

atque induratae; haud vero id, quod omnis tumor, quem aqua, aliusve enarratorum humorum implet, distenditque, glandula fit.

II^{da} Sententia illorum est, qui nasci hydatidas in vasis Lymphaticis credant sicque generari, ut tale vas inter singulas quasque, quibus scatet, valvulas, in globum extendatur; dum nempe ab obstaculo quocumque Lympha opposito motu remeat, sicque ipsa sibi viam claudit. Censeo hoc modo non nisi unicam posse Hydatidem nasci, & non ingentes illos, sive Hydatidum racemos, quales uterus non raro format, emittitque, sive innumeras illas solitarias Hydatidas. Etenim reflua contrario sensu Lympha, dum unam erigit valvulam, simul sibi viam ad reliquas valvulas præcludit.

III^{ta} Sententia vermes ad Hydatidas fabricandas necessarios credit. Verminosa Pathologia, luxuriantis ingenii fætus, hypothesebus innumeris nixa, probata nunquam, nisi paucis experimentis, quæ, ut recte monet *Morgagni*, ad casus peculiares, haud vero ad universam Pathologiam spectent; hæc, inquam toties resuscitata, & sponte corruens, etiam hic ejusmodi fortem nacta est, ut fere nemo posthac fuerit, qui hypothesein hanc, de origine Hydatidum ab uno, alterove aut fictam, aut resuscitatam, tueri ausus fuerit.

IV^{ta} Sententia fert valvulas Lymphaticorum vasorum, dum Lympha contrario nisu per illa fluere cogitur, impleri ab eadem, & turgere: Lympham hanc stagnantem lentiores, tenacioresque partes, a suo centro ad circumferentiam pellere; nasci sic membranam externam illam: præterea vero ab intestino motu ejusdem Lymphæ, in hoc semel formato cavo, produci a loco quopiam, ceu centro, quemdam motum, qui motus, dum ab illo, ceu centro, ducit crassiora, simul ad aliquam ab illo centro distantiam

tiam format novam rotundamque pellem; adeoque sic rationem se dare credunt Hydatidum minorum, in majore liberè fluctuantium.

Ingeniose sane hi: utinam tam vere! Ac primo quidem tria, quatuorve, simul supponunt, absque ullo argumento, quo vel unum suppositum firment. Deinde Hydatidas credunt inter quasque Lymphaticorum vasorum valvulas, eo, quo explicuere modo, formari. Ergo haberent semper degenerascentem membranam, in eaque fibras, vasaque, pro extremo involucro. Cur ergo toties & liberè fluctuantes Hydatidas, & Hydatidas majores, in quibus cæteræ innatent, invenimus haud alio involucro donatas, quam illi simili, quod a coagulante se ovi albumine, album, scissile, minime vasculosum, fibrosumve, formatur? Si hoc pro se assumserint, asseruerintque id inde probari, quod supra de generatione mira involucrorum Hydatidum dixerant; unicuique modo, quod regeram, habeo: Demus paulisper illis hanc involucri nativitatem; vel ipsum vas lymphaticum, in quo hydatis eo modo formatur, constanti lege involucrum hydaticum circumdabit; vel hydatis formata findet suum vas lymphaticum, & cadet: Si hoc ultimum statuunt, rogo 1. cur nunquam ibidem, ubi hydatides in viscere excavato invenimus, simul invenimus, vasorum Lymphaticorum, præternaturaliter & extensorum, & diffractorum, exuvias? reliquias? vestigia aliqua? Rogo 2. si hydatis frangendo vas suum lymphaticum se liberat, quomodo demum millenos hydatidum explicabunt racemos? Et tandem quod ad 2. sententiam dixi, id hic convenit: si a retrogrado Lymphæ motu, pressaque valvula, hydatis fit, non fiet unquam in toto illo vase nisi unica: via ad cæteras valvulas præclusa, crecta una.

V^{ta} Sententia, ob ineluctabiles priorum Sententia-

tia-

tiarum difficultates, in cellulis membranæ adiposæ aut cellulosæ hydatidum ponit originem. Et graves quidem in arte Viri hanc sententiam amplectuntur. Tum quod cellulositas major minorve ubique reperitur, ubi inventæ hydatides. Tum quod videantur in cellulosa substantia nonnunquam cellulæ, quarum aliæ pus, aliæ aquam, aliæ sebum, gelatum, &c. gerunt, sicque hydatidum intellectum facilitare videntur. Tum denique, quod cellulæ adiposæ videantur habere in sese minores cellulas, ac veluti sepi-menta, ad explicandas hydatidas, in hydatide inventas, apta nata.

Verum & maximis hæc sententia est implicita difficultatibus. Sumamus generata in hac membrana Hordeola dicta, sumamus Atheromata, Steatomata, Melicerides, &c. an unquam quis vidit involucra horum, quemadmodum ea, quæ descripsi, Hydatidum, cocto albumini ovi similia colore, consistentia, crassitie, dilacerabilitate facili & abrupta?

Quamvis igitur a sex mille ferme annis occasiones videndi Hydatidas mortales habuerint; & quidem primo in pecore, quod ab origine mundi Deo offerendum, primo, num quid morbofi non haberet, lustrandum esset; deinde tum in pecore ad usus philosophicos adhibito; tum in hominibus, qui vel ad durabilem condituram post mortem præparabantur, vel ad usus anatomicos, pathologicosque lustrabantur: quamvis, inquam, gens humana per numerosa adeo sæcula Hydatidas frequentissimas viderit, nihil tamen certi, quam certas observationes, habet; meliusque, quid non sint, quam quid sint, docere potest. Ita ut in theoretica contemplatione Hydatidum nos doctiores non reperiamus, quam ante mille pluresque præterea centenos annos se fatebatur *Aretæus Cappadox Lib. 2. de caus. diut. morb. Cap. 1.* ubi historia Hydatidum in abdomine repertarum relata.

„ Unde, inquit, id genus vesiculæ eruperint, via
 „ haud facile reperitur - - - & qualis sit ipsarum
 „ generationis modus, quid dicam, nihil certi ha-
 beo.

§. VIII. Nihilominus ea quæ certa observando
 novimus, hæc Pathologicos in usus nos multa do-
 cent.

Ac primo quidem Hydatidas plerumque ab ejus-
 modi continente materia formari, quæ ni undique
 partibus sive solidis, sive fluidis, fulciretur æqua-
 liter, dissiliret, contentumque effunderet humorem.

2^{do} Generari sic in corpore humano corpora or-
 ganica morbosa, quæ sive fibrosæ, sive vasculosæ
 naturæ, ne vel minimam quidem umbram habent.
 Bis modo *Morgagni* vasa videre sibi visus est; raro &
 in paucis, vasa detexi ego: in centenis millenisque
 nulla vidi. Vicina cellulofitas degenerascens, atque
 adhærens, imponere potest, ut falso habeatur pro
 vero Hydatidis involucro.

3^{to} Non semper pellucidam in hydatide inveniri
 materiem, sed quoque haud raro glutinosam, vix
 fluidam, vix ductilem, deinde ichorosam, saniosam,
 purulentam, imo terrestrem, ut continentem suam
 tunicam incrustet, induret; colore denique albam
 aut flavam, aut fuscam, aut plane viridem, aut e-
 tiam nigram.

4^{to} Hydatidas vel racematim inter sese, divisim
 tamen, cohærere, pedunculo pendulas, haud raro
 oblongas, atque pyriformes; vel solitarias, liberas-
 que hærentes, sive in majori Hydatide in viscere
 aliquo, sive in cavo abdominis; vel denique com-
 plures Hydatidas mutuis concrefcere lateribus, ut
 favo apum, quam Hydatidibus, similiores sint.

5^{to} Inertem bullam aquosam, levi digiti attactu
 destruendam, ejus esse potentia, ut crescendo, a
 sese removeat compactam viscerum massam, & qui-
 dem

dem duram adeo, ut illa Hepatis est. An pro dilatatrice causa necessariam fingemus animam, quemadmodum eam necessariam esse, ut uterus, ovulo in eodem hærente, distendatur, *Stablianorum* quibusdam placuit? Utique nostro in casu petulans hæc anima condemnanda valde, & castiganda foret. Sufficiat nobis observata physica alia haberi, quæ a *Mariotte*, *Boerhaave*, *S' Gravezande*, *Musschenbroek*, ex-culta, a nonnullis vero male intellecta, pejusque ad-plicata, egregiam suppeditent hujus phænomeni ex-plicationem.

6^{to} Nullam omnino nostro in corpore partem, plagamve, dari, quæ ab hoc morbo immunis præstari queat. In Utero, in Ovario, in Tuba, in Intestinis, in Hepate, in Renibus, in Peritonæo, in Omento, in Pulmonibus, in Plexu Choroideo, in Mammis, in Genu, in Glandula thyroidæa, in Glandulis colli, vidi ipse: in longe numerosioribus partibus, imo in ipsa cordis substantia, optimus vidit *Morgagni*.

7^{mo} Non modo in partibus cæterum naturaliter constitutis, verum etiam ita degenerascentibus, ut monstra potius, quam partem corporis referant, Hydatidas inveniri, ut abunde docuit hujus capituli §. I.

8^{vo} Sponte sæpe easdem rumpi, ruptasque demum in viscerum superficie cicatricem adeo naturalem relinquere, ut quisque facile juraret vulnere olim ibidem inflicto natam hanc cicatricem esse: quemadmodum in cadaveribus rem invenit *Morgagni*. Unde serio animadvertit in Medicos & Chirurgos, qui, inventa cicatricula, publice testati sint cor gravi vulnere quondam laborasse, aut Uterum, aut Jecur, &c. Hinc prudentiæ esse, si quis simile quidpiam in *contenta* parte deprehendat, ut simul cicatricis vestigia quærat in parte *continente*, antequam contentam illam partem vulnere quondam affectam fuisse asseveret.

9^{no} Cum similitudo tanta sit inter Hydatidas, Athe-

romata, Steatomata, Scirrhus, & Cancros, tum quod durities sæpe æqualis sit; tum quod degenerascens cellulofitas inæqualitate & duritie tumores duros & inæquales, & asperos referat, qui tamen minime scirrhusi sint; tum denique quod tumor quicumque, pre-mendonervos, dolores excitet: hinc ab una parte prudenter & caute procedendum esse in definienda, determinandaque natura tumoris, ab altera parte nihil certius esse, quam quod vel errantem nostram vel dubiam sententiam, dies corrigat vivo adhuc homine, qui tumorem habet, aut denato saltem.

10^{mo} Hydropas, cum multis hydatidibus junctos, si ex casuum, morte alias detectorum, similitudine, suspicamur adesse, nec remediis internis, nec paracentesi, curabiles esse; excepto forte uno alterove, qui narratur, casu: hinc cum vitalis indicatio præprimis hic urgeat, cavendum esse a remediis drasticis, ne vires concidant; & evacuantibus paucis, maximeque regimine roborante, vitam quoad ejus fieri possit, protrahendam esse. Hinc forte haud penitus ineptam hanc regulam esse: "Is Hydrops omnium maxime curabilis est, qui omnibus suis signis manifestus ab Hippocrate Libro 2. *Prorrhetic. Edit. Foës. pag. 89.*" describitur: signis, inquam, perfectæ atque illibatæ sanitatis, excepto solo Hydrope. Novi equidem durum, quinimo ridiculum nonnullis videri Hippocratem sibi tot illæsas functiones reservantem, ad bonam formandam in Hydrope prognosin, ut rari profecto dentur, de quibus bene augurari liceret, Hydropici: neque me latet vel ideo pluribus Hippocratem vituperari, quod ipsi horum complures vel tuto, jucunde, brevique, veletiam nonnullos laboriose, ab hoc morbo restituerint, quibus vix media affuisset pars earum, quas requisiverat Cous, conditionum: novi, inquam, hæc omnia; nihilominus velint, nolintque illi, tandem mecum fateantur necesse est:

nunquam fere turpius auguria nostra ab eventu derideri, quam in Hydrope: adeoque nihil eo esse certius, quam Hydropicos eo esse curabiliore, quo pluribus functionibus gaudeant illibatis; & vice versa, eosdem eo plus subire discriminis, quo illarum plures læsas habeant. Atque hoc totum, hoc unicum, quod magnus sibi voluerit *Hippocrates*. Quapropter si Hydrops hominem multum lædat; si neque remediis, neque auxilio paracenteseos obaudiat; si redeat, curatus quantumvis visus; si post punctiorem æger ventrem tumidulum servet, idque maxime inæqualiter; si vires haud constanter emendentur; &c. justus Medicorum metus est, ne palliativa tota fuerit, quæ facta sit, cura; ne viscera siue valdopere, siue irreparabiliter, obstructa, indurata, scirrhusave sint; ne faccati tumores, ne præprimis legio adsit Hydatidum. Cumque in his omnibus aut magnum in curando laborem in nonnullis, aut curam absolutam in pluribus nullam, Medici experiantur, jure utique merito *Hippocrates*, quo fausta caneret, tot requisivit conditiones.

Proderit profecto hæc nobis observatio, ut haud illos imitemur, qui continuo in Hydrope pertinacior nihil non tentantes, debiles aliunde ægrorum vires ultra projiciant, atque eosdem, ut ita dicam, ante fata necent; sed meliora ab *Hippocrate*, Virisque *Hippocraticis*, edocti, eam in dandis, adplicandisque auxiliis prudentiam adhibeamus, qua viribus, præprimisque Vitalibus, religiosissime parcamus.

De Intestino in Inguine perforato, & Excrementis inde foras expulsis.

§. I. *Vulnera aut Sphaceli Intestinorum tam simplicia, quam cum jactura substantiæ, sæpe letalia, non raro curabilia, sive cum labefactata deinceps sanitate, sive cum eadem præterpropter integra. Casus enarratur femine, quæ inflammatione, dein Sphacelo Inguinis laborans, omnia Ilei morbi symptomata patitur; apertoque deinde Inguine fæces, ac semicocta alimenta, inde emisit. Circa trihorium a comestione elapsum, solidiora alimenta colore ac consistentia sua ad ulcus manifestant se. Ipsum intestinum Ileum apertum esse verosimile est. Demonstratur Ileum ad magnam a Colo distantiam stercora gerere, ita quidem, ut libram Mercurii vivi, pridie poti, stercorum sustineat obstaculo. Vis valvulae Tulpianæ aboletur nonnunquam sic, ut stercora & clysmata ore expellantur, & ut nihilominus in vivis maneat homo, integreque convalescat. Diagnos morbi. Prognosis sequitur; sed ad eandem formandam Hippocrates consulitur. Ad Hippocratis sententiam examinandam, in opem vocatur experientia Medicorum.* §. II. *Unde primum referuntur ex Vatero tres casus, quorum unum Coli, duos Ilei esse, suspicio est, integra tribus redeunte sanitate.* §. III. *Deinde casus Falchii apud Juch in Colo obtinens, cum curatione imperfecta.* §. IV. *Malavalus binos refert casus, alterum affecti intestini tenuis, alterum crassi, cum perfecta cura: meminitque audacis Agyrtae, ad faciliorem herniæ introductionem intestina incidentis.* §. V. *Seidelius a Schenckio laudatur, ut morbi similis, Ileum forte occupantis, curam integram referens.* §. VI. *Ramdohr apud Heisterum hominem integre curat, latam portionem Gangrænosi Intestini abscindendo, & abscissas utrimque oras ad se mutuo adducen-*

ducendo, uniendoque. §. VII. Albini miles 20. annis a vulnerato Colo elapsis, apertum id in Epigastrio sinistro exhibet. §. VIII. Idemque monstrat miles Bouchardi, tertio anno a suscepto vulnere. §. IX. Kalschmidii homo a gangræna Ilei curatur cum ano adscititia. §. X. Notabilis per omnia casus Pfaffii, cum integra cura, quamvis Ileum variis vicibus pessime affectum visum. §. XI. Maichanquez singulari arte curat Ilei vulnus. §. XII. Mangetus integram curam describit Intestini sclopeti majoris globo perfossi. §. XIII. Idem N. C. referunt a globis tribus. §. XIV. Mangetus narrat ex Ileo hernioso, pro Bubonocèle aperto, alterum periisse, alterum integre curatum fuisse. §. XV. Wagnerus quadruplicem curam refert. Ileo intestino in 2. vel 3. vulnerato viso. §. XVI. Spöring similiter. §. XVII. In Acad. Reg. Sc. Par. integra cura fit, partim excisso, partim a natura separato Intestino tenui, ad octo latos digitos. §. XVIII. Mira historia separatæ magnæ Coli portionis, valetudine integra succedente, Autore Magnifico Kestler. §. XIX. Ex neglecta Hernia inguinali perforatio, & transsudatio fæcalis, vita salva, sed imperfecta. §. XX. Modus exponitur, quo ejusmodi aperturæ solent in inguine nasci. §. XXI. Dilata hucusque prognosis ægræ nostræ tandem fit, & Hippocrates vindicatur. §. XXII. Indicatio, & cura. §. XXIII. Mira circa tussim. §. XXIV. Multi ægri in Nosocomio pinguescunt.

§. I. **V**ulnera Intestinorum simplicia per sæpe letalia esse, certissimis constat omnium sæculorum testimoniis: at vero eadem hæc, simplicia non modo, verum etiam cum notabiliore eorundem portionis jactura, sive integre curabilia esse, sive cum labefactata plus minus sanitate, experimentis comperimus.

Latus differendi se hic nobis aperit, spatiosusque campus! Porro ut commodè atque utiliter spatiemur, duce utamur notabili casu, quem nostrum nobis nosocomium suppeditavit.

Femina 37. annorum, rarioribus, hisque levioribus, hysterice passionibus exceptis, illibata valetudine perpetuo usa, beato partu ter felix, & a quinquennio, ex quo non peperit, rite menstruans, secundo die Februarii, ultimo elapsi, enarrando nunc morbo corripitur.

Scilicet sana surrexit, elapsa autem una alterave hora subito Hypogastrii dolore corripitur; cujus causam errore quopiam se posuisse negat: neque enim suillas carnes, pridie moderate captas, una cum sale conditis rapis, edulii genus utique haud insuetum sibi, tanti causam doloris credere se posse. Dolori se calor junxit, clausaque integro quatrinduo alvus. Quarto morbi die vomitus, isque assumptorum, accessit. Vocatus tunc demum Medicus, venam illico jubet in pede tundi, potumque purgantem, tribus vicibus exhaustiendum, præscripsit: at vero hunc revomit actutum; moxque dein stercorea vomit. Interim cum tempus menstruum adesset, menses suos solitis suis sex diebus hoc tempore passa est.

Vomitum stercoris detestabilem, tum ore percepit continuo ægra, tum horruit in excipulo sæpius evacuando maritus. Porro nunc primum advertit parvum inguinis dextræ tumorem.

Febr. 8. alvus pauca, exhibito pulvere, successit; & bis iterum secta vena auctus in inguine tumor est, quem herniam esse Medicus censet. Vocati autem duo Balneatores herniam esse negant, sed alius, incerti scilicet, generis, tumorem declarantes, emolliens cataplasma, sæpe renovandum, suadent.

Cum a secundo cataplasmate, nimium calente,
in-

inguen veluti ureretur, credit in pejus actum cum tumore esse. Saltem pergentibus cunctis symptomatibus, ipsoque vomitu stercoreo, tumor inguinis 14. Febr. nocte ruptus est, fuditque primo oleum lini, quod enemate injectum ad unc. iv. fuerat, deinde materiem foetore stercoream. Atque ab hoc tempore vomitus penitus cessavit. Conati sunt injectis enematibus materiem tam stercoream, quam semicoctam, alimentosamque, ad alvum determinare, sed incasso sæpe labore. Tandem 25. Febr. alvus sponte prodiit, quemadmodum & 26. & 28. Febr.

Hucusque res, me incio, perrexerat, quando egregius Medicus *Schreibers* miserrimam hanc primum invisens, ejusdemque misertus, tum & de publica Studioforum utilitate sollicitus, me convenit, num intra nosocomium suscipere illam vellem, proponens? Extemplo afferendam jussi; ita ut 28. Febr. ante vespertas allatam jam examinarem, deprehenderemque viribus ac pulsu debilem, cætera bene valentem, & appetitu gaudentem. Aderantque ad vulneris labia cibi semicocti. Digni porro a vulnere spatio, vulvam versus, aliud vulnus detego, quod ipsa mulier ignorabat adesse. Explorando detego hoc vulnus sub musculis communicare cum vulnere primario, haud vero in cavum se penetrare abdominis: vulnus autem primarium, externe pollicis latitudine, oblongum, sensim brevius, angustiusque, in cavum Intestini penetrare; stylumque ab ejusdem externo latere, longitudine digiti, & ultra, ad extremam ossis Ilei cristam pergere, ita ut inter expansionem tendineam, & peritonæum fistula ibidem formata esset.

Vidimus 1. Martii trihorio postquam jus cum farinaceis coctum comedisset; totam vulneris aperturam oppletam his faricaceis; ita tamen, ut pars hæc

esset assumptorum exigua, & alvus prodiret naturalis, bene compacta, fæcalis, colore utcumque grisea.

2. Martii dura copiosaque alvus. Quæ brevi post undecimam comesta Brassica fuerat, in vulnere primum adparuit ad horam pomeridianam secundam, Ita & Radices Dauci 3. Martii. Defuit hoc die alvus. Ad 4. Martii immixtum enema, incredibilem produxit copiam fæcum, colore griseam, partim pultis instar, partim ingentes compactam in massas. Martii 5. & 7. alvus nulla. Ad 6. & 8. clyisma immixtum eduxit copiosam.

Brassicam, & Daucum, & Farinacea juri incocta, vidimus intra trihorium ad vulnus adparere, nunquam autem maturius, quantumvis sæpius vulnus intra id tempus detegeremus. Dubitamus tamen aliquando an non nonnihil prius? Dubio eximendus, dedi ipsi ruberrime tingentem misturam; verum nihil inde ad vulnus. An quod saliva, succis gastrico & enterico, jure carniū, epota aqua, diluta nimis? Hinc alio die post Brassicam dedi elixa Cerasa. Verum & hoc die exacto fere trihorio, non prius, primum Brassica, & elapso præter propter ab assumptione quadrihorio, una cum Brassica exuviæ Cerasorum. Sex ab assumptione elapsis horis denuo pelles Cerasorum.

Quærebatur nunc, quodnam Intestinum vulneratum esset? Tenuene, an Crassum? Ab una parte, Colum perforatum esse excrementa suadebant, quæ a principio de vulnere copiosa, parciora dein, prodierant: suadebat præterea olei lini, in anum injecti, per inguen elapsus.

Verum ab altera parte, breve illud trihorii tempus, quo assumpta in vulnere comparebant, Ileum penetratum esse videbatur innuere. Objici potest continua ad vulnus irritatione, eademque forsitan per

per Intestinorum tractum continuata, res deglutitas veluti sollicitari, quo maturius descenderent. Respondeo me negare minime ab irritamento hoc deglutita citius forte ad hunc locum adparere, adeoque me nihil inde ad physiologiam in sano corpore concludere: sed simul adverto præter celeritatem, etiam deglutitorum immutatam naturam Ilei vulnus potius indicare, idque a Bauhiniana Valvula remotius: præsertim quod ea, quæ alvo reddebantur, bene cocta essent. Etenim demonstravi *Tomo I. pag. 91. & 92.* nonnunquam Intestinum Ileum, ad 2. ad 3. imo fere ad 4. pedum a valvula Coli distantiam, fæcalem colligere materiem. Igitur non repugnat vomitui stercoreo probabilis alias Ilei perforatio: potuit enim is ex materia in Ileo contenta exortus fuisse. Similisque omnino nostra doctissimi *Kalschmidii* ægroto esse videtur, qui in 15. diem Ilei morbi symptomata passus, demum periit, atque a morte exhibuit Intestinum Ileum, ulnæ a Colo distantia, stercore repletum, sic quidem, ut integram Mercurii vivi libram, pridie haustam, exacte sustineret.

Si quis opponat verosimile non videri, ut nostræ feminae in casu, quæ fæcalis materies in Ileo adfuisse supponitur, copiosum vomitum stercoreum per integros novem dies continuasset; tum quod stercoreis in Ileo præsentia rarior sit, tum quod inveniatur, si adsit, parcius; respondeo primo ad casum præsentem exponendum sufficere, ut ejusmodi materies nonnunquam in Ileo adsit; secundo ignorare nos quamnam fæcum copiam Ileum quandoque possit continere. Inveni aliquoties scybala pauca, alia vice sterco liquidum copiosius: *Kalschmidius* vero ad ulnæ a colo distantiam usque repletum Ileum; quæ profecto quantitas vomitum fæcalem pluribus continuare diebus posset.

Sed contra; si cum quantitate & diuturnitate vo-
mi-

mitus stercoracei, jungamus olei lini, enemate injecti, per vulnus exitum, videmur vix posse, nisi in Colo, vulnus locare.

Imo videmur posse. Demonstravi enim Tom. I. in morbis Iliacis Coli valvulam enormi Intestini dilatatione sic aboleri, ut vix reliquias sui superstitites exhibeat; quemadmodum in conservatis Tympanitici intestinis sæpe soleo Medicinæ Studiofis demonstrare. Hinc si habeamus exempla deletæ ita valvulæ, ut e Colo patula in Ileum via sit; si deinde habeamus exempla restitutæ sanitatis etiam post certissimum argumentum deletæ vis valvulæ, quemadmodum historia pueri *Tomo I. pag. 184.* supeditat, nulla est in casu præsentis explicando difficultas, si statuamus inchoante morbo viam hanc præternaturaliter patulam fuisse, per eandemque oleum lini vulnere effluxisse.

DIAGNOSIS proinde patet. Inflammatio valida Intestini Ilei, Peritonæi, Aponeuroseos musculorum obliqui interni, obliqui externi, forsitan etiam transversalis, pessimum Ileum genuit; Inflammatione autem in sphacelum versa, portio intestini Ilei, Peritonæi, Aponeuroseos, Integumentorum, corrupta excidit, reliquitque hoc foramen.

Dubia PROGNOSIS, imo valde prava; tum propter gravissimam in Medicina auctoritatem, tum propter evidentissimam experientiam.

Ac primum quidem magni *Hippocratis* auctoritas prognosin admodum pravam dare jubet. Sed mitigant hanc Autores quamplurimi, eosque inter haud pauci, qui *Hippocratem* hic, si ullibi, infimulent falsi. Neque defendam *Hippocratem* ego, neque condemnabo. Historia medica candide tradita num forsitan quod in Illo obscurum, quod dubium, quod contrarium, adparet, illustratura sit, legitimumque conversura in sensum, sequentia docebunt.

Hip-

Hippocratis igitur *Aphorismus* 18. § 21. *Secl.* 6. sic habent: „Cui perfecta est Vesica, aut Cerebrum, „ aut Cor, aut Septum transversum, aut aliquod „ ex Intestinis tenuibus, aut Ventriculus, aut He- „ par, letale. Si ex Intestinis tenuibus aliquod dis- „ sectum fuerit, non coalescit.

Lindenianam interpretationem sequutus, monendum habeo, *Persectionem*, Διακοπήν, hic *Hippocrati* significare, interprete in hunc locum *Galeno*, Intestini tenuis magnum vulnus, id ad extrema usque dividens, abscindens, integram ejusdem continuitatis solutionem faciens, ἐς τὸ πέρας, ad extremum usque: & quemadmodum *Philothæus*, autor, ut *Lindanus* censet, secundi sæculi, in Comm. ad hunc locum, διὰ βάθος τομήν, sectionem ad profunda, aut per fundum, penetrantem. 2^o Θανατώδεις, & θανάσιμον, haud innuere semper absolutam morbi, vulnerisque, letalitatem, sed etiam non raro eorum aut pravitatem, aut majus minusve periculum. Confer *Aph.* 4. N. 16. cum 5. N. 1. § 4. § 2. N. 1. cum 4. N. 67. Cui lubet multos Aphorismos conferre cum variis *Concarum*, *Prorrheticorum*, *Epidemicorum*, aliorumque *Hippocratis* operum textibus, is de eo, quod hic assero, brevi convincetur.

Ne longus sim, ob idque tædiosus, referendis iis, quæ multi Interpretes, alios alii transcribentes; in hos textus commentati sunt, facta producant duntaxat, quæ Prognosin longe firmiorem formabunt, quam omnia illa opinionum commenta; quæque forsan veritatem, *Hippocratis* stantem a parte, demonstrabunt. Nec referam, quippe ad rem nihil facientes, quæ multiplices enarrantur, Cultrivororum, Insectivororumque historias; cum suspecta sit fides multarum: uti neque casus illos, qui numerosi & apud Autores extant, & quotidiana experientia confirmantur, mortis post vulnerata inte-
stina,

stina, maxime tenuia, observatae; siquidem id genus vulnera periculi plena esse apud omnes in confesso est.

§. II. Eximius *Vaterus*, merito ab incomparabili *Morgagni* in hanc rem laudatus, refert 28. annorum hominem, qui & multa sæpe devorasset, & æstuant corpore gelidam bibere copiosam solitus esset, inguinis tumorem advertisse, quem Medicus & Chirurgus Herniam rati, Brachierio atque Emplastris curare anniterentur. Aucto cum pessimis Ilei symptomatibus tumore, *Vaterus*, in opem vocatus, abscessum deprehendit, qui, adhibitis biduo maturantibus, ruptus, primo copiosum pus ingenti cum levamine fudit, sequentibus vero diebus cubitum longos lumbricos, & semicocta alimenta. Spem tamen haud abjiciens *Vaterus*, datis remediis traumaticis, balsamicis, ac roborantibus, vidit demum hominem integræ redditum, constantique sanitati.

Ob rationes antea datas Intestinum Ileum apertum fuisse fit verisimile: addit *Vaterus* integre a se curatam mulierem, cui Colon in inguine apertum esse arbitrabatur: itidem sanatum virum a se fuisse, cui Hernia suppurata, extrorsumque rupta esset.

§. III. In Dissertatione, qua D. *Juch* hasce *Vateri* observationes propugnavit, observatio ex *Cl. Faschio* habetur hominis, qui, in Bubonocèle sphacelata, excrementa alvina, una cum intestini Coli portione, per inguen excrevit, in vivisque, licet imperfectius, mansit. An cum ano factitia?

§. IV. Dissertationum inauguralium de Chirurgia, a solertissimo *Hallero* collectarum, Tomo V. ea *Adriani Malaval* ob binos est memoranda casus.

I^{mo} Feminæ, in Bubonocèles operatione, *Intestinum tenue* de Gangræna suspectum, vino, ejusque spiritu, calefactis irroratur, reponitur. Primo sedantur, tandem silent prorsum prava quæque sympto-

pto-

ptomata, proditque alvus. Decimo vero die, inguine rupto, exeunt continuis 6. vel 7. septimanis excrementa. Attamen consolidatum vulnus est, postque menses binos sat firma restituta valetudo.

2^{do} Mulieri in eadem operatione, eodem cum felici in principio eventu, rumpitur ad 7. diem Intestinum foras, & continuis 15. diebus stercora fudit. Die 20. alvus prodiit, & *Oëtidui* spatio consolidata apertura sanitatem optimam adduxit. Cum nulla ante diem 20. alvus, totoque illo tempore excrementa inguine proflua, perforatum videtur Colon fuisse.

Ad confirmandam ejusmodi vulneris letalitatis negationem, herniaria methodus cujusquam *Circulatoris* enarratur, qua ille ad faciliorem Intestini elapsi introductionem, illud larga incisione aperire solebat.

§. V. Affertur etiam ex *Schenckii* libro tertio *Seidelius*, feminam producens, quæ octavo tumoris inguinalis die primum potum, idque intra *horæ spatium ab eodem assumto*; deinde etiam portiones carnum, ac panis, aliasque alimenti solidioris reliquias, aperto de inguine misit: assumtis autem medicamentis adstringentibus, consolidantibusque, nec non adhibitis vulneri Sarcoticis, primo cibos, tandem & potus, retinuit, *sexque hebdomadam spatio elapso* penitus consolidata apertura, convaluit. *Ileum* penetratum fuisse videtur.

§. VI. Celeberrimus *Heisterus*, ut rem certissimam, narrat in *Chirurgiæ* Cap. 116. *Guelpherbyti* contigisse, ut in incarcerata Hernia Chirurgus Ducalis *Ram-dobr* partem notabilem Gangrænosæ Intestini exscinderet, utraque extrema ad se adduceret, quo exciperent se mutuo, eaque tunc leviter circumligaret: effectum hinc, ut bina hæc extrema coirent, alvusque deinceps naturaliter semper flueret.

§. VII. Celeberrimi ac nobilissimi *Albini* miles, *Adn. Acad. Libr. 2. cap. 8. pag. 31.* cui Colon in præ-
ilo

lio *Rameliensi* vulneratum, mansit quidem vivus, verum elapsis deinceps 20. annis *Albino* adhuc ostendit in sinistra Epigastrii regione suam factitiam alvum, cum tunicæ villosæ prolapsu tam superioris quam inferioris vulnerati Intestini portionis.

§. VIII. Similem prorsus historiam *Mangetus* in *Bibl. Med. Tom. II. pag. 1156.* ex *Bouchardo* refert, ea differentia, ut post tres annos ab inflictio vulnere suum virum is viderit; suum vero militem post 20. annos *Albinus*.

§. IX. Doctissimus *Kalschmidius* in *Act. N. C. Vol. 9. N. 4.* Vetulam profert, quæ antiquæ Herniæ incarcerationem passa, ejusdem operationem octavo demum die subiret; Intestino, (& ut ipse dicit, Ileo,) ita corrupto, ut intolerabili cum fœtore profilirent fæces. Ubi alvus diu nunc podice, nunc inguine prodiiisset, demum post bimestre spatium elapsum, tantummodo quid sanguinis ulcere exivisse; at vero utrum perfecte consolidatum inguen fuerit, an manserit in inguine anus, ex enarratione colligi certo non potest.

§. X. Doctissimus *Pfaffius* *Nov. Act. N. C. Vol. 2. Obs. 12.* hunc notabilem casum refert. Homo 28. annorum biennis herniæ oscheoceles incarcerationem præ nimio messis labore patitur. Binorum Balneatorum laboribus Hernia, quo die morbi non additur, reponitur quidem, verum non cessant Ilei morbi symptomata, atque tunc primum accedens Autor sterco-
ra reperit vomentem. Petitis auxiliis undecumque, mitigat quidem symptomata, alvumque copiosam solvit, verum adeo non tollit morbum, ut tumor, dolorque scroti, & redeuns intolerabilis abdominis cruciatus, quo morbi die non adjungit, oriatur. Gangræna nata, jubet, aperiant tumidum scrotum; e quo mox flatus & excrementa prorumpunt. Balneator altera die plura in parte foraminula per sondam

explorans, invenit in Intestino prope testem nucleos Ceraforum, quorum quadraginta eduxit, sequenti autem die multo plures. Notat porro historia ægrum, reposita primum hernia, copiosa Cerasa una cum nucleis deglutiisse; notat quoque violentam adeo tussim adfuisse, ut prodirent cruenta sputa. Cognito intestini vulnere, enemata ultra non iniecit, omnibus Chirurgis, ut ipse putat, ea tunc condemnantibus, sed Suppositorium immisit, advertitque crassiora alvo, inguine vero tenuiora, prodire. Jamque, nescimus quo die, novus in inguine tumor natus, suppuratus, & arte apertus, tum pus dedit, tum fæces liquidiores: inguine nunc hæc ejiciente, scroti apertura sensim coivit. Novus tandem, isque prior altior, abscessus in inguine observatur, qui apertus, pus, non fæces, fudit: tandem & hoc, & illo, sensim consolidatis, sanitas completa successit.

§. XI. apud *Mangetum Bibl. Med. Tom. II. pag. 524. 525. D. Maichanquez* narrat ex vulnere angustiore, quod uxori inflixerat maritus, demum excrementa prodiisse, dilatato parumper vulnere adpareret, *Intestinum Ileum læsum.* (Digito forte explorando deprehendere potuit canalem angustiores, cellulis carentem,) placuit in casu desperato periculum facere, nec ægra 25. annorum dolores recusabat, modo vita donaretur. Intestinum caute acu alligari curo cuti, recentisque laridi lamella interposita, ut fæcibus alvinis pateret transitus, cutem jungere jubeo; quod & factum; potiones præscribo vulnerarias, quibus ad stuporem curata est, binosque enixa est liberos annis sequentibus.

§. XII. *Mangetus* ibid. pag. 523. ex *Carolo Patino* refert fuisse hominem, cui globo sclopeti majoris abdomine perfosso, prope umbilicum, demum die quinto globus ano ejectus fuerit, & perfecta cura, exacto mensis spatio successerit.

§. XIII. *N. C. Decad. 3. ann. 4.* referunt curam
X
simi.

similem globis tribus ano ejectis; aliamque Rustici, postquam una cum fæcibus nucleos Ceraforum foramine inguinis, sponte aperto, ejecisset.

§. XIV. Et de duobus, quibus Chirurghi pro Bubone aperuerant ipsam Bubonocelem, unus quidem intra paucos dies obiit, alter autem, cui per 14. dies excrementa exierant, *sex septimanarum spatio* integram vulneris consolidationem nactus est: tandemque & tertius, cui ex *cæso punctim Ileo* chylus effluxerat, curatus integre fuit; referente *Hardero* apud *Mang.* ibid.

§. XV. Idemque pag. 530. ex *Wagnero*, qui ex variis id refert autoribus, narrat *Ileum transversim perscissum*, & extra vulnus prolapsum, futura cum vulnere intercedente, penitus coivisse: in alio integram curam observatam esse, post aperturam vermibus erodentibus factam; tandem *Hafniæ* quemdam, erosione etiam a vermibus facta, integre esse curatum; alterumque, cui ex sphæcelata hernia umbil. nuclei prunorum, jam cariosi exivissent.

§. XVI. In *Actis Suecicis Stokh. an. 1746.* notissima mulieris historia est, cui venter rodente & erumpente Tenia sæpius apertus, iterumque ad tempus consolidatus fuerit.

§. XVII. In *Hist. Acad. Reg. Sc. Par. anni 1723.* ex suppurata Hernia Chirurgus suscepit ossa pedis ovilli N. 16. , exciditque gangrænosi intestini portionem latorum quatuor digitorum; similemque circiter portionem, posthac a natura separatam, invenit. Expectabat porro, ni moreretur homo, anum factitiam, verumtamen observans sensim minus inde exire, dedit ipsi alimenta solidiora, & vidit *spatio 33. dierum* inguen clausum.

§. XVIII. Et quid demum de casu cogitandum, observato a magnifico Archiatro *de Kestler*, anno huius sæculi 1729. feminae scilicet, cui in incarcerata Hernia visa esset periisse integra portio, semipedem longa, intestini Coli: claudente nihilominus accu-

rate se apertura, alvoque totis, quibus deinceps vixit, annis naturaliter fluente? Profecto totam a sphacelo separatam Coli portionem, cum exsiccatam eandem, intusque linteo carpto infarctam, sollicite Vir magnificus reservasset, ad me examinandi, ac Studiosis demonstrandi, causa miserat. Ipsum Colon esse, & tota ejusdem substantia, & Ligamenti vestigia, saltem illius tertii, a *Morgagni* & *Winslow* descripti, Mesocolo tecti, & quæ aderat adhuc Mesocoli portio, evidenter docebant. Igitur sollicite scrutabamur qua demum lege notabilis adeo Intestini portio sphacelo solvi, apertoque excidere inguine potuisset, intereaque temporis, non adductis ad se mutuo, ut a libi factum notavimus, utrisque extremis, excrementa a Cœco sic pervenissent ad anum, ut neque anus nasceretur in inguine, neque intra cavum abdomen decideret quidquam?

Res sane nobis incomprehensibilis visa est, nisi concederetur, quæ exciderit, Intestini partem, ejusdem vel tunicam externam esse, remanente interna; vel tunicam esse internam, superstite externa: ut sic, reservata quadam tubi continuitate, excrementa tuto versus anum devolverentur. Verum mox hujus Dilemmatis falsitas apparebat, cum sola interna pars Intestini non habeat ad se accreta ligamenta, nec conatum Mesocolon; cumque externa Intestini portio integra solvi minime potuisset, manente continuitate Coli ope tunicae internæ: neque enim portio hæc separata lata & per medium fissa membrana erat, sed clausum intestinum; quod utique hac forma minime separari potuisset, continuitate tubi intestinalis permanente ope tunicae internæ.

Tandem veram totius phenomeni rationem & causam sic videbamur intelligere: Intestinum inflammatum, qua parte Mesocolo hæret, accubuit Peritonæo in inguine, eidemque accrevit: gangræna in-

cipiente, tunicæ Intestini variæ a se mutuo dissolvantur: gangræna pergente, lata in inguine facta apertura est: ita soluta interna pars intestini, cum *totius* intestini anterioris parte, cum peritonæo cum expansione tendinea, & integumentis, foras prolapsa est. Habet ergo prolapsa portio cavum integrum, a cujus anteriore parte hæret Mesocolon, ligamentum tertium, omniumque Intestini tunicarum portio, & cujus reliqua pars interioribus Intestini tunicis tantummodo componitur.

Sed statuimus antea tempore inflammationis diræ Intestinum Colon, qua parte Mesocolon habet, accubuisse & late concrevisse, cum peritonæo. Necesse igitur fuit ut, prolabente extra inguen interna Intestini parte, cum omnibus concretis partibus a facie ejusdem anteriore, ut, inquam, Colon externa sua parte in ventre integrum, firmiter suæ aperture oris cum peritonæo cohæserit, ita ut nihil in cavum ventrem dilabi potuerit eorum, quæ a Cæci sacco aut Intestinis tenuibus deorsum, anum versus, descendunt.

§. XIX. Sub finem anni 1745. negligens herniam femina incidit in symptomata morbi Ilei, quæ demum aperta alvo brevi evanuerunt. Attamen dum morbum curasse videbamus, aperuit se inguen, fuditque paucam, serosam, flavam, ac subinde vere stercoream materiem. Capto Clariss. *Albini* consilio, laboravi cum Chirurgo novem mensium spatio antequam locus clausus esset; optima interea vigente sanitate. Locus molliore quidem, sed apto admodum Brachierio firmabatur, ne rediret malum. Attamen sex cum dimidio elapsis annis, denuo aperitur, citra symptomata ulla prava, citra stercoream materiem. Nescio, quem finem res habuerit, quum ad ultimam aperturam, illam, cum Patria, reliquerim.

§. XX. Docent omnia hæc exempla ficcatis ab
in-

inflammatione partibus, alterius cum altera cohæsionem fieri, antequam inguen aperiatur: sic quidem sæpe ut nihil in cavum ventrem, sed per inguinis aperturam; eave clausa, per podicem cuncta exeant.

Haud tamen eodem ubique modo. Vulnere instrumento in Abdomen inflicta, plus periculi habent effundendi cavum in ventrem stercoris, & semicocti chyli. Docet id notabile exemplum a *Mangeto*, ut teste autopte, relatum hominis, qui sic triangulari instrumento fauciat, ut vermes excrementaque sinistro inguine exirent, sexto demum post decimum die moriebatur; idque exhibebat præprimis memorandum, quod Intestini Coli labia jam tum undique, firmiterque, & exacte, cum vulneris labiis coïviscent: unde mors unice inde ipsi contigerat, quod fæces intra ventrem pulsæ essent, priusquam perficeretur expositus mox coalitus, sæpe sat cito, ut datis exemplis constitit, contingens.

§. XXI. Atque ita Prognosis, pagina 304. petita, & dilata hucusque, formari demum potuit.

Prognosis igitur primo fert summo semper in periculo eos versari, quibus intestina, potissimumque tenuia, aut vulnerentur, aut gangræna aperiuntur: cum, vel integra aperti Intestini cohæsione cum Peritonæo nondum facta, fæces, crudusve chylus, intra cavum abdomen dilabi, certumque proinde efficere interitum queant; vel etiam, fæcibus quidem extra Inguinis aperturam prorumpentibus, gangræna vero in sphacelum jam conversa, late nimis diffusa per Intestinum corruptio sit. Hacque lege veridicus agnoscitur *Hippocrates*, qui morbum non indiscriminatim Intestini cujusque, sed Intestini *tenuis*, ut determinate utroque in Aphorismo loquitur, *Σαρασιμον*, vel *Σαρατῶδες*, appellans, eum valde periculosum esse indicavit. Confirmant hanc Strages, quas adeo multiplices omni tempore solet descriptus hucusque mor-

bus edere. Et si per διακοπήν intelligere debemus vulnus usque ad fundum omnia penetrans, & dividens, ut supra constitit, etiam vere pronuntiavit Intestinum ipsum post διακοπήν non coalescere libero, ut antea, modo; cum illud facie anteriore uniri cum Peritonæo, & reliquis læsis in vulnere partibus, iisdemque firmari, obturari, supplerique, ex observatis chirurgicis & anatomicis constet. Ut profecto inique admodum in *Hippocratem* ii Autores declamarint, qui numerosi, illum hac assertione vehementer errasse, asseverarint.

2^{do} Eorum, qui inde non pereunt, multos dari, quibus sanitas omnino integra non redeat, aperta manifeste inguinis, ventrisve, alicubi apertura, per quam, ceu anum, natura suas spurcicies, foetore abominabiles, hominemque per omnem vitam humana societate fere privantes, de corpore eliminat.

3^{tio} Horum nonnullis alvum nunquam ultra per anum emitti, imo in Intestinum Rectum & Colum, utpote collapsum, enemata immitti amplius non posse; ut *Vaterus*, *Bleigni*, &c. habent: nonnullis vero manere aliquam sive foecum, sive materiae mucosæ, tenacisve, per Intestinum Rectum excretionem; ut *Acad. Reg. Sc. anni 1701. Platerus, Hildanus, Bleigni, Palfinus, Cheseldenus, Albinus*, viderunt.

4^{to} Reperiri etiam, quos Artifices peritissimi, adductis ad aperturam vulneris ambabus separati Intestini oris, invicemque unitis, atque ad vulnus alligatis, ita percurarunt, ut continuaretur canalis intestinalis a summis ad infima usque, & alvus legem naturali deinceps semper processerit.

5^{to} Passim his, qui integre curati, adeoque ad perfectam sanitatem rediisse perhibentur, Intestinum manere loco læsionis angustius, prætereaque ad locum vulneris adfixum & connatum, ob idque causam pravorum quandoque symptomatum, imo leti
 ipsius

ipsius existere: constare quippe ex historia Medica, & confirmari notabilissimis exemplis, anatome demonstratis, ab egregio *De la Peyronie Tom. 1. Act. Acad. Chir. Par.* truculentissimos dolores Colicos hinc nasci, dum Intestina materie aut flatibus nimium turgeant, spasmisque torqueantur; imo vi spasmorum, aut impletione nimia rerum indigestilium, Intestinum ad locum adhæfionis dilacerari, & abdomen fœcum impletione letali turgere. Accretionem hanc Intestini cum abdominis partibus confirmatam *Heister* vidit, in femina eadem, quæ integre sana ab operatione *Randborii*, (vid. pag. 307.) anno post-hac pleuritide occubuit. Unde id hominum genus semper de hisce præmonendum est. Atque hisce omnibus ita consideratis, clare patebat in femina nostra Prognosis. Vel enim morituram gangræna partis affectæ; vel gangræna abdominis, si forte intestinum in toto vulneris ambitu necdum hæreret exacte cum Peritonæo, ita ut in cavum ventrem fœces a superioribus descendentes, facile & subdole dilaberentur: vel victuram quidem, sed cum molesta in inguine ano: vel curandam integre quidem, attamen cum proægumena permanente causâ variorum morborum, ni caveret sibi, imo & mortis. Videatur super his omnibus Ill. Præses, *Cap. de Vuln. Abd.*

§. XXII. Indicatio fuit vires conservare, auferre impedimenta consolidationis, vulnus purum, atque ab aëre tutum, molle & humidum conservando, alimenta eligendo ea, quæ quotidiana experientia docebat omnium minime per aperturam exire, & alvum propterea liberam clysmatum ope perpetuo servare. Enemata enim, formidanda, ut supra vidimus, quando Colum apertum, necdum agglutinatum est, ne in cavum abdominis cadant, hic tuto injecimus, eo, quod Ileum læsum crederemus.


Vidimus his scopis conferre alimenta facilis digestio-

stionis, & cum consuetudine plebejorum convenientia. Jus carniū præprimis indicatum, omnium maxime vulnere diffuebat; uti &, quæ siti sedandæ necessaria, aqua. Hinc Cerealia, ac Farinacea varia, incocta juribus proderant, & aquæ potus ita moderatus, ut parva admodum copia sumeretur, & sitis potius emulsis sedaretur spissioribus. Usus demum docuit alimenta solidiora, pauca quidem copia simul, sed repetita, omnium maxime ad consolidationem facere. Præsertim si jaceret mulier tota fere die in lecto. Ulcus interea tectum primo fuit cataplasmate emolliente; deinde Emplastro Diachyli cum gummi, superposito cataplasmate, postea emplastro defensivo rubro, tandem eo, quod dicitur *Fernelii ad rupturas*. Tertio mense potuit sine nocumento aliquantum sedere, tandem & surgere, ambulare, operari, sine incommodo. Advertimus porro haud simul & semel ulcus clausum; sed ita, ut primo per 1. 2. dies, dein per 4. vel 7. clausum esse videretur, ac posthac denuo aliquot extillantibus guttulis humesceret. Contigit sic, ut mulier hæc intra binos menses curata dici potuerit, excepto hoc repetente aliquoties stillicidio; curata vero integre perhiberi non potuerit nisi mense inchoante sexto, quando levis hæc ulceris veluti sudatiuncula cessavit, non reditura. Juvit ad integram consolidationem vinum marte & cortice peruviano medicatum.

§. XXIII. Symptomata aliena nulla se junxerunt morbo, toto curæ tempore, nisi tussis, cujus nulla indagari causa potuit, morigera tamen demulcentibus ac paregoricis. In homine *Pfaffi* pag. 308. notavimus tussim molestam atque violentam. Et *Albini* miles pag. 307. tussi vexabatur, quotiescumque aërem frigidiusculum ad nudum Intestinum admisset, nec antequam recaluisse sedanda. Observando

do potius hæc discimus, quam Physiologice explicamus. Neque Intestina, Mensenterium, ac variæ abdominis partes duntaxat, hanc observationem supeditant, verum & aliæ plures. Ventriculi morbi dantur, quos pertinax tussis comitetur; mox his curatis evanida. Et quisnam subinde, meatum auditorium scalpendo, haud tussiat? Acriorem, pertinacior, & ad omnia rebellior tussim observavi nunquam, quam in Puerpera olim; attamen, ejecto pudendis corpore oblongo, calloso, veluti incantamento curatam. In diagnosi, prognosi, ac cura morborum, observationes ejusmodi usum habent. Bis diarrhæam passa est, Rheo, & Lysimachia victam.

§. XXIV. Egressa demum nosocomio est, pinguis & torosa; id quod in ægris nostris toties observantes, minus remediorum vi tribuimus, quam vitæ, ab omni cura & sollicitudine vacuæ, somno pleniori, quieti, optimo alimento.



C A P U T X V I I I.

Varia.

- §. I. *Puellæ, Atresia laborantis, de qua anno 1761. cap. 8. a pag. 115. ad 118. Historia completa.* §. II. *Quædam de utero gravida.* §. III. *De Calorem generantibus causis aliis præter attritum, imo absente attritu.* §. IV. *De Observationibus clinicis Nosocomii.* §. V. *De Febre Hæmorrhoidali, deque Observationibus Nosocomii circa Hæmorrhoidas.* §. VI. *Ad Quæstionem de Bezoardicis remediis, toties a gravissimis Practicis explosam, jamque nihilominus renovatam, Responsio.* §. VII. *Nonnulla de Mistura Viennensibus dicta Hoffmanniana.* §. VIII. *Quædam,*

dam, quæ ad C. XV. §. V. omiffa fuere. §. IX. In quosdam Criticos.

§. I. **Q**uæ *Atresia* laboraverat puellæ historia anno superiore data est, sed incompleta, felici exitu terminata fuit. Tumores in abdomine varii, copiosaque in Vagina callositas, methodo interna, externaque ibidem enarrata, atque ad Octobris circiter exitum continuata, sensim fusa sunt, mensesque rite fluere interea ceperunt: ita ut perfecte sana die 5. Nov. 1761. domum perrexerit, & hoc mense Septembri proxime elapso ob ventriculi vitium me conveniens, testata sit menses sibi copia ac tempore debitos adesse, nullosque aut in ventre tumores, aut nullam ad pudenda superesse callositatem. Novo sane argumento Corticis peruviani præstantiæ; licet enim alia remedia præter hunc dederimus, prout superiore parte descripsi, tamen justo cuique rerum æstimatori evidenter adparebit Cortici potissimum adscribendam victoriam esse.

§. II. Cum anno superiore de viscerum cavorum dilatatione agerem, eademque nunc incrassari, nunc extenuari, nunc ejusdem manere crassitie in dilatatione, ostenderem, evitari non poterat quin sermo incideret in uterum, veluti cavorum viscerum fere principem, propriaque observatione typis necdum edita, quod de eo demonstratum esset, confirmantem. Addam propterea, quam præsens annus academicus suppeditarit, novam confirmationem.

In tertium mensem gravida vapulat a marito, pedibusque ad hypogastrium conculcatur. Venter posthac ratione graviditatis crevit quidem, sed admodum inæqualiter: ita ut dextro hypogastrio ille sensim tumidior, ac tandem sub menses ultimos admodum

dum turgens observaretur, suspicioque Gemellorum, quorum in medio alter, alter sinistrorsum, locatus esset, animis innasceretur Obstetricantium. Denique 31. Jan. hujus, quem vivimus, anni, partus ingruere dolores. Recte tum uterum situm, tum foetum, arbitrata obstetrix, prægnans serio cooperaretur, adhortata est. Cum autem minime promoveretur partus, alia obstetrix, & tertia, & quarta, atque ordine hoc & octava vocatæ, socordem esse, quod cum Natura foetuque haud cooperaretur, parturientem clamarunt. Unde tandem inhumanus maritus, duplex, ut patebit, homicida, verberibus illam, quo cooperaretur, adegit. Illucescente inanium partus dolorum septimo. eidemque fatali die, optimæ spei Studiosus, inque arte obstetricia magnæ dexteritatis D. *Hopf*, invenit in ore uteri humerum infantis, & secus illum funiculi partem, portionemque placentæ. Cum educturus infantem, hæc omnia loco movere deberet, ac ferme removisset, subita ingensque hæmorrhagia feminam sustulit.

Adductum mox ad me uterum examinavi. Facie anteriore sectus ille, infantem eximendi gratia, distentus mansit; ubique fere pollicis habens crassitatem. In percissa transversim hac crassa substantia vasa inventa numerosa sunt, angustiora, ampliora, & quæ calamus scriptorium facile caperent, nonnulla, omnia autem fere vacua. Necesse porro fuit ut hæc ipsa vacuitas, & tempestatis frigus ingens, horum vasorum lumen, uterique crassitudinem, multum imminuerint. Quo loco placenta fuerat, cernere erat vestigia multa lacunarum. Idque notabile præprimis, quod uterus in ambitu placentæ fibras musculares referret bene multas; cujusmodi fibræ *Ruischio* ideam musculi fætum pellentis, placentamve, generare quondam potuere. Portionem crassi hujus uteri, demon-

monstrationis ergo, servo in liquore.

Quod vero partum adeo difficilem reddiderat, ac crudele mariti facinus arguebat, erat uteri substantia, dextera sui parte abeuns in Steatoma figuræ fere rotundæ, pendensque pōdere medico libras tredecim & quatuor uncias. Ovarium utrumque naturaliter sese, una cum tubis, habebat. Præ enormi igitur hoc Steatmate necesse est uterus & rigidus, & pro parte repletus fuerit, adeoque dolores partus in foetum directè agere non valuerint; imo potius ipsum Steatoma, urgentibus hisce doloribus, corpus infantis compresserit, neve rite exiret, impediverit.

§. III. Observationes Thermometricas nostras, circa varium gradum caloris, in varia sanorum ægrorumque corporum conditione, ac statu, nec non circa ipsarum calorem gignentium causarum diversitatem, multis hujus anni academici experimentis ita reperiimus confirmatas, ut data dudum de iis sententia undique facta rectaque videatur. Inter multas observationes, cum prioribus nostris easdem, referenda historia videtur, quæ hac æstate, in Acutis morbis publice tractandis, observata est.

Femina 37. annorum Febre continua putrida laborans, (quæ nobis observata immortalis Coi de fallacia judiciorum in diebus non bonis, cum materia haud rite cocta, veridica omnino esse, usque in quartam hebdomadam, demonstravit;) die morbi 4. 5. & 6. perpetuo conquerebatur de interno calore urente, caloremque 6. 8. 10. 12. gradibus naturali intensiorem in Thermometro notabat; interea dum ego, dum nonnulli Medici adstantes, dum tota Studiosorum cohors, vix unquam in pulsu motum febrilem notabilem palpabilemve, imo potius pulsum bonum, plenum, æquabilem, prehenderimus; dein die 7. 8. 9. 10. & Thermometrum, &
sen-

sensus ægræ, & attactus noster, & febrilis admodum pulsus, calorem magnum una demonstrarunt. Ut merito putem nihil certius, demonstratiusque esse hac propositione: Caloris causam indubitato esse mutuum vasorum humorumque inter sese, nec non ipsarum humorum nostrorum particularum attritum; at vero necessario caloris causas longe alias, quam hunc attritum, in rerum natura existere; quandoquidem calor tum ad sensum, tum ad thermometron, isque & intensus admodum & diuturnus, toties in homine reperiatur, penitus absente, omnium votis, attritu. Miror ab iis, qui hujus veritatis testes oculati aut fuerunt, aut esse potuerunt, haud ita pridem in publica Thesi indirecte eandem oppugnatam esse.

Constitit quoque, experimentis infinities repetitis, medium horæ quadrantem sufficere, ad hominis explorandum cum thermometro calorem, additis ad notatum tunc gradum gradibus binis. Solet quippe 1^{mo} calor verus, isque haud ultra augendus, quadrantis horæ spatium notari, 2^{do} a semiquadrante ad quadrantem binis tantummodo gradibus augeri. Unde liquet semiquadrantis spatium haberi determinatum caloris gradum, additis duobus. Vix enim ex quinquaginta vicibus semel continget, ut hæc regula fallat; &, si rariore casu, saltem haud ultra dimidium, integrumve gradum, fallit. Sed hæc ea conditione dicta sunt, ut thermometrum & bonum sit, & bene ab initio vestibus ac stragulis tectum, dum sub axilla ponitur.

§. IV. Observationes Clinicæ de Acut. morborum cruditate, de coctione perfecta & imperfecta, de eadem ichoata & completa, de statu morborum, de diebus indicatoriis & criticis, de Metastasi varia, de morbis novis ex præcedente acuto natis, de urina, de pulsu, de respiratione, de varia Hypo-

chondriorum in Acutis conditione, de signis ex habitu corporis petendis, eque variis functionum læsionibus; hæc, inquam, observationes nos demum omnes convicerunt veraciorem in tota Bibliotheca, Scholave medica, Autorem *Hippocrate* non dari. Quod cum ita se habeat, merebitur sane hæc materies, ut Deo vitam largiente viresque, Pars hujus operis octava integrum *Hippocratem*, ad lectos ægrorum demonstratum, & confirmatum, compendio exhibeat; quo demum omnes ad *Hippocratem*, Virosque Hippocraticos, & admirandos, & sequendos, incitemur.

§. V. Doleo ex male intellecta doctrina mea Theses quodammodo erroneas sæpius a Medicinæ Candidatis proferri publice. Amans illos, perpetuoque amaturus, & jam sæpius hac ipsa Parte septima veram meam sententiam paucis elucidavi, & circa quasdam nondum recensitas Theses sequentibus elucidabo.

Propositum iterata Thesi fuit, *Dari Febrim Hæmorrhoidalem*: postremaque vice defendenda simul proposita fuit Hæmorrhoidalis fluxus crebritas, Viennensibus, quam cæteris omnibus, notabilior.

Quid illi nomine *Febris Hæmorrhoidalis* intelligant, id plane ignorare me fateor; ignorabunt forte quoque Thesium autores. Oportet enim hoc nomine intelligant Febrim, vel quæ ab Hæmorrhoidum affectione, obstructione, inflammatione, suam ducat originem, vel quæ Hæmorrhoidum fluxum pro crisi habeat. Porro neutro modo hanc febrim licebit hæmorrhoidalem vocare.

Non priore modo; nam in libro unde hoc nomen mutuati sunt, signa nulla enarrantur prægressæ alicujus affectionis hæmorrhoidalis: e contrario verbis notatur disertis post febrim jam natam, nec raro alterum, tertiumve diem jam numerantem, tumen-

tes

tes demum adparuisse Hæmorrhoidas.

Neque etiam posteriore modo. Narrat enim morbi historia admodum frequentem hanc febrim fuisse, attamen vix esse inventos paucos, quibus aut a Natura, aut ab arte, promotus hic fluxus fuerit: multos vero nifus duntaxat hæmorrhoidales, citra fluxum earumdem, perpeffos esse; irritoque hoc nixu, citra alias substitutas, sive a Natura, sive ab arte, evacuationes, cito, integreque convaluisse.

Demus autem, quod dari non potest, a paucorum numero, qui in frequenti admodum febre hæc fluxum hæmorrhoidalem a Natura, arteve, passi sint, totam febris naturam desumi oportere, ideone *Febris Hæmorrhoidalis* appellanda est? Eodem sane jure inflammatoriam aut acutam quamcumque febrim, vocares Alvinam, vel Mesentericam, quæ alvo judicetur; Renalem, quæ per urinas; quæ emesi, Vomitoriam; quæ sputis, Sputatoriam; quæ catameniiis, Menstrualem; quæ post aurem tumoribus, Paroticam; & sic porro. Est igitur loquendi modus, qui e scholis medicis petitus non est: quemque Autores harum Thesium ad lectos ægrorum, me demonstrante, non didicerunt.

Qualisnam ergo est, de qua hæc Theses, febris? Febris est talis indolis, ut similem sui in tota historia medica non habeat: quippe quæ in summa, imo in increfcente Cruditate, bonis jam gauderet perturbationibus criticis; quæ irritis, nec per alias excretionibus suppletis, ad evacuandum nifibus, brevi tutoque judicata esset: cum e contrario perpetua atque æterna Naturæ lex sit, ut Criticæ perturbationes, si profuturæ sint, cocta materie, bonoque die compareant; utque morbi minime judicentur ab irritis ad evacuandum conamine, nisi eidem alia evacuatio conveniens, atque sufficiens succedat; aut nisi, defectu etiam hujus, vagi materiæ morbosæ

er-

errores homines diu torserint, &, multis occisis, demum quosdam post diuturnas ærumnas in vita fervent. Quemadmodum in illa Epidemia apud *Hipp. Epid. Lib. I. pag. 941. 945. Foës.* in qua nullæ omnino crises observabantur, aut nullæ saltem, quæ id, quod inceperant, perficerent.

Objiciet mihi forte quisquam benigna Resolutione eos fuisse curatos, quibus irritò Naturæ conamine, nec aliunde suppleto, cita contigerit perfectaque salus; adeoque famosam hanc febrim, veluti sui similem in Medicina non habentem, a me describi non oportere.

Verum qui sic censeret, is leges & conditiones benignæ Resolutionis, ad gravem, ad periculosam, ad inflammatoriam hanc febrim, contra omnem Medicinæ legem, experientiamque, adplicaret. Secundo non adverteret idem, hac sua prolata sententia, illico rationem concidere totam, ob quam vocetur febris hæc Hæmorrhoidalis.

Atque hæc de nomine hujus Febris sufficiant. Superest additamentum videre ad Thesin de febre hæmorrhoidali, ultimo defensam, adjectum: „ Et Hæmorrhoides Viennensibus, quam aliis Nationibus, magis familiares sunt: ut merito de his suspicentur sæpe Medici.

Paucis Lectorem hic volo. Nonus jam annus est, quod & in ipsis ægrotantibus, & in scriptis Tyronum in gratiam typo editis, & in Cathedra, genuinam *Hippocratis*, id est Naturæ, tradiderim de Hæmorrhoidibus doctrinam: qua constitit vere Criticas dari Hæmorrhoidas, tum in Chronicis, tum nonnunquam Acutis in morbis, hasque a Medicis attentè observandas esse, juvandas, ac promovendas: dari præterea Hæmorrhoidas symptomaticas: dari etiam noxias plane, & perniciosas: tandem autoritate & experientia eos damnandos esse cum Medicis,

tum

tum Plebejos, qui omnium fere morborum curam ab Hæmorrhoidibus, vi promotis, expectarent. Hanc meam sententiam Theſibus de hac re publice editis cognitam, Clari Viri, quorum alii calidis in regionibus, alii in frigidis, Medicinam faciunt, literis ad me datis confirmarunt.

Quod autem maxime Medicinæ Studiosos de Hæmorrhoidum apud *Viennenses*, universosque *Austriacos*, natura convincere debuit, numerus est bis mille & ultra hominum, quorum exactissima historia adhuc proſtat, qui, ipsis circumſtantibus, examinabantur, & quos inter vix quatuor extitere, in quibus ipſa Natura hæmorrhoidum fluxum indicaret. Igiturne, poſt tantam experientiam, ipsis adſtanti-
bus captam, *Viennensibus*, *Austriacisque*, Hæmorrhoides præ aliis familiariores? Hæmorrhoides ſaltem illæ, quæ ſe aperiundas clament? Minime; niſi velint eas frequentes hic eſſe, atque pro criſi notandas, quas, Natura non indicante, Medici & Chirurgi hominibus ſponte crearunt: verum tunc nullatenus intellexere me in *Tractatu de Hæmorrhoidibus* docentem, atque omnium ſæculorum autoritate demonſtrantem, qua demum ratione Medici has conſiderare, & circa easdem gerere ſe debeant. Doleo proſecto has Theſes ipsis inconfideranter elapſas eſſe, id præprimis veritus, ne qui alibi gentium easdem legant, vel animum in ſtudento ſocordem, vel in proferendo aut obſtinatum aut malevolum fuiſſe, ſuſpicentur.

§. VI. Eodem prope modo res habet erga *Febres malignas* dictas, quibus *Petechiæ*, *Miliares*, aliæve exanthemata, ſe jungere ſolent. Propriis ad lectos ægrorum experimentis, numeroſa Tyronum ſemper cingente corona, petitis ac repetitis; libro meo de *Februm Diviſionibus*, (in quo præcipuorum cujuſque Nationis, præſertim Germanæ, Medicorum, ſuffragiis loculentiffimis ſuffultus fui,) nec non *Tomo Rat. Med. i. & Parte V.*

demonstratis, Medicinæ Studiosi convicti fuerint oportet de veritate asserti, statuentis malignitatem morborum sæpe a methodo medendi unice gigni; petechiales autem & miliares efflorescentias perquam raro Naturæ curantis esse opus: præcipue dum hæc invictis experimentis confirmata viderunt in spatiosissimo nosocomio Hispanico, ab eruditissimo, sagacissimoque ibidem Medico, discipulo quondam meo laudatissimo, G. Hazenorhl, edito tractatu anno 1761. An igitur mirari me non oportuit, quod e schola Viennensi Pathologici prodierint, qui publice edidere hanc Thesin: „Sed etiam absque calido regimine erumpunt exanthemata, non igitur aut febris miliaris, aut alia, a calido semper oritur regimine, aut bezoardico medicamento. *Praxis.* Et dubitari potest an unquam a bezoardico medicamento exanthema enasci visum? Profecto cum ejusmodi opinione in ægrorum perniciem nonnulli abuti possent, cogor paucis eandem examinare.

Vera in eo dixere a calido regimine, aut bezoardicis, *haud semper* exanthemata nasci; neque unquam id asserueram, sed *sæpe*: & si non exanthemata, saltem alia frequentia mala. Potuerant, debuerantque meam circa hæc mentem clare percepisse, in *Vindiciis* meis contra Apologiam Ill. Halleri; quas *Vindicias*, ut verbo hic moneam, Vir quispiam, æque in Theoreticis, quam in Practicis, præcellentissimus, confirmaturus est, numerofo plane experimento & vivis in brutis, & potissimum in vivis hominibus, multis coram testibus, magnisque suis sumtibus, capto. Hinc hisce non immoror; quæ vero ad Bezoardica, & ad regimen calidum spectant, hæc paucis tangam.

Varii generis Bezoardica sunt. 1^{mo} Bezoardicum *Animale*, confectum ex Hepate & Corde Vipera-
rum, siccatis in sole, inque pulverem redactis. *Lem-*
mercy

mery pharm. univ. pag. 130. Ratione salis alcalini & obesse in febribus putridis potest, augendo, quæ ad putredinem adest, dispositionem; & nocere potest movendo sudorem eo morbi in stadio, in quo aut nihil movere licet, aut saltem non sudores.

2^{do} Bezoardicum animale aliud est *Lapis Bezoar*, præsertim Orientalis. Pluries hunc ad experimentum in Nosocomio revocavi, siquidem AUGUSTISSIMA, pro munificentia sua, promovendarumque scientiarum amore, copiam hujus lapidis mihi fecerit. Præter alia experimenta quondam publice capta, hæc 13. & 14. Julii hujus anni cepimus. Lapis nucis moschatæ minoris magnitudine, per horam in unc. iv. aquæ frigidæ immissa, dabat aquam grate amaram. Relicta per 10. horas amarorem eidem aquæ copiæ conciliavit nauseosum, & omnibus nobis, quotquot gustaverimus, abominabilem. Unde merito conclusisse videmur infusionem ita dictam Lapidis Bezoar, cum aqua aliqua aromatica, aut cum vino, uti plurimum fit, remedium movens esse, stimulansque ad sudores. Referri huc & Bezoar Occidentalis, Pedra del Porco, Factitius Lapis de Goa, &c. &c. solent.

3^{tio} Bezoardicum *minerale*, vocant Antimonium fixatum cum spiritu nitri; id quod parum calcinatum, corrosivum; quod multum calcinatum, iners; quod justo modo calcinatum, prodesse in morbis potest. Bezoardica varia mineralia ab aliis metallis parantur.

4^{to} Remedia elapso sæculo, prioreque hujus, quod agimus, sæculi parte, titulo Bezoardicorum famosa varii generis erant, quemadmodum apud *Michaëlem, Ludovicum, Schröderum, Herculem a Saxonia, Techmeyerum, Barbette, Etmullerum*, innumerosque
Y 2 alios

alios Scriptores medicos, præsertim *Germanos*, legimus. Sic erat v. g. Mistura contracta Bezoardica, sic vocata, binis assumenda dosibus composita ex dr. i. Mist. simpl. Ludovici, & dr. semis Liq. c. c. succinati. Hæc autem Mistura simplex Ludovici sic parabatur: & spir. tart. rectificatissimi p. iii. spir. urinosi volatilis, & spir. vitrioli novies sublimati, a p. i. Totum hoc, cessante effervescentia, misceatur cum spiritus Theriacalis V. partibus, & per retortam destilletur. Si nunc huic simplici dictæ misturæ Camphora, Opium, & Santalum, addebantur, vocabatur Tinctura Bezoardica. Alia quoque Mistura Bezoardica celebris erat hæc: & Aq. Rutæ, Scorzonæræ, a unc. ij. Mist. simpl. Ludovici dr. i. Spir. fulig. rect. gt. XXX. Syr. Scordii dr. IV. m. pro binis dosibus. Ubi vero post hæc data ad sudores delirium imminabat, dabant sequens: & Aq. Cord. Herc. a Saxonia unc. i. Aq. cinamomi dr. IV. Aq. Theriac. camph. dr. ij. c. c. essentificati, vel, loco ejus, Sal. Vol. c. c. Scrup. i. Salis vol. succ. Grana X. Syr. Flor. Tunicæ dr. IV. Ad sudorem vero una dosi tunc eliciendum dabant Tinc. Bezoard. Ludovici dr. i. cum Scrup. i. spir. c. c. Ad normam porro hanc innumeras invenire est formulas apud Autores supra laudatos, aliosque.

Porro quod omnia hæc Bezoardica in morborum principio data, repetitaque, calorem jam nimium augerent, non movenda moverent, turbarentque coctiones, flos Hippocraticorum virorum, *Sydenham*, *Baglivus*, *Boerhaave*, *De Gorter*, Ill. Præses, ipseque etiam clariss. *Fridericus Hoffmannus*, unanimiter sese horum usui opposuerant; veluti malignitatem ita dictam in morbis, ac varii generis efflorescentias, petechias maxime ac miliares producentium,

foventiumque : quemadmodum videri compendio potest *Tract. de Febr. divis.*

Quod *Hoffmannum* hic cum cæteris laudem, perverse concepta de egregio hoc viro opinio me cogit : ubique enim condemnat regimen calidum, & Alexipharmacorum, Bezoardicorumque usum ; compendio autem capite *de Febre purpuratâ* §. II.
 „ Quam graviter, inquit, dein calida & alexiphar-
 „ maca medicamenta noceant, docuit sane uberius
 „ experientia, qua constat *eadem*, cum æstuoso regi-
 „ mine, in causa esse, quod ingruente primum no-
 „ vo hoc morbo (miliari) omnes fere perierint,
 „ quum jam sub temperata methodo plurimi eva-
 „ dant. Quin liberalior tantum infusorum, & de-
 „ coctorum calidorum potus, sudorem nimium
 „ movendo, & serum plus justo exhauriendo, of-
 „ ficat.” Equidem suasit nonnumquam *Bezoardica* :
 sed qualia ? Scilicet *sua* ; ex c. c. non usto, Lap.
 Cancr. Antim. diaph. & Cinnabari. Non sunt hæc
 communi notione *Bezoardica*.

Et in *Cap. de Febr. epid. exanth. sive petechizante* :
 „ Ex medicamentis, inquit, Alexipharmaca, salia
 „ volatilia, Bezoardica calida & spirituosâ, licet
 „ ceu efficacissima vulgo commendentur, plus dam-
 „ ni, quam emolumenti, attulerunt, præsertim
 „ liberalius, & cum calido regimine exhibita. Dis-
 „ solutionem enim sanguinis elementorum promo-
 „ verunt, & ob id majorem petechiarum fecerunt
 „ copiam ; vel Cephalalgias etiam, anxietates, in-
 „ flammationes, vel etiam sudores copiosos, susci-
 „ tarunt. Quin novimus his ad præservationem cum
 „ regimine assumtis, MOX IPSO CONTAGIO CORPUS
 „ fuisse affectum.

Et ut innumeros similes locos præteream, instar
 omnium ille est, quem habet *Cap. de Febr. ard.*

„ Notandus vulgaris, admodum tamen perniciosus
 „ ERROR PRACTICUS, quo primis statim diebus,
 „ liberali manu, essentias Bezoardicas, & Alexi-
 „ pharmacas porrigere suescunt MORBORUM AR-
 „ TIFICES, AD MALIGNITATEM, UTI STOLIDI
 „ PUTANT, A CORDE PELLENDAM. Hæc enim,
 „ si sanguis redundat, æstus inflammatorius ma-
 „ gis augent, & febrem graviolem, & diuturnio-
 „ rem, reddunt; quin si alvus simul diutius clausa,
 „ SANGUINEM NIMIUM RESOLVENDO, EXAN-
 „ THEMA PARIUNT.

Ut & *Cap. de Purpura Chronica*: „ Multo vero
 „ minus . . . essentias & tincturas Bezoardicas,
 „ hic morbus ferre potest, sed potius ex illorum
 „ usu semper augetur, magisque accenditur. Vidi-
 „ mus certe mitioris alius generis purpuram Chroni-
 „ cam, febris & vehementiæ symptomatum pror-
 „ sus expertem, . . . horum, & regiminis usu IN
 „ MALIGNAM FUISSE CONVERSAM.
 „ Et in genere id quoque pro comperto est Purpu-
 „ ram, quo citius, & impetuosius, per medicamen-
 „ ta, & calidum regimen expellitur, EO FACILIUS
 „ & LEVISSIMA DE CAUSA EVANESCERE, & IN-
 „ TERIORA REPETERE.

Magnorum igitur horum Virorum exempla sem-
 per in praxi sequutus, ea nunc in nonum annum
 Medicinæ Studiofis ita demonstro, ut de veritate
 moniti clarorum horum Virorum nullum dubium su-
 peresse possit. Et nihilominus, quis credere possit!
 ejusmodi reperiuntur, qui schola mea vix egressi,
 publice sustineant dubitari posse num a Bezoardico
 medicamento natum unquam exanthema sit? Eru-
 besco dum Viennæ ejusmodi proponi video, & me
 ideo circa hæc explico, ut dum boni practici alibi
 hæc legent, noscant saltem ex me non hausta, ex
 mea schola petita non esse.

§. VII. Ejusdem propemodum farinæ est, quod in alia Thesi inaugurali circa Misturam ita dictam *Hoffmannianam* est prolatum: „Mistura Hoffmanniana haud recte *criminatur* in febribus, non tantopere stimulat, ac dragma nitri in libra una vehiculi.” Nihil hic, nisi vitiosum, profertur. Et enim 1^{mo} non determinatur copia Misturæ, quam Celeberr. *Hoffmannum* ipsum, varia copia, varia ingredientium proportionem, dedisse, ex lectione omnium ejusdem operum constat. Oportuisset profecto prius exacte determinare vehiculi, contentique in eodem dosin, antequam minus stimulans, quam dr. i. nitri in Libr. i. vehiculi, statueretur. 2^{do} Auctores ejusmodi Thesium in nosocomio non didicerunt nitrum semper hac proportionem ad vehiculum dari oportere ægris. Vix quatuor libræ dragmam nitri capiunt, quando a stimulo vel minimum metuimus, præsertim dum ægri copiose bibunt. Sed 3. si mistura hæc, ante natum *Hoffmannum* jam obsoleta, *Hoffmanniana* debeat vocari, per me licet, nam & sic cum cæteris ipse soleo; modo *Hoffmanni* prudentia, & circumspeditione, adhibeamus eandem. Optimus enim ille Vir curam tradens *Februm continuarum putridarum*, curam *Febris ardentis*, curam *Inflammatoriorum quorumcumque morborum*, vix hujus misturæ, eive similis, meminit; longe alia, eaque sæpe adposita satis, præscribens: interea dum quamplurimi Medici, contra mentem, consuetudinemque *Hoffmanni*, Acutos suos ægros ab ipso morborum principio, perque totum eorundem decursum, hac mistura infarciunt totos. Tandem 4^{to} quandoquidem Absorbentia acidis saturata, adeoque etiam Mist. *Hoffmanniana*, auxilii aliquando præstantis sint in morbis, quos diuresi curari Natura docuerit, ut nonnullæ sunt Dysuriæ, & quidam cum valido pruritu

titu cutanei morbi, quales eorundem vires in ægris nosocomii demonstravi; facile per se quisque percipit remedium hoc diureticum iis in morbis & damnosum esse posse, & damnosum sæpe esse, in quibus tota Schola Hippocratica cane pejus & angue vetat, quidquid, Natura non indicante, imò repugante, crudos, ob idque ad motum bonum ac salutarem ineptos, movere possit humores: in eo occupata unice, ut coctionem promoveat, viasque excretorias omnes expediat sic, ut paratas easdem, aptasque omnes, inveniat post coctionem Natura, perque harum unam, pluresve, morbosam eliminet materiem.

§. VIII. Ad male intellectam meam de lata pulmonum cohæsiōe cum pleura sententiam, utrum scilicet morbifera dicenda illa esset, an non; *Cap. XV. §. V.* respondi: neglecta tamen necessaria animadversione in citationem plurimorum Autorum, qui apud Ill. *Hallerum Elem. Physiol. Tom. III. pag. 122.* vel *Lobi*, vel alterutrius, vel Pulmonis utriusque omnino concreti, in genere; & *pag. 133.* veluti *integræ cum integerrima respiratione cohæsiōis*, testes fuisse perhibentur.

Itaque regero 1^{mo} Cunctorum, qui hic laudantur, Autorum numerum valde exiguum esse, præ numero illorum, qui hanc adhæsiōem sive aliquam, sive integram, morbosam notaverint. —

2^{do} Haud vero omnes illos Scriptores id testari, quod testati esse Ill. Viro *Hallero* videantur.

Primo enim Juvenis apud Ill. *B. van Zwieten, Comm. Tom. I. pag. 510.* non habuit adhæsiōem dimidii pulmonis, ut *Hallerus* scribit, sed dextri pulmonis tantummodo *medii lobi*. Addere necessario hic debeo, Ill. Præside notante, juvenem, ante fatalem Apoplexiam, Hæmoptoicum fuisse.

Secundo, quæ ex *Actis Haarlemensibus* notatur co-
hæſio, *ſiniſtri* quidem totius pulmonis fuit, ſed non
geſta inculpatæ. Additur enim reſpirationem fuiſſe
a novem & ultra menſium ſpatio *valde impeditam*.

Tertio inter illos, qui integram cohæſionem cum
integerrima reſpiratione obſervaverunt, recenſeor
& ego, *Rat. Med. Tom. I. Cap. 17.* minus æque ta-
men. Sic namque ſcripſi ibidem pag. 110. „Nec
„vitioſe reſpiravit quatuor primis diebus, uti ne-
„que poſt peripneumoniam curatam, niſi ſub mor-
„tem. Reſpiratio tantum fuit naturali brevior,
„pulfusque naturali paulo celerior ac debilior, vix
„tamen inæqualis.” Præterea operam navaturus
omnem, qua juxta leges phyſiologicas vitæ mo-
dum explicarem hominis, qui totum thoracem,
pleuram, diaphragma, pulmonem, pericardium,
cor, vaſa majora, mediæſtinum, in unum ſoli-
dum ſic concretum habuerat, ut harum partium
nulla potuiſſet ſeorſim moveri; amplectebar, ut lon-
ge commodiorem, illorum ſententiam, qui pulmo-
nes perpetuo ſtatuunt contiguos pleuræ; & nihilo-
minus rem hanc totam, ut mihi inexplicabilem, co-
gebar dimittere. Unde proſecto qui hac mea hiſto-
ria uti vult, ad probandam integerrimam cum uni-
verſo accreſceto pulmone reſpirationem, tum plus di-
cit, imo utcumque contrarium potius, quam ego;
tum ſi quid illud prius probaret, conſequeretur
quoque neceſſario id, quod omnia mox enumerata
viſcera partesque, in unum ſolidum perfecte con-
cretæ, integerrimam & circulationem, & reſpira-
tionem, non læderent. Quia igitur quod nimis pro-
bat, probat nihil, mentio non fuiſſet hujus caſus
facienda.

Quarto *Boyleus* inter eosdem numeratur. Verum
nec ille *integrum Pulmonem* adhærentem vidit, nec

cum illo integre adhærente *integerrimam* notavit *respirationem*. Ait quippe se vidisse Pulmonem *multis in locis* adnatum, qualisnam vero respiratio fuerit, ne meminit quidem.

Quinto idem testari narrantur *Acta Edimburgensia, Act. Tom. II.* Acta quidem hæc nonnullos incompletos coalitus notant, sed egregii Viri *Waugh*, & *Lewis*, respirationis notabiliter in vita læsæ meminerunt; & ad adhæSIONem completam, cujus *Hallerus* mentionem facit, doctiss. *Andrew St. Clair*, respirationem, quamvis ætate mortem præcedente emendatam notet, eandem saltem antea admodum difficilem, atque cum tussi pertinaci, nocturnisque sociatam describit sudoribus: præterquam quod, si quid probaret hæc historia, una probaret, quod absonum, pulmones, ut pleuræ undique adnatos, sic eosdem totos tuberculis caseosis, vomicisque purulentis PLENOS, respirationem integerrimam non lædere. Typographo metam urgente, deficit tempus reliquos laudatos in *Elem. Phys.* Autores consulendi.

3^{tio}. Demum assero multorum in Anatome minus versatorum Sectionibus diffidere, prudentiæ sæpe esse; cum in casuum Collectoribus haud defint, qui inter cohæSIONem fibrosam, & aliam sive mucosam, sive inflammatoriam, sive serosam nuncupandam, de qua toties Partibus prioribus egi, quæque brevi ante mortem fit, haud sufficienter interstinxisse videantur. Quos porro si expunxerimus, numerus tandem illorum, qui notabilem integrumve pulmonum ad vicina coalitum, cum illibata respiratione, observaverint, exiguus omnino adparebit.

§. IX. Refutatio à me expectabitur forsitan iniquarum quorundam animadversionum, publicis

Novellis insertarum, in *Partem VI. Rat. Med.* & in meas contra Ill. *Hallerum* editas *Difficultates* ac *Vindicias*. Verum cum ab una parte harum animadversionum Autores seipsos refutarint, ineptissimos se demonstrando, qui de rebus Medicis tolerabile quid proferant; cum ab altera parte, quemadmodum paulo ante monui, eximium opus, meris, iisdemque numerosis experimentis, Halleriana refutaturum, ad typum paretur, aliusque Vir in Italia celeberrimus simile contra *Hallerum* opus paret; æquitas a me hac vice poscit, ut hos Scriptores publice non prostituam, sed ipsis potius suam ipsorum crassam & ineruditam Criticem condonem.



The first part of the paper is devoted to a general
discussion of the problem. It is shown that the
problem is equivalent to the problem of finding
the minimum of a certain function. This function
is then shown to be convex, and the minimum
is found to be unique. The minimum is then
found to be the solution of the problem.

The second part of the paper is devoted to a
detailed study of the problem. It is shown that
the problem is equivalent to the problem of finding
the minimum of a certain function. This function
is then shown to be convex, and the minimum
is found to be unique. The minimum is then
found to be the solution of the problem.

The third part of the paper is devoted to a
detailed study of the problem. It is shown that
the problem is equivalent to the problem of finding
the minimum of a certain function. This function
is then shown to be convex, and the minimum
is found to be unique. The minimum is then
found to be the solution of the problem.

ANTONII DE HAEN

*Consilarii Aulici, ac Medicinæ Practicæ, in
Alma ac Antiquissima Universitate Vindo-
bonensi, Professoris Primarii,*

P A R S O C T A V A

RATIONIS MEDENDI

I N

NOSOCOMIO PRACTICO
VINDOBONENSI.



LUGDUNI BATAVORUM,

Apud PETRUM VANDER EYK,

M D C C L X I V.

THE NATIONAL

LIBRARY

OF THE

CONGRESS

OF THE

UNITED STATES



WASHINGTON

1850

E L E N C H U S

C A P I T U M

C A P U T X I X.

Varia de Sudoribus in morbis Acutis.
Pag. 338

C A P U T X X.

Varia de Crisi morborum. 345

C A P U T X X I.

*De Morbis acutis cum Petechiis & Milia-
ribus.* 383

C A P U T X X I I.

Problemata de Scorbuto. 423

C A P U T X X I I I.

*De Machina ad curandum Ileum despera-
tum.* 442

THE UNIVERSITY

MULTIPLY

THE UNIVERSITY

THE UNIVERSITY

THE UNIVERSITY

THE UNIVERSITY

THE UNIVERSITY

THE UNIVERSITY

THE UNIVERSITY

THE UNIVERSITY


THE UNIVERSITY

THE UNIVERSITY


THE UNIVERSITY

THE UNIVERSITY

THE UNIVERSITY



RATIO MEDENDI IN NOSOCOMIO PRACTICO VINDOBONENSI.



C A P U T XIX.

Varia de Sudoribus in Morbis acutis.

§. I. Hippocratica tota nostra Methodus est. §. II. Longus Hippocratis textus ex Progn. limitatur, & suis exceptionibus traditur, ex ipso Hipp. §. III. Morbi nomina exemplo Hipp. quærenda. §. IV. Quæstio an sudor in ægra nostra 7. die contingens, Criticus esset, nec ne, utrinque agitatur. Quandonam ante sudorem criticum rigor præcedat oportet, quandonam non? Licet sudores optimi sint prægressi, nihilominus in alios morbos incidere ægri, imo & in mortem, possunt. Ea occasione exponuntur quidam textus Hipp. & Gal. §. V. Multi iterum textus Hipp. de sudoribus continuis aut frequentibus explicantur, tristisque confirmantur exemplo.

§. I. **H**ippocratis methodus ea nostri Nosocomii est; Hippocratis est, quam ad lectos ægrorum sequimur, norma: non proprie quia ejus, sed quia purum est Naturæ studium, nullis aut innixum, aut sociatum hypothesibus. Uti ad hoc demonstrandum plura specimina toties dedi, sic
Z etiam

etiamnum, quo Medicinæ Studiosis hæc norma maneat alta mente reposita, & quo promissis, Parte septima de totius doctrinæ Hippocraticæ adornando compendio datis, stare incipiam, notabilia quædam referam.

§. II. De sudoribus ad lectos ægrorum frequens sermo est; qui, ut Hippocraticæ doctrinæ accommodandus, textum Prognost. Libri ut basin agnoscit.

„ Sudores optimi quidem per omnes morbos acutos,
 „ qui diebus judicatoriis contingunt, & penitus febre liberant. Boni vero quicumque toto corpore
 „ orti, ostendunt ægrum facilius ægritudinem ferre.
 „ Pessimi autem frigidi, quique circa caput tantummodo, faciemque, & cervicem, oriuntur. Ii
 „ namque cum acuta febre mortem, cum mitiore vero morbi longitudinem, præsignificant: qui &
 „ per totum corpus eodem modo, quam secundum caput, fluunt. Qui vero Milii formam referunt,
 „ & circa cervicem tantum pravi, boni autem qui guttatim, & exhalantes, contingunt. Atque hoc
 „ in totum de sudoribus animadvertendum est, quod nonnulli ex dissolutione corporum, alii vero ex
 „ vehementia inflammationis oriantur.” Et Coac. n. 572. „ Sudor optimus sane, qui febrem die judicatorio tollit; utilis autem & qui allevat; malus vero frigidus, & ubi caput duntaxat, & cervix insudat. Nam & temporis diuturnitatem & periculum denuntiat.”

Dum ad hunc textum doctrinam clinicam accommodamus, semper memores sumus legis ejusdem nostri in Arte Dictatoris, qua Naturæ aberrationes & exceptiones attendere caute jubeat, doceatque etiam bonis cum sudoribus morbos nonnunquam aut letales, aut longos, fieri; tum & defectum sudorum bonorum ita aliunde suppleri, ut & citum sequatur, & tutum judicium. His cautelis progressi, quousque

Artis præcepta indubitata, quousque dubia *Hippocrates* eadem tradiderit, intelleximus. En porro exemplum.

Femina 26. annorum, febre continua acuta, una cum repetentibus sæpe doloribus capitis, atque pectoris, decumbens, die morbi quinto ad nosocomium nostrum adducta est. Maculas subpurpureas paucas in pectore mox in illa deteximus, ad dorsum, in ventre. Subdubitantibus Medicinæ studiosis num forte pulicum morsus non forent, paulatim constitit ejusmodi non esse: 1^{mo}. Quia sæpissime in morsu pulicum punctulum distinctum rubicundius reperitur, lætior in ambitu rubedo. 2^{do}. Quia sensim loca pallescunt, ut paucis postmodum horis, saltem die altera, aut vix, aut nulla, reperias vestigia. Nihil tale in hac ægra; nam & maculæ hæ integra, quam occupabant, plaga rubræ æquabiliter, & centro conspicuo carentes, nec ante diem morbi 12. c. vanidæ; an ad Petechias ergo referendæ?

§. III. Quærebatur morbi nomen? Acuta febris cum cephalalgia ad Phrenitidem sæpe referenda est, præfagitve saltem illam; eadem cum laterum dolore, ad Pleuritidem. At vero utriusque loci dolor, nec perseverans, neque explens pleuritidis aut phrenitidis definitionem, relinquebat nobis acuti solam febris ideam. Igitur morbum vocavimus febrim continuam putridam, imitati Magistrum, qui Epid. 1. historiam *Cleonæctidis* sic infit: „*Cleonæctidem*, „ qui supra *Heracium* decumbebat, ignis, id est febris ardens, vehemens ordine vagoprehendit: dolebat autem ab initio capite & sinistro latere.” Quemadmodum igitur ille morbo, quem vagi capitis laterisque dolores ab initio concomitabantur, nomen febris ardentis servaverat, ita & nos nomen synochi putridæ.

Secundum indicationem, in simili morbo formandam,

dam, bis ipsi Vena secta est, data alimenta, potulenta, medicamenta, qualia ejusmodi ægris *Tomo I. Rat. Med.* nos dare solere descripsi. Sudor eam die septimaprehendit, isque calidus, universus, copiosus, sex horarum spatio, tam insigni cum morbi levamine, ut post placidam noctem, sola superesset capitis gravitas die octavo; febre prorsum cum cæteris exulante symptomatibus.

§. IV. Quærebatur essetne judicata ægra *δια τέλεος*?

Utique dies criticus erat, & qui pro crisi sudor optimus. Aphor. 4 — 36. Morbi autem conditio hæc erat: Cruditatis signa urina habebat, alvusque, usque ad initium sudoris: interim ipsa febris post ultimam missionem sanguinis cujusdam coctionis signatulerat, perque illud ipsum remissionis tempus somnus inquietior, subdelirium, levis nausea, criticam quandam perturbationem subinsinuare potuerant, maxime cum brevi post sudor tantus, tantoque cum levamine, sequeretur.

Verum defuerat rigor ante sudorem. Rigorem autem sudores criticos præcedere oportere, *Hippocrates lib. I. Epid. in Cleonaëtidis historia*, in qua admirando Laconismo suo sylvam observationum integram comprehendit, nos docuit. Simulque retulit, eo quod rigor ante sudorem defuisset *Mulier, quæ in littore habitabat*, licet ipsa post sudorem febre omnino vacaret, tamen quinto febris ardentis die symptomata rediisse cruditatis, nec sanatam ægram, nisi ad undecimam obrigescens, nova febre corripereetur, ab eaque tandem die decimo quarto judicaretur vomendo, sudando. Quare eodem libro I. Epid. pag. 915. edit. Foës. „Plerique ægrotantium circa Crisin rigeant; ac præcipue ii, quibus non fluebat de naribus sanguis: rigeant autem hi, & sudabant.” Hinc in *Zoili Historia* pag. 1023. „Nescio,” inquit,

inquit, „quomodo ille sine Rigore judicaretur.” Et dein sudores non decernentes enarrans, subjungit: „Absque Rigore est die 14. judicatus.” Ostendit tamen postea, quam imperfecta ejusdem judicatio fuerit.

Itaque defectus rigoris de sudoris jubebat dubitare bonitate, ad crisin sufficiente; ab altera parte consulenda erat, quam de sua ipsa regula fecerat *Hippocrates*, exceptio. Quippe refert *Epid.* 4. pag. 1131. „*Menandri Vinitorem*, non esse, ut quidem sororem „*Timenæi*, rigores passum, quamvis judicatione ab- „solveretur, eo quod alvum perturbatam, ac liqui- „dam, ab initio morbi habuisset.”

Ad hanc exceptionem explicandam juvat decimus, isque obscurior, textus libri VI. *Epid.* cum *Galen*i explicatione. Textus sic habet: „Ante rigo- „rem Urinarum suppressiones; si cum bonis signis „processerint, & alvus dejecerit, somnique afrue- „rint.” In quem *Galenus* dum historiam *Menandri* elucidat: „Igitur si alvus plura dejecerit, Urinæ „suppressæ fidere non convenit ad futurum rigorem „præsentendum: at si alvus fluxa non sit, proxi- „mamque esse morbi judicationem prænoveris, æ- „grotum rigere, sudareque, necesse est.”

Cum igitur ægra nostra, quemadmodum *Vinitor Menandri*, perturbatam aliquomodo ac liquidam habuisset ab initio alvum, judicatio æque bona & perfecta, quam illa *Vinitoris*, censeretur poterat. Verum ita censendo non fuisset mentem *Hippocratis* rite assequuti. Crebritate enim observationum ille didicerat haud modo, qui horrore præcedente caruissent, verum etiam qui illum præcedentem habuissent, sudores, incertæ prognoseos esse, donec status insequens judicationis confirmaret certitudinem: quippe integre judicari quandoque ægros sudorum horum alterutro, unicâ; sæpe alios repetitâ vice; imo non

semper inde ne a morte quidem ægrum præservari; Ita *Charion*, ex potus abusu in febrem ardentem lapsus, licet die 7. post rigorem acute febricitans, diffusoque per totum corpus sudore manans, certo quodam modo judicatus videretur, nihilominus die nono novum insultum passus est; & graviores die 14. cum sudore; aliumque die 17. novo cum rigore, febre, sudore; ac tamen non nisi 20. die (quo demum modo non narrat,) absolute judicatus est. Et *Dromeade* uxor, licet ter sudorem cum rigore experta, nihilominus 6. die periit.

Igitur toties horum omnium exempla auditoribus in nosocomio demonstrata, in pronuncianda sententia cunctari omnino jubebat. Docuitque eventus haud inanem fuisse cautelam. Ægra nostra die 8. 9. 10. calido balneo crurum infidens, vomuit. Urinam hypostaticam die nono miserat. Die undecimo alvum coctam, biliosam. Die 13. vix vestigia macularum. Die 14. optime ac blande purgabatur ab unciis quatuor aq. Lax. Vienn. noctemque dato paregorico transegit tranquillam. At vero die 15. febre invadebatur tanti caloris, ut 104. gradum Therm. Fahrenh. æquaret; qualem febris in illa necdum attigerat. Die 16. mane calor 106. vespere 109. gradus notabat. Vomitus interea, dura alvus, urina jumentosa. Die 17. febris cum cephalalgia, vomitu flavo, flava alvo, ac pultacea, quater missa. An tandem vomitu judicata alvoque? Fere quidem; integre autem nondum. Etenim diebus insequentibus cum urina hypostatica vires rediere, pulcreque restitutæ sunt functiones; caput autem vertiginosum mansit, & hebes, & grave. Unde purgans cum paregorico repetitum: nihilominus a die 23. vagi observabantur colici dolores, noctu quam inter diu graviores, vomitusque frequentes. Et hinc, & quod oculorum album id innueret, & quod brevi ante ægritudinem

tudinem vermes bis ore expulisset, haud immerito vermium nata suspicio est. Datis ideo cum antihelminthicis, tum purgantibus, demum sanitatem integram 34. die adepta est.

§. V. Atque hæc de sudore critico; de eodem vero aut continuo, aut frequenti, paucis videamus. Sudores frequentes aut continuos, vi productos morbi, nunquam in Nosocomio salutavimus salutare, sed vel in mortem, aliosve in morbos tendentes, vel demum, hisce cessantibus sudoribus, animadvertimus aut per alias vias, aut per bonum sudorem, febres judicatas.

Confirmatam proinde ubique Hippocraticam veritatem conspeximus. Epid. 1. *Erasino*, qui 5. die morbi sui periit, febres aderant ad mortem usque cum sudoribus. Et Epid. 3. ægr. 4. *Phreniticus homo* primo die habuit sudorem copiosum, assiduum, toto corpore dimanantem; ita & die altero, & tertio, cum symptomatibus gravibus, quarto vero periit. Cur *Euxeni* uxor, Epid. 7. pag. 1224. septimo post remissionem die obiit? Sudores affuerant ab initio per totum corpus; iterumque morbo medium agente eursum. Cur *Nicolai* filius die 7 mortuus? Quia præter alia symptomata prava notat Hippocrates Epid. 7. pag. 1234. illum per morbi crudum statum bis sudasse. Cur *Philiscus* Epid. 1. pag. 966. die 6. cum sudoribus frigidis extinctus? primo ac tertio crudi morbi die sudaverat.


Sic viri immortalis doctrinam intelligimus, quam diversis operum suorum docuit locis. Prorrh. 1. text. 58. „Sudor in febribus acutis copiosus malus est.” Et mox initio 2. Epid. „In siccis calidibus magnis, febres ut plurimum circa sudorem; sin vero ipsis durantibus leviter ac guttatim pluer cepit, febres eadem jam ab initio sudores copiosiores, difficiliorumque crisin, quam alias,

„ habent: licet tamen haud ita difficilem, quam si
 „ a morbi ipsius ratione, aut natura, profluerent.”
 In *Phrenitico*, in *Euxeni* conjuge, in filio *Nicolai*, in
Philisco, veritas constitit effati Hippocratici Coa-
 car. n°. 574. „ Qui una cum febre incidit sudor,
 „ malus est.” Et quidni? Τα κρίσιμα ἐς βελτίον μὴ αὐ-
 τήνα ἐπιφανέσθω, dixerat Epid. 2. sect. 2. „ Haud ili-
 „ co cum morbo appareant ea, quæ in melius judi-
 „ cent.” Et quare non debent hæc ab initio appa-
 rere? Respondet ibidem pag. 999. Τα προκρινόμενα ἢν
 ὡμῶς κριθῇ. „ Quæ in cruditate præmature judicant,
 „ morborum recidivas faciunt, & si non has, tunc
 „ Crises aut malas, aut nullas: quin & si copiosio-
 „ ra, perniciosa sunt.”

Ex quibus liquet quantopere & *Hippocratis*, &
 nostræ experientiæ, illorum Medicorum adverteretur
 methodus, quæ ab initio ad excretiones quascum-
 que, potissimumque sudoris, vires intendat omneis;
 methodus, inquam, quam optimus *Boerhaave* adeo
 damnavit Aph. §. 715, 716. „ Sudor,” inquit, „ in
 „ initio acutæ febris cujus causa paullo pertinacior
 „ — si perennat, orbat sanguinem liquido di-
 „ luente, reliquum inspissat, obstructions facit le-
 „ tales; sanguine postea vix diluentibus, vel resol-
 „ ventibus auscultante; unde omne fere acutorum
 „ genus produci potest.” Longus forem omnia,
 quæ in hosce binos textus *Boerhaavii*, ut & in 610.
 ac 698. *Illustrissimus Commentator* habet, referendo:
 sufficiat monuisse cuncta eo collineare, ut penitus
 condemnet cum *Boerhaavio* lecti, conclavis, aëris,
 medicamenti, calorem, in communibus, quorum
 causa pertinacior est, acutis; & ut multis, potissi-
 mumque tribus diversis in locis, resumat æternas
Sydenhami laudes, „ quem, ait, generose, animo-
 „ se, ausu generoso, se solum fere, primumque,
 „ communi torrenti opposuisse.”

Triste

Triste hujus exemplum vidit Nosocomium quondam. Italus homo a primo, ad quintum diem febris, putridæ acutæ, potu Theano copiosissimo, lectoque ac cubiculo calido, profusissimos sibi elicuerat sudores, a quibus vehementer debilitatus, meam demum implorabat opem. Pergente sudore die 6. & 7. nau-seas passus est, ventrisque dolores, die octavo copiosissimam alvum, ab 8. die ad 10. qua mortuus est, perpetuos sudores. Mala utique arte infelix homo per primos quinque morbi dies crudam moverat materiem, sanguinemque exsiccarat; unde die 6^{to}. criticorum infidissimo, ad ventriculum & intestina materiæ morbosæ perturbatio nata; octavo die, non critico, evacuatio quidem alvi flava ac copiosa, sed ceterum sanguis adeo spissus, ut tranare per minima non potuerit, debilitasque observaretur tanta, ut nec movere artus, nec in lecto se erigere, citra animi deliquium, posset; ac præterea, ab octavo die ad mortem usque, sudor a sanguine sic condensato, ut aquosa epota haud ultra secum commiscere posset, perpetuus manaret. An palpabiliore testimonio doctrinam datam possumus confirmatam videre? Caput XXI. funesta exempla plura suppeditabit.



C A P U T X X.

Varia de Crisi morborum.

- §. I. *Observationes Hipp. de morbis sine Crisi terminantibus; ad Resol. benignam minime referendis.*
- §. II. *Ejusdem observationes de Crisi perfecta.*
- §. III. *De Crisi imperfecta cum recidiva.*
- §. IV. *Ejus mos agnoscendi Crises, quæ alios in morbos tendant, imo quæ in mortem: regulæ ejus de Criseos bonitate*

nitate & perfectione judicandi. §. V. Perfectæ Crises, quæ imperfectæ videbantur, & versa vice. Crises cum perniciosis symptomatibus bonæ. Ea occasione differitur de urinis nigris, quæ per se letales, nonnunquam tamen cum bona Crisi apparuere. Attamen una ægra excepta, quotquot post urinas nigras convaluere, non nisi post plures ærumnas convaluere. Galeni, & multorum cum illo, de urina nigra errores hypothetici. Et in chronicis urinam nigram laudamus, factâ bonâ Crisi, formidamus faciendâ. Pisonis textus & casus non docent contrarium. §. VI. Crises bonæ & perfectæ cum pravis, alio modo, urinis, pravis sputis, &c. Crises malæ, imo mortes, bonis cum sudoribus, cum bona, imo hypostatica urina. §. VII. Ad firmam prognosin tamen urinæ bonæ passim requiruntur, ad easque Hipp. attendit cum maxime. §. VIII. Bonæ ac praviæ urinæ solæ prognosin non formant: jungenda illis semper signa reliqua. Bonæ, insolitæ licet, Crises. Ad generalium regularum exceptiones perpetuo attendendum; ea vero lege, ut haud ita exceptiones consideremus, ac si regulam generalem auferrent. Pulcerrimum Hipp. in hisce exemplum. §. IX. Solæne urinæ morbos judicent? Probatum. §. X. Difficile sæpe exordium determinare acutorum: quæ hic se gesserit Hippocrates? §. XI. Agitur quæstio num, Crisi bona contingente, prædici possit fore eam perfectam, aut non perfectam? Regulæ Hipp. omnem hic nobis prudentiam suadent. Morbi sive letales, sive periculosi, nonnunquam formantur insciis ægris, inscio medico. Historia ægrotantis adjungitur, quæ multa confirmat dictorum.

§. I. **E**x Hipp. Gal. Aretæo Capp. ceterisque subsequentium Medicinæ Corryphæis, summus in arte Boerhaavius dedit nobis succinctam descriptionem cruditatis, coctionis, criseos, evacuationisque

nisque criticæ, in morbis acutis, Inst. §. 922. 925. 926. 928. & a 931. ad 940. His, ut per se perspicuis, non immorabor, recensurus duntaxat quas ipse *Hippocrates*, quas nos post illum, exceptiones in norma generali observandas deteximus.

Atque ut ab *Hippocrate* ordiar, observavit ille 107 Morborum finem citra Crisin. Libr. I. Epid. pag. 944. tradens illam, quam in *Thaso* observaverat, constitutionem morborum, 20. 40. 80. die judicatorum, „Erant etiam; subjungit, quibus ne quidem „ sic, sed errabunde, & nulla observata judicatione, „ febres desinerent.” Eademque in urbe grassantibus postmodum febribus continuis remittentibus, Tritaiophyis dictis, notat „ægotantium plerisque „ febres absque judicatione desisse.” Praxi Medica in 29. annum occupatus, necdum potui casum aut observare talem, aut demonstrare.

Cum simile quid, raro tamen, post *Hippocratem* unus notare alterve potuerit, *Boerhaave* prudenter Inst. §. 913. „In morbis acutis, ait, qui in humoribus consistunt, disponitur, ut plurimum, certo „ tempore, materies morbi ita, ut fiat subita mutatio morbi in sanitatem, vel &c.” Quæri potest num morbi, qui citra Crisin finiebantur apud *Hipp.*, ad sanationem per *Benignam resolutionem* referendi sint? Verum cum in Resolutione benigna inter cætera requiratur benigna morbi materies, & in Historia data ab *Hipp.* materiei perquam malignæ signa obtinuerit, ἀπρίσμοι illi *Hippocratis morbi* per benignam Resolutionem non explicantur. Effetne hæc variarum rationum una, cur *Hipp.* dixerit Aph. 2 - 19. „Acutorum morborum ἔ παμπαν, non omnino, non „ absolute, non citra ullam exceptionem, tutæ „ sunt prædictiones sive mortis, sive sanitatis?” Etenim si nihil critici in morbi sanatione observatur, etiam nihil certi Medicus ad præsentem futu-

futurumve morbi statum, pronunciare potest.

§. II. Ut morbos descripserat ἀκρίσιμους, ita descripsit multos δια τέλειος, δι ὅλης, integre, judicatos. Sæpe adhuc addit: „ Neque morbi est facta reversione.” Fatendum tamen est neque unum neque alterum sæpe adjunxisse morbis, quos simpliciter judicatos tradidit, licet & perfecte, integreque, & citra morbi reversionem, essent judicati. Crises tales perfectas Nosocomium exhibuit multas.

§. III. Descripsit judicationes cum reversionibus, quæ frequentes admodum ipsi visæ; ita quidem ut Epid. I. pag. 956. 957. integram viderit constitutionem, in qua nullus servaretur, nisi post recidivam, reconvalescerentque quotquot relapsum passi essent. Ut Hipp., ut omnes Medici, ita & in nosocomio nos frequentes relapsus cernimus. Est alia ratio cur Hippocrates in laudato mox aphorismo fassus sit, acutorum morborum haud esse tutas citra ullam exceptionem prædictiones. Sæpe sæpius cernimus Crisin omnibus numeris absolutam, integramque post eandem brevi redeuntem sanitatem, dum interea primo, altero, tertio, quaternario dierum elapso, morbus idem, aut similis, aut prorsum alienus, redeat. Contingitque subinde, ut de qua Crisi, num perfectam dicas, valde dubitares, eandem perfectissimam salutes; quamque arbitratus perfectissimam esses, hanc doleas fallentem. Ad talia in nosocomio data exempla ipsum hunc aphorismum adplicare soleo, & una cum Medicinæ auditoribus prudentiam disco in danda prognosi.

§. IV. Judicatos Hipp. vocat, quibus varia tamen incommoda, eademque sæpe gravia, post Crisin acciderint, imo quorum nonnullos mors abstulerit. Libr. I. Epid. pag. 956. judicatos appellat, quibus parotides postliminio suboriebantur; iisque nec dimittentibus, nec suppurantibus, vel Diarrhœa biliosa nascere-

nascebatur, vel Dysenteria, vel crassarum Hypostasis urinarum. *Metonem* Epid. 1. pag. 983. iudicatum die 5. pronuntiat, cui nihilominus post iudicationem pervigilium ac delirium leve nonnunquam affuit, a quibus non nisi crebriore narium hæmorrhagia est liberatus. Ibidem pag. 986. *Clazomenium* nobis refert die 20. iudicio liberatum, qui tamen ad diem 40. multa passus, demum mansit Amblyops. Pag. 958. inter iudicatione absolutos retulerat *Scymni fulionis ancillam*, & *Cratistonaëtam*, quos, licet parotidibus suis critice suppuratos, mors dira abstulit. Sic etiam videmus apud ipsum morbi crisin in mortem describi. Et Epid. 3. pag. 1073. *Euryanaëtis* filiam narrat 6. die iudicatam, quæ postea, & ut videtur circa 19. diem, legitur obiisse. Sane si ad constantes iudicationes perpetuo addidisset suum *per totum*, suum *omnino*, aut *perfecte*; si ad imperfectas vel nihil addidisset, vel, ut Epid. 1. pag. 973. morbus iudicatus quidem, sed *intermisit* tantum; historias morborum suorum accuratius traditas forte gauderemus.

Haud vero id *Hippocrati* ita visum, idque merito, est. Exemplo hoc ipso suo prudentem cautelam docuit posteritatem. Dixerat Aphor. 2 — 12. & *quinq̃* in Epidemicis repetiverat: „Quæ in morbis „ post Crisin relinquuntur, recidivas facere solent.” Porro recidivas aliquando letales esse demonstraverat. Hinc mos illi perpetuus invigilandi post Crisin ægrotis. Crisin esse perfectam ex aliis non noverat signis, nisi rerum post eandem eventum. Hinc toties addidit *ἐκ ὑπέρσεως*. Debuit ergo suos in ægros perpetuo attentus fuisse, ut vel integra vel imperfecta ægrorum in sanitatem illibatam constantemque restitutio, vel mutatio in alium morbum, vel recidiva nonnunquam letalis, sibi primo innotescerent, antequam, quam jam Criseos nomine donaverat, vel veram, vel personatam duntaxat fuisse, asseveraret.

§. V. Dixeram superius crises, quæ numeris omnibus videantur absolutæ, sæpe minime absolutas esse, & quæ imperfectæ admodum adparerent, has integras fuisse rerum constare eventu. Cum id in nosocomio toties visum, operæ pretium erit altius, ac præcipue ex *Hipp.* repetere.

Cum urinis plane nigris & subnigris, seu tenuibus, seu cum contentis quoque nigris, Crises acutorum morborum observamus bonas.

Attamen nihil in praxi Medica certius ac testatius est summa nigrarum urinarum pernicie.

Consulamus hunc in scopum universam Medicinam.

Hipp. in progn. „Viris, mulieribusque, omnium „pessimæ urinæ nigræ, sicut pueris aquosæ.” Et *Coac.* n°. 580. „Pestifera autem est inter urinas & „quæ hypostasim habet nigram, & quæ ipsa quoque „est nigra: sed pueris pestifera est magis aquosa.”

Unde *Hipp.* describens febres ardentes lib. I. *Epid.* I. pag. 954. „a quibus plerique omnes moriebantur” addit: „Urinæ his erant nigræ, tenues, „& paucæ.” Exemplis præterea urinarum nigrarum pravitatem demonstrat. *Pythio in Thaso*, post urinas primo subnigras, deinde nigras, 10. die mortuus legitur, *Epid.* 3. pag. 1098. *Mulier in Cyzico* cum urinis nigris tenuibus, deinde oleosis, 17. die periit, *ibid.* pag. 1114. *Mulier in Thaso ad frigidam decumbens*, 80. die interiit, notante sic *Hipp.* „Urinæ huic perpetuo nigræ, tenues, & aquosæ fuerunt,” *ibid.* pag. 1096. *Adolescens in Foro Mendacium* post urinas subnigras obiit 7. die, *ibid.* pag. 1076. *Femina in febre ardente post puerperium* 7. die expiravit, urinis 5. & 6. die paucis, tenuibus, subnigris, *ibid.* 1079. *Philiscus* habet die 3. 4. & 6. urinas nigras, 6. die moritur, *Epid.* I. pag. 966. *Erasimum* mors die 5. abripit post urinas nigras. *Epid.* I. pag. 984. *Abderæ*, *Apollonius* in mortem incidit

34. die cum urinis, quas *Hipp.* scribit, ex quo ipsum in morbo viderit, fuisse nigras. *Epid.* 3. pag. 1111. *Silenus* morbi die 11. extinguitur, cum toties nigras urinas aliquando cum hypostasi nigra reddidisset.

Hinc *Galenus* libr. I. de Cris. cap. 12. *Charter.* tom. 8. pag. 395. „Pessima igitur est omnis urina „denigrata, adeo ut neminem unquam servatum vi- „derim ex iis, qui talem urinam minxerunt:” Ex- ceptiones quasdam adjungit, sed quæ ad rem non fa- ciant; agit enim *Hippocrates* in his ægris, non de u- rinarum contentis, sed de ipsa urina subnigra nigra- que. Hinc quod *Galenus*, hoc textu, quod *liber Ga- leno adscriptus de urinis*, cap. 20., quod *liber de urinis ex Hipp. Gal. aliisque* subjungere: „Minus vero per- „niciosa est si solum id, quod subsidet, nigrum „fuit; atque adhuc minus, si solum enæorema; ac „multo minus etiam, si nebula:” hæc, inquam, exceptiones locum hic non habent, quandoquidem de ipsa urina nigra sermonem facit *Hippocrates*, non de contentis.

Equidem negavit omnino *Galenus* urinam nigram existere posse, quæ simul tenuis esset: negarunt idem cum *Galenus* Auctor libri *de urinis Galeno adscripti*, li- ber *de urina ex Hipp. Gal. aliisque*, ut & *Theophilus Iatrosophista* libr. *de urinis*, qui omnes libri apud *Charterium* tom. 8. inveniuntur. Et cur negarunt? Quia causam nigredinis urinarum hypothesis illorum ab atra bile deducebat; quæ cum crassa esset, non posset urinam nigram simulque tenuem exhibere.

Miror *Galenus* aliorumque errorem, miror eorum erga *Hippocratem* irreverentiam. Error est crassum liquorem nigrum non posse aquæ limpidæ copiosæ conciliare nigredinem sic, ut aqua hæc cum nigre- dine sit tenuis: atramenti enim crassamentum exi- guum nigram reddit copiosam aquam, haud ablata ejus tenuitate. Hic tamen adeo palpabilis error se- ducere

ducere hos Auctores eo potuit usque, ut, quod tot locis vidisse se testetur *Hippocrates*, non suspiciant, imo se simulent ignorare. Unde recte *Lud. Mercatus* vol. 1. lib. 2. pag. 254. asserit illos omnes urinam nigram posse tenuem esse *oscitanter* negasse, toties nigram ac tenuem demonstrante *Hippocrate*.

Duretus pag. 504. in verba Hippocratis: *Pestifera autem est inter urinas, quæ & hypostasim habet nigram, & ipsa quoque est nigra*: „Pestifera est inter urinas, „ de qua sperabilis nulla curatio est febris acutæ, „ cuius ardore talis mejendo emittitur.”

Quamvis igitur omnium testimonio urina vere nigra letalis sit, idque tot confirmavit *Hippocrates* exemplis, videmus tamen & cum iisdem servatos ægros, & una cum illis crisin bonam factam.

1^{mo}. *Metoni* ad 5. diem judicato urinæ subnigræ erant, tam ante, quam post Crisin. Haud omnino recte *Hippocratem* intellexisse *Foësius* videtur, dum de *Metone* scribit: „Urinæ istæ nigricantes, etsi taceat *Galenus*, non sine magnæ naturæ efficacitate, „ potuerunt esse salutare, ut in acutis morbis contingit, qui per urinas judicantur, ut multas pleuritides judicatas scimus per urinas nigras, *crassas* „ tamen: & quæ solent urinæ nigræ salutare esse, „ fere crassæ sunt; *tenuis* letales.” Etenim subnigras urinas, earumque subnigrum enæorema *Hipp.* refert ante crisin fuisse, ergo non crassas, utpote in quibus enæorema non apparet: post crisin vero urinarum cum tenuitate nigricantium diserte meminit.

Epid. 3. pag. 1108. *Mulier in Thaso austera & aspera* habuit ad diem 3. urinas nigras ac tenues, cum enæoremate valde rotundo; eademque nocte perfecte judicata sudoribus est, & catameniis.

Epid. 1. pag. 974. *Herophon*, post nigras tenuesque urinas, est judicatus imperfecte die 9. perfecte autem 17.

Epid.

Epid. 3. pag. 1106. *Heropytus* urinas nigras habuit, & tandem convaluit.

Epid. 1. pag. 979. *Epicratis* uxor judicata est post urinas tenues, ac subnigras.

Epid. 3. pag. 1108. *Nicodemus* 24. die integra judicatione absolutus est, post urinas tenues ac nigras.

Igitur sex exempla apud *Hipp.* prostant servatorum ægrorum, quibus urinæ aut subnigræ aut nigræ fuere: & quod ipse, idem alii magni practici observarunt.

Si *Galenum* per se ipsum explicare debemus, etiam sic censuisse reputandus est. Ipse enim, qui dixerat, ut vidimus, eorum, qui in acutis nigram minxissent, se servatum vidisse neminem, ille ad casum *Mulieris austerae & asperæ*, ait: „ Urina licet esset nigra nihil attulit periculosi: quod retenti menses essent magis melancholici.” Imo in comm. ad *Mulierem quæ ad frig. aq. in Thaso decumbebat*. „ Quandam novi,” inquit, „ quæ talibus (nigris) urinis magna copia evacuatis, ἀφελθεῖσαν, opem perceperit.”

Prosper Alpinus lib. 7. cap. 14. de *Præfag.* non malas urinas esse nigras judicat, si cum copiosa hæmorrhagia narium, ut in *Metone*; aut cum largis catameniiis, ut in *Muliere austera*, observantur.

Ludovicus Mercatus laudato mox loco: „ Tamen ad salutem,” inquit, „ aut ad mortem prædicendam, non est solum nigra urina consideranda, sed alia signa salutaria, aut deleteria adjungere oportet, & inspicere an bene exeant, vel male. Namque diffidendum non est interim dum virtus constat, ut statuit *Avicenna*; quantumvis ab omnibus urina nigra letalis habeatur.”

Prosper Martianus in *Coac. n.º. 580.* commentatus, *Mercati* sequitur sententiam. vide pag. 606. edit. Rom. 1626.

Hinc cl. *Rega*, *diff. de Urinis ut signo* „in æstate
 „ anni 1727. ait, vidi ego hic *Lovanii* duorum æ-
 „ grorum, qui adhuc superstites sunt, urinam per
 „ plures dies atram valde, cum sedimento quoque
 „ nigro.” Non addendo autem utrum acute an
 chronice hi laborarint, minus forte probant bina e-
 jus exempla, ut patebit mox.

Sed *Plempius* fund. lib. 5. sect. cap. 5. in acutis
 malignis nigram urinam quandoque criticam salutat.

Porro inquirendum est, cur uno tempore omnis
 denigrata urina absolute letalis habita fuerit, alio
 tempore minus fuerit?

Hippocrates raro ratiocinando, sed simpliciter pas-
 sim phenomena enarrando, parum quoque hic expli-
 cat; nisi quod in febre ardente epidemica, de qua
 supra actum, narret & plerosque in ea febre urinas
 nigras habuisse, & plerosque periisse: tum in histo-
 riis variorum ægrorum suorum, qui nigra minxe-
 rint, aut labores nimios, aut calores ardentis, aut
 victum pravum, aut Bacchum, Veneremve, morbi
 inter causas recenserit oportere: denique in nonnullis
 humores melancholicos esse considerandos.

Numquid hinc celebris illa nata distinctio, quam
 post *Galenum* omnes magni scriptores practici fove-
 runt, qua causas urinarum nigrarum partim deduce-
 rent a cruore per violentiam febrium exusto, partim
 ab ipso humore atrabiliario, qui quidem ante mor-
 bum existeret, vi autem morbi valida moveretur,
 miscereturque humoribus? Saltem eo collineant om-
 nes ut nigram urinam semper quidem periculosam
 valde existiment, longe vero perniciosiorem illam,
 quæ a corrupto, & exassato per ardores sanguine,
 quam quæ ab humore melancholico orta sit, pro-
 nuntient: & cum menstruum sanguinem retentum
 solerent melancholicum fieri credere, hinc *Galenus*
 in Comm. ad *Mulierem morosam* supponit ipsi urinas
 nigras

nigras minus noxias fuisse; quale quid cum ipso ceneset *Duretus* edit. Leyd. pag. 498.

Attamen motu humoris atrabiliarii in acutis *Hippocrati* nihil perniciosius visum. Passim in Coacis, in Prorrh. in Aphor. id videre est. Vid. Aph. 4 — 22. 23. 24.

Sane si videamus eorum qui, narrante *Hipp.* servati sunt, historias, excepta *Muliere aspera & morosa*, habuere omnes post Crisin aut perfectam aut imperfectam, prava symptomata varia, Crises perfectiores, nigrarum urinarum in colorem meliorem mutationes, alias excretiones salutare. Unde etiam *Hipp. Coac. 577.* & in *Progn.* vel solas nigras lividasque urinarum nubeculas damnavit; & *Prorrh. 1. n. 4.* inter alia Phrenitidem ex urina decolori cum nigro enæoremate præfagiit; dein *Coac. n. 581.* letale pleuriticis dixit sedimen nigrum in urina porracea, & demum *Coac. 582.* „ In errantibus febribus „ nigræ nubeculæ quartanam denuntiant; decolores „ urinæ enæorema nigrum habentes, cum pervigilio, & perturbatione, phrenitidem; urinæ cineritiæ vero cum dyspnœa, hydropem prænuntiant.”

Unde quod *P. Alpinus*, quod *F. Plempius*, aliique, ejusmodi urinas nonnunquam Criticas appellarint, id secundum *Hipp.* & celeberrimos ejusdem Commentatores, haud aliter capimus, intelligimusque, quam quod in his ægris, Criseos tempore, una cum nigris urinis, apparuerint hæmorrhagiæ narium, uterive, sudores, &c. qui morbum aut integre, aut imperfectius judicantes, simul indomabile illud, & vix coctile, letiferumque per sese, de corpore expulerint: pari profecto ratione, qua Petechiæ & Miliaria, dum cum aliis evacuationibus prorumpunt, critica quibusdam vocantur.

Exceptionem quidem Auctores petunt chronicis in morbis, dum hepar, lien, aliæve abdominis par-

tes, sua atra bile, Criseos in morem, exonerent sese, vel dum melancholicorum intermittentes febres nigris judicenter urinis. Fateor & tales formidandas me Crises vidisse, optasse vero ne viderem unquam. Qui historiam Bilis atræ ex *Hippocrate* bene possidet, propriaque praxi demonstratam tenet, ille demum novit quid non timendum sæpe ab atra bile mota, & quod, etsi aliqui fortunatiores emergant, post ejusdem expulsionem validam, vomitu, alvo, urinis; ejusdem motus nihilominus sit perpetuo formidandus. Ideo *Hippocrates*, & cum flore practicorum *Boerhaavius*, adeo anxie ac sollicitè inculcarunt nobis, ut de movenda bile atra ne cogitaremus quidem, donec eandem sic primo immutassemus, ut talis haud amplius esset, neve unquam prodiret foras, nisi sic mutata, mitigata, soluta, attenuata, dilutaque foret, ut antiquæ naturæ plurimum deposuisset. Verbo repetam, si in melancholica quartana febre urina nigra Critica dicenda sit, Crisin hanc infidam sic gaudent practici prægressam, ut formident futuram; eamque ob causam quartanam talem cortice, cæterum contrario, moderentur sic, ne bilis atra in motum ducta occidat.

Difficultatem contra hanc sententiam movere quis posset ex observ. *C. Pisonis* lib. de Coll. ser. sect. 3. cap. 9. Agens hic auctor de Colica Pictonum, & de ea Colica nephritica, quæ Pictonicæ perquam similis, bonas se narrat observasse urinas, quæ sic atræ essent, ut ni quis attente conspexisset, a nigro sanguine tinctas credidisset, tumque subjungit:

„ Ejusmodi urinæ atræ mihi sane olim fuere in autumno familiares, & per plusculos dies, vel etiam
 „ quindecim, assiduæ: sed fere iis post aliquot dies
 „ dolor Nephriticus, a me descriptus, successit.
 „ Alias cum nullam aliam injuriam iis succedentem expertus essem, plurimum ægrorum deinceps
 „ postea

„ postea querelas super iis composui, & animi anxietatem, earum occasione obortam, longe facessere jussi.” Hinc quisquam forte concluderet urinas nigras tam pestiferæ naturæ minime esse, quam hucusque descriptæ sint.

Sed regero 1^{mo}. summas easque multiplices auctoritates pro sententia de harum pravitate urinarum laudatas, unica hac observatione Pisoniana, eaque omnino extraordinaria, non elidi. 2^{do}. Ex ipso Pisonis textu ambiguum fieri an vere nigra ejus urina fuerit? Et an non potius sic nigredinem retulerit, qualem toties in chronice Nephriticis contuemur, quæ a sanguine commixto penitus videatur nigrescere, quamvis non ea, de qua hic agitur, urina nigra sit. Calefacta urina differentiam demonstrat. 3^{tio}. In renibus ac vesica urinaria, ut & in omnibus sive naturaliter cavis, sive præternaturaliter excavatis, corporis partibus, ejusmodi humorum aut solidorum degeneres mutationes ut consistentia, & forma, ita & colore, nos experiri, cujusmodi circulatio humorum non toleraret, sed a quibus extingueretur: nihilominus degeneres has conditiones longo sæpe tempore tolerari, quia extra circulationis veluti territorium sunt. Hoc modo vidi in chronica Nephritide, vidi in Dysuria, sic alcalinam prodeuntem urinam, ut mictionis momento vehementer effervesceret cum aceto. Sic Pisonis nephritici urina, non atra de sanguine secreta, sed corruptum atque atrum transeuns antrum, atra reddi potuit.

Ergo, quo ad thesin propositam redeamus, Crisin quandoque fieri bonam cum urinis, & Hippocratis & Auctorum practitorum pene universorum, testimonio, vel absolute per se letalibus, vel saltem summopere periculosis, discimus.

§. VI. Quod de urinis nigris vidimus, idem innu-
meris in ægris nosocomii nostri observamus de urinis

tenuibus, de urinis foetidis, de urinis bonam nunquam gerentibus hypostasin. Cernere e contrario datur in summa acutorum cruditate vel alvum quæ naturalis sit, aut etiam quæ flava ac pultacea conditione critica dici queat; vel urinas perpetuo hypostaticas, interea dum capit morbus augmentum, immo dum tendit in mortem; vel in inflammatoriis morbis pectoris sputa cruda, cum alvo urinaque adeo coctis, ut morbus inde judicatione integra absolvatur; vel respirationem bonam, cum perpetua morbi cruditate, viceque versa signa quævis coctionis cum respiratione fere desperata.

In hisce difficultatibus pro more ad *Hippocratem*, ceu ad sacram anchoram, confugere, antequam diagnosin ac prognosin formemus, solemus, examinaturi quid circa hæc observaverit ille, quî in hisce se gesserit?

Epid. 7. pag. 1208. 1209. in historia *pueri Eratolai* dysenterici miramur terribilia tot symptomata, graphice ibidem descripta, unico in homine posse contingere, ab homine posse tolerari, posse post tot tantaque eundem sanescere hominem. Ast in media enarratione *Hippocrates*, interrumpens filum orationis, jubet attendamus ad id, quod πνεῦμα ὁποῖον ὑπάρχει, respiratio haud aliter ipsi, quam sano homini solet, contigisset.

Ibid. pag. 1212. 1213. *Cydis* sive *Cydios* filium legimus morbo terrifico, diuturno, affectum, & (quia neque de morte, neque de alio morbo ulla mentio,) sanitati restitutum. In tanta calamitatum pravitate unicum notat memorabile: „Πνεῦμα δὲ ἐπιεικὲς διὰ πάντος μέτρον: respiratio per omnia, fere semper, erat moderata.”

Dixerat in prognosticis, sæpiusque repetiverat: „Oportet considerare respirationem vim habere magnam in cunctis morbis acutis.” Unde adeo sollicitus

sollicitus fuit respirationis modum plerorumque ægrorum suorum, ac *pravæ* maxime in letalibus, enarrare. Hinc quamdiu bonam respirationem cernimus ægrotantium, concludimus spem vitæ magnam superesse, quod aut illibata, aut perpaucum læsa tantum, innumera organa esse oporteat, a quibus vitæ dependeat perennitas, quodque cruditatis etiam summæ coquendæ spes bona affulgeat. Hinc nunquam desperabundi? Nunquamne tristis est facienda prognosis? Non tristis, sed utcumque dubia tamen. Vel enim nobilis hæc functio perennando universam morbi cruditatem emendatura, coctura, expulsura est, sanitatemque redditura; vel, copia ac malignitate crudorum humorum aucta, functio bonæ respirationis lædetur, ac delebitur, unde mors: quamdiu vero bona manet, bonam spem format.

Hipp. Prorrh. n°. 102. „ Qui sopore oppressi, „ circa initia tenuiter exsudantes *cum urinis coctis* „ οὐροῖσι πέποις ardentes, citra iudicium perfrigescen- „ tes, rursus ex brevibus intervallis peruruntur, „ torpidi, soporosi, convulsi, perniciem habent.”

Galenus qui bonis urinis nimium ubique fidit, voluit pro τὸ ἔρον πέπον, legere ἐπίπνον: sed 1^{mo}. omnes fere auctores hic se *Galeno* opponunt, dicentes lectionem esse genuinam τὸ πέπον; addunt quidam, ut *Jacotius*, se in moribundis coctam, imo hypostaticam, vidisse. 2^{do}. Quod *Hipp.* hic, idem significat *Coac.* 180. verbis iisdem, & convenit cum sensu *Coac.* 579.

Quod *Hipp.* in hoc loco notat de bonitate urinarum in summa morbi pravitate; quod *Jacotius* in pessimo morbo de urina hypostatica observat; idem in Juvencula brevi ante mortem cum pessimis morbi symptomatibus per plures dies observavi.

Epid. 2. pag. 1015. *Bion* eodem tempore & crudas habuit urinas multas, & criticam naris sinistrae

in splenitide hæmorrhagiam ; relapsum licet deinceps passus, servatus est.

Vidit *Hipp. Coac.* 582. diuturno tempore crudas urinas, cum cæteris omnibus signis salutaribus, tam frequenter, ut ausus fuerit regulam inde condere crisin per abscessum prædicendi.

§. VII. Attamen ab alia parte ad firmam prognosin, certamque salutem urinas cum cæteris bonis signis bonas passim requiri ab *Hippocrate* est certo certius.

Pro parte id jam vidimus in tot hominibus, qui post urinas nigras, subnigrasve, perierint ; pro parte id docebunt sequentia : *Coac.* n°. 575. „ Urina „ in febribus albam, levem sedimen habens, cele- „ rem liberationem denuntiat : ” prosequitur deinde reliquas bonas urinæ conditiones in acutis requisitas ; maxime vero fortunatam acutorum curam præfagit ex varia urinarum bonitate in magno textu libr. *progn.* pag. 40. Unde ad mortem *Hermocratis* *Epid.* 3. pag. 1062. addidit. „ Huic ad usque finem & „ surditas permanebat, & urinæ prodibant vel tur- „ bidæ, rubræ, non subsidentes, vel albæ, non „ coloratæ, nec enæorema habentes. ” Quæ ibidem pag. 1076. mortua legitur *Iliaca mulier*, hanc notat paucas habuisse tenuesque urinas. Idemque pag. 1077. in *Mulieris post abortum febricitantis*, deindeque mortuæ, historia advertit. *Epid.* 3. pag. 1080. *Mulier in foro Mendacium*, quæ die 14. mortua est, minxit die 8. multum crassumque inscia, die 10. mane multum ac nihil subsidens. Et pag. 1083. in grassante morbo, quæ multos sternebat, lotium perturbatum fuit, multum atque pravum. Pag. 1085. in pessimo genere febris ardentis, ac phrenitidis : „ Urinæ copiosæ, tenues, nec critici quid, „ aut levantis, habentes. „ Et paulo post : „ Vel „ enim densæ erant, vel nullo modo habentes aut „ coctio-

„ coctiones , aut utiles purgationes. Pag. 1001.
 „ *Homini Calvo*, ad 4. diem mortuo, copia urina-
 „ rum prodiit, nunquam bonarum.” Pag. 1100.
 Illius qui 4. die *Phrenitide* perierat, „urinæ tenues
 „ fuerant, parva enæoremata habentes, *διεσπασμένα*,
 „ divulsæ, non subsidentes.” Pag. 1093. *Pario* ad
 120. diem mortuo urinæ fuerant perpetuo malæ.

Memorable quoque magnum Virum lib. I. Epid.
 pag. 953. suspicari ne *Bioni*. *Cratiæ*, *Arctonis puero*,
 & *Mnesistrati uxori*, ideo post prægressam judicatio-
 nem dysenteria fuerit suborta, quod post judicatio-
 nem urinas reddidissent dilutas multas, liquidas, ac
 tenues.

§. VIII. Porro hæc ita, quemadmodum jam mo-
 nui supra, non sunt intelligenda, ac si ob solius u-
 rinæ pravitatem, sedimentique defectum, *Hippocra-
 tes* desperatas credidisset ægrorum res; verum pro-
 prie tunc, quando, una cum urinæ vitiis, crudita-
 tis notabilioris indicia in excretionibus reliquis, &
 præprimis in vitalibus aderant functionibus: erat e-
 nim perpetua sibi & inviolabilis lex haud judicandi
 unquam ex unico signo, sed ex multorum collectio-
 ne, ut patet ubique. Hanc *Coï* immortalis legem
 & nos observantes, nunquam boni quid ad lectos æ-
 grorum præsagimus, si multa alia prava signa pra-
 vas comitentur urinas: nunquam spem sinu fovi-
 mus, si una cum optima urina, & quidem constan-
 ter hypostatica, alia signa perniciofa, functionum
 potissimum vitalium læsarum, animadvertantur.
 Quod autem de urinis, hoc quoque de aliis quibus-
 cumque signis sive cruditatis, sive coctionis, dic-
 tum velim. Et e contrario quotiescumque in late-
 rum pulmonumve inflammatione cum sputis aut nul-
 lis, aut pravis, aut paucis, bona alvus seu sola, seu
 bonis sociata urinis, levaret pulmonem, viresque
 repararet collapsas, nunquam prognosin infaustam

formavi, lætique mecum medicinæ studiosi plurimos pectore inflammatos vel sine ullis bonis sputis, vel cum bonis duntaxat post crisin prodeuntibus, egregie curatos salutarunt. Sed bona alvus, & probe hypostatica urina nunquam inani spe animos lactaverunt nostros, quando partes alias, easdemque nobiliores, cruditate notabiliore laborare cernebamur. Pariter egimus ad insolita: haud parcius enim laudavimus illa, modo prodesse, quam si consuetas suas observaret Natura leges. Præiverat exemplo *Hippocrates* suo Epid. 1. pag. 951. Noverat consuetam lege febres ardentes solvi sudore, alvo, urinis, hæmorrhagiis; ast didicit tamen postea eos qui urinas aut nihil aut parum modo hypostaticas, & plerumque dilutas admodum reddidissent, modo insolito dysenteria curari. Rarior sane pleuritidis per sudores judicatio; *Anaxionem* tamen libr. I. Epid. licet 27. die cocta sputa ejiceret, legimus nihilominus perfecta judicatione non fuisse absolutum, nisi largis, qui de toto corpore, ad 34. morbi diem profluerent, sudoribus.

Equidem *Carolus Piso* de Coll. ser. sect. 3. cap. 9. putavit haud insuetum esse ut sudores pleuritidem judicent, idque se in pleuritico cive *Pontano* observasse, quinimo *Hippocratis* id se auctoritate confirmare posse. Verum legitimam hanc *Pontani* civis pleuritidem fuisse & ipse postea pag. 254. dubitavit, & nos dubitamus cum illo; deinde quem laudat coacarum 393. textum, is haud videtur nobis id, quod ipsi, significare, nisi alio sensu & modo. „ In his igitur, ait „ *Hippocrates* ibidem, & omnibus qui pulmonum „ affliguntur morbis, bonum quidem est facile morbum sustinere, dolore defungi, sputum promptè „ expuere, facile spirare, siti esse vacuum, reliquum corpus æqualiter incalescere, ac molle esse. „ Ad hæc somnos, sudores, urinæ eductionem, lau- „ da-

„dabiliter fieri; quibus contraria mala sunt. Quan-
 „docunque ergo bona hæc omnia *huic sputo* (quod
 „mox ante descripserat optimum) adfuerint, ho-
 „mo servabitur.” Clarum est sudores hic ab *Hip-
 pocrate* laudari, & alvum bonam, bonasque urinas,
 sed tamen sic, ut sputa morbum præcipue judicent,
 id quod non ita in *Anaxione*; licet laudabilia sputa ad
 27. diem ejecisset, eguit tamen ad judicationem ab-
 solutam sudore 34. diei.

Hæc nobis animo præsentia, multa utique dubia
 levant, multa etiam quæ certa credideramus, dubia
 reddunt, artisque genuinos observare terminos do-
 cent; quæ tantummodo vere certa pro certis, pro
 incertis ac dubiis dubia tradit. Sic scilicet hæc nos
 docent plures exceptiones, seu Naturæ a consueto
 tramite aberrationes, ut muniti quidem simus, dum
 occurrunt nobis, ast nihilominus ad consuetas ejus-
 dem leges nos indefinenter conferamus, nisi nos il-
 la, vi phenomenon aliorum, cogat exceptionem a
 regula sua generali agnoscere.

Suo iterum exemplo id docuerat admirabilis per
 omnia *Hippocrates*. Ecquis Viri in arte certitudinem
 & fiduciam non stupeat, dum animo meditantem su-
 per consuetas Naturæ vias *Epid. 7. pag. 1229.* illum
 cernit! *Fullo in Syro*, præter alia prava symptoma-
 ta, urinas posuit citra sedimen limpidas, & citra e-
 vacuationes criticas ullas; & ad diem 18. certe non
 criticum, judicatur. Stupefactus primo titubat
Hippocr. & quî demum hoc portentum explicet, an-
 xio animo volvit. Ea occasione *Nicoxeni* recorda-
 tus, qui quoque citra sudores aliasve evacuationes,
 die 7. sic judicatus esset, ut belle fumeret suas for-
 bitiones, suum vinum, suas uvas insolatas, sed quem
 17. die deprehenderit in pessima post crisin tam infi-
 dam recidiva, ut ab ea illum non nisi magnos post
 labores die 20. servasset, & sanasset; intelligit ejus-
 modi

modi criseos perfidiam, eaque probe confirmatam videt perpetuam suam experientiam: sed eo minus, cur *Fullo* in sanitate perseveret, capit. Tandem incidit ipsi in mentem, quod *Fulloni* enema ex *Thapsia* paratum injectum sit, rogatque num forsitan paradoxo causa lateat in eo, quod alvus enemate sæpius mota, morbi eduxerit materiem? sicque febris citra ulla evacuationes alias, rariore cæterum diei minime critici exemplo, judicata sit? Alvum non videtur conspexisse; firmiorem sententiam alioqui prolaturus.

Quod porro *Cous*, non nisi ejusmodi conjectura arrepta, hoc problema solvere se credit posse, nos convincit de ejus observationum certitudine inconcussa, doctrinæque æternitate. Simulque fateor, inter tot naturalium legum exceptiones, me nunquam in acutis, in quibus resolutionis benignæ spes nulla esset, neque in privata praxi, neque in publica, quemquam sine quapiam evacuatione judicatum vidisse; eamque ob causam semper & prædixisse, & eventu confirmasse, aut recidivas, aut alios morbos, aut mortem, si casus talis observaretur.

§. IX. An idem judicandum, ac metuendum, si morbus acutus citra ulla evacuationes, præter eam hypostaticarum urinarum, judicatus esset? An vero, etiam cæteris evacuationum criticarum feriantibus organis, solæ urinæ sic omnem morbi materiem critice eliminare queant, ut tuta sequatur integraque judicatio?

Profecto rariores sunt casus, in quibus morbi acuti per unicam modo excretionis viam plane judicentur; adeoque, quemadmodum frequenter non contingit, ut cæterarum evacuationum unica duntaxat totam morbi materiem eliminat, ægrumque perfecta judicatione absolvat; ita quoque frequens ea urinarum non erit. Veram tamen crisin acuti mor-

morbi ut olim in praxi, ita in nosocomio vidi; sic quidem ut cæteræ excretiones aut naturales omnino essent, aut plus minus cruditatē redolerent; urinis vero hypostaticis constanter emissis morbus levaretur, reliquæ excretiones emendarentur, & perfecta sequeretur judicatio.

Hoc idem *Hippocrati* sic visum esse ejus opera arguunt. Epid. 1. pag. 955. „ Atque in hoc statu
 „ (febris ardentis) ex quatuor maxime signis serva-
 „ bantur hi, quibus aut ex naribus sanguis proflu-
 „ xisset, aut copiosæ urinæ, quæ multam eandem-
 „ que pulcræ hypostasim haberent, per vesicam
 „ exivissent, aut qui per alvum turbulenta biliosa
 „ tempestive demitterent, aut qui fierent dysente-
 „ rici. Multisque contigit ut non ab uno horum
 „ descriptorum signorum judicarentur, sed ut plu-
 „ rimi per omnia decurrerent, graviusque habere
 „ viderentur. Sed hi omnes, quibus ista continge-
 „ rent, incolumes evaserunt. Mulieribus etiam &
 „ virginibus contingebant quidem hæc præscripta
 „ signa omnia; quibus autem horum quidquam bene
 „ fieret, vel muliebria liberaliter apparerent, per
 „ hæc servabantur & hæc judicabant. Nec periisse
 „ ullam novi, quibus horum quid bene successisset.
 „ Nam *Philonis filia*, cum liberaliter sanguis de na-
 „ ribus fluxisset, ideo mortua est, quod 7. die,
 „ (quo judicabatur,) intempestive utique, cæ-
 „ nasset.

Epid. 2. pag. 1027. metastases ex imperfecta crisi futuras expectat, nisi urinæ eruperint. Ergo credidit morbi materiem, quæ in corpore restitaverat, critice excerni urinis posse.

Ibidem in *Scopi* acuto morbo, ut etiam pag. 1085. & 1056. vocat urinæ hypostasies Corporis in morbis purgationes. „ Οὐρε καθαρεῖς πολλή, ” inquit „ καὶ πλη-
 „ θὺς καὶ ὑπὲρ αὐτῆς. Urinarum purgatio multa erat, tum

„ copia, tum subsidentia.” damnatque urinas „ nec
 „ coctiones, nec probas purgationes habentes ”
 laudat illas, „ quæ probæ essent per vesicam ex-
 „ purgationes.

Epid. 1. pag. 956. „ Quibus febre judicatorie
 „ desinente parotides, in febribus cum dolore sub-
 „ ortæ, neque conquiescunt, neque suppurantur,
 „ eos diarrhœa biliosa, *vel* dysenteria, *vel* crassa-
 „ rum urinarum hypostasis liberat: quale quid *Her-*
 „ *mippo Clazomenio* evenit.” Videmus iterum uri-
 „ nas hypostaticas dignitate & præstantia critica
 „ certare cum alvi criticis evacuationibus.

Epid. 4. pag. 1121. „ Hæmorrhagiæ erant, &
 „ per urinas purgatio & crisis. Αἱμόρροι, καὶ ὑποστασις ἢ
 „ καθαγίσις, καὶ ἡ κρίσις.

Ibid. pag. 1131. „ diserte affirmat *Menandri Vi-*
 „ *nitori*, cui alvus circa initia liquida fluxerat, nunc
 „ vero substiterat, per solam urinam judicationem
 „ contigisse. Καὶ τὸ ἔργον ἐκρίθη.”

Epid. 3. pag. 1083. describens malignum in fe-
 bribus erysipelas, in pessimos artuum, pudendorum-
 que abscessus abeuns, „ illud vero ipsis inerat,” in-
 quit, „ ut quæcumque abscessum facerent ad sup-
 „ purandum, si *vel* tempestiva, opportuna, alvi
 „ perturbatio, *vel* probarum urinarum transmissio
 „ fieret, per ea ipsa solutio procederet.”

Unde & Aphor. 4 — 74. statuit a futuris alioquin
 in morbo abscessibus ægros urinam, quæ crassa red-
 datur albaque, liberare; liberationem vero hanc
 citius contingere, quando abscessuum futurorum
 materies duplici via eliminetur, narium hæmorrha-
 gia & urina. Igitur pari passu urina procedit hic
 cum hæmorrhagia, ut paulo ante cum critica alvo.

Coacarum 575. „ Urina subrubra, habensque
 „ subrubram hypostasin, atque lævem, si quidem
 „ ante septimum diem fuit hujusmodi, septimo
 „ die

„ die (aut septimam febrem) solvit. Ἐβδομαίων
„ ἀπολύει.

Aphor. 7 — 54. crisin iterum certam declarat u-
rinis dicendo : „ his per venas in vesicam pituita
„ versa, morbi fit solutio : „ Hunc Aphorismum
Duretus vocat gravissimum super urinæ materie, &
super Crisi per eam suscepta & edita.

Coac. n°. 207. „ Ex acutis morbis, in febribus
„ ardentibus maxime tubercula ad aures exoriun-
„ tur, ac, nisi critice solvantur, & maturescant,
„ aut sanguis ex naribus profluxerit, aut urinæ cras-
„ sam hypostasim acceperint, ægros interimunt.”
In quem textum *Prosper Martianus* advertit *Hippo-*
cratem in prognosticis laudare in acutis mitioribus
urinam hypostaticam per omne morbi tempus, non
qua signum coctionis, sed qua signum mitissimi mor-
bi, & materie benignioris, unde morbi solutio evenit
per solam ejusdem urinæ excretionem : Criticas deinde
urinas non differre ab ea libri prognosticorum, nam
eos referens *Hipp.* modos, per quos febres solvun-
tur, urinam concoctam apposuit, inferens solam u-
rinæ coctionem absque alia evacuatione, ad morbi so-
lutionem facere. Et quid clarius in hanc rem dici
potest, quam dixit *Hollerius* lib. 3. sect. 3. Coac.
pag. 1047. „ Atque aliquando judicari pleuritides
„ multa urina & biliosa micta scripsit *Hippocrates*.
„ Et nos vidimus pleuritides graves dissolutas urinis
„ multis, crassis, & nigris; conversa, ut *senex* scrip-
„ sit, deorsum materie: quod certe minus mirum
„ videri debet, quam peripneumonias urinis solvi.”
Et pag. 824. „ Pus in pulmone effusum, a natura
„ attenuatum, transmittitur in venas, & arterias;
„ atque hinc modo ad renes, modo ad intestina,
„ dimittitur: mirabili Naturæ providentia, omnia
„ moliente, ut salutem ægro quærat.

Eundemque in locum *Jacotius*: „ Ex quo fit, ut
„ per

„ per urinas pulmonis vomicae critice expurgari
 „ possint.”

Et *Pr. Alpinus* lib. 6. cap. 16: „ Per urinas plures
 „ Acutorum morborum fuisse judicatos & nos vidi-
 „ mus, & *Hippocrates* in *Epid.* se vidisse scripsit.”
 Addit deinde ex *Galeno* signa, quibus crisis per uri-
 nam futura prænoscatur, si nempe defunt signa om-
 nis cujusque aliûs evacuationis futuræ; postea signa
 a se observata adjungit, ubi præter signa *Galeni* po-
 nit morbum non admodum esse vehementem, hypo-
 gastrium grave ac dolens, & in vesica veluti inflatio-
 nis perceptionem.

Unde recte *Jacotius* in libr. IV. Comm. Coac.
 pag. 240. urinam sic Criticam considerat in sua na-
 tura, ut ipsa sputa pulmone ejecta.

Et *Boerhaave* §. 1016. Instit. ubi n°. 1. quandam
 hypostaticam urinam toto morbi tempore emissam
 consideraverat, veluti indicium optimumque morbi
 præsagium, deinde n°. 2. „ Urina multa, ait, alba,
 „ stranguriosa, cum sedimento copioso alboque,
 „ critico tempore emissa, sanat, & abscessus tollit.”
 Etiam §. 938. omnes criticas evacuationes recensens,
 sputa, alvi fluorem, urinam, hæmorrhagias, &c.
 urinam iterum ut paris ad crisin efficaciam & dignita-
 tis, quam sputa, quam alvi fluorem, quam hæmor-
 rhagias, considerat.

Jure igitur concludere videmur, existente inter
 ægros nostros eo quandoque casu, ut præter urinam
 criticam nulla prorsum alia evacuatio contingat, non
 minus faustam prognosin dandam esse, cæteris pari-
 bus, quam si in aliis, aut per solum sudorem, per
 solam hæmorrhagiam, aut sola sputa, aut alvum,
 morbi expellatur materies.

§. X. Cum ex omnibus hucusque dictis pateat,
 quod ad crisin bonam determinandam oporteat dies
 morbi accurate notare, adeoque morbi principium
 exacte

exacte definire; haud citra difficultatem id efficere sæpe non possumus. Non raro namque apud multos, potissimum plebejos, contingit, ut, seu ingenio, seu morbo, stupidi, ignorent qua die, qua diei hora, primum morbi experirentur insultum, & ut quotiescumque de integro examinentur, vacillent. Ubi nunc ab eorum consanguineis, necessariisve, id rescire non datur, res dubia manet. Hi tamen numero sunt pauciores. Dantur autem numero plures, qui initia morbi exacte teneant, sed ubi dubites utrum cum incommodis principio perceptis acuta, qua laborent, febris una occeperit, an vero accesserit postmodum. Lassitudines spontaneæ passim adfuere; sed hæ Aphor. 2. — 5. æque morbos futuros denuntiant, quam præsentis. Dolores capitis, artuumque, inappetentiam, nauseam, haud minus acutos morbos præcedere, quam comitari, docent nos ægri, qui ab ipso nos convocantes principio, hæc symptomata sæpe ante primum febris insultum patiuntur. Ambigui itaque sæpe hærentes in nosocomio, Oraculum pro more consulimus.

Epid. 3. pag. 1106. *Herophytus* rectus incedens, ἑγὼς ἄδνν, & obambulans, capite autem dolens, videtur jam a principio febricitans ab *Hipp.* credi, ex symptomatum, quæ a principio cephalalgiam comitabantur, syndrome.

Sed ibidem pag. 1111. *Apollonius* videtur diutius ante febrim male habuisse, *erectus licet & obambulans*; acutæ autem febris initium non habuisse, arbitro *Hippocrate*, nisi quando per intempestivum potum, intempestivumque carnis bubulæ esum, inciperet incalescere.

Mulier in Thaso morosa & aspera Epid. 3. pag. 1108. die prima incommodi percepti, licet *erecta & obambulans*, ejusmodi symptomata habuit, ex quibus

bus *Hippocrates* febris inchoamentum cum prima symptomatum origine notaverit.

Qui post cœnam in somno horrore correptus, Epid. 7. pag. 1230. surrexit mane capite gravis, horruit, vomuit, gravitas capitis perseveravit, sub noctem remisit, ad usque secundi diei meridiem. Rursus inhorruit tum, noctemque tulit molestam. Haud tamen ante tertium diem symptomatum horum, cepit *Hipp.* febris acutæ notare initium, quæ demum, ut videtur, ad 14. diem morte terminata est. Facile nos in historia ægri febrim initio jam adfuisse suspicaremur, sed *Hippocrates* ex signis quæ hic non memorat, v. g. ex defectu caloris, ex pulsu, certus fuit, quod hominem non sit, nisi tertio die, aggressa.

Epid. 7. pag. 1231. Anamnesin refert *Anaxenoris*, quod Lienosus scilicet & pravi esset coloris, quodque obortus sinistro in femore tumor derepente evanisset. Data hac Anamnesi, morbum præsentem sic infit: „ Neque multis post diebus ad lienis regionem exorta est illi per initia veluti Epinyctis, in-
„ superque tumor, ac dura rubedo. Post quartum
„ autem diem febris ardens suborta est, & in ambi-
„ tu omnia livida apparuere, ac veluti putrida. Mor-
„ tuus est leviter antea purgatus, mentisque com-
„ pos.” Vel ægrotum ante quartum diem vidisse *Hippocratem* oportuit, vel ex *Theffalo*, *Polybio*, *Draconte*, aliisve, historiam morbi adeo accurate tenuisse, ut Epinyctidi, rubroque tumori febrim defuisse, eamque haud nisi post 4. diem accessisse, statuerit.

Epid. 7. pag. 1238. *Epicharmi* puer primo die necdum febricitasse videtur, sed a pepticiam contraxisse, id est cruditatem ex deambulatione, qua excalefactus supponitur fuisse, & ex potu, quo frigido æstuantem ex motu sanguinem condensaverit, omnem-
que

que perspirationem suppresserit. Ab introversa transpiratione ad ventriculum nausea orta vomitusque. Altero die anxietatem passus emeticum sumfit ex aqua cum aceto & sale. Post pituitæ vomitum, rigor primum ac febris accessit. Tertio die febris major. Quarto die morbi totius, scilicet tertio die febris, mors.

Epid. 3. pag. 1070. *Philistes in Thaso* diu capite doluerat, & soporosus ante morbum acutum decubuerat: Morbi vero acuti, cujus die 5. obiit, initium *Hippocrates* notavit duntaxat ex quo in morbo abusus potibus esset.

Hiscæ, similibusque muniti observatis, dum minime stupidi ægri sunt, probeque existunt memores antecessorum, exacte, opinor, determinare novimus, utrum cum ipsis primis perceptis incommodis, an vero postliminio ortus sit, quo laborant, morbus acutus. Febris enim indicia, majore calore, cæterisque symptomatibus sociata, hic juvant; licet plures pauperum suos, quibus victum quærissent, labores, per unum, pluresve dies, adhuc continuarent. Diffitendum tamen non est dubium superesse nonnunquam tale, ut incertitudo per totum morbi decursum perseveret, nec morbus ad demonstrationem regularum Hippocraticarum ullo modo sit accommodandus.

Quæ si ita se habent, an non capimus, quam inique nonnulli Hippocraticarum legum de diebus criticis inconcussam negent veritatem & constantiam? Si primo non utantur prudentia *Hippocratis* in determinandis acutorum initiis; si secundo non abstinant ab applicandis hisce regulis ad casus incertos; si tertio, ut bene notat optimus *Baglivus*, contra leges Hippocraticas naturam præpostera medicatione interturbent; habebunt unde perpetuo in *Hippocratem* invehantur, dum in se solos invehit illos oporteret,

dumque suis invectionibus falsis *Hippocratem* magis confirmant, quam oppugnant.

§. XI. An, Crisi bona contingente, certo determinare possimus, utrum ægri perfecta judicatione absoluti sint, an vero recidivam timendam habeant, aliosve morbos?

Ne absolute unquam hic determinent, auditoribus meis Auctor perpetuo sum. Exceptis enim casibus, ubi Epidemiæ natura talis est, ut omnes fere recidivent, qualem *Hippocrates* sic describit Epid. 1. pag. 956. 957. „Haud scio an eorum cuiquam, qui „superfuerunt, rite factæ recidivæ non recurrerint, omnesque, quod sciam, servabantur, quibus „hoc recidivæ genus contigerit:” exceptis observatis Epidemiæ, in qua vix recidivæ apparent, qualem *Hipp.* describit Epid. 2. pag. 1020. ajendo. „Nec nisi admodum paucis recidivæ contingebant:” hisce, inquam, exceptis, innumeræ causæ existunt, quæ recidivam morbi ejusdem, quæ morbos ex acuto alios, quæ demum cum optima crisi mortem inferre queant; adeoque summam in præfagiendo nobis inculcent prudentiam. Causæ hæc ab ipso morbo petendæ sunt, ab ægro, ab assistentibus ipsi, a Medico, ab errore Pharmacopæi &c.

I^{mo}. Ab ipso morbo vel corpore morbofo pendere ejusmodi casus, docent nos quotidiana observata. Novi ex regulis criticis requiri criticæ evacuationis eam constantiam, ut omnis morbi materies de corpore expellatur: Quis porro Medicum certiorem reddet fore ut, quam laudet, quam gaudeat, critica evacuatio, ejus sit constantiæ? Ex causis nobis ignotis; ex non sufficiente virium expultriciū robore; ex facili recessu materiæ per circulationem motæ in nobiliora loca; ex angustia finium minimorum canalium, quos permeare critice motus, expellendusque humor, debeat; optima crisis quæ gaudia

exci-

excitaverat, in luctum vertit. Ne longus sim, qui historias ægrorum apud *Hippocratem* attente revolvit, pluries has similesque bonæ, sed non perennantis, criscos, reperiet causas.

2^{do}. Ipsi ægri vix judicati, animi passionibus, errore regiminis, diætæ, imaginatione venerea &c., bonæ suæ perdunt judicationis effectum. Cur *Philonis filia*, quo ipso die optime judicata erat, periit? Intempestive cœnando debilem obruerat naturam, vasaque debilitata sua copiosiore chylo inferciverat, quam illa essent transmittendo. Quare *Moscho* die 14. ut debebat, bene judicato, tam pessima recidiva? Ἀμαρτάδες βρωμάτων ἐγένοντο: Die 17. errata in ciborum ratione contigerant. Cur *Scopus* Epid. 2. pag. 1028. post crisin Synanches inciderit in alvi segnitiam, febrimque continuam? Φλαύρως διατηθῆναι respondet *Hippocrates*: improba utebatur diætæ. Si aëre nimis libero utantur, dum v. g. crisis per sudores fit, continuat, imo aliquando, ut *Sydenham* in quodam morbo advertit, 24. horis perseverare debet, aër frigidior imprudenter admissus omnem nostram spem ilico fallit. Præterquam quod aëris mutatio spontanea morbos mutet, eorumque symptomata. Fuerat *Perinthis*, Epid. 2. pag. 1020. aër in Epidemicis morbis ficcus diu calidusque; ast cito mutatur in humidum a copiosa minutissimaque pluvia: tanta hinc in acutis mutatio, ut qui iis non nisi ad finem contigerant, sudores, jam ægros ab initio invaderent. Ponamus tale quidquam contingere dum v. g. nunc fit critica per alvum aut urinam evacuatio: mollitudo cutis aëre calido humente nata, allicit motam per circulationem morbosam materiem, quæ forte, apta quidem ut systemate mesenterico, aut renali, excerneretur, minus apta erit, quæ per cutaneos evacuetur poros, crisinque sic turbatam monstret.

3^{to}. Ab iis, qui ægro adfint, inserviant, adeant, turbari critica evacuatio potest. In irato ob uxoris morositatem viro, in alio quem uxoris cum alio viro adstantis zelotypia torquebat, visitantium hominum importuna multitudine, vidi anxietates ortas, crisesque turbatas. Nec desunt, qui res eo tempore haud concedendas ad manducandum aut bibendum suadeant, obtrudant; id quod ne Medico suboliat sæpe religiose cavent; sique ille quid suspicatus, interrogaverit, præfractæ negant, culpamque turbatæ naturæ in Medicum impudenter refundunt. Cum a tot tantisque rebus fortunata judicatio morbi turbari queat, quis non videat, quam plena dubiæ aleæ sit, quamque circumspectum esse oporteat in prognosi?

4^{to}. Ad evacuationes criticas a Medico medicamenta, quæ eo usque data fuerant, incaute continuata, imprudenter ablata aut mutata; evacuatio critica quod nimia crederetur, suppressa, imminutave, vel quod minor falso supponeretur, imperite aucta; nimia Medici in usu alimenti aut potus, indulgentia, virium intentione restaurandarum, ut ad laborem sustinendum æger sufficiat; aut diæta continuata, quæ in vigore morbi bona, jam insufficiens est; famulorum pharmacopolæ forte errores in paranda, apportandave, medicina, & millena id genus alia, criticam evacuationem turbare, minuere, augere, sufflaminare possunt.

5^{to}. Quid quod Crises sint, quæ videantur perfectæ, nec tamen sint? Quæ sanitatem reparasse appareant, nec reparaverint tamen? Intereaque temporis homines quid vitii in corpore alere minime credantur, & nihilominus alant? Hoc genus vitia nonnunquam a bona natura sic coqui, alvoque, aut urina, aut perspirationis organis, tam blande eliminari, ut æger prorsum ignoret, credibile omnino est; sed sæpius post simulatam aliquantisper sanitatem,

tem, varios in morbos erumpere, testatissimum est. Defumatur a Variolis exemplum. Hisce sic defuncti, ut perfecta valetudine frui videantur, si vena tundatur, fundunt æmulum pleuriticorum sanguinem. Cum omnibus propemodum Variolosis meis, *Sydenhamo* docente, semel, bis, ter, a curatis variolis sanguinem detraxerim, potero centenis confirmare, quod hic assero, exemplis. Porro ejusmodi cruor in corpore circumductus, videtur in multis sic sensim subigi, ut attenuatus insensibiliter eliminetur, aut etiam sic, ut diathesin phlogisticam amittat; attamen, quod dolemus toties, potest subitaneis in cute tumoribus furunculos generare, abscessus ad articulos, ad oculos inflammationes, suffusiones, cataractam, amaurosin; ad aures baruëkoiam, surditatem; ad pulmones aut vomicas, aut puris continua sputa, variaque ad viscera & partes, alia atque alia, formidandos morbos creare. Haud eget confirmatione thesis, quam, heu nimium! demonstratam mecum dolent omnes practici, si post variolas venæ sectiones negligantur. Multi quidem inter variolarum curationem & erupturos postea morbos, languent; verum non desunt plures, qui, ut monebam mox, ferant hanc diathesin insensiles, inscii, usque ad tempus, quo alius inde erumpat morbus.

Sane miri casus, quos suppeditat praxis, millies mihi in memoriam revocant sententiam *Hippocratis*, quam inexperti rident, experti mecum verissimam agnoscunt. Libr. I. de Morbis pag. 456. de Abscessibus agens, qui multis in pulmone, sæpe letales, nascuntur, addidit „esse, qui ob bonum corporis „ habitum eosdem in se fieri, ne sentiant quidem.” Binos memorabo quos hac æstate habui casus. Vir nobilissimus in Moravia, totus torosus, ac sanus, vomicarum ingentium in thorace latitantium prorsum ignarus vixit, donec in prandio ab officulo aviculæ

imprudenter quidem, sed feliciter, deglutito, maximas pateretur angustias, & sub conaminibus extrahendi officulum excitata tussicula, subito pus expueret, horrende foetidum, ad plures libras; post aliquot dierum quietem denuo plures libras, atque sic per 7. 8. vices, ut vix ausim describere dolium, quod pure plenum eo tempore evacuassee se æger affirmet. Norunt mecum casum bini celebrandi in arte Viri, qui ægrum tractantes, mecum super eo sæpius consulere, doctissimus *Sagar* Physicus, merittissimus circuli *Iglaviensis*, Botanices simul ac Historiæ naturalis eximius Cultor; & doctissimus Dominus *Magb*, Archiater nobilissimæ & excellentissimæ Comitiss viduæ *de Liechtenstein*, in praxi medica colenda & promovenda eminens: & quod magis mirabar, bimestri spatio vix inde exacto, vidi nobilissimum Comitem in prædio meo suburbano me visitantem, adeo sanum, & torosum, ut quid in ejus valetudine culparem, invenirem prorsus nihil. In curatione ejus lac, aqua Selterana, mel, opium, cortex Peruvianus, primas tenuerunt.

Dixeram diathesin phlogisticam longo tempore in corpore circumlatam, haud raro, absque formato primum sacco, ex sanguine videri immediate transfudare, dilatata vasa pulmonalia, aut bronchialia, atque purulentorum sputorum forma expui, ut incautis vomicæ pulmonalis videatur evacuatio esse, idque ideo præcipue quod longiore sæpe tempore hæc continuet sputorum ejectio. Casus plures variis in *Rat. Med. partibus*, anatome demonstratos, communicavi; dabo alium confirmatum sanitate. Nobilissimus vir ex rheumatismo dimidii anni, ex morbillis deinde, & angina, incidit, anni abhinc spatio, in magnam debilitatem, & in induratum valde hepar, deinde in febrim tertianam. Solvente ac deobstruente remedio, succis herbarum potissimum, curata febris

febris fuit; iisdemque remediis, aqua felterana, atque continuato cataplasmate ad durum epigastrium, hepar denuo molle factum est, vires rediere, somnus, appetitus; ut demum declinante æstate munere suo publico fungi æger, itinera quotidiana curru, aut equo, sanitatis ergo, peragere potuerit, & exceptis flatibus sæpe torquentibus, integram videretur sanitatem adeptus. At subito, ineunte Septembri, raucus fit, moxque tussiendo pus coctum album copiosum commode, unica tussicula expuere cepit, & toto mense Septembri & Octobri continuavit, sanitate interim, liberrimoque semper pulmone, perseverante. In excellentissimo Comite priore latuit omnes enormis copia puris, vomitis contenta pulmonis; in posteriore, diathesis purulenta sanguinis magna & copiosa, non nisi numerosissimis innotuit sputis.

Ergo dubia prognosis danda semper est, bona quamvis fiat evacuatio critica, & nunquam post eandem dum videtur absoluta esse, nimia indulgentia erga ægrum utendum: ne nostra culpa quod forte insensibiliter exivisset, vel recidivam, vel novum morbum faciat; neve in ipsam Medicinam, aut Medicos, refundatur recidivæ, aut deterioris, causa.

Addere juvat historiam ægrotantis letalem, quæ tum per se singularis est, tum egregiam facit plerorumque hucusque dictorum ἀνακεφαλαίωσιν.

Femina 27. annorum, quæ veris variolis bis se laborasse asseverabat, leviolemque dabat virulentæ gonorrhœæ suspicionem, morbos acutos pluries perpeffa, menses suos aliquando interruptos, semper irregulares tempore, copia autem paucos, habens, tandem 15. Augusti proxime elapsi horrore ac frigore, spatio 5. horarum corripitur, magno succedente calore. Tristi necessitate coacta, lassum suum ac dedolatum corpus ad hortenses labores iterum ad-

movit, superstita ad prandium & cœnam aliquo appetitu. Die altera laborem hortensem eadem difficultate profecuta, tandem die tertio ingravescente morbo lecto surgere non potuit, æstu laborans ingenti, siti intensa, cephalalgia, apositia, artuum omnium dolore, vigiliis, &c. Pulverem quo sudaret sumsit, modice sudavit. Die quarto maculis rubris sibi cutem tingi advertit, vespere evanescentibus. Die quinto maculæ renatæ; pedes, manus, venter, pauculum intumuerunt. Die sexto eadem. Huc usque & alvum quotidie habuerat, & nunquam dormiverat fere. Die septimo inchoante, mox ubi ad Nosocomium SS. Trinitatis adducta esset, ad nos adferebatur.

Femina hæc quamvis primis morbi diebus labores suos profecuta esset, *erecta & obambulans*, ὀρθοσταδὴν, ex regulis tamen a pag. 368. ad 372. datis iudicabatur a nobis acute ab ipso initio laborasse, adeoque acuti ac maligni morbi diem nunc septimum agere. Cum in summo æstu, notante thermometro Fahren. in umbra gradum 81. caloris, febriente corpore laborans valide sub dio, tenuiora humorum suorum dissipasset, incrassasset reliqua, dein sine auxilio bono, cum intempestivo sudorifero, jacuisset, mirum minime est petechias accessisse, morbumque evasisse malignum.

Symptomata porro, die 7. inchoante, hæc invenimus; cephalalgiam, artuum gravitatem, vehementem sitim, cutem aridam & urentem, aridam linguam, respirationem difficilem, fortem ac celerem pulsum, ventrem tumidulum, dolorem, attactu auctum, in latere dextro, eoque inferiore, thoracis, petechias tandem, & ad femora vibices, quæ tamen ex aliquot horis coloris intensitatem multum dimiserant.

In toto morbo, undique examinato, nihil non cru-

crudum. Petechiæ, & errore natæ, &, quod morbus indies ingravesceret, vere symptomaticæ; ergo tuto, *Sorbaitii* consilio, negligendæ, ac si non adessent; & febris acuta, tanquam plane cruda tractanda. Unde vena secta est, diluentia, nitrosa, expectorantia remedia præscripta, cataplasma dolentibus adplicatum locis. Post V. S. respiratio paullo facilior fuit; petechiæ, quæ jam illi ad nos intranti minuebantur, plus disparuere, vespere vero, quamvis in parvo somno levio rem sudorem, humidamque postea ac calidam cutem haberet, vix ultra nisi ex vestigiis relictis cognoscebantur.

Vespere cum calore 102. graduum cephalalgia ingens, & ferme suffocans respiratio, alteram V. S. suaserunt. Symptomatum inde remissio.

Inchoante die octavo, licet calor 100. graduum thermometri non transcenderet, febris tamen magna fuit, pulsu minus, quam pridie, suppresso. Perseverantibus ventris utcumque doloribus, continuatum cataplasma est, & injectum emolliens enema, quod copiosa stercore solvit, eduxit.

Suffocans respiratio, quæ die 7. ad meridiem, & ad seram vesperam affuerat, hoc die octavo ad 9. matutinam minus violente, ad 2. pomeridianam post levem horrorem violentissime ingruit, ita ut, ne suffocaretur penitus ægra, tertiam V. S. tentaremus: verum vix fluente sanguine, & imminente animi deliquio, sub stragulis reposita est, & aceti frigidi aspersione ac frictione sic recreata, ut facilius respiraret. Calorem notabat tunc eo, qui pridie, majorem; graduum scil. 104., percipere se affirmabat sub sternum corpus veluti durum, ac dolens, quod in paroxysmo auctum respirare prohiberet.

Ex his phænomenis suspicamur, ne præter acutum morbum, spasmodici quid respiratorios afficeret nervos, dedimus inter remedia dicta nonnunquam lene
neuro-

neuroticum, spiritum C. C. succinatum, mistum cum tantillo diacodii, & admovimus vesicantia. Nihilominus ad mediam septimam subdelirare cepit, valde febricitavit, vehementer sitivit, & cum cute primum jam humida sudare cepit ad octavam, sudore per totum corpus profuso, cum somno perturbato. Urinam tunc reddidit, quæ boni coloris enæorema suspensum habuit. Nox valde inquieta, quietior ad auroram somnus parum modo læsam respirationem ostendebat. Mane febris minor, & calor tantum 100. gr. Vesicantia operabantur.

Signa bona plura hic aderant. Sudor, post horrorem, universus, symptomatum emendatio, somnus tranquillior, febris sedatior, calor minor, bonus vesicantium effectus, urina bona.

Verum contigerant hæc media octava morbi die, quæ non critica: Coctionis signa ante sudorem non adparuerant, & dies 9. continuis omni hora variantibus anxietatibus pectoris, & febribus, transacta est. Ergo nihil critici in sudore prægresso. Porro hoc 9. die observavimus dormienti, quam vigilianti, respirationem liberiores, quod acuto morbo spasmodum adjunctorum confirmavit suspicionem. Interim hoc toto die pulcre fluxere vesicantia, bonique fuit urina coloris, calor 101. gradum tantum notavit. Nox insequens molesta, sudor frequens.

Die 10. inchoante pulsus fortis ac celer, ad meridiem moderatus; cephalalgia continua toto morbo, sudor indefinens, apositia. Post meridiem permutationes perpetuæ respirationis ac febris, cum somno, ut videbatur, placidiore, aliquoties capto. Enema alvum copiosam, stercoraceam, eduxit.

Subnascebatur interim suspicio num febris hæc referenda non foret ad speciem illam, quam libro *de Febrium divisione* Capite 9. descripsi, quam postea vidit, accuratissime descripsit, feliciter curavit, egregius

gregius *Lautter*; qualis si foret, cortex peruvianus ilico præscribendus esset.

Verum species illa febrium ad intermittentes urinæ, ac maxime pulsu, referendam se esse docet; nostra febris erat continua remittens utroque hoc signo. An vero etiam in continuis remittentibus, si malignitatem redolerent, non dedimus sæpius summo cum effectu Corticem? Utique daturus fuisset, nisi bonæ eousque & naturales urinæ circa tertiam matutinam, mox instante 11. die in vere hypostaticas pulcre mutatæ, jussissent paulisper expectare eventum morbi.


Die igitur 11. vere critico, post hypostaticas urinæ, placidus somnus, facilior respiratio, multus,isque universus sudor, sputa pauca glutinosa. Hocque die quinquies missæ urinæ, habebant omnes sedimen album, læve, æquale, copiosum. Febris moderata sic, ut post meridiem vix ultra perciperetur.

Igitur habebamus hic plurima bona signa, quæ bonæ Criseos, criticæque evacuationis, certitudinem ad salutem indicabant; sive evacuationes sudorum & urinarum, primumque apparentium sputorum indicium, sive insignem morbi, ejusque symptomatum, emendationem, intuearis.

Principiis vero imbuti Hippocraticis, (vid. pag. 372. n°. 1.) cavimus a certitudine prognoseos, visuri num bonorum signorum gauderemus constantia. Prudenter sane: nam ad 8. vespertinam reversio anxietatis in respirando; quæ ad 10. remissior, tandem ad 2. adeo vehemens, ut intra horam vitam una ademerit.

An malum, postremos sudores prægresso caruisse horrore? Sed alvus per totum morbum libera fuit. Vide a pag. 341. ad 342. An spasmi motam, & critice probe excernendam, natura tamen sua crassiores, materiem morbosam, sic in angustiis pulmonum

monum compresserint, ut tota simul substiterit circulatio? Nunquid, simili casu denuo se offerente, cortex peruvianus non foret audacter ab initio exhibendus, tanquam antispasmodicorum princeps? Si optime hypostaticæ urinæ formidolosas se ostendant aliquando, ut hic, ut & ex *Hipp.* pag. 359. & seq. patuit, an non imprudenter imitemur *Galenum*, tan-
topere bonis fidentem urinis, ut ex iis solis prognosin credat posse formari?



C A P U T XXI.

De Morbis acutis cum Petechiis, aut Miliaribus.

§. I. *Petechiæ & Miliaria rarissime, si unquam, Critica sunt; frequentissime symptomatica; symptomaticorum vero plurima factitia: quod quamvis demonstratum pluries, nec dum animis patrium evellere errorem potuit.* §. II. *Hinc natæ Tironum objectiones, & scrupuli, contra demonstrata. Objectione 1^{ma}. de Aphthis est. Ostenditur hanc ipsam objectionem evincere tum Miliaria factitia esse, tum brevi occidua fore.* 2^{da}. *Objectione ponit si, quæ de calida methodo, ut Miliaria generante, dixerim, vera essent, Miliaria & antiquiora, & universaliora esse oportere: Respondetur argumento a pari, quo ob-
jectione refutetur.* 3^{ta}. *Objectione supponit, quamvis Viennæ calida methodus vix in usu sit, tamen & in urbe, suburbiisque, & in omnibus nosocomiis, etiamque in meo, Miliaria frequentissima esse: adeoque falsum esse, quod eadem generet calida methodus. Respondetur, salvo honore multorum præstantissimorum Viennæ Medicorum, multos medicos, ipsamve plebem, vel utrosque, aut calida medicamenta, aut cali-*

calidum regimen, aut utrumque, vehementer amare: deinde præterquam a calida methodo, etiam pluribus aliis de causis illa generari: Falso accusari meum nosocomium, demonstrari Diariis hic communicatis; utpote quæ & rarissima in illo Miliaria, & semper symptomatica fuisse, doceant. Animadversio in imperitos, qui maculas rubras, & sudamina, cum Petechiis & Miliaribus inepte confundunt. 4^{ta}. Objeção statuens exanthema hoc, ob regularem oriundi, crescendi, decrescendique tempus, criticum dicendum esse, nihil probat: id textu Hippocratis, plura alia adhuc docentis, ostenditur. 5^{ta}. Objeção supponit ideo critica esse Miliaria, quod eadem moderari, mutare, minuere non liceat, ut quidem id, quod vere symptomaticum: Respondetur summo ægrorum emolumento, & licere, & oportere 6^{ta}. Objeção comparat illa cum Variolis & Morbillis, ponitque male a me negari, quod ut hi illis, sic illæ his, superveniant: respondetur paucis exceptionibus regulas universales non destrui: adeoque jure me negasse. 7^{ma}. Objeção me ipsum ut idiopathica descripsisse: respondetur negando. 8^{va}. Objeção condemnat meam in Miliari febre methodum, V. S. educationem ægrorum ex lecto, vesicantia &c. Respondetur demonstrando V. S. necessitatem apud Germanos, deinde Sydenhami exemplo a Boerhaavio & illustrissimo Præfide laudato, meam methodum commendari. Vesicantia id non facere, quod supponit objeção, demonstratur observatis; verus demum illorum usus & effectus ostenditur. 9^{na}. Objeção nititur testimonium Fr. Misericordiæ annihilare; probatur non modo verum fuisse, sed novis constare & firmari experimentis. 10^{ma}. Objeção agit de omisso maximam partem in latino Lautteri textu gallice reddendo. Respondetur quod incuria fecerim, idem vitium in eodem textu gallice reddendo paulo inferius commissum esse ab iis, qui

qui ob id me carpant. 11^{ma}. Objectio spectat contradictiones notatas in libro doctissimi Domini Haze-
nohrl: Responsio demonstrat, aut imaginarias has
objectiones esse, aut malevolas. Objectio 12^{ma}. de
usu candelæ ad detegenda miliaria, & responsio. Ob-
jectio 13^{ma}. supponit me perperam Hoffmannum,
Fuchsum, Triumphium, in meas partes laudasse;
respondetur laudari in meam sententiam debuisse, eo
quo laudavi sensu, non vero in eo sensu, quo adver-
sarii velint, & qui meus non fuerit. §. III. Epi-
logus hujus capitis necessaria.

§. I. **E**x quo Medicinam, idque Viennæ potissi-
mum, feci, per observationes, quas in
nosocomio meo, & apud Ægros in urbe atque sub-
urbiis in consilium vocatus, plurimas habui, dudum
didici duo hæc: 1^{mo}. Clarissimum meum in Cathe-
dra Viennensi Antecessorem, & augustissimæ Impe-
ratricis ELEONORÆ Archiatrum, Paulum de Sorbait,
ante 100. fere abhinc annos, verissime de Petechiis,
extra pestem contingentibus, scripsisse Univ. Med.
pag. 541. quod essent motus noxius ac symptomaticus;
& pag. 545. Expulsio symptomatica, cujus tam parum
noxia esset retardatio, ut extantibus iisdem venæ
sectio tuto institueretur. 2^{do}. Incomparabilem Sy-
denhamum 80. adhinc elapsis annis in Scheda monito-
ria justissime non modo similia de Petechiis, de Ma-
culis purpureis, & de Miliaribus, testatum esse,
verum etiam raro a natura, sæpius mala arte extor-
queri, luxisse.

Hinc elapsis propemodum quatuor annis in dedi-
catione Thesium de Div. Febr. ad auditores meos
hæc dixi: „Dantur Exanthemata Petechialia, &
„ Miliaria critica; dantur mere symptomatica; dan-
„ tur denique accidentia, aut accidentalialia, ut vocant,
„ prava arte producta. Pestilentiosis temporibus
„ Cri-

„ Critica frequenter, frequentius symptomata,
 „ describuntur Auctoribus: tempore autem minime
 „ pestifero, Exanthemata hæc tum critica, tum
 „ symptomata, rariora sunt, accidentia vero, fa-
 „ tali scilicet arte genita, frequentissima.”

Post editum hunc librum, magis convictus fui,
 magisque, de tanta utriusque Exanthematis, veluti
 critici, raritate: ita ut vix critica dari, sponteque
 generatorum Exanthematum pleraque, ac fere
 omnia symptomata esse; cæterum symptomatico-
 rum in *Germania* numerosissimorum pleraque esse
 factitia; audacter statuam.

Hinc in omnibus fere quæ edidi opusculis medi-
 cis, hanc veritatem proposui, statuminavi, ungui-
 bus defendi rostrisque: ut demum omnes, qui Me-
 dicinæ addiscendæ causa ad inclytam hanc Universi-
 tatem confluunt, dictis convicti factisque, ad extin-
 guendum hoc pessimum, ac sæpe letale symptoma,
 animum admoveant, dum ipsi per sese praxin exer-
 cebunt.

§. II. Sed altiores egit radices patrius error, quam
 ut exantlatis hucusque laboribus evellatur animo.
 Id me docent ipsi Medicinæ Tirones, quos conver-
 satio cum vetustioribus Medicis, quos male relata
 exempla, quos horror omnis ejus quod novum dici-
 tur, licet sit præjudicata opinione antiquius, ita
 præoccupavit, ut sylvam objectionum collectam mi-
 hi sæpe objiciant, ad quas toties responsa ipsis dedi,
 quibus videbantur convicti recedere; haud ita ta-
 men, quin convictionis obliti, sæpius ad me redi-
 rent, crambem recoquentes antiquam.

Cum porro salus publica suprema lex sit, & cum
 nosocomii nostri Diariorum collectiones, quas opus-
 cula *de Rat. Med.* referre solent, in usum studioso-
 rum præcipue evulgentur; operæ pretium erit, in
 hac octava ejusdem operis Parte, easdem tum am-

plius evulgare, tum elucidatius exponere, ut demum omnis de illorum animis auferatur hæsitatio. Quod autem utilius atque efficacius id exequi possim, putavi nihil ad id accommodatius fore, quam recensionem earundem objectionum, quas mihi contra meam sententiam opposuerunt, & ad quas responsa, quæ dudum dederam, nondum rite intellexisse eosdem deprehendo. Nosocomii observata simul ad objectiones easdem dirigam, & applicabo.

I. Objiciunt mihi sæpe problema, quod Ill. Med. Præses L. B. *van Zwieten*, capite de *Aphthis*, Medicis proposuit illis, quibus occasio rem propius examinandi, quam sibi, ut Archiatrorum Comiti, liceret, frequentissima adesset; *utrum scilicet Miliarem morbum inter, & Aphthas, tanta intercederet affinitas, ut quod apud Belgas Aphthæ, id Miliaria apud Germanos essent; unde concludunt non posse Miliaria dici factitia, quia factitiæ non sunt Aphthæ.*

Quidquid ex problemate concluditur, æque problematicum manet, quam problema ipsum. Verum demus non esse problema, sed demonstrationem; quid inde? Profecto Miliarium in *Germania* ruinam necessario præfatur.

Belga natus, & spatio 19. annorum luculenta ibidem praxi exercitatus, certi quidquam & novi de aphthis proferre potui; utpote qui pluribus annis posterior magni *Boerhaavii* in Coll. Pract. auditor fuerim, quam Ill. Præses; & qui integris novem annis post Ill. Viri abitum praxim ibidem exercuerim.

Aphtharum nomine quid intelligatur propriè, ex definitione *Boerhaavii*, & Commentario Ill. Præsidis cuique notum est. Antiquitus videmus eo nomine potissimum intelligi puerorum morbum, & etiam exedentia aulorum ulcera, quæ cancri aquatici, vel ulceris *Nomæ* nomine, nunc describimus; minime vero aliquod symptoma, vel evacuationem criticam,

cam, quæ in acutis creberrima conspiceretur, ut quidem postea. *Forestus* in *Belgio* potissimum sic de aphthis agit, ut dixi: addit vero libr. 14. in Scholio ad obs. 22.: „Asth Aphthæ quæ in febribus & in morbis „ acutis, & in pestilentia, & quæ frequentius in pe- „ riculosis febribus apparent, ex flagrantibus exha- „ lationibus etiam in peripneumonicis, ut sæpe vi- „ dimus, raro non diro augurio spectantur.” *Sen- nertus* in *Germania* prax. lib. 2. part. 1. cap. 18. ut infantum morbum describit; sin vero adultos occupa- pat, ad malignitatem morborum acutorum refert.

Ex quo vero regimen & medicamenta calida *Bet- gis* per integrum fere sæculum acceptissima fuere, aphtharum frequentia tanta ibidem fuit, ut gaude- rent Medici & ægri acutum morbum quandoque si- ne aphthis curari. Luxerat quidem diu infamem ob illas Patriam suam *Boerhaavius*; verum triennio ante sua fata vidi, audivique, venerabilem Senem glo- riantem, & exultantem, quod indies aphtharum crebritas minueretur, spemque sui interitus daret, ex quo Hippocraticæ methodo, multitudine suorum discipulorum sensim inductæ, inciperet, pergeret- que cedere error antiquus.

Hoc adeo verum, ut ipse ego, ultimis Batavæ meæ praxeos annis, celebresque mecum in Patria practici, testarentur, vix bis ter in anno aphthas se in adultorum acutis cernere morbis; læti ob id in- primis, quod inciperemus hoc modo carere ejusmodi in acutis symptomate, quod criticæ evacuationis ho- nestæ appellatione vix esset recensendum. Equidem *Boerhaave* Instit. §. 938., & Aphorism. cap. de Aphthis, ad crisin eas retulerat; sed ad qualem? Ad difficilem, laboriosam, periculo plenam, ac sæpe le- talem; raro scilicet ortam a natura febris, sed, Aph. 991. probl. 3. maxime si medicamenta, victus, regi- men, calefacientia (aut adstringentia) initio hujus morbi

data. Agnovit eas absque calefacientibus nasci, sed simul ab iisdem nasci *maxime* asseverat. Ergo agnovit quoque aphthas *factitias*. Hinc minime in Collegiis mirabamur, quod magnus ille vir, *Sydenhamum* imitatus, nobis tam serio inculcaret, ut in initio ejusmodi febris, quæ adjunctam Diarrhœam & Dysenteriam haberet, & in quarum fine alioqui essent adparituræ aphthæ, purgans daremus, *quo ejusmodi Aphthas præcaveremus*. ibid. probl. 4. Si autem jussit nos aphthas, ne nascerentur, præcavere, agnovit aphthas negligentia medici *factitias*; aphthas, inquam, quæ in fine morbi haud affuissent, si Medici in morbi principio suas partes explevissent. Eodem prorsus modo hic *Boerhaave* egit, quo ante 100. fere annos *Sydenhamus* agebat, dum bubones, parotides, antraces, periculosas sæpe febris pestilentialis crises, tam salutariter sudore 24. horarum, ac purgante, præcaveret, ut omnes inde feliciter emergent; interea dum aliorum plurimi, quibus hæc Medici non præcavissent, desiderarentur. Vid. de Febr. pestil. & peste ann. 1665. 1666. Eodem denique modo, *Sydenhamii* ac *Boerhaavii* sapiens exemplis, Cl. *Allionius*, Miliaria, in febre ad illa disposita, ne erumperent, præcaveri docuit, bina ternaque venæ sectione, totidemque purgantibus; quam methodum ut saluberrimam toties expertus, vehementer laudat.

Itaque quo magis urgent adversarii problema hocce, eo magis statuminant, & roborant, sententiam nostram.

II. Si Regimen, & calida medicamenta, miliaribus producendis apta nata forent, utique ad 16. sæculi initium, quo *Sylviana* methodus florere incepit, necesse est tunc illa adparuisse, & ex eo tempore ubique, siquidem calida methodus exinde universalis fuit.

Transeundo errorem in Epocha *Sylviana* commissum, siquidem initium 16^{ti}. sæculi, imo vix illud

Iud 17^{mi}. nec dum *Sylvii* videre natales, virique opera prima ante 1664. lucem non viderunt; dicam calidam methodum dudum ante Epocham illam in Germania viguisse. Sed his transmissis argumentum argumento opponam, quo ejusdem imbecillitas patelcat. Si congressus venerus posset luem veneream, ac gonorrhœam, creare, hanc & illam creasset jam ante numerosa sæcula, siquidem semper obtinuit ejusmodi congressus. Atqui ante finem sæculi 15. nullibi Europæorum locorum morbus hic notus fuit. Ergo eundem producere congressus venerus non potuit. Est quidem ridiculum argumentum; sed quo objectionis ridiculitatem demonstret, necessarium. Utriusque autem facti, argumento utroque contenti, rationem rogatus, fateor responsi nihil me invenire, quam, quemadmodum finiente sæculo 15. morbi venerei, ab impuro congressu contracti, primo in regno Neapolitano apparuere, & deinde reliquos ordine Europæos invasere, prout infectorum commercio succedente ordine utebantur; a qua tamen causa, licet antea millionesies & millionesies posita, lues venerea nunquam orta esset; sic post elapsi sæculi principium (eam enim epocham figere Riveriana suadent,) nata Miliaria esse ex regimine calido, a calidis medicamentis, ab aëre aut non, aut non sufficienter, renovato, ab eodem multorum hominum exhalationibus inquinato, ab interna corruptione humorum, illi simili, quam calida dicta generent, & forte ab aliis nonnullis causis; a quibus tamen causis nunquam antea generata essent. Mera observatio est, cujus causam neque in Purpura, neque in lue Venerea, ingenio assequimur, naturæ utriusque corruptionis ignari.

III. *Frequentissima sunt Miliaria Viennæ, & in omnibus nosocomiis, & in privatis ædibus, etiam quandoque reperiunda in meo nosocomio. Atqui Viennenses Medici*

calida methodo tam parum utuntur, ut qui eosdem de illa accusaverit, videatur de lana caprina disputasse, neque ego certe calidis utor in nosocomio. Ergo non est verum, quod ea calida methodus pariat.

Reservandum mihi responsum ad ea, quæ de omnibus Nosocomiis objiciuntur, admitto majorem, & ad minorem, salvo semper honore plurium Viennensium medicorum, qui egregiam methodum curandi adhibere solent, morbosque acutos, in quibus exanthema prodit, sic curant, quasi illud non adesset, id quod mihi testati sunt sæpius; respondeo 1^{mo}. formulas multorum Medicorum adeptum, certo me nosse, & in nosocomiis, & in urbe, suburbiisque, plurimos reperiri Medicos, qui calidis Alexipharmacis, copioso præprimis Croco, ipso acutorum principio, perque universum eorundem decursum, utantur, & hanc suam methodum publice laudare non vereantur, ut virus, quemadmodum *Hoffmannus* Medicis pravis exprobrabat, de corde pellant. Extant innumeræ formulæ Hofmannianæ dictæ misturæ cum bona Croci dosi; formulæ linctuum pro tussi catarrhali, quibus suspicione aut latentis, aut saltem futuri exanthematis, crocus est admixtus. Præsens in consultatione vidi celebrem Medicum, animadverso, ut postea patuit, culicum morfu, cardiaca calida ad exanthema, ut ajebat, foras ejiciendum, jam dedisse: methodo tamen a me, binisque aliis Collegis, in rationabilem mutata, æger absque vel minimo exanthemate brevi integreque convaleuit. Advocatus ad consultationes, ærem nedum ægris, verum nec sanis, calore tolerabilem, sæpius deprehendo. Quin & animis adeo alte insitum calidi æris præjudicium offendi, ut hora consultationis is, ne conquereretur, moderaretur, moxque, abeunte me, incenderetur; quam fraudem, aliquando maturior interpellans, detexi. Plures etiam boni Medici apud me

me conquesti sunt, quod, quantacumque diligentia aëris commendarent, curarentque temperaturam, tamen vulgus æque nobile, quam ignobile, calidum perpetuo aëra, se abeuntibus, concilient ægris. An ergo falsum non est, quod, qui de hisce conquerratur, de lana cavillet caprina? An miremur, quod exanthemate infamem se Regia *Vienna* lugeat?

Resp. 2^{do}. ut prava arte Miliaria, alioqui defutura produci, sæpe conquestus sum, ita luce clarius evici aliis occasionibus, haud sic calida medicamenta requiri, ac si, citra illa, petechia aut purpura gigneretur nunquam. Equidem etiam sine medicamentis calidis aptum aëra esse, qui illa producat, calidiorum: adeoque a Medicis, temperatam medelam dantibus, Miliaria millies creari, dum aut studio imperent, aut conniventia tolerant, acute laborantes calido in aëre foveri perpetuo. Demonstravi pluries quoque purpuram eorum sub cura produci, qui calidi remedii, calidique aëris osiores, vano interim metu ægros lecto sæpius eximere, eorundemque propriis inquinamentis in lecto fœdatam atmosphæram sufficienter mutare, ac lustrare, religioni habeant. Generari forsitan eadem facilius dum in ægris, lecto vix mutatis, venæ sectiones fuerint omisæ; sive præ defectu necessariæ distinctionis veram inter imaginariamque debilitatem, sive præ generaliore, quam par est, persuasionem insequuturi cujusquam nocumenti, si ægris acutorum principio vena secetur, quando aut impetus humorum vehemens non sit, aut cutaneæ sperentur, expectenturve, eruptiones. Præterea docuit experientia toties, absque calidis remediis, abs calido aëre, Miliaria & Petechias produci, quando plures ægri, eodem in loco collocati, atmosphæra mutua, aut non mutata, aut saltem haud sufficienter, ut in bellis toties visum, vesci cogantur. Quin etiam omnibus sic a

Medico directis, ut nullatenus exanthema gigni debeat, gigni nihilominus idem, dum qui jam prius istud vel in miasmate alibi concepissent, vel aliis explicitis de causis sibi comparassent, curandi susciperentur. Tandem spontaneam acutis in ægris humorum corruptionem, spontanea exanthemata, penitus tamen symptomatica, & perniciofa, generare nonnunquam.

Cum ergo tot existant causæ, a quarum vel unica hæc exanthemata citra naturæ operam produci queant, nonne iniqua prorsum argumentatione concludere velint, exanthema ideo datis de causis non gigni, si earum vel unica desit? Eodem plane modo concluderet quis febrim ardentem gigni posse nunquam. Optimus *Boerhaave* Aphor. 740 „Causa, inquit, „ (febris ardentis) labor nimius, iter longum, æstus „ solis, sitis diu tolerata, usus calefacientium, fermentatorum, aromaticorum, acrium, veneris nimia, delassatio immodica, maxime æstate, &c.” Sex igitur septemve varias, seorsimque subsistentes, febris ardentis causas enumerante *Boerhaavio*, licetne negare hujus febris præsentiam, eoquod ad eandem præsentem sistendam ex his septem defuerit una, duæ, tres? Ut febris ardens non gigneretur, deesse oportuisset causas omnes: data autem earum vel unica, generari potuit.

Sic unà responsum habetur ad objectionem, petitam a viso quoque Exanthemate in nosocomio nostro. Nunquid ideo apud nos, citra bonæ naturæ operam comparere haud potis est, non porrectis licet medicamentis calidis? Ordine adplicentur exanthematum recensitæ causæ omnes ad ægros, qui eadem apud nos acquisiverint, & capiet facile quisque, quod aut a degeneribus prorsum humoribus, aut proprio neglectu, aut suscepto antea contagio, subinde debuerint nasci.

Dedi

Dedi in variis *Rat. Med.* Partibus catalogum horum, & omnium, qui unquam exanthematibus apud nos laborarunt; ex quibus antequam demonstrationem formem, recentiora nonnulla prius enarrabo. Anno 1762. feminam cum Miliaribus in nostro nosocomio acquisitis ægram habui, idque hunc in modum: per decem dies acutæ febris labore agitata femina, demum ad nos confertur. Die 15., non critico, Miliaria prodeunt notabili cum incremento morbi. Die 19. non critico, abundantior purpura. Die 21. non critico, post ingentem horrorem calor, sudor, copiosiora Miliaria; quæ & pauciora ante, & copiosiora post, auditoribus demonstravi; eaque demum sic, ut die 24. moriente ægra, tum essent copiosissima, tum aliquantisper a morte, adhuc bene prostarent.

Anno currente, ad 8. Aug. juvenculam suscepimus, quæ cum continua febre ædibus expulsa, ad feminam pauperrimam sibi notam se contulerat, ibidemque citra ullum auxilium ad medium tertium diem jacuerat. Inde in quoddam nosocomium, in quo exanthematicorum legio, delata, sex horis citra auxilium, tantummodo plurimum tecta, ac probe sudans, mansit; inde ad nos sella portatili bene clausa conductæ est, maculis petechialibus hinc inde jam conspicuis, pectore anxia & tussiculosa. Die 4. & 5. morbi alvus cocta biliosa, naturalis urina, sudor levis, febris pauca. Ad meridiem diei quinti febris admodum magna, valido cum sinistri lateris ventrisque dolore. Post factam sanguinis missionem obdormivit, ac sudore toto pomeridiano tempore diffudit, maculis petechialibus inde non promotis, sed ita sensim obscurantibus sese, ut ad 9. morbi diem ulla vix relinquerentur vestigia. Quod autem notandum, post venæ sectionem die morbi 5. factam, crisis facta videbatur sudoribus & alvo, ita quidem, ut bona indies perseverante alvo, cum urina existente

passim naturali, semelque hypostatica, ad 10. diem inchoantem nullam prorsus febrem ultra deprehenderemus.

At vero 16. die mensis, morbi die 12., non critica, notavimus alba quædam, eademque parva admodum Miliaria in pectore, at ita inconstantia, ut nunc conspicua, hora vix elapsa, evanida, pauloque post iterum visibilia essent. Idem morbi 13. die; perseverante interim, quæ ante Miliaria affuerat, sanitate. Die morbi 14. & 15. bene conspicua, sed minutissima. Die 16. 17. 18. 19. 20. mane quidem pauca, post meridiem vero plura. Die 21. mane plura, post meridiem pauciora. Die 22. vix visibilia. 23. nulla. Cum puella hæc post crisin sana vixisset, ita ut quovis die ambulans, & sedens extra lectum, nec ante eruptionem, nec sub, nec post illam, vel minimum ægrotasset, templum 1. Sept. adivit, silentio supprimens levem ventris dolorem. E templo redux, vomuit, quæ comederat, fere tam integra, quam in mensa fuerant. Levem inde experta febrem, sudavit nocte multum, & sana surrexit, mansitque.

Dedi jam Cap. XIX. hujus Tomi historiam feminae, quæ sub idem tempus, ad diem sui morbi 5. purpureis maculis extantibus, ad nos allata fuerat; septimoque die judicari visa, ingens posthac negotium nobis facefferat; & Cap. XX. aliûs, quæ a triduo Petechiis tincta, ad 7. diem ad nos conductæ, & ad 11. mortua est.

Ex cunctorum recensione decem homines, spatio decem fere annorum numeramus, qui alterutrum exanthema, aut utrumque, in nostro nosocomio acquisiverunt. Horum porro decem, tres in nosocomiis, exanthemate infectis, aliquantisper decubuerant; unus negligentia petechias sibi comparavit. Quinta ad peripneumoniam neglectam, extra ædes nostras, habuit Scarlatinam ac Miliaria, in nosocomio

mio vero variolas & petechias, a degeneratione humorum subtilissimorum summa. Sexta ex morbo maxime maligno, cum mictu cruento, fere desperato, petechias contraxit. In reliquis, morbus acutus per 4. 6. 8. 10. dies neglectus, jam motu, calore, labore, sudore, in multos loci versus errores, malignitatem jam contraxerat.

Cum exanthematibus jam conspicuis quatuordecim ad nos allati sunt ex nosocomiis aliis, privatisve ædibus.

Igitur spatio decem fere annorum 24. homines exanthematici in nosocomio nostro fuere: Octo scilicet exanthemate petechiali, quos inter cum variolis una; undecim solo miliari: quinque utroque, eosque inter una cum pessimis variolis, affecti.

Horum quatuor diem eruptionis reliquere incertum; novem quidem die aliquo critico habuere eruptionem, novem vero die non critico, duo in restituta post morbum sanitate: verum in horum nemine criticæ evacuationis notam sustinuerunt: aut enim in morborum acutorum incremento prodire; aut si in statu, decrementove, cum symptomatibus pravis; ita ut inde perierint nonnulli, copioso licet exanthemate tecti, pluresque sive Cortice peruviano, sive criticis evacuationibus aliis, sive utrisque, servati fuerint: aut judicato, curatoque jam morbo, supervenere Miliaria, absque ullo præeunte concomitante, subsequente, symptomate.

Hisce igitur mature consideratis, capient facile studiosi nostri cur morbus hic a Natura raro, ab arte vel casu ut plurimum genitus, etiam nostro in nosocomio compareat? compareat autem adeo rarissimus, ut utroque exanthemate simul sumpto, vix quinquies inibi biennali advertatur spatio? &, si numeremus eos modo, qui illud in nosocomio acquisiverint, unicus modo singulo detur anno? Præterquam

quam quod in hac enumeratione liberalem juniorum quorundam Medicorum in numerando modum de industria imitati simus, ne quid cavillent; haud vero, ut eandem approbemus. Si enim pauculas illas maculas rubras, vel purpureas, quas *Sydenham* passim, quas *Boerhaave* pluribus in locis, a petechiis distinguendo ad pessimam humorum corruptionem referunt; si præterea quasvis pustulas miliaceas, sudore genitas, quas Patres Græci ἰσποα vocarunt, Latini *sudamina*, *papulas sudorum*, quales ut sano in æstivis sudoribus, sic sudantibus ægrotis sæpe obveniunt; si, inquam, hæc omnia ad Pétechias, & Miliaria relegemus, tunc ab orbe condito, per universas mundi plagas, petechiæ & miliaria sunt ἐνδυσμυκώτατα. Hoc autem negatur ab omnibus. Quam incongrue ergo miliaciis illis sudaminibus, in sudore critico nonnunquam prodeuntibus, crisin morbi clament per Miliaria fieri! sed *nova* data occasione, de hisce latius: Dives enim differendi seges mihi adest. Capiant quoque quantopere præter veritatem mihi objecerint, quod Miliaria soleant, *etiam fatentibus nobis*, & diebus prodire criticis, & morbi afferre, omniumque symptomatum, insigne levamen. Contrarium prorsus ex allatis vident exemplis. Si præterea videant, quæ in hoc ipsum notarint viri, eruditione aut praxi aut utroque clari, *Pourchon*, *Trumphius*, *Fuchsius*, *Kleinius*, *Hazenöbrl*, *Lautter*, erunt de iis, quæ profero, convicti. Et qui multitudine observationum cæteros antecellit cl. *Allionius*, qui ipse ex professo de Miliaribus, tanquam naturaliter genitis, disseruerat, nonne disertis scripsit verbis hæc: „Tertio aut quarto die, (ambobus criticis) exeunt pustulæ, septimo, & octavo, plerumque letales: minus funestæ, quas dies sexta (criticorum infidissima) affert. Et per manipulos & cohortes, incerta die ac hora, fit hujus exanthematis expulsio.”

Ju-

Jurene ergo, an injuria, Discipuli mei ex pag. 70. *Thes. de febr. Divis.* colligant criticum me pronuntiasse miliare exanthema? Conqueror pluries objectiones, quas refutandas susceperam, aut jam refutaveram, nihilominus tamen veluti meam propriam sententiam laudari; pari, ni fallor, injustitia, qua quis *Sydenhamum*, toties calidam methodum refutandam assumentem, veluti calidæ methodi celebraret Patronum: aut qua quis affereret *Davidem* Regem in Psalmis 13. & 52. Dei negare existentiam, quando impiorum sententiam oppugnaturus, referret quid ipsi in corde suo dicerent.

IV. *Crisin Miliaria referunt*, inquiunt mihi studioforum nonnulli, *regulariter procedendo, certamque efflorescentiæ, exsiccationis, ac desquammationis servando periodum.*

Sat superque responsum, quod ad tertiam objectionem dedi, hanc quartam diluit, ut insalutatam hanc præterire possim. Verum cum Discipulis meis nihil non debeo, dabo illis & aliquam hujus objectionis refutationem peculiariorem. Nescire me fateor quid in mentem venerit ipsis, quod allatis de causis Miliaria critica vocent? *Hippocrates* saltem tale quid, propter has causas, criticum non vocasset. Grassabatur populariter *Perinthi*, Epid. 2. pag. 1020. Febris ardens, quæ ut plurimum die 14. judicabatur sudoribus, at vero in ipsa æstate sudores jam a principio comites habebat; prætereaque die 7. (critico) die 8. (non critico) die 9. (critico.)

„ Τρηχύς μαλα ἐν τῷ χρωτί κεγχρώδεια, τοῖσιν ὑπὸ κωνάπων
„ γινόμενοις μάλιστα ἴκελα ἀναθήμασιν, ὃ πανὸ κνεσμώδεια.

„ Aspredines in cute miliaceæ, culicum morsibus
„ maxime similes, oboriebantur, haud multum tamen prurientes. Ταῦτα διετέλει μέχρι κρίσεως, hæc
„ ad usque crisin perseverabant.” Ergo erat symptoma peculiare in hac febre ardente, quod & diebus
criti-

criticis, & non criticis efflorescens, perdurans diu, & periodum disparendi servans, morbum nedum judicabat, verum ad morbi crisin, nempe sudorem, disparebat. Ergo Exanthemata regulariter procedentia, certamque efflorescentiæ, exsiccationis, desquamationis, periodum observantia, nec *Hipp.* nec ulli in hunc *Hipp.* locum commentatores, ad criseos naturam & genium ea de causa retulere.

Plura sane hoc in textu nos *Hippocrates* docet. Ac primo quidem, ut jam dictum, regulas crescendi evanescendique servantem efflorescentiam, minime tanquam criticam, sed tanquam mere symptomaticam, consideravit. Secundo crisin neutiquam huic tribuit, ast sudoribus diei 14. Tertio, in hac ardente febre, quæ tam benigna, ut ipse testetur illam nihil habuisse maligni; & ut, licet ab initio sudores perperam adessent, tamen pauci inde morerentur; in hac, inquam, febre, adeo benigna, agnovit excretiones dari symptomaticas, contra illorum sententiam, qui ideo negent symptomatica posse Miliaria haberi, quod sæpe in benignis acutis contingant, in quibus illi credunt tantam humorum non dari degenerationem. Et morbum benignum salutavit *Hippocrates*, & in benigno morbo exanthemata descripsit symptomatica.

Dum igitur accusamur quod Crisin acutæ febris non Miliaribus, sed aliis, aut simul, aut postmodum contingentibus evacuationibus adscribimus, auctore id facimus *Hippocrate*. Ut enim ille agebat in descripto exanthemate, ita nos symptomaticam Petechiam ac purpuram habemus, eo quod utraque die erumpat & critico, & non critico; quod eruptio in die critico peior sæpe demonstretur, quam in non critico; quod cum eruptione, postque eandem, morbus sæpe ingravescat, morbique symptomatica; quodque, etiamsi morbus in melius vertatur, tamen

ea in meliorem conversio minime exanthemati symptomatico, sed aliis criticis perturbationibus & evacuationibus potius adscribunda sit, quæ morbosam eliminantes materiem, simul illud symptomaticum crudumque exanthema, quod secundum *Allionium* pag. 44. coctionem non patitur, pellant foras.

V. Attamen instant: *Symptomatica dici hæc exanthemata nequeunt, eo quod symptomatica, si modum excedant, suppressere, minuere saltem, liceat, oporteatque: nunquam vero Miliaria; ni mortem velis, pejorare morte creare symptomatica.*

Profecto ut Symptomaticos in acutis sudores, ut *Sydenham* Collegæ sui Petechias, ita *Allionius*, nosque cum ipso, ægrorum e lecto exemptione, venæ sectione, enematibus, cortice peruviano, symptomaticos hosce motus moderamur cum bonis ægri rebus, totosque auferimus. Ergo sunt Symptomatica exanthemata.

VI. Comparant Medicinæ Tirones *Miliaria ac Petechias cum Variolis & Morbillis, naturali ortu, progressu, effectu; id me perperam negasse arbitrati, quando scripsi Variolas & Morbillos non supervenire Miliaribus ac Petechiis, sic ut penitus prodeant, crescantque, quemadmodum quidem hæc illis; contrarium nempe ex Camerario, & Albrechto, N. C. Sodalibus, demonstrari.*

Cum Tironibus multæ ineptiæ condonandæ sint, & ad has respondebo. Primo ex quinque rationibus, ob quas hanc comparisonem, libr. de Febr. Divis., negaveram, quatuor suppressere, ac, veluti illas quatuor non adduxissem, unicam quintam arripuerunt. Attamen arripiundæ erant omnes quinque, ut stringeret causa negati. Secundo etiam hanc, quam memorantur unicam, mutilarunt. In Febr. Div. pag. 70. sic scripseram: „Variolæ & Morbilli non „superveniunt Miliaribus & Petechiis, sic ut penitus prodeant, & crescant, sicut quidem hæc illis, „sed

„ sed tantum eo, quo pag. 32. dictum est, modo.” Porro pag. illa 32. dixeram: „ Miliaribus enim, aut Variolis, aut Morbillis, aut Scarlatinis, Petechiæ superveniunt; & vice versa Variolæ, Morbilli, Miliæres, ad Petechias accedunt, vix elevantes se, mortemque denunciante propinquam.” Communem observationem sic me exposuisse crediderim. Rogo enim practicos quosvis, num eandem utrimque consuetudinem observent sic, ut eo modo Variolæ Miliaribus & Petechiis superveniant, quemadmodum hæ ambæ illis? Num, quo in loco Miliæres & Petechiæ frequentissimæ sunt, sic in illis Medici expectant Variolas & Morbillos, quemadmodum in Variolis ac Morbillis, Petechias aut Miliæres? Si igitur nudo, quo scripsi, sensu verba mea intelligantur, eam referre sententiam censeo, quam tenent mecum Medici omnes. Verumtamen exempla prostant Variolarum Petechiis ac Miliaribus supervenientium. Admitto utique illa; utpote qui simile clapso jam sexennio protulerim. Sed num rariores exceptiones subvertant communes naturæ leges? Tunc nullas leges Medicina haberet, nullas Physica tota, nullas alia quælibet ars; semper enim aliquid est, quod extra easdem divaget.

VII. *Sed ipsemet ego, pergunt, in Febr. Div. pag. 39. Miliarem morbum velut idiopathicum, & gravissimum quidem, descripsi, cujus illa esset proprietas, ut morbosam materiem ad corporis deferret superficiem.*

Nunquid, qui sic fantur, mea volverunt attente? Videant ergo revolvendo me morbum nunquam idiopathicum vocasse, sed descripsisse talem, qualem Naturararissime, causæ aliæ numerosæ passim, generent. Minusne factitia lues venerea est, quod Auctores Syphilici eam describant tanquam morbum gravissimum, cujus illa proprietas sit, ut solida æque quam fluida corrumpat? An inde sequitur lucem

venen-

venercam morbum esse, in quem unusquisque ex communibus vulgarium morborum causis incidere queat?

VIII. Ajunt mihi Medicinæ Tirones se Medicos, veteris opinionis tenaces, advertere acriter in-
 vectos, & quotidie invehi, in methodum, quam in exan-
 thematicis tractandis observem: ægre illos ferre me ve-
 nam secare, me ægros lecto eximere quotidie, & si fe-
 rant, per aliquot horas in sedili collocare erectos: me
 vesicantia admoveere, quæ longe acrius solida fluidaque
 humani corporis agitent, stimulentque, quam, de quibus
 conquerar, calida stimulantia: interea medicos se frequen-
 tare, quibus quotannis innumeri exanthematici curandi
 committantur, qui tamen in febre simpliciter miliari ve-
 nam non tündant, qui Ethmulleri consilio ægros hosce com-
 pluribus diebus lecto haud eximant, qui vesicantia nun-
 quam, nisi efflorescentia retrocedente, ac debilitato vehe-
 menter inde ægro, admoveant.

Medicinæ Tirones, qui his visis auditisque in da-
 ta ipsis doctrina vacillant, manifeste docent se nec
 ad ea, quæ apud alios viderint, nec ad illa quæ in
 nosocomio nostro sibi demonstrata sint, accurate sa-
 tis attendisse; nec sufficienter se utriusque methodi
 consequentias & effectus ponderasse.

Profecto in initiis acutorum venam secantem non
 viderunt me unquam, quando vires vera debilitate
 prosternebantur, neque in schola medica didicerunt.
 At vero observare potuerunt in natione Germanica,
 quæ fluxui hæmorrhoidum sive naturali sive facti-
 tio, quæ frequenti admodum venæ sectioni, plus
 justo assueta est, quæ vorax præterea, vinoque in-
 dulgens ac cerevisiæ est, venæ sectionem in acuto-
 rum principio, si nihil vetat, egregie conducere:
 neglectu V. S. ex benignis malignos, eosdemque
 exanthematicos morbos, esse exortos; sic quidem
 ut notare potuerint ægros, neglectu jam exanthe-

maticos, instituta ac repetita sanguinis non dissoluti, sed vere pleuritici, missione, e mortis ereptos fuisse faucibus. Obliti penitus videntur confirmatæ toties apud nos observationis *Sydenhamianæ*, de ea apparente debilitate in febribus, cujus cardiacum venæ sectio esset. Ut dubio procul inter causas frequentioris alibi exanthematis missio sanguinis, acutorum principio neglecta, recensenda veniat.

Deinde causam, cur rarius apud nos exanthema, evidentem semper habui, & indefessus docui, esse quotidianam lecti refectionem: intra quod tempus ægri debiliores alium in lectum transferuntur; qui minus debiles per horæ quadrantem, horam, horasve complures, &, si ferunt, bis die, in majore ac commodiore sedili collocantur. Hinc toties videre mecum auditores plures ægros, quibus omnia symptomata, futuri exanthematis præsaga, adessent, febrim duntaxat acutam, minime exanthematicam, sed sæpe benignam, esse perpeffos. Viderunt mecum alios, erumpente exanthemate ad nos allatos, tolerabiliter valde morbum hac methodo tulisse, nec quenquam quid detrimenti inde unquam passum esse. Ita ut longe alia & penitus contraria a nostra methodo observaverimus, quam apud alios divulgetur.

Nec insolita hæc nostra ratio, nec nova est. Summorum in medicina virorum est celebratissima. Docuerat nos eandem dictis factisque immortalis *Sydenhamus*. Tempore febris contagiosæ variolosæ adeo abhorrebat ab ægris suis lecto addicendis, *ut ejusdem additionis effectus compararet cum intempestiva cardiacorum eodem in stadio exhibitione*. Sufficiebat ipsi, nec, ubi rerum arbiter erat, unquam aliter concessit, ut ægri cubiculi ambitu se continerent, *a lectulo, æque quam a cardiacis, abstinentes*: quarto vero die lecto adjudicabat: porro si benignæ ac discretæ essent

essent variolæ, & calida tempestas, *quotidie per aliquot horas lecto exemptos detineri curabat*. Quo demum effectum, ut feliciter morbi progressus ac maturatio fieret, ægrique longe minore cum tædio morbum perferrent. Sin verò aut frigidior anni tempestas, aut eruptio copiosior id minus concederet, lecto quidem eodem detinebat, verum & moderate tectos, & , foco in Camino mediocriter, bisque die duntaxat, accenso, quando hyems scilicet ingrueret, locum in lecto sæpe mutare jubebat, ne ad perniciosos hic semper sudores cogerentur.

Sed *Sydenhamo* objiciebant, quod nunc mihi; multos methodo prorsum contraria tractatos nihilo minus convalescere. Respondebat vir candidus negari tamen non posse, quin quoque plurimi illa contraria methodo interirent, pluresque adhuc interituros, nisi vel a frigidiorè tempestate, in quam fors inciderit morbus, vel a Phlebotomia, fervarentur: tumque notabile hoc addit: „Ex dictis, ut obiter „ attingam, facile erit vulgare illud problema solvere, quæ fiat scilicet, ut perpauca adeo e plebe hoc morbo pereant, si ad eos comparentur, qui inter divites eodem *trucidantur*? Quod quidem vix ad aliam causam potest referri, quam quod ob rem domi angustiorè, & agreste vivendi genus, vix fiat illis copia sibi nocendi, regimine magis accurato, ac delicatiore.

Quando nunc *Sydenham* in valde confluentibus ægros lecto addicebat, veniam concedebat ab hac in illam lecti partem corpus pro arbitrio suo transferendi, eosque, febre maturatoria adpetente, ad id ferio monebat, imo per alios curabat illos in lecto versari. Si autem facies in discretis ad 8. diem flaccesceret, ac pallesteret, sudorque bonus eo tempore cessaret, & phrenitis oriretur, præter venæ sectionem, & paregorica, asseverat sæpe se ægros ab

imminente morte præservasse liberiores auras illis conciliando; quo ut rite fruerentur illos lecto aliquantisper surgere jubebat. Confirmat autem experientiam suam exemplis phreniticorum, qui post sedulitatem irritam custodum externo aëri frigido, eique nocturno, se exponendo, servati sint; & exemplo juvenis, quem in variolis mortuum nunc a phrenitide habitum, lectoque exemptum, & in mensa, ut cadavera solent, positum, aër frigidior in vitam quasi revocaret. Coma variolosum eadem ratione tractans, *eadem sanguinis contemperatione* inquit, *& maculas purpureas vidi sublatas.* Urinæ suppressionem in variolis, acutisque aliis, ægrum lecto eximendo melius, quam per omnia alia remedia, curabat. Conqueritur alio loco vir præstantissimus, incautionibus quibusdam necesse videri, ut ægri in variolis lecto affigantur, eo quod sudores, in quos illi proclives, cum facilius inde manarent, tum æstus moderarentur febrilem; ubi tamen sole evidentius esset, quod exsiccato hinc corpore ad diem undecimam quamplurimi vitam cum morte transmutarent. In malignis variolis, non ductus opinione, sed experientia firmatus, assererat, nec venæ sectionem, nec medicamenta diluentia, & refrigerantia, per se periculum auferre; plus vero expectari oportere ab aëre moderato ac renovato: sic quidem ut non, nisi nocte, lecto committendi essent, quibus confluentes illæ anomalæ variolæ eruptionis præviderentur. Et in genere confluentium semper usque in tertium & quartum eruptionis diem vix, nisi nocte, lectum ægris concessit. sexto autem morbi die, scilicet tertio aut quarto eruptionis, cum ægri præ debilitate abstinere lecto de die vix poterant, eosdem, & ob virium defectum, & ob sufficientem pustularum copiam, lecto addicebat, ea tamen lege, ut non
 „ plus

„ plus tegerentur, quam fani consueverant, & in
 „ lecto se verterent sæpius, verterenturque, ne
 „ sudores, hic adeo noxii, prolicerentur. Quare
 „ & ipsos infantes cunis sæpe eximi curabat.

Patet igitur evidenter *Sydenhamum* haud solos eos
 condemnasse, qui aëre ac stragulis in lecto caleface-
 rent, verum etiam hos, qui ægros in lecto simpli-
 citer detinerent: Hoc porro inculcavit, ac repeti-
 vit, urfitque, sincerus ille & candidus vir, toties,
 ut hujus articuli necessitatis ipsum oportuerit peni-
 tus convictum fuisse. Hoc ipsum tanti fecit, ut ju-
 dicaverit non modo frustraneam sine eo esse reliquam
 antiphlogisticam curam, verum etiam ut descriptu-
 rus in *Schedula monitoria* singularem epidemicam fe-
 brim, in qua *mala passim arte* gigni observabantur
 Petechiæ, Maculæ purpureæ, Miliaria rubra „ quæ
 „ licet sponte sua *nonnunquam* ingruant, *sæpius ta-*
 „ *men lecti calore & cardiacis extorquentur*” hæc
 summe notanda verba adjungat: *Æger jugem in lecto*
decubitus, quantumvis levissimis stragulis coopertus sit,
non sine magno suo periculo experitur.

Hæc porro incomparabilis ille veteranus multipli-
 ci annorum serie, non ex ludicra cerebri Phantasia,
 sed Natura duce, didicerat, innumerabiliterque vi-
 derat confirmata. Quicumque deinceps naturam
 imitati in medendo, *Sydenhamiana* verissima invene-
 runt. Et quod luculentius testimonium *Boerhaa-*
viano? Variolarum adeo accurata Sydenhami descriptio,
ut decies legi merenti, pauca modo addenda habeam. A-
 phor. 1379. Quicumque Medici in Schola *Boer-*
haaviana Medicinam edocti, & cum *Boerhaavio* *Sy-*
denhamum secuti, nihil non exacte verum ibidem de-
 prehenderunt. *Boerhaavii* jam senescentis discipu-
 lus, cum publico communicavi in Tomo I. *Rat. Med.*
 Cap. 12. & in tractatibus quos de variolarum insitio-
 ne conscripsi, propriam meam annorum multorum

in variolis praxin, quæ Sydenhamianis, & ad hæc adjectis *Boerhaavianis*, ad utraque autem additis propriis observatis innixa, felicitate curandi demonstrat, quam tuto ac proficue hac via eatur. Pediluvia bis die per universum morbi tempus a *Boerhaavio* ad methodum *Sydenhami* addita, quum eo tempore ægri in lecti crepidine, si debiliores; in sedili, si firmiores, erecti collocentur, adeoque atmosphæram adhuc frequentius mutant, hæc, inquam, utilitate sua magnopere se commendaverunt.

Quid quod etiam hæc praxis a multis illorum confirmetur, ac laudetur, qui oppugnent eandem? Obruta Europa fuit Dissertationibus de inoculandi variolas præstantia, eo præter alios sine summopere commendanda, & ubique introducenda, quod sed deant, quod ambulent, quod ludant, quod cursitent suo in cubiculo inoculati, tam in febre contagiosa, quam post plenam eruptionem; sic ut ne ægrotare quidem videantur, neve metus retropulsionis adsit ullus. Provoco ad complures scriptores, qui hujusmodi narratiunculis suos delectarint lectores. Quid igitur metuatur ne benigna miliaria, quibuscum ægri, ut ajunt, vix ægrotent sæpe, retrocedant, retrocedendoque necent? quid metuant ne erupturum quod creditur exanthema, extra lectum haud satis pellatur foras? An quod, ut suo jam tempore dolebat & conquerebatur *Hoffmannus*, exanthema miliare *factitium* ex facili retrocedat & necet? hoc aliquando contingere cum *Hoffmanno* & *Sydenhamo* arbitror in Petechiis ac Miliaribus *factitiis*, nec non in variolis atque morbilis, quos copia ac malignitate methodus prava auxerit; cæterum quod *Sydenham* testatur, id plures mecum videre medici, Variolas, Petechias, Miliaria, copiosissima in denatis confertissimaque extare; sic ut mors eorum retropulsioni tribuenda non esset.

Do-

Dolendum interea est, quod exultans olim de excusso hoc pulvere Medicina, *Sydenhami* potissimum ac *Boerhaavii* laboribus, nunc denuo eodem conspergi contegique sic videatur, ac si nunquam fuisset excussus. Olim honori ducebatur magnorum horum virorum inhærere vestigiis; ab illis vero discrepare in gravioribus rebus, dedecori. Summa cum voluptate horum vituperia, illorum encomia, legimus apud Ill. *Hallerum* in Comm. super *Metb. Stud. Boerb.* Nec horum solummodo, sed & illorum, qui antequam medicina hoc inclytum virorum par venerabunda suspiceret, vel ob communem cum iisdem sententiam humano generi profuerant, vel ob contrariam nocuerant. „Ab eo viro, (*Helmontio*) „in Sylvium, aliosque medicos, amor transiit antacidorum, quibus innumeræ malæ, in Germania imprimis, curationes peractæ sunt.” Hall. pag. 888. De *J. D. Horstio* Prof. Magdenb. „Ex- „tant etiam practica, & non mala aliqua, ut calidæ curationis in variolis refutatio. „Pag. 891. Et „*Franciscus de le Boe Sylvius, Hanoviensis* — „egregius — auctor, tot laudes corrumpit nova „ad Helmontianam nata Theoria, qua omnes fere „morbos, & acutos omnes imprimis, ab acido deduxit, alcalinis vero, & quidem volatilibus, fanare voluit; neglecta interim, aut non satis laudata V. S. atque refrigerante diæta.” Pag. 894. „*Thomas Sydenham* meruit post *Hippocratem* primo „loco recenferi, non a grata sola posteritate, sed dum „inter vivos fuit. Eam laudem sibi peperit, quod „ab omni Hypothesi purus, omnem laborem suum unice observandis morbis impenderit, eorumque „curationem ab ipsa per felices eventus, imprimis „præeunte Natura edoctus, proposuerit; febres „autem, rejecta inani veneni specifici, aut acidi „hostilis theoria, in universum per acida atque re-

„ frigerantia expugnare docuerit.” Pag. 895. „ G.
 „ H. Welsch — in praxi secutus est vulgarem sui
 „ ævi methodum. Calida & Bezoardica dedit in
 „ febribus.” Pag. 897. „ J. Michaëlis, Professor
 „ Lipsiensis de Chemica secta, magnus medicamen-
 „ torum compositorum calidorum & sudoriferorum
 „ inventor, & ex eo ipso Patriæ non utilissimus,
 „ quæ his alioquin nimis indulget.” Pag. 897.
 „ Casp. Theophilus Bierling, parum latinus homo, &
 „ deditus formulis, quarum vim non mediocrem sub
 „ finem subjecit, non tamen absque judicio fuit, qui
 „ præter sæculi morem, in Germania imprimis raro ex-
 „ emplo venam in variolis secuerit, calidam cura-
 „ tionem rejecerit.” Pag. 901.

Et quid volupe magis, quam ea encomia legere,
 quibus Sydenhamum sequacesque ejus, insatiabiliter
 extulit Ill. noster Præses? Videatur ad §. 715. &
 716. Aph. Boerh. ubi, postquam in sudorum in a-
 cutis expulsionem, usumque croci, aliorumque ca-
 lidorum remediorum, acriter animadvertisset, hæc
 demum addidit: „ Legi merentur de hac re illa, quæ
 „ passim in suis operibus habet Sydenhamus, qui ge-
 „ nerofo ausu primus, & solus fere, se huic tor-
 „ renti opposuit, & PERNICIOSAM HANCMEDEN-
 „ DI METHODUM GRAVISSIMIS ARGUMENTIS DE-
 „ BELLAVIT, ILLIQUE CONTRARIAM FELICI, IN
 „ PERICULOSISSIMIS ETIAM MORBIS, EVENTU
 „ STABILIVIT.” Et ad problema Boerhaavii §. 698.
Cur lecti, æris clausi, victus, medicamentorum calor,
adeo hic noceat? „ Perversa hæc methodus,” inquit
 „ Præses, imprimis invaluit, quia medici quon-
 „ dam fuerunt in hac opinione, per sudores tutissi-
 „ me febrilem materiem de corpore eliminari pos-
 „ se; atque ideo tepore lecti corporis omnem
 „ superficiem fovendam semper voluerunt. Ve-
 „ rum uti optime demonstravit Sydenhamus, in fine
 „ mor-

„ morbi cocta & subacta morbi materies sic quan-
 „ doque expellitur; in morborum vero initiis, im-
 „ portuna arte sic expressis sudoribus, liquidissima
 „ pars sanguinis diffatur, & MORBI SEMPER IN
 „ PEJUS RUUNT. Unde huic torrenti se generose op-
 „ poluit magnus ille Vir, solus tunc fere.” Et ad
 §. 610. ubi Boerhaave scribit: *Si itaque exorbitare*
deprehenditur circulatio, moderamen fit abstinencia, vic-
tu tenui, potu aquæ, aëre frigidiusculo — medicamen-
tis blandis refrigerantibus; sic Ill. Commentator ha-
 bet: „ Elapso sæculo Medici fere omnes erant in
 „ illa opinione omnes febres tutissime & citissime
 „ sanari posse per Diaphoresin. Hinc in calidissimo
 „ aëre ægros detinebant, stragulis tegebant, imo
 „ obruebant, ut nempe fota corporis superficies
 „ hoc calore, sudoribus emittendis foret aptior. Ve-
 „ rum magno ægrorum damno sic ignes ignibus ad-
 „ debantur, & enormiter exacerbabatur febrium
 „ impetus. Omnium maxime vero huic methodo
 „ insistebant in illis morbis, quos cutaneæ eruptio-
 „ nes comitabantur, quales sunt variolæ, morbilli,
 „ &c. Primus fere se huic torrenti animose oppo-
 „ suit *Sydenhamus*, atque passim in suis operibus in-
 „ dicavit nihil perniciosius esse.”

Et quid miremur Ill^{mos} Viros *B. van Zwieten*, &
Hallerum, in *Sydenhamo* celebrando adeo fuisse profu-
 fos? Laudes Viri antea paucis verbis omnes inclytus
 comprehenderat *Boerhaavius*, in *Orat. de Commend.*
Stud. Hipp. dum primum conquestus quod inter re-
 centiores de *Medicinæ usu* scriptores, pauci, si ulli
 essent; veterum perfectionem attigissent, cum ta-
 men Priscos in cæteris artis nostræ partibus longe
 superassent, in hæc verba erumpit: „ Unum exi-
 „ mium habeo, *Thomam Sydenham*, Angliæ lumen,
 „ Artis Phœbum, cujus ego nomen sine honorifica
 „ præfatione memorare erubescerem: quem quoties

„ contemplatur, occurrit animo vera Hippocratici
 „ viri species, de cujus erga Rempublicam Medi-
 „ cam meritis nunquam ita magnifice dicam, quin
 „ ejus id sit superatura dignitas.”

At quorsum hæc, forte inquierent, de *Sydenhami* laudibus aberratio! Ut miremur hodiernam praxin eo iterum ruere præcipitem, unde *Sydenhamus*, Virique post illum in praxi summi, eandem tam fortunate eripuissent; hodiernam, inquam, praxin sic tradi, colique, ac si ingentes illi, quos laudavi, Viri, ejusdem regulas, natura duce inventas, nunquam posteris tradidissent; venerandaque eorum nomina in tradenda praxi vix amplius resonare. Dolco Artis fata! Interim probe noscant genuini omnes Artis filii, dum alienam a laudatissimis his viris praxin colicernant, ex mea saltem schola petitam non esse; ut qui primum in mandatis habeam Boerhaavianum, id est Sydenhamianum, id est Hippocraticum puræ naturæ studium, unice tradere cum theoretice, tum practice; secundo, ut qui, etiam citra tale mandatum, nunquam aliam doctrinam traditurus essem, quam eam, de cujus usu & certitudine tantorum annorum praxis certissimum me reddiderit. Unde etiam nunquam me defuturum polliceor, quin masculam hanc medicinam tuear voce, & calamo, contra quoscumque.

Ut autem difficultatem hanc VIII. demum absolvam, debeo adhuc *Vesicantia* tueri in acutis. Postquam *Aretæus Cappadox* forte primus iisdem Medicus usus est, Medici plerique eadem magni fecerunt; cum vero, quemadmodum cum cunctis medicamentis comparatum est, haud omnibus ex æquo prodesse, *Caji*, *Massariæ*, *H. de Saxonia*, *Terilli*, *Baglivii*, *Hoffmanni*, *Veratti*, operâ, usum abusumque illorum rite intelleximus. Observatione practica propria ad eas Cl. horum virorum adjecta, constat

stat mihi evidenter, Vesicantia prodesse, ubi vis vitæ debilior, quam ut morbum coquat; deinde, quando intentio est certam corporis partem irritare sic, ut in eandem major calor, rubor, dolor, humorumque advocetur, & acceleretur, affluxus; quodemum quæ pars a morbo præcipue afficiebatur, ea minus humorum accipiat, multaque vis morbi ex reliquis corporis partibus in unam veluti derivetur: præterea quando topicus dolor, cæteris immoriger auxiliis, irritandus eo fine est, ut, qua doleat, materies attenuetur, discutiatur, pellaturve foras: forsitan quoque quando in nervis aut motus tumultuarius, attenuata ac dispulsa agitante eosdem materie, moderandus; aut sufflaminatus, stimulo agitandus est. An evacuationibus aliis sufficienter institutis, dissolvant quoque cruorem phlogisticum? Sapientioribus hoc determinandum relinquo, id modo testatus, quotiescumque dolorem pleuriticum, ad Phlebotomias iteratas, cæteraque auxilia immorigerum, Vesicante brevi sustulimus; quando vesicans mihi in Pleuroperipneumonia omnem brevi sedavit dolorem, febrim non modo non intensiorem, sed moderatiorem fuisse, multoque faciliora sputa prodiisse. Proxime autem ad Vesicantia qui accedant, dropaces, phœnigmi, sinapismi, huc quoque referendi sunt. Vesicantia præprimis in parte quam rubefaciunt, solutis epidermidis cum dermate vinculis, Vesiculas excitant, quæ, maligniores si exceperis acutos, laticem, qui ad ignem concrefcit, continent.

Ex phænomenis enarratis destruuntur ratiocinia praxeos vacua, quasi calorem in corpore præparato excitarent, eo, qui a calidis Alexipharmacis excitatur, formidabiliorem. Unde in præparatis, ut semper requiro, corporibus, ad intolerabiles capitis dolores, ad coma utrumque, ad deliria, ad pungentes dolo-

dolores pleuriticos, ischiadicos, &c. salubriter adhibentur, humorum minime inde aucto motu. Et dum *Sydenham* in variolis consuefceret Allium pedibus adhibere, dum nos aut idem aut simile admovemus, sic calorem; dolorem, & metuendam adeo in Variolis phrenitidem, minui observamus, ut eandem ob causam febris ipsa adpareat moderatior. Quare & per totum variolarum decursum hæc salubriter adhibentur. Itaque si quis rogasset *Sydenhamum*, quid sibi vellet *execrationibus* suis in alexipharmaca, quæ tam parce dentur, ut qui in eadem invehatur de lana disputet caprina; ubi ordiri debuisset ab execratione Vesicantium? Utique solita modestia sua vir candidus respondisset, se a calida methodo experiri in febribus caloris augmentum, a Vesicantibus autem & Epispasticis, post requisitas evacuationes admotis, haud modo non auctum, sed imminutum calorem; hic cessare oportere ratiocinia; hic solam consulendam esse, quæ jugis ac sedula ad lectos ægrorum, & minime in musæo, comparetur, experientiam.

IX. Quædam supersunt minoris momenti in Discipulorum objectionibus, ad quæ tamen & ipsorum, & veri amore, respondendum est. Ac primo quidem referunt mihi *a multis falsam haberi, quam ad corroborandam sententiam meam a R. R. Fratribus Misericordiæ mutuaveram observationem; vigere quippe apud ipsos eodem semper modo ut olim, & olim ut nunc, exanthematicos morbos.*

Quæ de raritate Miliarium in Nosocomio Monasterii horum fratrum in *Tract. de Febr. Divis.* cum publico communicavi, hæc ex diariis depromferam, quæ suos in usus sibi exaraverat Rev. Frater *Bertrandus*, noster Collega expertissimus, confirmata testimonio reliquorum fratrum. Conservavi hæc mihi, ut cui lubet ostendere ea possim. Qui vero dubitet de Diariorum illorum fide, me imitetur, olim sub-

subdubitantem; & ut ego tunc, & postea, & haud ita pridem, ita ipse Monasterium intret, examinetque ægros; inter 140. 150. quorum plerique acute degunt, sæpe 1. 2. 3. sæpe nullum, quem Miliaria tegant, inventurus, idemque ab expertissimo Viro, dignissimo illius Nosocomii Physico *Guarin*, cunctisque confirmari Fratribus, auditurus: qui & id addent, quos paucos exanthematicos habeant, iis dudum domi aut neglectis, aut prave tractatis, exanthema jam paratum, expulsive fuisse, antequam ad ipsorum deferrentur nosocomium.

Ergo resumo, quam olim feceram conclusionem: Si non a causis peculiaribus, quas toties jam memoravi, verum a causa cunctis communi; Miliaria orirentur, Fratres Misericordiæ iisdem, æque ac alia nosocomia quædam, scaterent: atqui sæpe raros, sæpe nullos, in tanta acutorum ægrorum turba habent eisdem affectos. Ergo.

Inquisivi sæpius in methodum ipsorum, & tractatu de *Febr. Div.* plurima dixi. Id modo & Exp. Physicus, & Fratres, addunt, quod nulla dies sit, in qua ægrorum lecti non bis penitus reficiantur, nisi vires id omnino vetent. Quantum id ad avertendos cutaneos morbos in acutis conferre debeat, demonstravit supra *Sydenhamus*; demonstrat experientia quotidiana.

X. Objiciunt studiosi *a me in Gallica ad amicum Epistola minus fideliter ex lingua latina in Gallicam versum esse textum Lautteri; siquidem illo maximam partem Miliarium factitiam scribente, ego illud pro maxima parte in transferendo omiserim.*

Fateor illud *pro maxima parte* omissum esse, sed negligentia, non vero peculiari intentione: cum enim tantum hoc probandum suscepissem, quod Miliaria *pro maxima parte* factitia essent, non indigebam Lauteriana experientia, nisi quatenus idem, quod ego,

ego, probaret. Demonstraturus quippe quod idem ille, quod ego, diceret, frustra plus dicentem induxissem. Sed ridiculum est nugis ejusmodi inhærere. Oporteret alioquin rogare num is, qui in eodem textu Lauteriano Gallice vertendo, ubi in Latino est, *ad incitas fere redactus*, redderet *déjà réduit à l'extrémité*, omittendo *presque*, an inquam, talis homo aut alia editione operis Lauteriani usus esset, aut malitiosius illud *fere* omisisset?

XI. Laudantem me ore scriptisque egregii Hazenöhrli opus super hac materia mirantur studiosi, cum videatur ipsis hic Auctor sibi minime constare. *Primo quod scripserit anno 1760. pauca sibi obtigisse Miliaria, dum interim ipsi Studiosi Hispanicum nosocomium frequentantes, copiosam inibi miliarem repererint. 2^{do}. Miliaria in nosocomio eodem Studiosi viderunt & benigna, & morbi cum emendatione, ut capere proinde nequeant cur Medicus ille eadem critica esset neget. 3^{tio}. Eundem qui scripserat anno 1760. pauca exanthemata se vidisse, mox asserere quod multoties, quod sæpius, emisuisse viderit. 4^{to}. Illa saltem exanthemata factitia appellari neutiquam posse, quæ nec ipsi Auctori ibidem Physico, nec ejus Chirurgo, pepercerint.*

Ut paucis multa comprehendam, an me mecum dissentientem sincerus homo suspicabitur, dum in cathedra v. g. dico pauca Miliaria mihi in nosocomio obtingere, & dum paulo post auditoribus assero me in urbe, ac suburbiis, eadem sæpe, multoties, pluries, emicantia observare? Ita nullam in libro egregii hujus Medici contradictionem infert, quod pauca miliaria viderit in suo nosocomio, quod plura viderit alibi, sive in altera sui nosocomii parte, cui non præerat ipse, sive in sua privata praxi. Quin quod eadem in multis non critica, multoties cum morbi gravamine contingentia asserat, an id eodem ipso anno, & non potius multorum serie didicerit annorum?

rum? Quod vero *sæpius* studiosi Miliaria apud ipsum viderint, quod viderint etiam *benigna*, nemo inficias ibit, qui noverit quoties turmatim Milites ad ipsum deferrentur, quibus exanthema jam erupisset, aut in procinctu staret; haud vero multa ipsi apud eum videre tunc, quando pauca haberet. Quod Chirurgus ejus gravi exanthemate anno 1760. decubuerit, quid mirentur? Debuerat is etiam alteri Nosocomii Hispanici parti prospicere, ubi exanthema erat *epidemicum*, ut publica scripta testantur. Qui igitur inter exanthematicos diu noctuque versabatur, nunquid eundem demum exanthematicum mirari oportet? sed an conclusio legitima est; quia ille Chirurgus in parte ea Nosocomii Hispanici, ubi exanthema epidemicum, etiam exanthema contraxit; ideo etiam exanthema plurimum fuit in qua parte Nosocomii *Dominus Hazenöbrl* Medicinam faciebat? An quod eruditissimus ille Nosocomii Physicus anno 1757. diu noctuque inter exanthemata versatus, demum contagione iisdem quoque gravissime corripereetur, concludere possint exanthema etiam frequens apud ipsum triennio post animadverti oportuisse? Aut quod illi bini ex contagio in exanthematicos morbos inciderint, ideo non esse verum quod factitia exanthemata dentur? Nescio demum, quid sibi velint.

Quod autem clarus idem vir Miliaria, una cum aliis evacuationibus coctis erumpentia, neget critica esse, nec his, sed evacuationibus illis aliis, criseos concedat prærogativam; id ideo fecit, quia aliter facere Medicus rationabilis non potest. Sat superque probatum est Miliaria & Petechias nunquam critica, semper vero esse symptomatica: demonstrationes pluries attuli. Quid ergo de iisdem, una cum aliis bonis evacuationibus conspicuis cogitandum, nisi quid pravum, quid indomabile, bonitate Naturæ simul expelli de corpore, dum cocta expelluntur.

Hippoc.

Hippocratis alumni, dum ad sudores criticos, urina tenuis nigra; dum ad hæmorrhagias criticas, gangrænosa alvus; dum ad alvum criticam, sputa ichorosa simul compareant; criticam evacuationem salutamus, non pessimam quamque crudam, sed vere coctam; unà gaudentes Naturæ robur tale, ut cum optima evacuatione simul corrupta & nocitura eliminentur.

Sed offendit illos hæc explicatio. eo quod apud Exp. Virum hunc viderint Miliaria admodum benigna; adeoque non ea, quæ cum urinis nigris, cum gangrænosa alvo, cum sputis comparentur ichorosis.

Profecto videre benigna talia, sed etiam viderunt, benignis copiosiora, maligna. Quid ergo ex illis paucis benignis concludant oportet, nisi, quemadmodum apud me pluries alvum criticam, cum pravo sputo, in pectoris inflammationibus sic viderint, ut aliquando valde mitis morbus appareret, facileque alvo judicatus & urinis; ita Miliaria, quantumvis mala & symptomata, citra ulla malignitatis indicia adesse posse, & morbum aliis criticis evacuationibus benigne solvi, ac judicari?

Rogant me an saltem illa Miliaria, quæ, crisi jam facta, & Doctiss. *Hazenöbrl*, & ego, vidisse nos testamur, non sint vere critica, aut metacritica; qualia plura *Hippocrates* descripserit, quando a priore crisi morbi materies haud fuisset eliminata sufficienter?

Quod toties demonstratum est criticum dici minime posse, non potest iterum assumi, ut criticum: adeoque inanis tota hæc quæstio est. Sed undenam ergo illa Miliaria judicato penitus morbo? Forte a contagio. Si homo levi venereo contagio, nec dum se manifestante, affectus, in morbum acutum inciderit, morboque absolute judicato, prodeuntem gonorrhœam aut bubonem percipiat, utique non vocabimus gonorrhœam aut bubonem morbi acuti,
jam

jam judicati, crisin, sed effectum contagionis ante morbum contractæ.

Contagium porro miliarium in urbe, quæ iisdem adeo scatet, contrahere facile est; quandiu vero in corpore latere possit, antequam effectum edat, incertum. Sufficiat contagia alia nosse, quæ diu lateant. Rabidi canis, insitarum variolarum, veneris impuræ, contagia sæpe brevi, aliquando multo latuisse tempore, antequam in nervum erumperent, practica observata demonstrant.

An miliaria tamen talia prodire, post crisin acuti morbi absolutam, sic possent, ut nulla ægritudo observaretur, nullave febris?

Profecto possent, cum describantur apud Auctores miliaria dicta chronica, quæ vel in sanitate illibata, vel perfecta morbi crisi, homines sic adorian- tur, ut sæpe non ægrotent. Provoco ad testimonia publica. Inducor fere ut credam chronica Miliaria, quæ in aliis cum nonnullis incommodis, sine febre; in aliis sine febre, aut ulla molestia, ut v. g. scabies, sæpe efflorescunt, plurimum deberi ejusmodi contagio, quod diutius breviusque latens, demum chronice efflorescat, ut *Hazenobrlus*, ut ego, post absolutam acutorum crisin aliquoties observavimus.

Sed nondum finis objectionum. Vehementer Medicinæ Tironibus displicent hæc ejusdem Auctoris verba: „Sed vidi *multoties* illos, qui conferto exanthemate scatebant, gravius longe ægrotasse iis, qui pauco macularentur:” Rogant me an ejusmodi ratiocinium non sit practicis contrarium observationibus? Multoties, inquiunt mihi, vidimus, qui copiosa sputa redderent in morbis pulmonicis, gravius longe ægrotare iis, qui pauca expuerent: Vidimus, ajunt, *multoties* homines febre ardente detentos, qui die critico egregie sudantes, gravius longe ægrotarent iis, qui parum tantum. Nunquid in-

de iuste quis concludat nec sputa, nec sudores, critica morbos judicare?

Benigne ferant Medicinæ Tirones, me respondentem, si ad acutorum crises in nosocomio meo attentiores animum adplicuissent, si Hippocraticæ doctrinæ vel levissimam conservassent memoriam; se talem objectionem mihi facturos non fuisse. Etenim dum die critico bonæ contingunt, copiosæque evacuationes, v. g. sputorum in inflammatione pectoris, sudoris in febre ardente, solent omnes, quotquot talia fiunt, se melius habere iis, qui parum aut expuant, aut sudent. Ab una enim parte evacuatio critica magnitudini morbi respondeat oportet; unde Priscorum axioma: *Nihil paucum criticum*: ab altera parte emendatio morbi, ejusque symptomatum, in signis bonæ criseos haud infimum locum tenet. Ita ut studiosorum objectio duplex supponat falsum. Sin vero rariore casu, (nequaquam autem *multoties*, id enim falsum,) post ejusmodi sputa, sudoresve copiosos, ægri gravius longe ægrotarent iis, qui modo paucos haberent, referendæ hæ evacuationes forent ad κρίσιμα μὴ κρίνοντα, & infidæ cum *Hippocrate*, perniciosæque, declarandæ.

Sed superfluum, & inane est, ad similia argumenta attendere; cum enim sat superque demonstratum sit Petechias & Miliaria ne vel umbram criseos habere, refutat se ipsum omne argumentum quod critica eadem falsa supponit.

XII. Cum videant Studiosorum simpliciores quomodo Medici alii apud ægros suos accensâ utantur candela, examinaturi num pectus, collumque exanthema ferat; dubitant an fors ideo nosocomium nostrum pauciora non exhibeat exanthemata, quod candela haud semper lustremur.

Crudum dubium, cruda solutione dignum. An quod cænaturus luce candelarum indigeam, quo ferulis patinisque distinguendis sim, etiam candulam

pran-

pransurus petam? cura nostra est acutos maxime æ-
 gros iis in lectis collocare, qui, cortinis apertis,
 plenum lucis jubar admittant, adeoque exanthema-
 ta vel minima actutum revelent. Imo ægros lecto
 exemptos plena die mecum studiosi solent, num ef-
 florescant, examinare. Sin vero loci angustia, &
 major ægrorum numerus, nec non si insignis debili-
 tas ægri in lucem vetat eum adducere, aut dies in
 hyeme tenebricosior sit, candela utimur accensa.
 Quapropter dum dies plena plus candelula illuminet,
 & e contrario ægri alibi passim sic locentur, ut Me-
 dicus eos lustraturus candela egeat, arbitramur nos
 in exanthematum detegenda præsentia esse cæteris
 certiores. Minutulorum artifices crassiora opera ad
 candelæ lucem, ad plenam diem subtiliora, reser-
 vant. Addiderim Exp. Dominum Guarin, & omnes
 Misericordiæ Fratres, ob plerorumque ægrotantium
 situm candela uti, nec tamen ideo invenire exanthe-
 mata.

XIII. Tandem proposuerunt mihi studiosi du-
 bium circa Cl. Hoffmanni, Fuchsi, ac Triumphii alla-
 tam libr. de Febr. Div. auctoritatem; & quidem sic,
 ut Cl. Hoffmannus, statuens exanthematicos hosce morbos
 cum sponte genitos, tum vere criticos esse; ut Fuchsius,
 miram de cura uterini sphaceli per remedia externa theo-
 riam proponendo suspectus, deinde exanthema violente ex-
 tortum cum euphoria procedere, quod impossibile, docens;
 ac præterea exanthemata puerperis uteri inflammatione
 laborantibus, ante nonum puerperii diem salutaria esse
 contra me statuens; tandem Triumphius, qui haudqua-
 quam de sudoribus, ut Miliarium genitoribus, verum ut
 Miliarium comitibus, differuerit, ac datis dedita opera
 ealidissimis Bezoardicis, & Miliaria expectaverit, &
 eadem inde nata salutaria esse pronuntiaverit; ut hi, in-
 quam, tres admodum inidoneè a me ad confirmandam me-
 am sententiam adhiberi ipsis videantur.

Si tres hosce Auctores ideo laudassem, quod mecum censerent raro sponte naturæ miliaria & petechias gigni; utique male laudassem: si hosce viros ideo celebrassem, quod calida in exanthematicis morbis non commendarent; falso eosdem celebrassem: cum vero eam ob causam illos laudaverim, quod amare de iis Medicis conquesti sint, qui vel exanthemata producerent, ubi cæteroqui futura non fuissent, vel qui regimine calido uterentur in morbis, quibus exanthemata supervenire possent; tunc justo titulo hos omnes in meam sententiam citare potui & debui. Relegant ergo Discipuli mei & quid probare voluerim, & quid allati dixerint Auctores; pudeatque ipsos se, omnia tumultuariò commiscendo, mihi intentiones varias imputasse, quas nec cogitaverim unquam, nec cogitare quidem potuerim.

§. III. Triste sane ac tœdiosum est, temporumque notat iniquitatem, toties dicta repetere oportere, cogique ad respondendum objectionibus, quas, si non malevolus animus, saltem defectus attentionis in audiendo, legendo, reminiscendoque, pepererit. Ast vero Publici ego servus, publicæ amator promotorque salutis, elucidare hanc disputationem debui; qua demum a Tironum mentibus quævis hæsitatiōis nebulæ dispellerentur? Interest *Austriæ*, totius interest *Germaniæ*, tam clara in luce Sydenhamianam collocari Boerhavianamque doctrinam, ut cujus miserandæ pestis, sive indies sævius grassaturæ, sive maximam partem propulsandæ, arbitri sint, serio jubeant exulem de finibus agere suis. Est mihi cordi hoc negotium, nec plane ingratos meos cineres *Germanis* fore hariolor, quando ab hac funesta plaga pene immunes, me adjuvante & urgente, se redditos esse recordabuntur. Feliciora vivimus tempora, diesque gratiores, quam ut publicam salutem Nationis erroribus immolaremus.

Inte-

Interim animos juniorum Medicorum ad sanam doctrinam amplectendam ea eriget experientia, quam complures, qui mecum sentiant, frequentem habuerunt. Egregius *Klein*, cujus opus honorifica præfatione exornandum esse Ill. *Haller* censuit, se deprehendisse declarat „ Exanthemata simplex acci-
dens esse, & symptoma; nec critici quid, nec falsis spem facere” Cl. *Allionius* Taurinensis Professor eadem in acutis, summo cum ægrorum emolumento, prævenienda esse, speciali tractatu evicit. Celeberrimus *Valcarenghi*, in Regia *Ticinensi* Universitate Prof. primarius, in *Spec. Pract. Cremonæ* 1761. edito in Quarto, aperte evicit nec ea Miliaria, quæ in febribus suppuratoriis, nec ea, quæ in veris acutis adpareant, critica esse; hinc cum laudato *Allionio* omnem curam eo dirigi oportere, ut in hisce dictis morbis non prodeant: meamque denique, de Miliaribus & Petechiis factitiis sententiam, sua confirmat experientia. Egregius *Glas*, Comm. 7. de Febr. multus est in demonstranda Miliarium artificiosa generatione, & nocumento. Eximiorum Virorum *Hazenöbrl* & *Lautter* tractatus, eadem propria experientia confirmantes, jam laudati sunt toties. Plures Medicorum, qui in ultimo truculento bello militibus curandis operam navarunt, serio mihi testati sunt, Miliaria & Petechias invenisse sese copiosas aliquoties, quo loco alii, sive calido regimine, sive aëre haud satis renovato usi, præcessissent; pauca vero, ac sæpe nulla in nosocomiis, quibus præfuis-
sent ab initio. Laudabilissimus studii Naturalis, Botanices, ac Medicinæ cultor *Cramer*, dignissimus *Pontis ad Leytham* Physicus, pluries mihi narravit, dum plura millia *Borussorum* captivorum anno 1757. & 1758. suæ curæ demandati essent, inter 300. eodem tempore, acute ut plurimum, laborantes, vix quatuor aut quinque exanthemata passos esse; illos

vero quatuor vel quinque, aut nimium tectos, aut arcte conclusos se reperisse, antequam sibi demandarentur: Leucâ autem a se distante Pago, ubi ab initio morbi calida methodus in ulu erat, vix ægrotasse quosquam, qui exanthemate non macularentur; a militibus in incolas contagium transisse; pluresque, una cum medico suo, exanthematum genitore, mortem occubuisse.

Quando igitur Medicinæ studiosi, & Medici juniores, qui in nosocomio meo demonstratam veritatem viderunt, serio hæc dicta revolvunt animo, an non gravis molestia, quæ ægros sub calido regimine premat; an non periclitans adstantium sanorum salus; an non formidabile discrimen, quod in calido regimine a minimo, eoque fere inevitabili, frigore exsurgat; an non tot ægrorum perditio, qui vix priori morbo sustinendo pares, altero, eoque sæpe calamitosiore, torqueantur; an non acutorum, inflammatoriorumque morborum dubia, propter imaginariam exanthematum curam, alea; an non præfens ipsorum medicorum periculum contagionis & mortis; an non demum omni velamento denudatus patrius error; adhortari, incitare, animare, cogereque ipsos debeant, ut in acutis morbis curandis inclytum *Sydenhamum*, admirentur, sequantur?

Præter insignia hæc emolumenta, quæ, exanthemata haud ultra faciendo, universo generi humano conciliabunt ilico, etiam eidem supremum hoc beneficium præstabunt, ut contagio sensim imminuto, dira tandem plaga cesset, nec ultra, nisi in summa humorum corruptione, appareat.

Problemata de Scorbuto.

§. I. Cur nobis scorbutus, quam Antiquis, notior? Quosnam potissimum affligit? Scorbutus alcalinus, muriaticus, acidus, differt ab acrimonia spontanea alcalina, muriatica, acida. §. II. Daturne talis triplex scorbutus? an autem unicum modo esse nonnulli recentiorum vere demonstrarunt? Cum plura ad id observata requirantur, quam illi attulere, ut lis dirimatur, testimonia plura examinantur, & varia diarria marina consuluntur; ac 1^{mo} quidem Jacobi Quartier. 2^{do} J. van Linschoten. 3^{tio} Duodecim Navitarum, qui soli de naufragio, & hybernatione in Nova Zembla superstites, post varios errores in patriam redierunt. 4^{to} Guill. Corn. Schouten. 5^{to} Classis Nassovicæ. 6^{to} Laurentii F. Haan. 7^{mo} Friderici Maartens. 8^{vo} Trium navium missarum ad novas terras australes detegendas. 9^{no} Navis dictæ Barneveld. 10^{mo} Guillelmi Dampier. 11^{mo} J. Egede. §. III. Putridus scorbutus esse Marinis evincitur, idemque cum terrestri; quæritur porro, cum terricolis mitior redditus sit, an eadem causæ etiam mitificare eundem maricolis possint? Hinc cognoscendæ marini scorbuti causæ forent. Causæ sufficientes non sunt aut marinus aër respirationi adversus, non aër humidus, non sal, nec vegetabilium succulentorum defectus. Cur vulgus marinum frequentissime, rarius navium procures, afficiuntur? Machina Suttoni ventilatoria aëris humiditatem noxiam sæpe non tollit. Concluditur ex combinatis pluribus causis scorbuto Classarios affici, quæ causæ navis procures tangere nequeunt. §. IV. Scorbutus marinus & alcalinus esse unice adparet, & tamen remedio æque calido, quam frigido, sed semper ex Vegetabilibus succulentis, persanatur. Quæritur

unde hoc? Pringleana experimenta an id explicent? Quid in nautarum salutem suadendum supremæ potestati? Curaretne morbum aër purus? §. V. Parsimonia nostra in dandis medicamentis, Nautarumque in iisdem devorandis aviditas, efficere videntur, ut longe citius efficaciusque nobis illi curentur.

§. I. **S**corbutus, morbus pro parte Antiquis notus, ast vero, quia rarior, minus accurate, quam quidem posterioribus ævis, descriptus. Cum enim in longis, tædiosisque navigationibus potissimum contrahatur, utique rarior fuerit morbus necesse est, quando naves littora duntaxat lambendo, novis ubique alimentis, nova ubique refocillantur aqua; frequentior vero, ex quo sævum mutandis mercibus æquor arando, diuturno sæpe tempore per immensa maria fluctuantes, commercium agunt. Ergo & in navibus jam multo numerosioribus, plebeque oneratiores, dicta de causa scorbutici longe plures quam olim, & in continente quoque copiosiores, quod innumeri ex navibus in terram deportentur; quo tam scorbuticorum in regione numerum augeant, & morbum veteribus curatius cognoscendi occasionem exhibeant Medico.

Observatur scorbutus quoque frequentior populis Septentrionalibus, maris quippe plurimum accolis, 1^{mo} quod ibidem Athmosphæra sit, ob fluxum refluxumque maris, heterogenea, ac putrescentia, in littore relinquentis, impurior. 2^{do} Quod frigidiora incolent humidioraque loca. 3^{tio} Quod Borealium gentium complures magnam vitæ partem in nave transigant, scorbutoque affecti suos repetant lares. 4^{to} Quod protractiore ibidem hyeme, vegetabilibus diutius careant. Quippe generaliter loquendo (exceptiones enim res habet, ut patebit,) in scorbutum cæteris proniores sunt, qui vegetabilibus

libus diutius carent, ut *Bachstrom*, ut *Anglorum* plures, demonstrarunt: ita ut v. g. in urbe diu, arcteque obfessa, cives, copiaeque praesidiariae, Scorbuto patiantur; interea dum, qui obsident, Scorbuto immunes vivant vegetabilium abundantia, quam liber ad exercitum aditus, ipsique horti suburbani, suppeditant.

Dum vegetabilia dico, intelligo succulenta: habentibus enim urbibus obfessis, & navibus, abundantiam cerealium, pisorum, fabarum, nihilo minus scorbutus in illis saepe saevit. *Viennensis* Inclyta Facultas Medica Doctissimo *Cramero*, ipsam de scorbuto hungarico pessimo consulenti, antiscorbuticas herbas siccatas, hyems enim erat, & antiscorbutica destillata miserat; dolens autem respondet *Cramerus* nullum morbi levamen ab iis se consecutum esse. Patebit postea spiritus quosvis antiscorbuticos semper inutiles fuisse nautis.

Causa proxima ponitur esse sanguis rubra quidem parte crassus, serosae vero partis una portio, mucosa; altera, acris; acris autem specificè: muriatica scilicet, acida, alcalina.

An porro similis acrimonia acida, muriatica, alcalina, in scorbuto, quam in humorum acrimonia spontanea, in qua etiam haec triplex notatur acrimonia? Schola medica multam utriusque notat disparitatem. In spontanea acrimonia cujuscumque speciei sit, haud notatur putredo, atque exulceratio, gingivarum: non illa dentium vacillatio; non dolor ille, immobilitasque in genu, saepe cum tendinum cruris flexorum contractione; imo ne illa quidem matutina lassitudo: in sola spontanea acrimonia alcalina apud *Boerb. Inst.* §. 912. notatur quidem putredo; in muriatica §. 914. rigiditas totius corporis: attamen conferenti has §§. cum capite de scorbuto *Boerb.* ingens apparet inter utrumque differen-

tia. Describitur in spontanea acrimonia alcalina, sanguis dissolutus; in scorbutica, sanguis parte rubra crassus; in spontaneæ alcalinæ sero, nulla mucositatis mentio; in scorbuticæ acrimoniæ alcalinæ sero pars mucosa una est, acris altera. Sed in singula spontaneæ acrimoniæ specie sanguis omnibus in partibus, pro specifica acrimonia, peculiari modo peccat; ut hinc acrimoniam ab acrimonia characteristice distinguas: in scorbutica vero singulæ speciei sanguis idem crassus, serum partim crassum partim acre: acre autem illud speciem a specie unice discriminat. Febris adest, abest, sic ut in scorbuti definitione non contineatur, quamvis quædam detur scorbuticorum nonnullorum peculiaris febris. Quam Doctiss. *Murray* in suæ navis scorbuticis numerosioribus epidemicam petechialem, eandemque funestissimam descripsit, hæc contagio maligni morbi, non scorbuti, tribuenda erat.

§. II. Estne igitur diversa scorbuti species? Estne singula specificis suis curanda remediis? Gravissimi Auctores post *Eugalenum*, & *Sennertum*, sic docuerunt; egregii autem Medici non defuere, qui acrimoniam quidem specificam agnoverint, curam vero indiscriminatim tentarint calidioribus dictis antiscorbuticis, & acidis, sæpe etiam inter sese commistis. Videntur igitur hi sua curandi methodo indicasse, quod specificam hanc in scorbuto acrimoniam minus admitterent. Quin etiam dum historias navales accuratius examinemus, & consulamus, fere in paradoxam opinionem incidimus, ac si unicam scorbuti speciem duntaxat esse stupendæ arguissent curationes.

Sed priusquam concludamus, expediet consuluisse eos, qui omnium optimam morbum noscendi & curandi occasionem nacti, nobis sua reliquerint observata.

Occasionem de Scholarum doctrina circa scorbutum dubitandi, suppeditavit nobis opus tam utilitate, quam amœnitate, commendabile, Doctissimi Medici, *Richardi Walteri*, quo iter præclari Architalassi *Anson* per orbis ambitum, testis oculatus complexus est. In hoc erudito opere invenimus innumeris exemplis, quorum quodque centenos homines una capit, quæ proinde simul plures millenas sanationes referunt, hanc sententiam, veluti axioma positum, quod scorbutus navalis sit alcalinus, sit putridus, sit qui vocetur calidus; de quo innumeræ historiæ nullum dubium reliquum fecerunt: quodque hic ipse scorbutus putridus tutissime, ac citissime curetur, tam copiosis antiscorbuticis calidis, quam frigidis; ita ut nautarum saluti æque conduceret copiosus Cochleariæ; Ceparum &c. usus, quam immensa Aurantiorum ac Limoniorum pomorum copia. Mox nos in limine offendit tale paradoxon axioma, cum scholæ subvertat doctrinam; unde memores Præceptoris monitûs *μὴ δὲν εἰκὴν, μὴ δὲν ὑπερορᾶν*, consulamus prius alios scriptores marinos, examinaturi num idem, vel contrarium, illi experti sint, antequam Walterianum axioma, aut amplectemur, aut repudiemus.

Quod mihi primum occurrit, est *Diarium Jacobi Quartier*, qui jussu Regis Christianissimi *Francisci I.*; anno 1535. Americam Septentrionalem lustrans, hibernare cogeatur ad ripam fluvii *Canada*, prope locum nunc dictum *S. Crucem*; nautarum ingentem stragem hic scorbutus fecit, universalem brevi facturum, nisi incolæ ipsis indicassent arborem *Anedda*, cujus & cortice & foliis plurimi reconvaluere. Doctus scriptor *A. Montanus*, qui nobis hujus diarii copiam fecit, in sua *Americæ Borealis Historia* nihil attulit lucis, ut cognoscamus arborem: nec licuit apud *R. P. Hennepin*, apud *Denis*, apud *Martinier*, aliosque, qui regio-

regionem illam peragrarunt, aliquam ejus descriptionem invenire. Nec in doctissimi, ac nobilissimi Consiliarii, & Professoris, *Nicolai Jacquin, Historia Stirp. Amer.* aliquid habetur, cum ad eam in America latitudinem non pervenerit. Hinc ad alios, qui nobis nota magis antiscorbutica suppeditarint, nos conferamus.

In pluribus diariis variarum Classium Navalium, quas sub finem sæculi 16. sive Respublica Batava, sive Urbium Batavarum nonnullæ, sive denique cives ditissimi, miserunt ad viam tentandam, juxta *Muscovicam* ac *Tartaricam* oram, in *Chinam* ac *Japoniam*, strages nobis occurrunt, quas edidit scorbustus miserandas; eo quod expeditione qualibet infortunato admodum succedente, vel complures naves inter perpetuas atque insuperabiles glacies, montesque glaciales, naufragarentur; vel nautæ itineris tœdio, longitudine, periculo, confecti, proprios demum lares repeterent; vel in *Nova Zembla*, aut alibi, hybernare coacti, una vice ad unum usque perirent omnes, alia vice ex *Nova Zembla* in binis apertis scaphis, ex nave majore, glacie fracta, compositis, iter 400. milliarium in pelago errantes conficerent, donec demum ad extremam *Russicæ* oram appellentes, inde in Patriam, ex toto numero duodeni, redirent. Non immorabor aliis diariis, quam his, quæ ad scopum faciant.

J. van Linschoten in itinerario anni 1594. refert se appulisse in locum, quem *Waygat* appellant, alii *Nassovicum Fretum* mensis Junii 27. ibidemque detexisse inter gramina, aliasque herbas, *Cochleariam* copiosissimam, scorbuticorum illuc appellentium tutissimam refectionem.

Diarium duodecim illorum, quos retuli, post hybernationem in *Nova Zembla*, in Patriam rediisse, refert illos anno 1597. in insulam ignotam conscenden-

dentes, præ gaudio exclamasse ad visam primo Cochleariam, eoquod fere cunctos Scorbutus reddidisset pene immobiles; inde non comedendo, sed continuo vorando, se percepisse, non modo veras esse, quæ cochleariæ in Patria laudes darentur, verum etiam omni illam laude superiorem; quandoquidem celerem adeo mutationem perciperent, ut, paucis post diebus, panem biscoctum denuo masticare, quod dolentes gingivæ, dentesque vacillantes, antequam nequivissent, commode inciperent.

Data hæc exempla monstrant Scorbutum curatum Cochlearia: unde forsitan quis suspicabitur Scorbutum frigidum, sive acidum fuisse, hincque herba alcalescente & calida sublatum; talem vero, si acida & acescentia antiscorbutica regio dedisset, non modo non curatum, sed in pejus versum, imo letalem fuisse redditum.

Respondebunt nautæ iidem. Scorbutus redierat dum promontorium *Wardhus* petituri, multum in fluctibus aberassent. Appulere demum ad extrema borealia *Laponiæ* in portum *Cela* vocatum, intimiusque se penetrantes, baccas *Rubi* copiosissimas deprehendere, quibus affatim comestis a Scorbuto convaluere omnes.

Fructus acido-dulces copiosissime comedentes, curantur a Scorbuto iidem ipsissimi homines, quos antea eodem in itinere, eodem in climate, eodem cum victu, Cochlearia curaverat. Quid ergo de natura Scorbuti statuendum? Acida & Alcalina curarunt saltem eandem Scorbuti speciem.

Rubi copia ingens, ingens & Cochleariæ per boreales omnes regiones: in omnibus itinerariis utrumque describitur, & ad scorbutum ex æquo laudatur. *Denis*, quo tempore in *Canada* habitabat, Rubum ubique invenit tam copiosum, ac fertilem, ut qui suis de pratis eradicare vellent, non possent.

Ant

Anno 1615. 1616. 1617. *Guillelmus Cornelii Schouten*, Hoornanus, quo novas, transvecto freto *Magellanico*, terras detegeret, australem orbi partem circum navigans, refert cum tædioſi itineris longitudine, tum diverſi generis commeatûs, aquæ bonæ potiffimum, penuria, potiorem nautarum partem ſcorbuto affectam eſſe; tentaffe ſe dudum hinc inde inſulam ut detegeret, & in continentem deſcenſionem faceret ægrotantium; ſed fruſtra. Sca-
pha demum littus aliquod attingente, nautas herbam detexiſſe *Nafurtio Hortenſi* ſimilem, eamque dein adhuc copioſiorem in inſula dicta *aquofa* ad 12. gr. lat. auſt. Coctis inde pultibus abundanter comestis, ſcorbuticum nautam adeo levatum ſe percepiffe, ut herbæ vires haud potuerint ſatis mirari.

In Diario Claffis navalis dictæ *Naffovicæ*, quæ undecim navibus conſtans, Architalaſſo *Jacobo Eremita*, ab anno 1623. uſque ad 1626. vecta circum orbem eſt, nullas in principio detegimus ſcorbuti querelas; cauſa videtur limoniorum abundantia fuiſſe, quæ tanta nonnunquam, ut abuterentur, & ut claffis primo anno numeraret 42. ſuorum Dyſentericos inde periſſe. Poſtmodum vero, ut in longis ſolet tædioſiſque itineribus, ſcorbuto aliam poſt aliam navem petente, deviando continentem quærere decretum fuit in procerum conſilio, limoniorum quærendorum, aliuſve remedii antiſcorbutici gratia: at vero nulla inſula detecta, de ſervanda claffe ob ſcorbuti immanitatem deſperatum eſt. Detegunt tandem inſulam *Annabon* ad gr. III. lat. auſtr. nautæ & in inſula Aurantiorum pomorum copia incredibili repleverunt ſeſe, & bis centum millia eorundem ſecum in naves induxere. Ex eo tempore nulla ſcorbuti in diario mentio fit.

Scorbutus igitur natus in plaga mundi auſtrali, curatur antiſcorbutico calido, *Nafurtio Hortenſi*;
cura-

curatur antiscorbutico frigido, pomis Aurantiorum & Limoniorum; eodem prorsum modo quo antea vidimus Scorbutum borealem integre curari calidis Cochleariis, & frigidis Rubis.

L. F. Haan, in *Historia Freti Davidis* plagam Occidentalem in *America Boreali* notat, ut in qua crescat species Rubi, humi repentis, fragorum sapore grati, copiosissimi. Deinde totam Regionem describens, arbores ferre eam nullas ait, sed aliquas frutices, & baccas ceruleas, similes Juniperi in *Norvegia* baccis: tum & copiosissimam *Lactucam*, quam ibidem *Groenlandicum acetarium*, vocant, & *Acetosam*. Hæc lactuca & acetosa pro incomparabili antiscorbutico habentur, ut refert; ita ut iisdem plurimum vescentes, incredibile quam cito, & integre, convalescant.

F. Maartens, Chirurgus navis *Hamburgensis*, in Diario sui itineris in *Spitzbergen*, & *Groenlandiam* suscepti, inter cæteras plantas meminit *Cochleariæ* quam ibidem pro scorbuto, copiosissimam, & sapore gratiorem, & in acetariis vehementer amatam, notat.

Joannes Egede, Danicus per 16. annos Missionarius in *veteri Groenlandia*, refert cap. 3. „præstantissimam viribus *Cochleariam*, incomparabile adversus scorbutum remedium, copiosam ubique ad oras maritimas reperiri, sapore autem haud acrem ita, amaramque, quam in regionibus temperatioribus. Stupendas cæterum per eandem se curas vidisse.”

Anno 1721. a Societate Indiæ Occidentalis Batavæ missæ tres Naves, ut novas Regiones ad gradum lat. austr. 56. quærerent, cruditum habent hujus expeditionis diarium, cujus in capite 7. hæc de scorbuto leguntur: „Aprilis 27. altitudinem attigermus graduum 23. min. 2. lat. austr. Hic demum incommoda, diu observari cepta, quæ illos, qui
„ longa

„ longa itinera mari conficiunt, insequi solent, nos
 „ gravius premebant. Quantus enim cumque com-
 „ meatus nobis datus esset, minuebatur tamen, ita
 „ ut quotidianæ portiones, ne tandem deficerent
 „ penitus, indies parcius dispensarentur. Quin &
 „ panem, cum communem, tum biscoctum, situs
 „ corruerat, quemadmodum & reliquum, qui in-
 „ super vermibus scatebat, commeatum. Percepta
 „ quoque & aquæ sensim crescens penuria; quare
 „ & parcius illa nautis cepta dari. Tandem & ipsa
 „ fætida ac verminosa, non ultra fuit ad sitim ido-
 „ nea, nec ad humectanda corpora, quæ enormis
 „ calor exsiccaverat, apta, nec utilis ad deperditas
 „ illorum vires restaurandas.”

Præter cæteros morbos, Scorbutum inde deduxit,
 nasci scilicet illum oportere ratus, eo quod sicca es-
 set, ac suffocans in mari atmosphæra, quod salita a-
 limenta corrumparentur, quod potabilis lympa de-
 ficeret, noctesque præprimis gelarent. „ Signa,
 „ scribitur in Diario, morbi prima manifestantur ad
 „ gingivas, haud tumidas duntaxat, sed & nigras
 „ ac putridas; hinc foetens anima, hinc corrupti
 „ dentes vacillantesque adeo, ut nedum navalem,
 „ verum etiam nec alium quemcumque cibum,
 „ manducare queant. Inde porro per universum
 „ corpus morbus vagatur. Ad crura, ad brachia,
 „ ad alias partes, maxime vero ad genu, patellam,
 „ Maculæ visuntur, pulicorum morsibus similes,
 „ rubræ, purpureæ, lividæ, nigræ, una cum arti-
 „ culorum doloribus. Posthac brachia, coxæ, fe-
 „ mora, hinc inde tument; livida sic aut nigra,
 „ quemadmodum alias a contusione fit. Palata vi-
 „ dere est, quibus frustra veluti crassæ corruptæque
 „ carnis adhæreant, die a chirurgica ablatione alte-
 „ ro renascentia. Multorum cernas horride tumi-
 „ dos vultus. Accedunt denum tremor, palpitatio

„ cor-

„ cordis, tensio ventris, miseranda artuum contrac-
 „ tura, vehemens sæpe dolor, & morbo penitus ir-
 „ radicato, mors: non ita quidem ut omnia hæc
 „ symptomata eundem hominem impetant; nam ad
 „ interimendum sufficiunt pauciora.”

Remedia deinde prosequutus, Cochleariam quidem præstantem esse censet, sed recentem tantummodo, haud vero in spiritum evectam; cum is, inquit, calidior existens, tenuiora dissipet, figat crassiora. Cæterum in longis itineribus nihil reperiri præstantius, quam in continentem descendere, quo ægri sereniore aura aliquantisper vescantur.

„ Vix fari datur, inquit, quantum marinum hunc
 „ morbum aër mutet, emendetque, campestris;
 „ ac quantopere simplices *herbæ pratenses*, ipsumque
 „ vile adeo habitum *gramen*, vires exercean̄ curandi
 „ valentiores illis omnibus, quæ ut decantata reme-
 „ dia laudentur. Miror sane Medicos illos, qui na-
 „ ves, quæ sua consilia observent, a scorbuto im-
 „ munes fore obfirmata fronte asseverent. Etenim
 „ quæ eorum remedia ad efficaciter præservandum
 „ alia, quam illa, *quæ ipsissima in longis deficiant iti-*
 „ *neribus?*”

Inter medias has miseras insulam detegunt ad gr. 15. lat. austr. cujus nigri incolæ insulæ afferunt producta: Nuces scilicet *Kokos*, & quandam herbam abundantissimam, amarescentem, similem per omnia *Nasturtio hortensi*. Incredibile, ait, quantopere inde reficerentur omnes; ita quidem ut, licet lapidibus fere obruti ab insularibus fuissent, ni fugam capessissent, insulam tamen *Refectionis* appellarent; quo nomine eandem posthac in Geographicis mappis decoratamprehendimus. Est in eadem fere altitudine cum insula supra dicta, ob inventas a nautis aquas *Aquosa vocata*, in qua eadem herba & copiosissima deprehensa est, & mirifice antiscorbutica.

Anno 1719. navis *Barneveld*, post infortunatos per immensum pelagus errores, appellens tandem ad amplissimam insulam *Madagascar*, ad oram *Africae* occidentalem, nautarum 120. scorbuticos in littus duxit, sub tentoriis locavit, & post 14. dies plerosque iterum sanos in carinam recepit, nullo adhibito remedio præter speciem *Nymphææ*, quam in aqua copiosissimam inveniētes, tum juribus incoxere, tum more acetariorum comederunt.

In itinere circum orbem universum *Guillielmi Dampier* legimus, qua ipse vehebatur, navem deposuisse ad Promontorium *Bonæ spei* suos Scorbuticos, eo quod ibidem quocumque fructuum olerumque genere plerique brevi soleant convalescere. Non addidit Auctor numerum scorbuticorum, qui in hoc promontorium depositi fuerant; sed convaluisse refert omnes, quatuor duntaxat, qui omnium pessime in nave habuerant, exceptis.

Famosissima Scorbuti curâ est insula *Sanctæ Helene*, inter 15. & 16. lat. austr. gradum. „Raro fit,” inquit *Dampier*, „quin scorbutici hic amissam dum recuperent sanitatem. Fert insula hæc herbas optimas, unde balneis per insulanos adornatis rigiditas, immobilitasve cruris pereuretur: a suo autem scorbutico fructibus, oleribus, recentioribus alimentis, cito liberantur; ita quidem, ut qui penfili lecto ex navi in continentem ducti fuerant, elapso octiduo pedibus incedant, imo saltent: juvat vero aura serena.”

In tædioſo itinere ex *Nova Hollandia* ad idem promontorium, homines scorbuticos primum 20. perdidērunt; deinde vero morbo aucto, auctis itineris tædioſi laboribus, putridaque existente ad bibendum aqua, miserè omnino cum nautis agi ceptum. Interim navis præfectus, magnam in navi possidens *Tamarindorum* copiam, jussit definitam cuique ad pran-

prandium portionem cum oryza dare; id quod omnes multum reficiebat.

„ Porro ita commune omnibus, ait, malum erat,
 „ ut vix existeret, quem immunem diceremus; ma-
 „ lum subdolè sic obrepens, ut ipsi nos vix perci-
 „ peremus ægrotantes, vixque dolentes; sed debi-
 „ les quidem & inappetentes: subdolè, inquam,
 „ sic, ut plurimis eorum, qui morti adpropinqua-
 „ rent, vix suaderi posset suo manerent in pensili
 „ lecto, donec demum immobiles redderentur:
 „ quando vero se lecto immobilitate affixos cerne-
 „ bant, condebant testamentum, haud ultra bidu-
 „ um, triduumve, calamitates protracturos se certi.”

§. III. Ubique quæ de ipsa morbi descriptione & symptomatibus diaria habebant, in mea relatione collegi, ut constaret marinum illum scorbutum, in nonnullis symptomatibus, alia atque alia in nave, differentem, tamen præcipuis in rebus sic convenientem esse, ut scorbutum putridum vere referat; conveniatque omnino cum eo scorbuto, quem terricolæ habent: ita ut idem prorsum morbus esse appareat terra marique.

Subdolum hunc morbum lævius gentem borealem afficere observamus, ex quo tellus multis in locis sit reddita ficcior; aggeribus sic adornatis, ut externæ aquæ secludantur, liber internis concedatur effluxus: ex quo ædes sic suas construxerint, ut minus humescant intus, ac liberiore perflectur aëre: ex quo durioribus alimentis plura ceperint molliora interponere, sic ut dies nulla transeat, in qua variis lactucis, oleribus, fructibus, non vescantur; crudis, coctis, elixis, tostis: ex quo Asiatici aliàs noxii, potus; sic saltem *Boerhaavii* sententia erat; corpora ab acrioribus, diluendo, magis liberarint: ex quo tandem se contra cæli inclementiam firmioribus vestibus muniverint. Quin & cæteris paribus, vita labo-

riosa admodum, in eadem regione boreali, sub eodem victu & aëre, immunes omnino a scorbuto, aut levius saltem affectos, præstat aratores, fabros ferrarios, lignarios, &c. interea dum textores, sartores, futores, pictores, phrigiones, viri litterati, gravissime afficiuntur.

Examinandum est undenam scorbutus in navibus? ut pateat num vel hæc, quæ terricolis mitiorem reddiderint, vel adhuc alia, maricolarum quoque mitigare tollereve scorbutum queant?

An igitur 1^{mo}. ab aëre marino, ita ut ex mari quidquam exhalaret, quod aëri commistum, ipsum sæpe redderet respirationi ineptum, & ad scorbutum generandum aptum, ut quorundam opinio fert?

An 2^{do}. ab humidioris semper atmosphæra?

An 3^{io}. a salitis?

An 4^{to}. a penuria vegetabilium?

Ut primo generalem responsionem ad hæc omnia, deinde ad singula propriam, adornem, dico has quatuor causas ita universales esse, ut ex æquo omnes in nave afficiant, Gubernatores majores, minores, & Classarios vulgares. Constitit vero universali observatione classis *Ansonianæ*, aliorumque, nautas potissimum scorbuticos esse, minus esse præpositos minoris ordinis, adhuc minus præpositos majoris ordinis, omnino nihil fere Præfectos supremos. Cum igitur quatuor hæc causæ omnes ex æquo afficientes, non omnibus ex æquo scorbutum creent, haud videntur ejus causæ appellari posse.

Doctissimus *Lind*, qui de Scorbuto tractatum Historico-dogmaticum erudite & practice scripsit, dum examinat an salita scorbutum creent? egregie respondet non videri, quum sal a putredine ea præservet, quæ cæteroqui in putredinem proclivia sint: cum 2^{do}. diuturniore tempore aqua marina, dira necessitate cogente, pota, scorbuticis haud nocuerit: quod

quod tertio salita visa sint homines ab eodem præservasse.

Observatum quippe fuisse, dum naves *Anglicanæ* cum *Batavis* conjunctæ, stationem diu peragerent, ne portu solveret *Gallica* Classis, *Anglos* scorbutum corripuisse, non corripuisse *Batavos*: causa quæsitâ, constituisse id, quod classiariis *Batavis* bis in septimana ex brassica sale condita pararetur prandium, *Anglis* vero minime: cæterum in omnibus idem utrisque regimen contingere.

Pergit Doct. *Lind* docere non esse, qui scorbutum faciat, salem marinum. Scorbutum affici ceptis, inquit, mox omnia salita auferuntur; attamen morbus pergit, & furit. Præterea scorbutum natum ostendit, non nisi recentibus carnibus vescente nauta. Sic *Ansonii* classi, *Mexico* recedenti, inter medias recentes carnes morbum natum: *Cæsarias* legiones, *Clar. Cramero* notante, cum carnum recentium abundantia; *Russicum* exercitum, referente *Nitschio*, salitis carentem, in turpes incidisse scorbutos.

In quæstione porro de Vegetabilibus, merito occinit Doctissimo *Bachstrom*, in eo, quod & ad præveniendum, & ad curandum, sint egregia: id urbes obsessas, id *Hollandorum* brassicam confirmare lubens fatetur: attamen censet etiam hanc *Bachstromii* esse limitandam sententiam.

Quod enim 1^{mo}. de urbibus obsessis constitit, id in multis aliis obsidionibus, ubi similes causæ existerent, non ita constituisse. 2^{do}. In media Vegetabilium abundantia scorbuticos effectos esse classiarios.

Exemplum terribile affert, quod egregius *Huxham* confirmat. Dum classis navalis Architalassi *Martin* in Freto Gallicano diu observabat Classem Gallorum, in summa abundantia vegetabilium omnium & optimarum aquarum, tanto afficitur Scorbutum, ut inter 4000. classiarios 400. numerarentur miserrime

affecti: sic ut Doctiss. *Huxham* cernens redeuntem in *Pleymuti* portum classem, graphice ac lamentabiliter conditionem descripserit ægrorum. Unde Cl. *Lind* defectum Vegetabilium, scorbuti feracem, non nisi causæ occasionalis vice fungi putat.

Sed ut certius, quid de Scorbuto proferatur, quid causæ est, quod plebs navalis infima hoc morbo maxime laboret? minus, aut vix proceres? 1. Proceres navis & præpositi nautarum habent mutatorias vestes, ut madefactas exuere, siccas induere queant. 2. Lectos suos pellibus animalium munitiores adversus frigora, quam plebei, habent. 3. Omnes suas vestes habent præpositi, quam classiarii, crassiores, arcendo frigori aptiores. 4. Habent navium Gubernatores, & supremi Ministri, Tamarindos, Aurantiorum ac Limoniorum poma, horumque defectu varia Limoniorum genera muria condita, succum Limoniorum qui in doliis, & melius adhuc in lagenis diu servari possit, conditas sale brassicas, rapas, phaseolos, endiviam &c. vina, cerevisias lupulatas, &c. hæc omnia simul sumta & non vegetabilia sola, concurrere videntur, quo minus navium Proceres hoc morbo affligantur.

Vita laboriosa nautarum an non deberet illos eximere potius a Scorbuto, ita ut minus eo, quam Proceres, laborarent?

Si solus labor exercitus Scorbutum præcaveret, labor neglectus conciliaret, utique nautæ essent ab eo proceribus navis exemptiores; sed ut, non obstante sua vita laboriosa, magis tamen Scorbutum contrahant, plures inevitabiles ipsis causæ, evitabiles Proceribus, efficiunt; ut jam vidimus.

An machina *Suttoniana* apta non est, ad Scorbutum præcavendum in navibus?

Juvat ad aëra puriorem reddendum, ac renovandum; in eoque sane egregia nautis est: si autem hu-
mi-

miditate diuturna peccet aër, nil machina juvat; cum pluviosa tempestate expulsum aëra humidum, humidus subsequatur. Unde gravissimus *Ansonio* Scorbustus, *Mexico* redeunti, & omni genere abundanti vegetabilium. Pluviis saturo aëre explente naves, nulla dies serena illuxit, quæ navem permetteret sicari. Venti interim & procellæ spumantes undas in naves invehebant, nautas reddebant madidos & frigidos. Cum nunc inter causas occasionales nulla sit aëre humido ac frigido peior, cum is diuturniore tunc obtineret tempore, Scorbutum pessimum nasci oportuit.

Ex cunctis liquet victum corruptum, aëra humidum ac frigidum, vestes tenues & humidas, humidos tenuesque lectos, Vegetabilium succulentorum defectum, animi mœrores ac tædia longi itineris, unâ concurrere ad Scorbutum generandum; aëra humidum ac frigidum, cum vestibus & lectis nautarum frigidioribus, Scorbutum creare posse in media Vegetabilium opulentia; Vegetabilium defectum solum sine humiditate & frigore & mœroribus, vix creare Scorbutum, ut optimus *Lind* in *Scotiæ* Montanis incolis, & in *Finnis* evicit.

§. IV. Ex mirandarum curarum collectione constat illas peractas esse herbis calidis, & frigidis; calefcentibus, & acidis: *Cochlearia*, *Nasturtio*, *Brassica*, *Cœpis*, *Nymphœa*, *Lactuca*, *Acetosa*, *Rubi baccis*, fructibus *Tamarindorum* aliisque, maxime pomis *Aurantiiis*, *Citreis*, ac *Limoniis*: quovis graminum genere: nec non quibusvis succulentis *Vegetabilibus*: *Vino*, *cerevisia*, *aceto*.

Quamvis remedia, quæ morbum curaverint, oppositæ sint naturæ, Scorbustus tamen navalis, symptomatibus descriptus suis, unius modo speciei fuisse apparet; maxime id concludere licet ex curatione eorundem hominum primo per cochlea-

riam, deinde per Rubi baccas; ut supra constitit.

An vero Cl. Viri *Pringle* experimenta, acescentis cochleariæ, dum chemicis quibusdam operationibus eandem exponebat, præcipuam difficultatem haud tollant, docendo unicum Scorbuti genus unico medicamento genere curatum esse?

Si hæc experimenta aliis clarioribus elucidentur, lubens Viri Doctissimi sententiam amplectar: verum ne huc usque amplexus sim, me alia experimenta remorantur. De acore in ipsius experimentis ex Cochlearia percepto, ideo non concludo acidum in Cochlearia adesse, quia didici propriis experimentis, dum alcalina vegetabilia, dum ipsa jura carniū, certum quendam corruptionis gradum consequuta, quid acidi redoleant, id fugax acidum, licet syrupo violarum detectum, ideo non docere naturam rei acidam, cum brevi post totum abeat in alcalinum. Ergo vix video, cur, ob fugax tale acidum, credamus & alcalescentia vegetabilia, & jura carniū, in corpore humano ut acida agere? Equidem in experimentis clarissimi Viri alcali volatile cochleariæ avolavit multum, indeque natura herbæ alcalina vehementer mutata est; sed an mutata tota? An mirandæ curationes putridi scorbuti ægris, armentorum instar, crudam de pratis herbam vorantibus factæ, præsens non habuere alcali, idque copiosum? Deinde in Pringleanis sufficiens distinctio inter fermentationem & putrefactionem desiderari mihi videtur. Desiderari etiam arbitror debitam distinctionem putrida inter & alcalina. Putrida multa cum acidis non effervescent, donec certum adipiscantur putredinis gradum, quo fiant alcalina. Necdum etiam mea experimenta me convicere de vera putredine, etiam nondum alcalina, in vivente corpore animalis. In tot morbis putridis, etiam conclamatis, dum sanguis vena tusa eductus, aut aliunde effluens, exami-

examinatus est, nunquam, ne in pèssimis quidem variolis, putredinis signa vel minima mihi dedit. *Mortono* putridus sanguis de vena exiliens descriptus, ob raritatem hic vix memorandus est. Et demum non datur in tota Chemia machina, quæ utcumque Machinæ humanæ similis sit: Comparentur alimenta & potulenta cum excretis secretisque omnis generis, an huic similem possideat Chemia machinam? Unde donec clari, quem veneror, semperque venerabor, Auctoris, experimenta elucidentur, cochleariam, nasturtium, allium, &c. vocabo calida alcaliescentia, imo alcalina Antiscorbutica.

Nunquid ergo in vegetabilibus, præter prædominans acre, aliquid aliud est, quo sic operentur, ut acre illud nihil obfit, & illud aliud, quidcumque demum sit, curam scorbuti peragat totam? Foretne vis eorum saponacea? an aliquid aliud?

An non his, qui salutis publicæ vi muneris coguntur invigilare, incumbit ut supremæ potestati ea indicent, quibus horrendus hic morbus præveniat? Et an inter hæc consilia etiam hoc salutare non suadendum, ut loco tantorum vegetabilium siccorum, parentur in doliis succulenta vegetabilia omnis fere generis sale condita, ut nunc pauca modo parari solent? Si Viri Clarissimi *Poissonnier* aquas marinas levi negotio potabiles reddendi succedat conatus, laudes merebitur æternas.

An ad stupendas & celeres scorbuti curas plurimum non contulit aura serena, in quam ex navì deducti scorbutici inducerentur, & qua compluribus fruerentur diebus?

Purus, ficcus, tepens aër, partem medicinæ in his expleverit necesse est, dum humidus frigidusque aër symbolam adeo magnam morbo generando contulisset: sed absoluta talis puri ficci tepentisque aëris necessitas non demonstratur ex eo, 1^{mo}. quod

ægri sæpe jacuerint in littore sub tentoriis, ubi certo & humidus aër, & frigidus sæpe est. 2^{do}. Quod plures tales celeres curæ peractæ sint, ægris in continentem non expositis, verum nave detentis. Curam vero fortunatiorem ac celeriores bono cum aëre expectare oportet.

§. V. Quid demum causæ, quod marini scorbuti, ejusque pessimi, sæpe tam celeris, atque perfecta cura fuerit; quodque terricolarum scorbutus curam nostram toties diuturnam, laboriosam, ac sæpe impossibilem arguat? An dosis esset medicamentorum, quam ad guttulas, ad cochlearia, ad vascula aliquot nocturni spatii evacuanda, præscribimus (interea dum historia marina homines curatos ostendit illos, qui vegetabilia cruda integris manipulis, qui poma aurantia & limonia denario numero, qui præterea herbas & fructus, coctos, elixos, assos, juraque eorum, ad victum sic adhibebant, ut nulla re alia vescerentur?)



C A P U T XXIII.

De Machina ad Curandum Ileum desperatum.

§. I. Communicantur duæ Epistolæ agentes de Machina, nuper in Italia excogitata, qua tres homines, Ileum desperato laborantes, integræ sanitati brevi restituti sunt; referentes quoque facta in canibus eadem experimenta. §. II. Traduntur novem mea experimenta cum hac Machina capta; qua occasione etiam phænomena, quæ circa vermium in corpore animali domicilium, & circa vitales actiones, observabantur, noto. §. III. Quatuordecim Corollaria tam Theoretica, quam Practica, ex dictis deducta.

§. I.

§. I. **E**ruditissimus ac solertissimus Medicus *Joannes de Videmar*, celeberrimus *Mediolanensis* Practicus, ad promovendam Medicinam natus, jam pluries de ejusmodi Machina ad me scripsit, quæ excogitata in *Italia*, ad desperatum Ileum morbum, præsentem jam vomitu stercoreo, solvendum pluries admota, nonnullos homines mortis faucibus eripuisset, eosdemque spatio incredibiliter parvo reddidisset sanitati.

Primæ ejusdem literæ ad me datæ XII. Kal. Jan. 1762. sic se habent: „Machinam, de qua alias sermo fuit, a Domino Physico *Molinari* huic nostro Fabro *Laurentio Mazzoni* demandatam, istuc brevi deferendam intelligo; ita binas alias historias, ad eam spectantes, quæ bis fortunatum obtinere eventum, tibi communicatas volo; eaque simul in denatis per me capta experimenta coram Archiatro *Vandelli*, ejusque nepote D. *Dominico Vandelli*, ut de ejus usu certiores apud Litteratum orbem rationem reddere queamus.” Et primo:

„Rustica mulier torosa, quartum agens lustrum, post magnam falsamenti, fructuumque horæorum, ingurgitationem, quatuor miliarium iter suscepit. Domum redux doloribus *ad ileum dextrum* vexatur, cum abdominis intumescencia, vomitu, anxietatibus: nihil profuere enemata sæpius applicita, nihil iteratæ V. S. nihilque fatus emollientes, & oleum lini magna satis copia positum; ita ut *ad octavam diem* increbescentes, jamque morituram proclamantes, ut transferretur machina, conscii suadeant nonnulli: qua applicata magna tepentis aquæ copia quatuor dierum spatio, sed per intervalla, injecta, mirum! dextram abdominis intumescenciam se movere vi-

„sum

„ sum est, doloresque demulceri ceperunt, multis-
 „ que brevi post dejectionibus liberata fuit.
 „ *Frater Josephus Fidelis a Mediolano*, Capucinus,
 „ moribundis in Xenodochio adstans, quadragenarius,
 „ post diuturnam toleratam febrem vix reconva-
 „ cens, in vomitum fere continuum incidit, ma-
 „ teriei primo aquosæ, viridescantis, magnæ co-
 „ piæ, singultibus identidem comitantibus, nullis-
 „ que trium dierum spatio sedibus. Omnibus in-
 „ cassum adhibitis, fœtentes jam incipiebat vome-
 „ re fœces. Re in angusto sic posita, adstans Chi-
 „ rurgus & Lithotomus magni nominis *Dominicus*
 „ *Ocelli*, machinam experiri solitus, ad eam confu-
 „ giendam esse autumavit, motum peristalticum
 „ inversum revocandi ergo. Manu operi admota,
 „ paulatim, sed repetito, injicitur tepida: pau-
 „ cæ, sed crebræ redduntur sedes, (qui effectus
 „ machinæ hujus singularis & proprius alvum cre-
 „ bro irritandi,) brevi cessat emesis, permanente
 „ adhuc singultu; verum analepticiis recreatus, in-
 „ tegre convaluit, prout mihi retulit idem ægro-
 „ tus.

„ Ad ea, quæ in denatis ipse animadverti coram
 „ testibus, nunc devenio. Nudatis igitur intesti-
 „ nis, aqua per machinam injecta paulatim præter-
 „ fluere omnes intestinorum convolutiones, usque
 „ dum continuato per os exiret rivo, conspexi; ne
 „ guttula quidem in cavo abdominis ejecta, intac-
 „ tis, etiamsi satis extensis, intestinis; neque tam
 „ impleta ac distenta inveni, ut rupturæ periculum
 „ minarentur, quin majori extensioni locus foret.
 „ Iterato periculo in cadavere, cui Ileum pone
 „ valvulam apertum fuit, aquam vix ad libram in-
 „ jectam per aperturæ locum exire vidimus, nihil
 „ prorsum resistente valvula, haud secus, ac si
 „ nul-

„ nulla adesset : ex quo vera scripsisse *Matthæum de*
 „ *Gradibus* , *Guainerium* , aliosque , intelleximus ,
 „ qui suppositoria in anum intrusa , abrupto vi filo ,
 „ per os ejecisse ægrotantes nobis tradiderunt ; quin
 „ imo digito immisso in colum , deforsum versus
 „ absque ulla resistantia in ileum transivisse animad-
 „ vertimus.

„ Nec per constructam Machinam istuc quanto-
 „ cyus translaturam experti fuimus aliis duobus in
 „ cadaveribus ; hinc pari modo injecta aqua ultra
 „ valvulam præterlapsa non fuit ; ita ut non sem-
 „ per æque constructam , neque in omnibus æque
 „ validam esse fateamur oporteat ; quemadmodum
 „ & *Hales* in canibus , aliique in hominum cadave-
 „ ribus Anatomici annotavere. Horum duorum ca-
 „ daverum intestina ad spithamæ longitudinem , su-
 „ pra & infra valvulam , de industria dissecui , at-
 „ que e corpore extraxi , in diem sequentem peri-
 „ clitaturus , quid inde esset. Injecta igitur in co-
 „ lon aqua , in Ileum pertransiit ; minime miratus
 „ sum , eo quod partes in situ quandam habeant
 „ actionem , quam non retinent divulsæ , quemad-
 „ modum partium usus in denatis valde laceffitur.

„ In vivo cane de industria parato iterum pericu-
 „ lum fecimus , in eoque facillime tepidam omnes
 „ intestinorum anfractus , ad pylorum usque , per-
 „ vasisse vidimus. Ex quibus patet Instrumentum
 „ hoc nullum neque in vivis conatum inferre posse ;
 „ eo magis , quia dum satis est , injectio de cessa-
 „ tione admoneat , atque extracto tubulo immédia-
 „ te post rejiciat aquam ”. Hæc de Machina satis.

In secunda Epistola data *Mediolani* sept. Kal. Jun.
 1762. sic scripsit : „ Habes hic annexam delineatio-
 „ nem , atque descriptionem Machinæ , clysteris
 „ vice adhibitæ. En casus ! Mulier fere quinquagenaria ,
 „ colicis doloribus quatuordecim dierum

„ spa-

„ spatio vexata, nihil prorsum per inferiora emit-
 „ tens, omnia evomebat; incassum adhibitis clyste-
 „ ribus emollientibus, acribus, ipsoque tabaci fu-
 „ mo, atque oleo amygdalino cum hydrargyro de-
 „ glutito, nec repetitis V. S. ac balneis, levare
 „ potuit. Ipso momento, quo Machinæ ope in-
 „ jecta fuit saccharata aqua, tot deiecit prædura
 „ scybala, ut vix credi possit; quibus exacte in-
 „ spectis, præmulti uvarum acini, jam multis men-
 „ sibus retro comesti, reperti sunt.

„ Verum quidem est, quod mulier hæc multos
 „ sustinuit labores in aquæ violenta injectione,
 „ quemadmodum optime notat Exp. *Hales* in Hæ-
 „ mast. Exp. 25. ac parum affuit ne in animi deli-
 „ quium laberetur in fœcum dejectione; ast analep-
 „ ticus roborata, in diem sequentem injectione ite-
 „ rata, iterumque interpositis aliquot diebus repeti-
 „ ta, optima nunc fruitur valetudine, quæ iliaco
 „ morbo mori proxime videbatur.

„ Haud absimilis ei hæc machina est, quæ ad
 „ extinguenda incendia apud *Martin* describitur, in
 „ *Grammatica scientiarum*.

„ Jam in cadavere Machinam hanc experti fu-
 „ mus, vidimusque aquam ad pylorum usque ad-
 „ scendisse; ast ignoro usque dum, an in omnibus
 „ cadaveribus hoc eventurum sit? Repetitis expe-
 „ rimentis te commonefaciam. Dubium tamen est
 „ an, posito quod æque eveniant in omnibus de-
 „ mortuis, in vivis pari modo eventura sint, (quem-
 „ admodum & tu notas super *Halesiana* experimen-
 „ ta,) majorem propter *Tulpianæ* valvulæ vim in
 „ his, quam in illis.

Clarissimus *Hales* loco citato, & tu quoque in ca-
 „ pite de *Tympanitide* & *Ileo morbo*, Medicos admo-
 „ nes ut hujusmodi casibus enemata excogitent tan-
 „ tarum virium, quæ intestinorum obices tollere

„ pos-

possint. Hæc tibi communicata historia satis evincit, quantæ sit efficaciam similis aquæ injectio.

His ita a dignissimo viro perceptis curavi mihi juxta delineatam calamo effigiem Machinam ejusmodi parari: quam tabulam lubenter communicaturus essem, si in actis *Bononiæ*, aliusve Italicæ Eruditorum Societatis, non prostaret brevi; & nisi, ut ante monitum est, fere similis haberetur in *Martinæ Gram. Scient.*

Die Martis 28. hujus anni, primum experimentum in nosocomio fecimus in cane viva, mediocris magnitudinis. Injecimus tribus iteratis vicibus in intestinum rectum libras medicas unciarum XII. propemodum sex aquæ tepidæ.

Post singulas injectiones canis incredibili impetu aquam cum stercorebus ad 4. 5. pedum distantiam expulit ano. Has tres injectiones spatio horæ quadrantis absolvimus.

Liberata Canis per 3. 4. minuta spatiosum cubiculum circuivit, corpus posticum totum madidum ubique affricans. Postea cucurrit alacriter, bene dormivit, saltavit, manducavit eo, & seq. die.

Violenta hæc vis, qua injecta aqua ad tertiam usque vicem resiliret, nosque injectionem ter repetere cogeret, suspicionem dabat an valvula *Bauhiniana* transitum non denegasset.

Unde die 29. & 30. & 31. Martii eodem modo experimentum repetivimus, eundem an effectum editurum esset curiosi. Et phænomena injectionis eadem erant, & æque bona canis post injectionem valetudo.

Unde 1. Aprilis experimentum sic mutavimus, ut ano bene circum siphunculum clauso, & cane melius intra manus firmata, sex ad minimum libras continuata opera injecerimus. Porro dum libræ penne quatuor injectæ erant, canis vomere cepit, primo

mo aquam, dein cibos, vermes tandem teretes vivos. Iniectione interim pergente, vomitus rivi lati instar profiliit ad distantiam 3. aut 4. pedum.

Vis ergo machinæ continuatior resistantiam valvulæ superavit.

Animus erat ilico interna examinare. Strangulavimus canem, & aperuimus. Crassa intestina modicè, tenuia minus, ventriculus immense distentus erat.

Apertis colo & ileo, oblongum in valvula hiatus deprehendimus.

15. Aprilis fano ac vegeto cani unica continuata vice, nisi quod semel quidquam alvus resliret, injecimus ultra octo libras aquæ tepidæ. Post injectas 5. libras vomere cepit, pluriesque vomitum exinde repetivit. Paucis post minutis a sordibus canis mundatus, ac linteo ficcatus, hilaris ac sanus fuit per plures dies; postea dimissus adiit ilico suum in vicinia herum, reditque adhuc sæpe nos blande salutaturus.

18. Aprilis in cadavere humano vires exploravimus Machinæ. Sexagenario major cum calculo in vesica in nosocomio obierat. Vesicam cum calculo primum eduxeramus, ne utilissima demonstratio, quam posthac communicabo, turbaretur. Injecimus tunc ope Machinæ tepidam per anum, quæ ut facilius progrediretur, intestina plurium manibus molliter compressimus; sic tamen ut aquæ progressum levatis sæpe manibus bene contemplaremur. Vidimus intestina crassa cito impleri; nonnullam quidem nasci ad valvulam remoram, sed brevi sublata; injectam aquam momento citius intestina tenuia permeare; non extendi ea notabiliter; ventriculum autem valde turgidum fieri, oreque mox elabi aquam. Valvula hiabat; antequam vero perscinderemus, ex colo aquam in ileum promovere satageba-

gebamus, haud æque feliciter in quovis intestini situ: certus ac determinatus situs requirebatur, ut ex Cæci sacco aqua in Ileum transiret.

3. Maji canem masculum 16. mensium, fortem, nacti, experimentum iteravimus. Valida corporis contorsione & ejulatu tres primæ tepidæ libræ vi expellebantur ano. Qua dein accuratius circum cannulam firmata, tres alias libras commode, & non interturbate, injecimus: aqua interim vomitu quidem valido, sed eo, qui in primo cane observatus, debiliore, ejectabatur, cum paucis cibis, & teretibus lumbricis, ad tertiam usque vicem.

Decreveramus etiam hunc extemplo aperire; sed cum inde minus recte, quam priores canes, se videretur habere, pepercimus ejus vitæ, viseri an quid ab operatione infortunii observari daretur. Ast hora elapsa canis per omnia se sanum esse demonstrabat. Cum haud illepidus cuiquam placeret, qui pro suo magno ac vetustiore cane libenter eum mutaret, dedimus illi nostrum, postquam per novem dierum spatium certiores nos de ipsius perfectissima sanitate reddidissemus.

Canem ergo majorem illum 12. Maji ad experimentum ducentes, spatio binis minutis breviori injecimus aquæ tepidæ 8. vel 9. libras, quæ incepere tunc violento saltu, minus tamen violento, quam in primo experimento, ore exsilire. Vomitus iterum ut in prioribus ter repetierat, isque singula vice copiosissimus. Materies ejecta partim aqua erat, partim copiosa caro, partim lumbrici teretes, digitum, sesquidigitum, longi, valde graciles, partim copiosissima tenia, & gluten multum.

Apertis per longitudinem intestinis deteximus innumerabilium teniarum copiam, sic ut catena coherentium sibi cucurbitinorum vermium, sive Asca-

ridum planorum, hinc inde, forte per vim aquæ, fracta, plus vigesies iret, rediretque per totam tenuium intestinorum longitudinem, glutine involuta copiosissimo. Lumbriciteretes Teniam concomitabantur ubique.

Peculiare in hoc cane fuit, quod Colon in medio ventre sub umbilico originem haberet, rectaque descendens, mox Rectum formaret; longitudinem igitur una cum toto Recto 8. vel 9. pollices emensum duntaxat: quale quid & in homine *Dionis* se testatur observasse. Ceterum breve hoc Colon ab injecta aqua probe elutum erat, compactas modo fœces & in ortu suo, & in magno suo processu vermiculari, gerens.

Utrique cani, quem strangulaveramus, effectum machinæ contemplaturi, laxato post apertum abdomen & thoracem fune, vita pulcerrime redibat. Quo animadverso, mox ad actiones vitales contemplandas, reliquo examine ad tempus dilato, nos accinximus. In priore cane, aperto pericardio, cor pulsabat uno tempore æquabiliter, alio inæqualiter: vita labascente, per vices quievit & palpavit. Levis digiti attactus momentaneam vitam reddebat. Attenti ad ultimum cordis motum, vidimus utrumque ejusdem ventriculum æquabilissime agere, & æque fortiter; idque etiam ubi post aliquantillam quietem, sive sponte, sive flatu, tactuve, suos redintegraret motus. Quo autem certiores hujus essemus, cor parum invertibamus, ut cum sinu & auricula sua ventriculus sinister sub liberio-rem conspectum caderet; unde sinistram cor pulcerrime agere cernebamur, ut ante videramus pro parte.

Quod autem diu, distincteque, ac de industria, notabamus, vix cuspis dici poterat ad basin in systole

le multum accedere, idque etiam a principio, dum cordis validior motus existeret, notavimus. Dicendum potius est in systole cuspidem, & latera ventriculorum, se simul leviter contrahere.

Arteria intercostalis percussa pulcre ostendebat velociorem illum saltum, quem arteriosus sanguis ad singulam cordis contractionem edit.

Uterque cordis ventriculus apertus multum, sinister autem plus, sanguinis continebat.

In altero cane pericardium ægre a corde secedebat. Attenti ad omnia, vidimus clare in systole cordis basin, æque ac mucronem, & parietes, ad se invicem accedere, & cor facere se ipso minus: motus vero vitalis ad finem usque pergebat æqualiter in utroque thalamo, inverso corde, quemadmodum in cane priore, ut cordis sinistri motus apte conspici posset. Tandem, quod non in cane priore, cessante motu vitali ventriculorum, auricula dextra quater vibrabat, quo tempore sinistra semel. Cor sinistrum cum sua auricula æque plenum sanguine, quam sua cum auricula dextrum. In sinu dextro polypus magnus.

In utroque canum experimento dextrum cor non vixit sinistro diutius. An quod, corde in situ manente, cor sinistrum minus conspicuum sub ultimis vitæ scintillis mortem testari maturiorem videatur? Igiturne aliqua cordis inversione opus, ut certi quid affirmemus, detegamusque errores?

In humanorum Cadaverum examine cor sinistrum sæpe minus quam dextrum repletum inveni, sæpe æque repletum, aliquando repletius. A methodo secandi multum pendet: qui cor dextrum prius aperiant, hi motu, pressione, evacuant cor sinistrum plus, quam aliter; qui sinistrum prius eandem ob causam possunt dextrum inanire.

Finem Capiti huic, & simul operi, imponam quibusdam Corollariis & Problematibus.

1^{mo}. Patet in Canibus facta Machinae operatione sic, ut aqua injecta bis, ter, cum fæcibus alvo expelleretur, vomitum non adfuisse.

2^{do}. Canes post hanc operationem minime ægrotaſſe.

3^{tio}. Quod vomitus non ſucceſſerit, violenteque ex ano fuerit expulſa aqua, id minus videri valvulae reſiſtentiae tribuendum, quam quidem canis motui, contorſioni, clamori, elabendi conatibus.

4^{to}. Id evidenter patuiſſe, quando, cane prudentius firmato, injecta continuatim aqua vomitu repetito expulſa fuerit.

5^{to}. Experimento eo uſque producto, ut violentus, repetitusque ſequeretur vomitus, unaque cum aqua cibus, gluten, multusque tum teres vermis, tum latus; igitur eo uſque, ut vis valvulae coli penitus ſuperaretur, ut motus periftalticus naturalis ſufflaminatus, & ut motus antiperiſtalticus eſſet præternaturaliter auctus; experimento, inquam, ſic aucto, canes tamen nullam inde habuiſſe, imo ne a ſæpius quidem repetita eadem actione, ſanitatis jaçturam aut læſionem.

6^{to}. Canibus ſtantibus, ac quatuor pedibus ſuis ſupra menſam detentis, cum injectionem fecerimus, quaeritur utrum injecta aqua faciliorem hinc habuerit, an difficiliorem motum ad os uſque? Et an ſaltem in homine iliaco, dextrum in latus pro more verſo, injectione minus ſuccedente, ſitus non foret, qualem in canibus obſervavimus, conciliandus?

7^{mo}. Et in canibus, & in hominum Cadaveribus, quæ *Cl. Widemar*, quæ nos, aperuerimus, aperteve contemplati fuerimus, omnia inteſtina modice

tan-

tantum turgida inventa esse : videri hinc eam vim Machinæ esse , ut omnes in via resistentias multo leviores negotio superet , quam ut per resistentes potentias suam viam amplificare cogatur. In vivis quidem intestinorum vis contractilis juvare dici potest ; in cadaveribus autem haud ita.

8^{vo}. Cur in iisdem experimentis (nº. 7.) ventriculus maxime expansus? Replendus is erat donec vel finderetur, vel per orificia evacuet se sua : per orificium inferius sive dextrum non poterat, impellente fortius machina; ergo per superius tantum, ubi primum sic repletus, ut capere ultra non potuerit.

9^{no}. Haud in canibus duntaxat, verum nec in hominibus, hucusque inventam esse per se letalem eam, superna versus, *Tulpianæ* valvulæ aperturam, ut aqua, ut stercorea, ut enemata, ut etiam suppositoria, ex recto & colo adscendant, & ore evomantur. Casus *Matthæi de Gradibus*, *Guainerii*, *Pueri*, de quo *Rat. Med. Tom. 1. pag. 184.* tandem & trium illorum, quibus, referente *Cl. Widemario*, hæc Machina vitam servavit, aperte hoc evincunt.

10^{mo}. Casus dari ex observationibus, quos Machina hæc minime curet: quales enim binos expertus sit *Cl. Widemar* insuperabilitatis valvulæ, tales plures reperiundos fore. Jure proinde *Italos* Medicos & Chirurgos laudandos, qui in vivis hominibus, ne una vice nimium urgendo obessent, lente adeo & prudenter progressi sint.

11^{mo}. Meditationi Pathologicæ multam materiem a vermibus in canibus repertis suppeditari. Ac primo quidem ope Machinæ in binis canibus vermes teretes plures vomitu ejectos; in tertio magnam copiam teretium & latorum. 2. In Anatome

canis posterioris teniam copiosam, multosque illos teretes vermes, intestina fere tota explevisse. 3. Eosdem copiosissimo ac tenaci inhæsisse glutini. 4. Cur tota hæc moles, aut cur saltem primo in ortu, motu peristaltico, & transeunte chylo, depulsa non fuerit, mirum videri; cum quo affigat sese, quove retineatur, nullibi appareat quidquam. 5. Retineaturne hæc vermium ac glutinis moles a motu antiperistaltico naturali? Sed cur tunc chylus, cur incipientes non retineantur fœces? 6. Nunquid copiosi adeo vermes suo motu & reptatu non plus, quam alia ibidem contenta, canalem intestinalem stimulent? & cur haud expellantur tamen? 7. Possiderentne vim sustinendi se, motui peristaltico resistendi, affigendi se, dum pelluntur, tuendique domicilium? 8. Ideone inefficax toties Antihelmentici vis, quod tenaci glutini involuti vermes, tutique hæreant? 9. Visne Antihelmentici ea præcipua sit, quæ gluten incidere, pellereque, sit potis? 10. An allium, asa fœtida, fuligo cruda caminorum, &c. sæpius sumta, vermes in medio suo glutine sic afficerent, ut sede mutari cogerentur, & vel sponte sursum deorsumve exitum quærerent, aut cathartico fortiore tunc facile expellerentur? An vero hæc tantum in gluten destruendum potenter agendo infecta fugent?

12^{mo}. An inde forte capiatur cur alvo nonnunquam prodeant corpora ulna longiora, intestinum cavum longitudine, amplitudine, cavitare, referentia; quale quid stupenda eruditione clarus *Justus Lipsius*, teste medico suo *Heurnio patre*, excrevit? Et quale præstantissimum Collegam, variis portionibus, quas inter unam quatuor spithamarum, excrevisse vidi? Utique glutinis immensi, intestina opplentis, copia, sive genita cum vermibus, sive ali-

aliunde, possetne aliquando inspissari, condensari, conglutinari cum cavo intestino, & post Leienteriam, post Atrophiam a tot obstructis lacteorum osculis, Naturæ demum bonitate sub hac exposita forma excerni?


13^{mo}. Si tandem, plurium Iliacorum curatorum exemplis, cunctis meridiano sole clarius constiterit *Tulpianam* valvulam a Machina innocue aperiri, totumque intestinale tubum se tuto per os evacua-
re; an tunc in difficillima cura vermium, cum maxime latorum, Machina applicanda non foret vicibus repetitis, ut *Itali* fecerunt; quandoquidem viderimus ab unica applicatione, sed fortiore, & lumbricos multos, & copiosam, cum muco abundantissimo, expulsam Teniam? Animus est, si denuo canem teniosum nactus fuero, singulo tertio quartove die experimentum toties repetere, donec ultra nihil de verme prodeat; incidere demum canem, visurus num penitus a vermibus immunis sit, nec ne?

14^{mo}. De experimentis, circa actiones vitales in vivo animali utroque hic captis, notandum id censeo, quod in omnibus canibus ac felibus, quos ad contemplandam hanc actionem unquam vivos contemplatus sum, rem non semper, ut hic, invenerim; verum perpetuo cum mira in aliis atque aliis varietate: unde concludo 1^{mo}. illegitimam quamcumque regulam physiologicam fore, quam ex ejusmodi phænomenis, adeo inconstantibus, obtrudere quis vellet. 2^{do}. magis illegitimum esse actionem sani vegetique animalis sic exponere, & per ea explicare velle, quæ in eodem vulnerato, convulso, agitato, cum morte luctante, cum absentia resistentium potentiarum, quæ olim partes in debito situ detinebant, fulciebantque, observentur. 3^{tio}.

Maxime illegitimum vitalitatem humanam, sanam, explicare, & comparare cum phænomenis, quæ animal vulneratum, & cum morte luctans, insigni varietate & inconstantia offert contemplantibus.

Atque hic tandem finem operi impono, solito jam protractiori, quam ut notabiliores casus Chirurgicos & Anatomicos, quorum tamen scire interest, adjungam eidem: unde hos ad proxime subsequentem tomum reservabo.

















I N D E X

Præcipuorum in hoc Volumine contentorum tam
Remediorum quam Monitorum Practicorum
&c. Ordine Alpha-Betico.

A.

A ccretio intestinorum ad Abdomen quid efficiat?	Pag. 315
Acrimonia Scorbutica multum a spontanea quacunque differt.	426
Acuti morbi per unicam excretionis viam raro plane judicantur.	364
Aër purus & serenus facit ad sanationem Scorbuticorum.	441
Agaricus lamellatim applicatus & forma pulveris inspersus.	233. 257.
——— laudatur contra hæmorrhagiam.	187
Albumen ovi cum Spiritu Vini, bonum ad excoriaciones præveniendas.	235
Alimenta solida parva copia præstant liquidis in Ileo disrupto consolidando.	316
Alvi tarditas convenit in operatione Aneurismatis & cruris fracti repositione.	235
Alvinæ fæces Stercoraceæ in Ileo.	303
Alvus tarda sæpe redditur naturalis carminativis & opio.	96
——— ad omnia rebellis optime forma liquida & per Epicrasin movetur.	250
Anedda arbor Americana.	427
Aneurisma sæpe fallacissimis latet sub signis.	85
——— aliquando difficilis diagnoseos.	263
——— externum potest diu inculpate geri.	264
——— spurium curatur operatione.	231
——— ——— aliquando sola compressione.	232
Aneurismatis cura.	90
Anti-epileptica, qua talia, non dantur generalia.	227
——— helmintica an potissimum in gluten Intestinorum agunt.	454
Aphthæ quid antiquitus denotabant.	386
——— jam maxime imminutæ.	387
——— frequentes in Belgio a quo tempore.	ibid.
Aqua calcis non solvit calculum in corpore humano.	78

I N D E X.

Argillacea Diarrhœa sæpe in suppuratis observatur.	Pag. 122
Arthritica materies calculos generare potest.	75
Aselli vino infusi ad strumas.	287
Atresis bene sublata per operationem signa.	111
———— tollendæ obliqua sectio rectæ præfertur.	113
Aurantiorum folia in convulsionibus.	222
———— cum Chocolatæ decocto.	223. 224
———— juncta cum Electricitate.	225
———— determinatum in applicatione requirunt ca- sum.	227
Auxilia ad hæmorrhagiam.	179

B.

Bezoardica in principio Acutorum data nocent.	327
Bezoardicorum enumeratio.	326
Bilis Atra in motum acta semper reformidanda.	357
—— prius immutanda, quam movenda.	ibid.

C.

Calcis aqua non solvit calculum in corpore humano.	78
Calculi generari possunt a materia Arthritica.	75
———— in vesicam retropulsio dolores minuit.	185
Calculosorum urina pallida unde?	191
———— gluten Calcareum unde?	192
Calida curandi ratio Viennæ valde est in usu.	390
Caloris aliæ sunt præter Attritum causæ.	321
Cardialgiæ cura quæ felix in multis.	96
Carminans conditum.	97
———— mixtura.	96
Carminantia opio juncta tardam alvum sæpe naturalem reddunt.	96
Causæ inertiae medicamenti.	248. seq.
Cephalæ variæ medelæ.	219. 220
Chemia non possidet machinam similem machinæ huma- næ.	441
Cochleariæ elogium.	429, 431
Colcothar Vitrioli in aqua solutum injicitur in ulcera.	148
Colon breve.	450
Compressio externa sola sæpe curat Aneurisma.	232
Compressioni interceptio succedere sæpe debet.	237
Con-	

I N D E X.

Conditum carminans.	Pag. 97
Convulsionis fictæ, detectæ, curatæ.	56. seq.
Convulsionibus profunt folia Aurantiorum.	222
Cornu Cervi succinatum cum diacodio pro antispasmo- dico in Acuto.	380
Cortex Peruvianus antispasmodicorum princeps.	382
———— debilis pulsus animator & frequentio- ris moderator est.	267
———— frequentis usus est in debilitate ab ab- ortu & hæmorrhagiis.	252
———— vindicatur a perversis imputationibus. ibid.	
———— in febre continua remittente.	177
———— non remittente ac inflammatoria &c.	6—8
Cort. Per. Decoctum cum spiritu terebinthinæ vulnere in- jectum.	242
———— meracissimum in gangræna.	245
———— efficacia summa in sistenda gangræna.	246
———— extractum ad Unc. β. in mixtura.	117
———— in magna dosi.	242
———— fomentum ad Gangrænam.	40. 242. 260
———— immanis quantitas uni homini data.	248
———— injectio detergens.	181
———— pondus aut mensura non determinat dosin sed morbi levamen.	250
———— usus cum Diæta lactea in febribus Hæcticis.	147
Cranii inustio ferro candenti ex arte proscribenda est.	213
———— futurarum decursus valde inconstans est.	210
Crises diversæ Hippocratis.	346. seq.
———— absolutæ visæ, sæpe id non sunt.	350
———— bonæ cum urinis nigris.	ibid.
———— per urinas nigras, lethales vel periculosæ.	357
Crisi determinandæ an bona sit, inservit principii morbi determinatio.	368
Crisis bona requirit copiosas evacuationes.	417
———— constantiam multa impediunt.	372
———— perfecta non tollit metum recidivæ.	3
Critica exanthemata vix dantur sed fere omnia sympto- matica & factitia sunt.	385

I N D E X.

D.

D escensus in continentem optimum remedium antiscorbuticum.	Pag. 433
Diæta Lactea cum Cortice Peruviano ad Febres Hecticas.	147
Diarrhœa argillacea sæpe in suppurationis observatur.	122
Diatheſis Phlogiſtica ſanguinis ſola requiritur in annofis excretionibus purulentis.	124
Difficultates circa Crifes quomodo tollendæ.	358
Diſpoſitio Scirrhoſa tollitur mellis Copioſo & pertinaci uſu.	97
Dolores calculoſos Uva urſi & Opium levant.	64
Doloribus urinæ remedium ſingulare.	62
Duræ matris cum Pia cohæſio sæpe multorum malorum cauſa.	275

E.

E fflorefcentia ab emplaſtro quomodo tollenda.	96
Eneina in ſpasmō deglutitionem per diem impediēte.	159
Epilepſiæ curandæ ſufficit aliquando ablatio ſymptomatum proxime ante paroxyſmum.	50
———— a terrore Valerianæ radix prodeſt.	52
———— paroxyſmus in ſomno adoriens cur?	53
Exanthemata critica vix dantur.	385
———— factitia facilius retrocedunt.	407
———— putridæ ſanguinis diſſolutioni non debentur.	3
Exanthematum contagium non niſi prædiſpoſitos invadit.	5
———— frequentia a quibusnam cauſis.	15
Exemplum inſenſibilitatis in parte Senſiliſſima.	171
Experimentum de acido fugaci quorundam Vegetabilium.	440

F.

F actitia exanthemata facilius retrocedunt.	407
Febres intermittentes poſſunt generare pus.	118
Febris Hæmorrhoidalis.	322
———— Hectica requirit Diætā lacteam & Cortic. Peruv.	147
———— intermittens a continua diſtinguitur Urina & Pulſu.	381
Fellea & Urinæ Veſica creſcunt tenuitate pro ratione extensionis.	103
Fibræ in Utero in ambitu placentæ.	319
Fictæ	

I N D E X.

Fictæ convulsiones detectæ, curatæ.	Pag. 56. seq.
Flatus copiosi per os a rudiori attactu brachii.	265
Fœlii error circa urinarum nigredinem.	352
Fomentum ad crus œdematosum.	240
——— ex Cortice Peruviano ad Præcavendam Gan-	
grænam.	40. 242. 260
Fratri Cosmi methodus Lithoromica.	169
Fundamenta quatuor Pathologiæ.	136
Fusa omenti & ventris pinguedo.	18

G.

Galenus negavit urinam nigram & tenuem simul cur?	351
Gangræna ulcerum præcavetur Fomento ex Cort.	
Peruv.	40
Gangrænæ præcavendæ lotio.	181
Gluten calcareum calculosorum unde?	192
Glutinosa corpora ano excreta.	454
Gramen pratense optimum Antiscorbuticum.	433

H.

Hæmorrhagiæ sistendæ auxilia.	179
Hæmorrhoidalis febris quid significet.	322
Hæmorrhoides quotuplices.	324
——— non adeo frequentes naturaliter sunt ac	
vulgo putatur.	325
Hecticis febribus prodest Cortex Peruvianus & Diætæ	
Lactea.	147
Hepar & Lien in emaciatis sæpe fiunt monstrosa.	120
Hippocrate veracior non datur auctor.	322
Hippocrates cur carpatur supra dies Criticos.	371
Hippocratis textus quidam interpretatus.	363
Hoffmanni mixtura ubinam.	331
Humores in cavitatibus sæpe ita degenerant, ut circulatio	
eos motos non toleret.	357
Hydatidis involucra carent vasis & fibris.	294
——— in omni parte corporis facilis proventus.	295
Hydrops Pectoris est in classe incertissimorum morborum.	
	31. 132
——— potest adesse sine subita a primo somno	
excitatione.	44
	Hy-

I N D E X.

Hydrops Pectoris a multis non vel vix notatus.	Pag. 34
————— habet & signa Pathognomonica proxime.	35
————— cum incipit signa.	42
————— a nimis hæmorrhoidibus.	126
————— urinosus celeriter perimit.	24
————— eo curabilior quo plures functiones illibatae per- stant.	297
Hydropicorum ulcerum Gangræna fomento ex Cort. Per. præcavetur.	40
————— urinæ sedimen lateritium habent.	28

I.

Indicationes in ruptis Intestinis a Gangræna.	315
Indulgentia Medici erga ægrum limitatur.	377
Injectio ex Colcothare Vitrioli in aqua soluto in ulceribus.	148
Insensibilitatis exemplum in parte sensilissima.	171
Insula Refectionis.	433
———— Stæ Helenæ famosa cura Scorbuticorum.	434
Intercipiendo arteriam nervo prospiciendum est.	237
Intermittentes febres possunt generare pus.	110
Intestini prolapsus a calculo curatur Lithotomia.	190
Intestinorum longitudo non semper eadem est.	163
Intestinum Colon notabili portione Gangræna excidit si- ne magna læsione.	310. seq.
———— tenue vulneratum summe periculosum.	313
Inustio cranii ferro candente ex arte proscribenda.	213

L.

Lactea Diæta & Cortex Peruvianus ad febres hæcticas.	147
Lactuca laudatur ut Anti-Scorbutica.	431
Lex Hippocratis, non judicare ex uno signo.	361
Lien & Hepar in emaciatis sæpe fiunt monstrosa.	120
Lithontriptici vires Ononidis.	216
———— Raphani hortensis.	180
———— J. Stephens compositio; id creditur dispo- sitionem calculosam augere.	70 — 79
Lithotomia calculum auferendo non curat partes degene- res.	167
———— facta, potus copiosus & dilutum nutrimentum.	171
Lotio ad Gangrænam præcavendam.	181

I N D E X.

M.

Machina ad Ileum desperatum.	Pag. 443
— — — — — non sanat omnes.	453
— — — similitudo ejus.	446
— — — an non vermibus medeatur?	455
Machinæ vis continuata superat resistantiam Valvulæ Tulpæ.	448
Maculæ exanthematum a Pulicum morfu distinctio.	339
Malignitas morbi sæpe a methodo medendi gignitur.	326
Materies Arthritica calculos generare potest.	75
Media horæ quadrans sufficit ad hominis Calorem cum Thermometro explorandum.	321
Medicamenta multa parcius data potius nocent quam pro- sunt.	250
Melancholia sine materie abit in Melancholiam cum ma- rie.	118
Mellis copiosus & pertinax usus tollit dispositionem Scir- rhosam.	97
Mensibus provocandis methodus.	205
Miliaria & Petechiæ in eodem morbo præsentia, sympto- matica sunt non Critica.	2
— — — quibusnam potissimum excitentur.	389. seq.
— — — singulari modo tempus decurrentia.	391
— — — non sunt Critica.	397
— — — — — quare?	398
— — — moderari & auferri possunt & debent.	399
— — — Chronica unde.	417
— — — & Petechiæ ne umbram Criseos habent.	417
— — — — — rara nec nisi arte producta.	421
— — — — — prævenire quanti interest.	422
— — — possunt sine ulla ægritudine comparere.	417
Mixtura Hofmanniana ubinam?	331
— — — summe carminans.	96
— — — ad inungendas partes, quibus incumbunt.	235
Monstrosi nonnunquam Natura se accommodat.	100
Morbi denominatio quibus adstricta regulis.	339
— — — primus insultus difficulter determinatur.	369
— — — per paroxysmos invadentes sæpe agnoscunt causas permanentes.	276
Mors a Sudoribus præcocibus.	345

N.

I N D E X,

N.

Natura nonnunquam se monstrosis accommodat. Pag. 108
 Nervo prospiciendum in interceptione Arteriæ. 237

O.

Observatio Auctoris circa bonas urinas. 359
 Oculorum Album indicare potest vermes. 342
 Olei Philosophorum inunctio ad strumas. 286
 Ononidis vires Lithonthripticæ. 216
 Operatio in Aneurismate spurio. 231
 Opii permagna dosis. 251
 Opium datum in stertoroso somno & morbo inde. 52
 ——— & carminantia tardam alvum sæpe reddunt natu-
 ralem. 96
 ——— & Uva ursi levant dolores calculi. 63
 Ovarii extirpatio magnis premitur difficultatibus. 27

P.

Paracentesis in qua specie hydropis proficua. 38. 39:
 Pathologiæ quatuor Fundamenta. 136
 Paucitas medicamentorum causa minoris successus in
 Scorbuto terrestri. 442
 Pectoris hydropis incipientis signa. 42
 Pediluvia commendantur in Acutis. 406
 Pericardii absentia quandoque, quomodo explicatur. 45
 Perturbationes criticæ sub quibus conditionibus bonæ. 323
 Petechiæ & Miliaria in eodem morbo præsentia sympto-
 matica sunt non critica. 2
 ——— arte factæ. 4
 ——— cum febris exacerbatione intropulsæ malignita-
 tem præfagiunt. ibid.
 ——— symptomatice negligendæ. 378. 384
 ——— & Miliaria ne umbram criseos habent. 417
 ——— ——— ——— rara nec nisi arte producta. 421
 ——— ——— ——— prævenire quanti interest? 422
 Phlogistica sanguinis dispositio sufficit ad annosas puru-
 lentas excretiones. 124
 Potus noxii ex Asiaticis secund. Boerhav. 435
 Prognosis quibus fundamentis instituenda. 362
Prognosis

I N D E X.

Prognosis in Acutis cum summa fiat prudentia.	Pag. 372
Pulicem morsus a maculis exanthematum distinctio.	339
Pulmones in cadaveribus raro ab omni adhæsione liberi.	273
Pulsus intermittens cum signis coctionis circa criticum tempus quid præfagiat.	9, 10
Pupillæ sensilitas.	201
Purulenta Diathesis per puris sputum sine vomica.	377
Pus potest & a febribus intermittentibus generari.	110
Putredo vera nondum ab Auctore in vivente observata.	440
Putrida multa non effervescent cum acidis donec fiant alcalina.	ibid.

R.

R adix Valerianæ in Epilepsia a terrore.	52
Raphani hortensis vires lithontripticæ.	180
Remedium singulare in doloribus Urinæ.	62
Repletio cordis multum a methodo secandi pendet.	451
Requisita ad perfectam Crisin.	3
Resolutione non contingente in Acutis nulla crisis sine evacuatione.	364
Respiratio liberior in somno quam vigiliis testatur de spasmis.	380
———— magnum pondus habet in Prognosi morborum.	358
Rigor requiritur ad Sudorem Criticum.	340
Rubus maxime frequens in Canada.	429

S.

S anguinis diathesis phlogistica sola requiritur ad puris annosam excretionem.	124
Scirrhotæ dispositio tollitur mellis copioso & pertinaci usu.	97
Scirrhus ambitum totum Pylori occupans.	99
Scorbutus ubinam potissimum contrahitur.	424
———— frequentior septentrionalibus.	ibid.
———— in quosnam in genere magis cadat.	ibid.
———— idem morbus terra marique.	435
———— terrestris minus gravis a quo tempore.	ibid.
Hh	Scor-

I N D E X.

Scorbutus non oritur a salitis.	Pag. 436. seq.
Scorbuti unica duntaxat videtur species.	426
———— eandem speciem curant acida & alcalina.	429, 431
———— absentia in nave debetur copiæ limonum & aurantiorum.	430
———— signa & symptomata.	432
———— causa pessima est aër frigidus & humidus.	439
———— causæ aliæ.	ibid.
———— curatio per opposita inter se remedia.	ibid.
Scorbuto curando & præveniendò inserviunt vegetabilia.	437
———— magis laborat plebs navalis, vix Proceres.	438
Sedimen lateritium in Hydropicorum Urina.	28
Sensibilitas pupillæ.	201
Sicca & destillata Vegetabilia non profunt in Scorbuto.	425
Singulare remedium in Urinæ doloribus.	62
Somnus stertorosus aliquando requirit Opium.	54
Spasmi a morte non raro supersunt.	208
Spiritus terebinthinæ potenter resistit putredini.	242
———— cum ana Theriac. Androm. bonus in gangræna.	246
———— Vini cum albumine ovi ad excoriationem & gangrænam præcavendam.	235
Steatoma in Utero.	320
Strumæ requirunt asellos vino infusos &c.	286
Sudor Criticus quomodo internoscendus.	340
———— an laudandus post magnas cruoris evacuationes.	240
Sudores incertæ sunt Prognoseos ante statum morbi.	341
———— vi morbi expulsi non sunt salutare.	343
Suttoni Machina egregia sanitati Nautarum, sed non in aëre humido.	438. seq.
Suturarum cranii valde inconstans est decursus.	210

T.

Tenia & Lumbrici in eodem cane.	450
Terebinthinæ spiritus potenter resistit putredini.	242
Testis extirpatio, funiculo affecto malignitatem exasperat.	152
Theriaca Andromachi cum spiritu Terebinthinæ bona in gangræna.	246
	Thy-

I N D E X.

Thyreoidea glandula omnis generis tumoribus repleta. Pag. 285

U.

Ulcerum Hydropicorum gangræna præcavetur Fomento Corticis Peruviani.	40
Unguentum de styrace cum $\frac{1}{4}$ Ung. Ægypt. in gangræna.	246
Urina Hydropicorum habet sedimentum lateritium.	28
—— calculosorum pallida unde?	191
—— vere nigra lethalis.	350
—— ——— non semper mala Hip. Gal. &c.	353
Urinæ doloribus remedium singulare.	62
—— & Fellea vesicæ crescunt tenuitate pro ratione extensionis.	103
—— nigræ a duplici causa.	354
—— ——— quomodo Criticæ appellandæ.	355
—— ——— in febribus Quartanis faciunt crisin infidam.	357
—— bonæ aliquando solæ morbum criticè solvunt.	368
—— jumentosæ an a pure in sanguinem recepto.	244
Urinarum Doctrina requirit adhuc multa ad sui perfectionem.	256
Urinis bonis nimis ubique fidit Galenus.	359
Uterus in graviditate augetur crassitie.	105
Uva ursi & opium dolores calculosos levant.	63
—— ——— non curat quos Lithotomia curat.	64
—— ——— pluribus aliis Lithontripticis præfertur.	ibid.
—— ——— post Lithotomiam ad reliquias data.	69

V.

Valerianæ radix in Epilepsia a terrore.	52
Valvulæ Bauhini apertura sursum versus non videtur lethalis.	453
Variolæ & Morbilli raro superveniunt miliaribus.	400
Variolis defunctis omnibus unam vel plures Venæ sectiones suadet Auctor.	375
Venæ sectio tentata die nono morbi acuti.	379
—— ——— neglecta post variolas omnis generis morbis dat occasionem.	375
—— ——— in principio acutorum quando.	401
Hh 2	Venæ

I N D E X.

Venæ sectio neglecta benignos vertit in malignos. Pag.	401
—— ——— est causa frequentium exanthema-	
tum.	402
Verbenæ laudes in Cephalæa pertinaci.	221
Vesicæ Fellea & Urinæ crescunt tenuitate pro ratione	
extensionis.	103
Vesicantia in quibus casibus prosunt.	411. seq.
—— ——— Pleuritide & Peripneumonia febrem mode-	
rantur, sputa facilitant.	ibid.
Virtus saponacea vegetabilium forsan curat Scorbutum.	441
Visceribus vivis vicissim summa contractio & summa	
relaxatio observatur.	66
Vita sine sanguine durans cum signis apparentis plenitu-	
dinis.	140
Vomicæ latentis & sanatæ exemplum.	376
Vomitus causa sæpe est intropressio Cartilaginis Ensi-	
formis.	107
—— præsentibus omnibus ejus causis sæpe non suc-	
cedit.	100
Vulnera instrumenti ope abdomini inflicta certo respectu	
habent plus periculi, quam alias.	313



